





110

TRACTATUS
DE
HIERARCHIA
ECCLESIASTICA,

Præminentia Sacerdotii,

Collectore

Ad usum Reverendo, Eruditissimoq; Domini

D. GUILIELMO BEYER,
S. T. Licent.

C. S. T. E. C. H. P. A.

Nunc primum in lucem prodit.



ANTVERPIÆ,

Apud JOACHIMUM à METELEN,
Anno Christi MDCLXVI.

Permissu Superiorum.

Sit autem Dux verbi Christus (si enim dicitur filius)
meus, qui universam illam Hierarchicam in-
spirat elucidationem. Tu verò, fili, juxta san-
ctam Hierarchicam nostrae traditionis sanctio-
nem, prout sancta decet, audi, quae sacrosanctè
proferuntur, ipsemet divinus, divinam doctrinam
evadens. Dion. Coel. Hier. c. 2. §. 5.
Sacerdotes, qui accedunt ad Dominum, sanctifacen-
tur, ne percutiat eos Dominus. Exod. 19.

Est ad vsum P. D. Benedicti
de Cartolis Pistorien: Abbatis.

Facultas Superiorum.



*Um Viri docti legerint, & utili-
ter edi posse, censuerint librum,
seu tractatum, de HIERAR-
CHIA ECCLESIASTICA, &c.
auctore R.D. Guilielmo Beyer, S. Theol.
Licent. Nos JOANNES, Episc. Castor.
potestate ad id nobis factâ concedimus, ut
is Liber excudatur, per Typographum
quem auctor elegerit. In cujus rei fidem
has litteris, nostrâ manu signatas dedi-
mus, 14 May, 1666.*

JOANNES,
Episc. Castor.

A P P R O B A T I O.

Librum de Hierarchia Ecclesiastica ab Admodum Reverendo Do^o GUILIELMO BEYER, Sacrae Theologiae Licentiatō &c. scriptum perlegi, mandato Illustrissimi Domini D. ac Reverendissimi in Christo Patris JOANNIS NEERCASSELII, Episcopi Castoriensis &c. in quo, doctrinam à Parisiensibus nostris, applaudente Clero Gallicano, & Congratulante Sorbona, traditam, insigni Confoederati Belgii Clero, omnibusque Hierarchici Ordinis cultoribus gratam, & utilem futuram, exponit Vir Eruditissimus.

*Die 19. Februarii,
Anno Domini 1666.*

Ita censeo

JOSEPHUS COUSEBANT,

*Theologus Parisiensis
L'roton. Apost.*



*Illustrissimo ac Reverendissimo
Domino,*

D. JOANNI NEER-
CASSELIO,
Episcopo Castoriensi,

V. . . A.

Domino suo Colendissimo.



Uantopere, Vir Illu-
strissime, ad bonum ordi-
nem, & ornatum Ecclesiæ
conducatur, diversorum in
eagraduum, officiorumq;
& ministracionum distinctio, clariùs est,
quàm ut multis verbis debeat explicari:
Haud dubiè enim, ad Aulæ Dei majesta-
tem & amplitudinem pertinet, habere in
† 3 terris

EPISTOLA

terris diversos sibi ministrantium ordines, ad imitationem Cœlestis Regni, in quo, non est unus duntaxat angelorum chorus, sed elegantissimæ distinctæ Hierarchiæ, & beatorum spirituum ordines, aliorumque S S. classes & gradus.

Neq; parum facit, ad decorem sponsæ, Christi Ecclesiæ, in terris militantis, quòd circumamicta sit varietatibus, & velut corpus Christi mysticum, diversis constet, & ornetur membris, inter se aptè cohærentibus, & eodem fidei & charitatis vinculo connexis, sub eodem capite, Christo Domino, ejusque in terris Vicario, Rom. Pontifice, S. Petri Apostoli successore, cui Deus pascendas oves suas, *Joan. 21.* & agnos commisit, clavesque regni cœlorum dedit.

Hinc etiã magnoperè elucet, quomodo divina sapientia attingat, à fine, usque ad finem fortiter, & disponat omnia suaviter, diversos Ecclesiæ ordines Hierarchicos instituens.

Enimverò, propugnari satis Hierarchica ista constitutio, non potest, cui novi quotidie adversariorum conatus, perniciem.

DEDICATORIA.

niciem intentant. Atque ut justa semper exstitit ordinis illius defensio, cujus religio, nunquam potuit citra sacrilegium violari: ita hoc maximè tempore necessaria est, cùm videmus, sacram illius Arcem, non unius aut alterius hominis ausu, temerari, sed publicâ multorum conspiratione, non tacitis, ut olim, cuniculis, sed apertâ vi, & evidentibus arietum machinis quassari.

Novi equidem, allisas iri, & irrito impetu, ad hanc Petram, divinâ soliditate fundatam, perventuras hostium sagittas. Novi, quàm frustra in veritatis exitium mendacia concitentur, in justitiæ ruinam, temeritas conspiret, in Ecclesiastici regiminis æternitatem, nupera Heterodoctorum commenta, subinde repululent. Sed novi etiam, quàm sit zelotes Deus; quàm non patiatur segnes ac tepidos, sponsæ suæ Ecclesiæ defensores: quàm denique invisam habeat illorum audaciam, qui capiti membra confundere, avellere à parentibus liberos, divina omnia, humanaque miscere, in Augustæ Hierarchiæ locum, miseram quan-

EPISTOLA

dam anarchiam substituere, totâ animorû contentione meditentur.

Hinc supremus ille, Ecclesiæ sponsæ suæ, supervigilans Pastor, nunc, sicut olim, excitavit, præcipuè in Ecclesia Gallicana, in societate Sorbonica, præclarissimos illos Hierarchiæ vindices, quos virtutis singularis, pietatis eximiæ, stupendæ eruditionis, vigoris Apostolici, quotidianos testes esse voluit, Petr. Aurel. & Franc. Hall. aliosque, qui accensa vetustatis lampade, caliginem illam dispellere conati, quam constantissimæ veritati, & tot retrò sæculorum consensione firmatæ, cæca malignitas offundit; Scripturæ ac traditionis regulam, quæ in Christiana fide potissimum dominatur, humanis inventis objecerunt; quæque in Conciliorum sanctionibus, Pontificum Oraculis, P P. monumentis, Theologorum, ac Juris Canonici peritorum voluminibus, sparsa undique erant, & disseminata, in unius corporis compagem, quantâ potuerunt diligentia, collegerunt.

Cùm igitur Illustris. vestræ paternitati placuerit, mihi hanc provinciam demandare,

DEDICATORIA.

dare, ut quædam traderem, quæ ad Hierarchiæ Ecclesiasticæ, ac Status Sacerdotalis commendationem facerent, de me, velut altera Ruth, existimavi, quæ cum pauper esset, nullâ hæreditate; aut censu, ad divitis cujusdam agrum sese contulit, *sequens messorum vestigia*, & spicas colligens, quæ excidebant manipulis, quo scilicet labore penuriam arceret. Idem ipse conatus, qui conscius meæ egestatis, subivi campum fertilissimum, præfatorum DD. atque ibi sequens vestigia SS. PP. (qui sunt primi messores, qui tam copiosos manipulos, tamque abundantem messem, collegerunt, ut per eam hodièque alatur S. Ecclesia, ac pascatur spirituali doctrinæ cibo) spicas nonnullas collegi, ad componendum hunc Tractatum, in XV. dispersum Quæstiones.

Qui diffusiores postulant, adeant limpidissimos præfatos fontes, è quibus pleraque hausimus. Quid autem, & quantum ego assecutus sim, sapientes Aristarchi, ac prudentes Catones judicent.

† §

Quem

EPISTOLA

Quem autem patronum eligerem , cuique committerem hanc collectionem meam, suâ auctoritate defendendam, anticipiti disceptatione , diu deliberandum non fuit, mihi nempe, Illustrissime Domine, primus omnium occurrissi, neque sub alterius auspiciis, lucem videre poterat, aut felicius, aut securius. Enimvero, ea in te, tam illustri eminent splendore, tantâ fulgurant Majestate, ut majora, qui requirat ornamenta, aut labori suo munimenta, non sapiens æstimari meritò queat. Adde, quòd æquitas ipsa non postulare modò, sed imperare; non persuadere, sed visa mihi jubere, ut doctrinæ de Hierarchia Ecclesiastica, ac præeminentia Sacerdotii, non nisi Hierarcharum Principi, Sacerdotum supremo, qui hunc laborem injunxit, patronum adoptarem, à quo non posset, non multum trahere splendoris, sibi multum usurpare venustatis.

Quis non videat, quàm munificâ manu, immortale Numen, ea animo tuo indiderit ornamenta, quæ & virum summum deceant, & Pontificem, quem
vel

DEDICATORIA.

vel Deus ipse nobis vivis expressit coloribus? Gallia, Brabantia, Colonia, te adolescentem vidit, spectavitque morum innocentiam, felicique ad omnem doctrinam ingenii facilitate, principem juventutis, dum ibidem Philosophicis ac summa cum laude, Theologicis præesses studiis: habuere omnes, tuo exemplo, quid discerent, quidque (si sciperent) agere possent; sic idem eras & discipulus, & Magister; discebas quidem, ut alios, dum ferret usus, docere posses, & simul docebas. Instrumenta comparabas promovendæ olim alienæ salutis, & promovebas; verbo seminabas, simulque metebas, menses & annos sagacitate præcurrēs. Beata profectò novalia, non ferro prius subacta, quàm locuplete segete triumphantia; ubi vomerem à rastro, aratrum à falce, à messe non distinguas sationem.

Theologici tandem exacto studii stadio, gravissima te in Belgicis excepere munia, ac frequentissima pulpita. Quibus in muneribus eum te gessisti, qui muneribus adferres splendorem, non tibi munera. In hac te palæstra exercebas

t 6

impi-

EPISTOLA

impiger, cùm ad nova, majoraque munia, ab Illustrissimis Episcopis, Ephesino & Trallensi, ad Archidiaconatus, ac Visitatoris generalis, acciris dignitatem. Præfagâ mente, præsentire dixisses, Præfules Illustrissimos, quis postea futurus esses, nam Episcopalis Eminentia te velut successorem designabant, & per varios quasi gradus, ad hanc, quam modò tenes, dignitatem, viam muniebant patentissimam.

Hic latissimus dictioni meæ campus aperitur, si veritati per se loquenti, argumenta, (quod injuriosi laboris est) conquirere, solemque (quod parum sani est) velim illustrare. Ubi te ubique gnavum probasti, & strenuum, Spartamque tuam bellè adornasti, divinis jam dotibus prudentiæ, discretionis, vitæ integritatis ad cumulum auctis, ad venerandas Insulas, Cœlo adstipulante, applaudente Clero, summo Belgarum bono, bonorum non minori lætitiâ, assumptus es.

Quàm integrè Diocesim vestram moderaris; quàm modestè gubernas; quæ sumpserit Religio incrementa, clarissima testan-

DEDICATORIA.

testantur ubique locorum monumenta. Vera virtus, ubique virtus est, ac sibi semper similis, nisi quòd crescat exercita. Illa te, in eum, quem tenes excellentiæ gradum, extulit, hic cum illa de dignitate contendit & eminentia. Nobile iurgium omninò, dum tanta undique luditur æquabilitate. *Nibil utilium subtraxisti, quò minùs annuntiares & doceres publicè, & per domos, testificans omnibus in Deum pœnitentiam, & fidem in Dominum nostrum Jesum Christum.*

Nobile Præconii compendium ! hæc si molesta sint auribus, da quæso locum animo meo, da veniam laudandæ contumaciæ veritatis. Sustine, Vir modestissime, ut quam pro dignitate virtutem extollere in te non possum, illam aliis me pro modulo commendare. Diœcesim patentissimam, reconciliandis Deo hominibus, operosissimè lustras, gregem tibi, fideique concreditum, sacro divini eloqui pabulo, tutè reficis, alumnos ipse per te recreas, antiquos juxta ac juvenculos Sacramenti munimine confirmas. Non audire modò, què quisque

E P I S T O L A

Subditorum faciat officium , verùm & præsens, ut verbo dirigas, excites exemplo, vis spectare.

Quidni possis meritò, si deformati forent, morum simul exspectare reformationem ? nam tuos mores convertis in præcepta , & hæc eadem quoque documenta sunt , quorum Magisterio, ambiguum redditur Legislatoris officium, dum non minus dicis, quàm jubes, neque magis illa præstas voce, quàm manu. Ars illa non modò imperatrix est operum, sed arbitra voluntatis. Hinc tanta moderatio in Clero, ac morum mutatio. Nonnè divitias, cum S. Greg. Ultrajectens. Episc. *dulce venenum*, & *preparationem ad interitum* appellas? nonnè ebrietatem, tanquam *inferni foveam*, fugiendam instantèr prædicas ? nonnè ad omnium vitiorum extirpationem, & virtutum acquisitionem, jugiter instruis. Longior sim, si singula velim enucleatè percensere. Finiam, ne offendam.

Tantùm obsecro, Vir Illustrissime, ut hoc officioli qualecunque erga te me
argu-

DEDICATORIA.

argumentum , fuscipere non graveris : quod ut impar sit amori , atque benevolentiaë, quâ in me, quâ in utrumque Clerum afficeris , nam ut velim quidem , par facere , satisfacere non possum ; at certè, nostri saltem animi possit esse monumentum, cujus veritas, ut confido; melius declarabitur deinceps factis , quàm modò possit scriptis. Tuus est hic liber , tuo jussu editus , tuâ fortè indigebit manutenentiâ, ut rem tuam, auctoritate, quâ polles, plurimâ , defende , tuere patrocinio. Interea Deum Opt. Max. precamur, ut te Ecclesiæ suæ, Clero tibi devotissimo, diu servet incolumem. Vovet totis viscerum medullis,

*Illust^{ma} ac Rev^{dissim}a Dominat.
Vestræ*

Humillimus Servus , & si patris , Filius ,

GUILLIELMUS BEYER.

Pio

Pio, ac veritatis studioso

LECTORI.



On abs re censui, erudite Lector, consilii mei erga hanc à me adornatam collectionem, compotem te facere: agnosces inde, nihil hîc agi, quod privatam meam utilitatem respiciat: publicam eruditorum; imò Ecclesiæ, quæsitam fuisse. Faxit Deus, ut quâ mente opusculum hoc agitatum fuit, recipiatur, ut Dei cultui, Patriæ, Clerique decori, & legentium defer-
viat utilitati.

Quidam disponunt ea, inquit Senec. de brev. vit. in fin. *Quæ ultra vitam sunt, moles magnas sepulchrorum, & operum publicorum dedicationes, & ad Regum munera, & ambitiosas exequias:* verùm altiores sunt animæ, quibus in subeundo scribendi labore, nihil antiquius occurrit, quàm publico prodesse; Ecclesiæ, Cleri, publicam causam agere; ordinem Hierarchicum bonis imbueri præceptis; veritatem à calumniis vindicare, ejusque hostes retundere; dignitatem PP. assertum ire; cum obrectatoribus manum conferere. Equidem laude dignissimos, quisquam per se censere debet: interim audiatur Joan. Gerf. Canc. Par. de laud. Script. tom. I. oper. *Scriptor* (qui profert de Thesauro suo nova & vetera) *Ecclesiam di-*
tat,

Præfatio ad Lectorem.

rat, Scriptor Ecclesiam armat, Scriptor Ecclesiam custodit, Scriptor posteris sal sapientiæ ministrat, Scriptor largitur, miseretur, & commodat, & plurima quæ essent transcribenda.

- Scripseram pridem, & quasi paleas amovens, grana congregaveram quædam, in otio meo litterario, ad memoriæ conservationem, ex variis excerpta libris, quæ ad Hierarchiam Ecclesiast. cognoscendam, ac præcellentiam Sacerdotii, supra cæteras Hierarchicas functiones, pertinerent, quæ Schedâ suâ premere, & intra domesticos parietes continere, decreveram, judicia vitans humana, ne reprehensione dignissimus judicaretur, qui materiam, disertis meritò Scriptoribus reservandam, impudens occupassem. At ubi Hierarcharum Princeps, Illustrissimus meus, (cui refragari nefas duxi) aliter injunxerit, ego, quantumvis nullis eruditionis ornamentis excultus, confisus auxilio ejus, cui facilè est ditare pauperem, qui aperit, & nemo claudit, claudit, & nemo aperit, quique & mutos facit loqui; securus de patrocínio Imperantis, non ingenio meo inventa, sed ab ore suscepta Magistrorum, quia perutilia videbantur, ad lucem apponere curavi.

Nec tamé temeritatis, sed obedientiæ gratiâ, hoc tam ingens, parva cum cymba, ignarus nauta, pelag⁹ navigare cepi. Nec affectu abreptus, vel odio alicujus ordinis, sed simplici

P R Æ F A T I O,

plici intuitu veritatis, ac amore Cleri nostri latitantis, ac fermè labefactati, nisi altior, ac fortior supponatur manus, quod unicè anhelamus. Potiùs amo dicere cum S. Bern. ad Guil. Abb. *Laudo, inquit, omnes ordines, & diligo, ubicunque piè & justè vivitur in Ecclesia; unum opere teneo, ceteros charitate, faciet autem charitas (fidenter loquor) ut ne illorum quidem fructu frauder, quorum instituta non sequor. Sicut in domo Patris sui, Christus dicit, esse multas mansiones: ita multi ordines sunt, in una Ecclesia, quæ unitas, tam hîc, quàm ibi, consistit in una charitate.*

Nec me etiam deterruit ab hoc labore, ævum nostrum, tam felix esse librorum, qui scripti sunt, & quotidie scribuntur, à Viris doctissimis, pleni eruditione & scientiâ, in omni genere facultatis, in omni materia, ut videri queat superfluum, quod ultra scribitur. Sed hanc abundantiam librorum, nunquam mihi visum est, (ut quibusdam ineptè) vertendam esse, vitio hujus ætatis: quinimò, felicitatem æstimandam, bonamque sortem nostri ævi, quòd inter cætera, quæ affligunt, in hoc, à Deo ditatur, ut videat, & miretur, viros sapientes, qui scripserint ad miraculum, docta & erudita, quæ magno fructui sunt Ecclesiæ.

Proinde judico non esse rationem justam, quâ avocentur hi, quibus datum est, id posse, ad Ecclesiam instruendam, & fideles

ad Lectorem.

les ad virtutem excitandos. Quantumcunque enim scribitur, reliquum semper est, quod scribatur, neque falsum erit unquam, quod per Salomonem Spiritus S. propalarit, *faciendi plures libros, nullus est finis.*

Neque limitem esse convenit, quodd saliva multorum sit tam varia, qui indigent varietate doctrinæ; Hi enim de hac gustant, illi de alia. Præclarè Gersf. *Sicut exterior,* inquit, *gustus, secundum personas, & tempora diversificatur, & nunc isto, nunc illo cibo delectatur, interdum quoque vilioribus edulis amplius exhilaratur, & confovetur; ita & de interioris gustus palato censetur. Unde in fine 2 Machab. c. 15. inducitur, quodd alternis uti delectabile est, & nunc aqua, nunc vinum delectat.* Postremò Gersf. docet, quodd in mensa sapientiæ, nova semper fercula proponi debent.

Ab sit tamen à me, obscuro & abjecto, ut arbitrer, me in mensa sapientiæ recentia fercula posse ponere, qui nonnisi aliena profero, sed ut S. Hier. ait, *In domo Dei unusquisque offert, quod potest; nec aliorum opes, aliorum inopiâ, queunt sædari; imò magis ornantur, qui i opposita, juxta se posita, magis illucescunt.* Item secundum August. lib. 1. de Trin. c. 3. *Utile est plures libros à pluribus fieri, diverso stylo, non diversâ fide, etiam de questionibus eisdem, ut ad plurimos res ipsa perveniat, ad alios sic, ad alios verò sic.* Et secun-

P R Æ F A T I O

cundum cund. alibi, *nova aliquibus amplius
placent, & conferunt.*

Porro, Si quid, in hisce, labore nostro
compilatis, minùs veritate fultum, aut non
fatis cautione tutum, imprudenti exciderit,
zeli, non stomachi rem considera; idque
totum, Candidi Lectoris, doctiorumque
judicio, ac imprimis S. Matris Rom. Eccle-
siæ, quam filius, totâ pietate veneror, censu-
ræ, subjectum velim; nemo ita industriâ
aut ingenio pollet, ut omnia colligat, intel-
ligat: nec veto, imò posco, ut manum alius
addat. Benignè in me consulet, si quis mo-
nebit, aut suggeret. A te peto tantum,
prudens Lector, cum J. Lips. tom. 3.
de vest.

*Ne mea dona tibi, studio disposita fidei,
Intellecta priùs quàm sint, contempta relinquant.*
Nam multi judicant, priusquam legerint:
Quid? etiam priusquam inspexerint qui-
dam; contemptores scilicet honestarum ar-
tium, & quorum voto, jam diu doctrina
omnis, sit funus. Non audi, ô Deus, ex-
clamat Lips. neque Solem hunc è mundo
tolle. Unde malignioribus illud Aurelian.
ad Senat. præscribo, *Si habeant propriarum
venena linguarum hi, quibus nihil placet:* qui-
bus verò in hoc Tractatu, laboris mei cura
placuerit, pro me, ad Dominum, interces-
sore esse dignentur: quatenus hoc ponde-
re corruptionis exuto, à meorum absolutus
inve-

ad Lectorem.

veniri merear, vinculis peccatorum. Vale-
te benigni Lectores, legite & percipite.
Amen.

Incipio ergò, cum Freculpho, Episcopo
Lexov. dicere.

*Te duce, Christe, vias facilè est nos ire per omnes,
Quod natura negat, varios fessosque labores,
Dasq. ausus fragili, dâns grandia vincere posse:
Parvula mens tropidat hominũ, qua tangere dura,
Miratur tetigisse quidem, gaudet superasse.
Si quid enim fuerit dignum laude, & memorandum,
Nec sibi, sed Domino tribuat, quæ gesta videntur:
Qui dedit ingenium stolido, qui cuncta gubernat,
In cælis, terris, perque omnia secula semper:
Cujus ego auxilio jutus, non viribus aquis,
Arripui celsos, cæli transcendere colles, &c.*



Erudi-

*Eruditissimo Viro , ac multum Reve-
rendo Domino , Domino*

GUILIELMO CORNELII BEYER,

**Librum de Ecclesiastica Hierarchia
in lucem emittenti.**

S Cripfisti: *fatis hic dixi, Guiljelme, virorum
Lumen doctorum, gloria, dux hominum.
Aureus in cælis micat ut Sol: sic quoque fulges
Inter sacratos Religionis Viros.
Lumen Sol astris: Tu das, quis denegat? Orbi:
Purgas, illustras, perficis. An magis hîc?
Angelus officio tria præstas munia, major
Munere. Qui te non, quàm malè torpet, amat!
Frendeat hîc Momus, mordaci Zoylus actu
Te laniet, feriat murmure, dentè fremit.
Exclamo: vana hæc. Per te longæva vetustas
Vivet, & in seros transferet acta Patres.
Præmia det mundus vano peritura labori:
Immortali operi non peritura dabit
Cælum ingens, fructusq; Tibi, usuramq; reponet
Polliceor: doctus scribere perge libros.*

REINERUS INGELIUS,
J. U. L. & Christianiss. Regi
à Consil. & Elëmos.

Libri

Libri de Ecclesiasticâ Hierarchiâ
in lucem emissi amicis, non cen-
sorium Testimonium.

theologus es, & historiographos
GUILIELME De Beller.

sed quis valis? insignis, præ-
stans, magnificus.

Ita testor ego Infrascriptus
Reneris IngeLIVS IVrIs
VtrIVsqVe LICentIatVs,
& gaLLIæ regIs ConsILIarIVs
& eLeeMosynarIVs.

SalvoroManæ ecclesiæ, nec
non VICarii apostolici
Melioris, & Intègre servato IV-
DICIO.

Ad

Ad Eundem.

EGregius quondam Vates hæc dicta reliquit:
Carmen amat, quisquis carmine digna
gerit.

Quis nunc, BEYERO sancti moderamina Cleri
Exponente, magis carmine digna profert.
Austriacæ gentis primùm qui scripsit honores,
Nunc Hiërarchiæ jura sacrata docet.
Scilicet ingenuâ Natura hoc edocet arte;
Ut semper Magnos scribere magna juvet.
Quæ gens Austriacâ major? quæ major in orbe
est,

Quàm non mortalis sponsa decora Dei.
Divitis ingenii est, immania Cæsaris acta
Condere, materiâ ne superetur opus.
Divitioris erit; qui grandia Cæsaris acta
Scribens, divina his addere jura potest.
Hæc quisnam possit, si quis rogat? inspice
librum,
Invenies digni tu monumenta Viri.

AMORE SCRIPTORIS LIBRI DIXIT.

WARREBOLDUS VAN DAM.

Tracta-



Tractatus

De

**HIERARCHIA
ECCLESIASTICA,
In XV. Distinctus Quæstiones.**

QUÆSTIO I.

*De Hierarchia Generatim,
Præfatio.*



Sicut Fluviorum, ita errorum initia sunt, & progressus; parvi fontes continua aquarum accessione, in ingentes evadunt Fluvios, & minimus error initio, consecutiones

tiones longe deteriores parit ; nam ut docet Chrys. in c. 2. poster. ad Tim. Hom. 5. subsistere error non potest : *Nam quid novi fuerit inventum , semper nova id parturit ; infinitusque fit error ejus , qui tranquillam fidamque stationem littoris egressus , per devia cæperit vagari.* Periculosissimè itaque aberrat , qui offendit in limine , impingit in portu : de quibus Ps. 57. dicitur , *Erraverunt ab utero , locuti sunt falsa.*

Talis est error eorum , qui triplicem distinctam *Hierarchiam* Ecclesiasticam , statuunt , supremam *Charismatum* , mediam *ordinis* , tertiam *Jurisdictionis*. *Quare cum is , teste Stobæo , Apot. 58. Qui semel aberraverit in quadrivio , ferè in varia diverticula , tandem deviat : nec errorem bene explicat , nisi regressus , quasi novam viam ineat : Ita qui errare cæpit , facile multos errores congerit , nisi paulatim intermittat , ac quasi recens ad intermissam disputationem redeat.*

Consilium proinde saluberrimum istuderit , ut quia in trivio , vel etiam in quadrivio errarunt , unicæ Hierarchiæ
Eccle-

De Hierarchia Eccl. generatim. 3

Ecclesiasticæ ordinis, & jurisdictionis potestati instructæ, & charismatum diversitate exornatæ, planam, & calcatam à majoribus viam, sequi, quàm per inaccessa, distinctarum Hierarchiarum diverticula vagari, ac redire ad viam, eamque Hierarchiæ notionem sequi, quam & nominis enodatio, & usus approbavit, à qua qui deflectit, in non minima absurda, & errorum præcipitia labatur, necessum erit.

C A P U T I.

*De origine vocis Hierarchiæ, & usu,
apud D. Dionys.*

U Nam Hierarchiam Ecclesiasticam, constitui oportere, quæ dotes habere debeat suas, *ordinem* scilicet, *Jurisdictionem*, & *Charismata*: nec sine Jurisdictione, sine imperandi auctoritate, & obediendi necessitate (quod toties impugnant) eam fingi posse, vel ipsa nominis ipsius expositio demonstrat: nam si vim nominis expendimus, Hierarchia est *ἡγεμὴν*, *sacer Principatus*.

Principatum qui dicit Ecclesiasticum,

principantium imperium, parentium subjectionem denotat. Inde enim quia S. Petrus, Princeps Apostolorum refertur, Apostoli & Episcopi, Principes dicuntur, inferunt Catholici adversus A catholicos, auctoritate & imperio, Petrum cæteris Apostolis, Apostolos & Episcopos, reliquis esse Prælatos. Quam rectam collectionem infirmat, quicumque absque imperio, & subjectione Principatum aliquem Ecclesiasticum statuit: Vox ista heterodoxorum est, Principatum Petri; Supra cæteros Apostolos, *Charismatum* esse, non *Iurisdictionis*: nec abluderet à vero, si principatus propriè dictus, Ecclesiasticus aliquis, in sola *Charismatum* præeminentia confisteret.

Verùm id, ad evertendam frivolum istam distinctionem, firmissimum est, quod nullus antiquorum scriptorum, in alio sensu, aut aliter, *Hierarchiam Ecclesiasticam* acceperit, quam prout tres prædictas dotes conjunctas, indivisasque complectitur. Fusius istius nominis acceptionem, & originem explicabimus: tum quod auctor Hier. Conc. Trid. secutus anteriores quosdam hæreticos, ad discussionem, sess. 23. c. 4. & c. 6. nomen *Hierarchiæ*, tanquam peregrinum, prophanum, scripturæ S. non solum ignotum, verùm etiam contrarium à nescio quo Dion. excogi-

cogitatum, à nullo PP. antiquorum usurpatum reprehendat; tum quod ex abusu istius vocis, modernorum nonnullorum, novitius error prodierit.

Primus hujus nominis auctor, censetur Dion. antiquissimus scriptor: is autem modo supra explicato, *Hierarchiam* sumpsit, & ita sumptam definivit, utroq; tam de coel. quàm de Eccl. libri prioris siquidem c. I. enumerans ea, quæ in utraque *Hierarchia*, sibi respondeant, satietatis ejus, quæ sola mentis contemplatione habetur, sacras disciplinas, signa esse, & simulacra, dicit, cælestis Hier. Beatitatem referentia; quemadmodum, & *eos*, qui his sunt graduum ritè dispositorum ordines, signa esse, testatur, virtutis, in angelicis Hierarchiis, circa divina optime consonantis & ordinatæ: imperii simul & subjectionis, in utraque tam Eccles. quàm cælesti Hierarchia non semel ut infra docebimus, meminit. ideoque in utraque ordinem & imperium quoddam, (quod in Ecclesiastica Hierarchia *Iurisdic.* dicitur) & Charismata collocat.

Cap. verò 3. Hierarchiam universam ita definit, *est quidem Hierarchia, meo quidem judicio, sacer ordo, scientia, & actio, quæ ad divinitatis similitudinem, quoad ejus fieri potest, & pro proportionem Illustrationum, quæ divinitus datæ sunt, ad Dei imitationem traduntur.* Quæ definitione, tria ista in Hierarchia,

rarchia, quæ necessaria dicimus, exprimuntur: primum *ἱερατικὸς*, *sacer ordo*; alterum *ἐπισκοπικόν*, *scientia*, quæ unum est, ac potissimum, ex Charismatis Hierarchicis, tertium *ἐνεργητικόν*, *actio*, sive illa sit purgatrix, sive illuminatrix, sive perfectrix inferiorum, ut eod. c. explicatur: quæ proinde qualiscunque sit, necessario Jurisdictionem cum Ecclesiastico Principatu conjunctam exposcit.

Itaque ista in omni Hierarchia admittit, *ordinem sacrum*, *Energiam quandam*, & operationem aliorum directivam, quæ in Hierarchia Ecclesiastica, Jurisdictioni conjungitur: in cælesti, omnis Jurisdictionis modum transcendit; & *scientiam*, quæ in Ecclesiastica Hierarchia *Charisma*, seu propria quædam Dei gratia censetur, in cælesti, visio quædam longè superioris ordinis vocitatur.

Id autem non minus evidenter confirmat, dum eod. c. 3. aliam Hierarchiæ descriptionem tradit, tria ista complectentem. Nam, inquit, *qui Hierarchiam dicit, is profecto sacram quandam ordinatam dispositionem* (quo nomine Ecclesiasticos ordines, seu gradus sacris cæremoniis operam navantium, & adscriptorum vocare solet Dion.) *declarat, quæ divinæ sit pulchritudinis simulacrum*. Nam & ordines Ecclesiasticos, participationem esse sacerdotii Christi,

sti, & characterem, ornatum quendam esse animæ, à Deo impressum, divinitatis nota eos figurantem, qui ejus ministeriis, & cultui sunt mancipati, docent communiter Theologi post S. Thom. 3. p. q. 63. 2. 1. 2. & 3.

Quæ causa fortasse fuit, ob quam Damasc. l. 2. de fid. c. 3. *ornatum* Hierarchiam nostram dixerit: eum verò ornatum splendoremque in Hierarchiis Angelicis longè nobiliorem, Dion. admittit, qui dispositionem istam consistere subdit, *in ordinibus scientiisque Hierarchicis suæ illustrationis Mysteria sacrè peragentem*, & ad sui principii similitudinem, *quam potest proximè accedentem*. Quibus verbis & ordinem in Hierarchia, & Charismata scientiarum ostendit, non privata, quæ ad Hierarchiam constituendam, minimè sufficerent, sed Hierarchica, cum potestate agendi in alterum, eamque ad Deum, sacris Cæremoniis & Mysteriis adducendi, & cum aliqua subjectionis, & principatus distinctione, quæ in eo consistit, quod, ut mox subjungitur, *ordo Hierarchiæ hoc postulet, ut alii purgentur, alii purgent: quidam luce doctrinæ illustrentur, nonnulli illustrent: & aliqui perficiantur, alii perficiant, &c.*

Quæ omnia complexionem trium istarum dotum, *Ordinis, Jurisdictionis, & Charismatum*, ad Hierarchiæ Ecclesiasticæ,

immo etiam quodam Eminentiori modo, ad ipsius Cælestis integritatem necessariam credidisse, divinum Dion. ostendunt.

C A P. I I.

Alia Dion. loca expenduntur.

V Erùm præcedentibus, lucem addunt & robur quæ ipse Dion. lib. de Eccl. Hier. in eandem sententiam adducit, cujus initio docet, & statim præmonet, demonstraturum se, ex divinis sanctissimisque scriptis, *quod quidem Hierarchia nostra divinitus tradita, ac divinæ divinitusque efficientis sit scientiæ & operationis, & consecrationis seu ordinationis.* Quæ descriptio paucis multa complectitur, tres scilicet Ecclesiasticæ Hierarchiæ dotes, *Charisma scientiæ, operationem, & efficaciam ministerii* circa alios, seu Jurisdictionis, & *Consecrationem, ordinationem, initiationem,* quibusdam Cæremoniis perficiendam.

Uterius mentem suam explicat, in progressu cap. Gratiam sacerdotalis & Hierarchici ordinis, vim divini sacerdotii, scientiam Hierarchicam, officium illustrationis, illuminationis, & perfectionis circa subditos exponens, quæ omnia prætereo, in iis duntaxat verbis, ejusdem cap. hæsurus, *sed tamen*

De Hierarchia Eccl. generatim. • 9

tamen tantum dici necessum est, & illam Hierarchiam, & omnem, & eam, quæ nunc à nobis laudatur, unam eandemque in omni Hierarchico munere hanc vim habere, ut & ipse pontifex pro suæ conditionis natura, modo & ordine, in divinis Mysteriis ac rebus perficiatur, Deificetur, & subditis suis divinam similitudinem, quæ ipsi divinitus inest, pro sua cuique dignitate impertiat: & inferiores tum perfectiores imitentur, tum inferiores se ad majora provocent, tum ipsi congressum faciant, tum pro virili parte aliis se duces præbeant, atque hac ipsa divinitus tradita, Hierarchicæque ordinis consensione, & quasi Conspiratione pro sua quisque parte, id quod verè est honestum, & sapiens, & bonum consequatur.

Nihil iis est ad propositum efficacius, nihilque evidentius dici potuit. I. Enim Hierarchiam Ecclesiasticam, & omnem aliam, unam, eandemque esse significat Dion. Quamvis varias dotes includat, sui ipsius, & aliorum perfectionem, affecutionem propriæ perfectionis, & alienæ curationem, sui ipsius dispositionem ad officia Hierarchica dignè exercenda, per assimilationem cum Deo, & subditorum ad Deum directionem. II. In omni Hierarchico munere, eas omnes dotes non divulsas, sed conjunctas esse oportere, testatur. III. Hierarchicum ordinem tam Episcopalem, quam inferiorum & sacrorum graduum,

postulare affirmat, ut qui Hierarchizant, tanquam Duces subditis imperent; qui Hierarchizantur, tanquam subditi principantibus ordinibus obsequantur. IV. Eorum tamen omnium finem esse, affecutionem summi boni asserit, ad quam diversis quidem actionibus, sed unicæ Charitatis agitatione conspirent omnes, & sibi consentientes ferantur.

Quæ sanè doctrina, pro diversis functionibus diversas Hierarchias constitui respuit, sed ordinis Ecclesiastici Jurisdictionis atque Charismatum, in unaquaque Hierarchica functione, indivisam societatem probat. Insuper Hierarchiam omnem obsequentium sub imperantibus, subditorum sub præpositis suis atque ducibus, legitimam esse dispositionem: eaque sublata, Hierarchici ordinis notionem perverti, demonstrat. Quæ omnia nupero errori, ex Diametro repugnant.

Sed pergit Dionys. eod. c. 1. & in Hierarchia Ecclesiastica, ac unoquoque ordine. (quos singulos, singulas Hierarchias appellari posse, ibidem asserit, teste Maximo) five Episcoporum, five Presbyterorum, five Diaconorum, conjuncta hæc esse confirmat, *Scientiam* sacrorum, quæ Charisma est, *potestatem* sacrorum, quæ & ordinis, & jurisdictionis est, & *Consecrationem* Sanctam, quæ solius ordinis est: ita tamen,

men, ut superior ordo, Augustiorem consecrationem nactus, eminenter scientiam, & potestatem inferiorum omnium contineat. Quæ doctrina, prædictam illorum trium in omni Hierarchia connexionem, arguit; quin etiam argumentum subministrat, diversitatem Charismatum, vel functionum divisim spectatorum, Hierarchiarum diversitatem non operari: alioqui Hierarchia superior, Episcoporum v. g. quæ inferiorum Charismata, & functiones, & operationes complectitur, cæteras quoque Hierarchias, in se contineret.

Infinita alia propè sunt, quæ S. iste doctor, pro omnium dotum prædictarum, in unaquaque Hierarchia, indivisa societate locutus est; quæ fusius à nobis explicanda sunt, quia, cum nominis *Hierarchiæ*, parens exstiterit, ejus sensum, cæteros secutos fuisse, probabile est, nec in alia Hierarchiam, quàm in qua eam Dion. usurpavit, significatione sumpsisse.

C A P. III.

*Eodem sensu, post Dionys. cæteri SS.
PP. nomen Hierarchiæ usur-*
parunt.

NEque nos ista conjectura fefellit:
nam qui deinceps SS. PP. Hierar-
A 6 chie

chiæ nomen sumpserunt eodem itaq; sensu, non alio ipsum usurparunt. S. Maximus accuratus Dion. interpres, ab ea significatione, Scholiis in super. cit. loca, minimè discedit, sed ex iis, quæ ipse scripsit, circa inscript. lib. de Cæl. Hier. hoc loco, desumere sufficiat, sic enim ibi præfatur, *sciendum igitur est, quod Hierarchia quidem sit principatus ipsius dispositionis sacrorum & veluti cura; & Hierarcha sacrorum princeps & curator, & provisor, nec tamen sacerdotum: sed is, qui sacra, & ipsorum constitutionem, atque Ecclesiæ & Mysteriorum disponit, nec tamen princeps sacerdos.*

Quæ definitio, à S. Max. tradita, corrigere debet modernos, ne pertinaciter defendant, *Hierarchiam*, seu sacrum principatum, dici posse, vel Charisma Dei, sine ordine & jurisdictione, vel alterum eorum, sine alio; quippe cum audiant, Maximum duo hæc conjungentem, sacrorum scilicet dispositionem, quæ est ordinis, cum cura sacrorum, quæ Jurisdictionem infert. Cui enim sacrorum procurandorum obligatio imminet, is subditos habeat, necessum est, quibus ista sacra procurare teneatur: atque ita aliqua Jurisdictione perfrui debet; Charismatum verò, iis illigatam distributionem, non negat, sine quibus videlicet, neminem posse sacra legitime procurare, docet c. 3. Cæl. Hier. *secundum differentiam & eminentiam ordinum.*

num etiam sciendi facultatem inesse oportere, edifferens. Sed & subjectionem in Hierarchia, etiam Cælesti admittit, in c. 5. ejus libri, superiores, seu transgredientes, & inferiores, ac submissos, velutque incurvatos, alios ordines, admittens.

Antiochus Monachus Palæstin. Lauræ S. Sabbi, qui à M. annis scripsisse creditur, Hom. 122. de dign. & funct. Pontif. Hierarchici nominis dignitatem, nonnisi Episcopo, & cæteris è clero, ejus adjutoribus tribuit è Dion. nam serm. de Past. incepto, verba ista conjungit, inferens quæ huic instituto faciant, *Hæc est enim Hierarchia, sacer ordo, & scientia: est itaque Hierarchiæ scopus, & assimilatio Deo, in quantum homini possibilis est, & cum eodem unio, Deum habens, sacræ totius scientiæ & operatoriæ virtutis præceptorem: & quidem aciem mentis, Pastor seu Episcopus in Divinissimum illum decorem indeclinabiliter intendens, & pro modulo virtutum, Deum imitatus, suos etiam vel sic suos etiam, in eodem sacro Cætu convivas, seu socios, Ad Cœles, divinas imagines perficit, specula nitidissima, & capacia primariæ illius lucis; radii prorsus divini: Hanc rursus Hierarchicam functionem, in cætera suo quæque ordine elucentia transmittit: non enim fas sit sacrorum cæremoniis, aut sacris initiis quidquam omnino efficere præter proprias, & eas sacras constitutiones.*

Nolim lectorem, in hujus textus lectione, infructuosam operam terere; eum itaque moneo, ut ex ista Antiochi Doctrina, quæ ex c. 3. Dion. desumpta, scholiisque Maximi, in eundem locum illustrata est, hæc mecum discat; I. Monachos alloquentem, locum istum, nunquam dignitatis ipsorum Hierarchicæ, mentionem ob oculos ipsis posuisse: tunc solum Hierarchiæ mentionem fecisse, cum de Episcopis, & Pastoribus, Jurisdictionem habentibus, & ad ponendam animam suam pro ovibus suis, pastoratus lege obstrictis, verba faceret; ac proinde & *Ordinis*, & *Jurisdictionis* Hierarchiam esse censuisse.

II. Hierarchiam ab eo, & ordinem sacrum, & scientiam definiri; quæ ordo & scientia Jurisdictionis Hierarchicæ seu pastoralis, quam ibi explicat, conaturaliter adnexa sunt.

III. Non pro modulo scientiæ, & Charismatum, licere unicuique, in perficiendis, illustrandis, purgandis, magis minusve occupari, sed pro modulo sui gradus, & ordinis Ecclesiastici, quod etiam inculcat, Hom. seq. *in omni Hierarchica purificatione*, unumquemque docens, in ordine perstare suæ functionis. Quod ipsum expressè docet S. Maxim. ex Dion. c. 3. Cæl. Hier. cit. prohibens, ne quis quicquam aggrediretur, *præter proprias sacræ*
cære-

De Hierarchia Eccl. generatim. 15

cæremonialis consecrationis præscriptiones, quibus verbis sibi videri, ait, eum declarare, quod non oportet aliquem in sacro gradu annuatorum, aliquid supra proprium ordinem facere. Sed partim, quod propriæ incumbit dignitati efficere, & docentem tradere, non verò manum admoveere iis, quæ dignitatem superant, sicut Presbyteros, docere, & donum offerre, non autem ordinare; Diaconos, docere, non autem baptizare debere, &c.

IV. Sacris Cæremoniis ordinatum esse debere, insinuat, quicumque sacram sibi aliquam functionem, seu Hierarchicam, ausus fuerit arrogare, quæ duæ observationes, Hierarchiam *Charismaticum*, à cæteris, quam nonnulli statuunt, omnino convellunt.

V. Perfici in convivio Eucharistico, Hierarchicis perfectionibus subditos, quæ etiam observatio juvat, ut discamus, perfectionem fidelium, nonnisi Eucharistiæ beneficio obtineri; ac proinde, cum ad eam perfectionem, Hierarchicæ aliæ duæ functiones, *purgatio & illuminatio*, ordinentur, nullius Hierarchicæ functionis capacem esse, qui ad Sacrificium Missæ, proximè vel remotè, ordinatus non fuerit, quam rationem, infra fusius prosequemur.

C A P. I V.

Aliorum PP. Sententiæ, hac de re.

Sed fusius, in unico Antiocho, Dionysianæ sententiæ interprete, dum moror, cæterorum ferè oblitus videor. Redeo itaque ad aliorum PP. & sententiæ, & locutiones, qui nonnisi Hierarchiæ, à Dion. expositæ, quæ ordine Jurisdictione, & Charismatis instructa esse debeat, meminere.

Cyprianus seu quivis alius antiquus Auctor, ferm. de oper. card. ferm. de cænâ Dom. pro quovis sacerdote nomen Hierarchæ usurpat, iis verbis: *In his omnibus laborare se dicit Deus, nec esse voluntatem suam in Ministris impuris, indignatione districtâ testatur: sed Hierarcha pius, quem Spiritus S. compungit, excitat, inhabitat & sanctificat, elevatione manuum Crucis Mysterium representans, confidentur orat pro sua & populi ignorantia.*

Amphiloch. in vita Bas. Episcopum appellat, *Magnum Hierarcham*, id est, Magnum Sacerdotem, c. 12. n. III. *S. Ephraim manus imposuit Magnus Hierarcha.* Chrys. ferm. de S. Joan. Theol. prope fin. tom. 6. ipsius oper. Episcopos per excellentiam, sed Jurisdictione præditos, & sacris Charismatibus

matibus instructos Hierarchas nominat, *His igitur Apostolis in potestate, & principatu & zelo succedunt, ut ante dictum est, venerandi DD. Hierarchæ, & Christi gregis pastores, vestigiis Apostolos consequentes.*

Sophron. Hierosol. Antistes Epist. Sergio Patriarchæ Constant. seu honor. PP. Rom. relata, Act. 11. 6. Syn. Hierarchiam pro ipsa pontificali dignitate, & diæcesibus, ordinibusvè Hierarchicis subditis Episcopi Regimini usurpat: *Quia verò quædam Apostolica, atque prisca traditio, in Sanctis Dei per totum orbem Ecclesiis, tenuit, ut qui ad Hierarchiam (id est Pontificatum) deducuntur, qui ante illos Hierarchias (id est, Diæceses, vel ordines Episcoporum Regimini subditos) regunt, omnia synceriter conferant & exponant.*

Felix III. Epist. 5. ad Zenon. Imp. per dignitatem Hierarchicam, Ecclesiasticam, Pastoralem, sive Sacerdotalem, tam ordinis quàm jurisdictionis intelligit, hæc scribens adversus Petr. Alexandr. *Valentini & Eurychetis discipulum expelle à civitate simul, & Ecclesiastico Regimine, & à dignitate Hierarchica dejectum esse sancito.* VIII. Syn. PP. Act. 10. c. 11. beatos Spiritus, qui aliis præsunt, Hierarchas appellant, statuantes eos, *qui à Divina gratia ad munus Episcopi evocantur, honorandos esse, ut gestantes imaginem, & figuram SS. Cælestium Hierarcharum.*
Nice-

Nicephor. Callist. qui floruit sub Andronico Majore, & Michaële, Filio ejus, Andronicoque minore, Michaëlis hujus Filio, Palæologis, lib. 2. Hist. c. 34 agens de argum. Epist. 1. ad Timoth. ait, in hac Epistola, tanquam in Typo, seu forma adumbrata, rationem, & vitam Hierarchicam, id est, sacerdotum & Diaconorum, de quibus scilicet prudenter eligendis, & ritè ordinandis, Timotheum à se factum Episcopum exprimit, ac proinde ad Hierarchiam Ecclesiasticam, sacerdotes tum primi, tum secundi ordinis, ac Diaconos præsertim ad Hierarchiam spectare, eosque ordines Hierarchicos esse insinuat.

Idem quoque lib. 17. c. 19. Clericos honoratiores Hierarchas Primarios indiget, eosque Monachis opponit, testatus, *Aphtartodocitarum hæresi, non solum ex eis, qui Magistratus gesserunt, sed etiam Hierarchas, Primarios, & Monachos vita illustres, & ex Sacerdotali ordine, alios assensisse*, quatuor hominum genera denotans, Magistratus dignitate politice creatos, Monachos vitæ austeritate conspicuos, Antistites sacrorum, seu ex Clericis dignitate Ecclesiastica conspicuos, Sacerdotes inferioris notæ, & gradus, seu illi secundi ordinis intelligendi sunt, seu inter Sacerdotes secundi ordinis, qui nulla Jurisdictione, vel illustriori officio insignes.

Hæc

Hæc per Satyram allata testimonia, ostendunt, Hierarchiæ & Hierarchæ nomen in Ecclesia Dei, regiminis, & dignitatis Ecclesiasticæ, ac sacri ordinis significationem, continere. Alios jam Ecclesiasticos scriptores, in eodem sensu, expendamus copiosius.

C A P. V.

Cæteri Ecclesiastici scriptores, expenduntur.

ELias Metropolit. Cretensis, comm. in orat. i. Greg. Naz. Hierarchiæ mentionem facit, sed in ea significatione, qua exterius Ecclesiæ regimen, & gubernationem significat, per homines ad id sacris Ordinibus, Episcopatu, Presbyteratu, ac cæteris deinde ordinibus consecratos, atque initiatos; ubi enim Hierarchiam nostram, cum Cælesti contulit, in qua ordines quoque admisit, & sacras Cæremonias, seu Mysteria quædam, & duces aliquos cæteris prælucentes, loco præpositorum ac pastorum: & legali, in qua externi quoque initiationum ritus habentur, mox ad utriusque comparisonem hæc subdit:

Ac spectes velim, quonam pacto in nostra quoque Hierarchia Typus exacte servetur: an non enim ut illic, sic in nostra quoque Hierarchia,

chia, Hierarcharum ordo initiandi ac perficiendi vim habet; Sacerdotum autem illuminandi; Eorum autem qui deinceps sequuntur, purgandi ac discernendi. Verum quodnam unumquodque horum sibi velit, si qui scire cupiant, Magni Dionysii liber eos docebit. Nos verò hæc eò commemoravimus, ut demonstraremus, quam similitudinem ea quæ à nobis celebrantur, ad princeps illud exemplar habeant, & quonam pacto animos in altum erigant.

Ex quo vel unico, discent neoterici, tantum abesse, ut ex analogia Hierarchiæ nostræ, cum cælesti & legali, elici possit divulsio ista sua Hierarchiarum, ut una sit *Charismatum*, eaque suprema; media *Ordinis*; tertia Jurisdictionis: ut potius ex ea, Hierarchiam nullam inferat Elias Cretenf. quæ non ordinum Ecclesiasticorum consecrationem, regiminis exterioris auctoritatem, quæ à Jurisdictione haud differt, & Charismatum subsidium conjuncta habeat.

S. Germanus, ex Cyzicensi Episc. Patriarcha Constant. Hierarcharum Mentionem facit, sumpto nomine, pro Ecclesiæ Pastoribus, lib. contempl. Rer. Eccl. non longè ab init. ubi Ecclesiam, in *Prophetis prænuntiatam*, dicit, in *Hierarchis exornatam*; & in *Martyribus consummatam*. Et paulo post, ubi S. Petrum *ἀρχιερέων ὁ ἀρχιεπίσκοπος*.
Prin-

Principem Hierarcharum, seu Pastorum Christi vocat. Quæ significatio Hierarchæ ostendit, cum Hierarcha Pastorem Ecclesiæ significet, Hierarchiam ejusdem esse pastorum.

VII. Syn. PP. Can. 21. qui ad Episcopatum evehendi sunt, in SS. scripturis exercitatos esse debere definientes, hanc ex Dion. subdunt Rationem, *Nostræ enim Hierarchiæ substantia, sunt eloquia divinitus tradita, divinarum scilicet, scripturarum vera scientia.* Quo loco Hierarchia pro dignitate Ordinis simul & Jurisdictionis sumitur, cui scientia conjuncta, tanquam ad ejus substantiam seu integritatem spectans, ac proinde Hierarchia nobis ibi exhibetur, tanquam ex tribus illis dotibus conflata, non in tres, pro tribus istis dotibus divisa.

Verum ex eodem quoque Can. juncta Anastasii Bibliothecarii (qui statim sequenti post. 7. Syn. sæc. floruit) versione, nominis Hierarchiæ illustratio peti potest. Nam quos Christianis plebibus, opponit 7. Syn. hos Latinè interpretatur Anast. *Qui Hierarchicam consecuti fuerunt dignitatem: & Gentian. Herv. Qui sacerdotalem dignitatem obtinent.* Quo certè loco de pastoribus sermo est, Ordine & Jurisdictione insignitis, quibus ad subditorum instructionem, scientiæ scripturarum habendæ,

habendæ, tanquam ad suum statum pertinentis, onus, isto Can. ut vidimus, imponitur. Unde patet tria ista, ad eundem Hierarchicum ordinem, testimonio saltem Anast. Bibl. 7. Syn. interpretantis, concurrere.

Juvat ad eandem explicationem nominis, Conc. Laod. Can. 24. Quem Can. Dion. cognomento exiguus, meritis magnus, Monach. Scythæ, (in cujus egregias laudes effunditur Cassiod. ejus æqualis, de div. lect. c. 23.) ut Latinis verbis reddit, *quod non oporteat Sacro Ministerio deditos, à Presbyteris usque ad Diaconos, & reliquum Ecclesiasticum ordinem, id est, usque ab Subdiaconos, lectores, exorcistas, & ostiarios, & ex numero continentium & Monachorum ingredi tabernacula.* Quo Can. tria hominum genera denotari constat, quibus Tabernaculorum frequentatio interdicitur, primum genus eorum, qui singulariter. ἱερατικοὶ dicuntur, quasi Hierarchici, qui sunt Episcopi, & Diaconi. Alterum qui sunt deinceps sancti Ecclesiastici ordinis, subdiaconi videlicet, quos ὑποδιακόνες vocat, seq. c. 25. *lectores, cantores, exorcistæ & ostiarii.* III. tandem, & μοναχικοὶ ἢ ἀσκητικοί, qui sunt ordinis eorum, qui Monasticis officiis exercentur.

Juxta quam Ordinum distributionem, Hierarchicis soli Episcopi, Presbyteri & Diaconi

Diaconi singulari jure adensebuntur, Ecclesiasticis deinceps ordinibus, qui ad istos ordines, in inferiorum graduum officiis exercentur, ut ad superiores disponantur: Ascetæ denique seu Monachi, qui puritati vitæ studentes, eo aptiores ad Ecclesiasticorum Ordinum ascensum evadunt, si cætera adfuerint, quod fuerint puriores.

C A P. V I.

Testimonium S. Greg. & Acacii. Archiepisc. Constant.

ADdimus his, luculentum S. Greg. testimonium, lib. 3. indict. 12. Epist. 11. Maximiano Syracus. Episc. ubi Hierarchici viri fit mentio, pro principantis ordinis, & dignitatis Ecclesiasticæ, atque auctoritatis viro: sic enim loquitur Greg. *Illud quoque Charitatem tuam commonere curavimus, ut si quispiam Episcoporum de hac luce migraverit, vel (quod absit) pro suis fuerit remotus excessibus, convenientibus Hierarchicis cunctisque cleri primoribus, &c.* Quibus verbis, quis non videt Hierarchicorum nomine, eos solum significari, qui & Ordinis & Jurisdictionis prærogativa, non solum laicis, verum etiam inferioribus

bus clericis præcellerent, clerique primores essent.

Denique, ut quædam alia, quæ fortè sua multitudine nauseam excitarent, prætermittamus, iis omnibus veterum Auctorum sententiis, unicum addimus, ex Acacii Archiep. Constant. Epist. ad Petr. Archiep. Antioch. quæ habetur tom. 2. Con. Gen. Bin. p. 1. *Quomodo autem & ascendere nunc sacerdotalem thronum non erubescis, quem contaminasti per tuas blasphemias, extra Hierarchicum ordinem, & alienus factus es ab ovili Christi, &c.*

Videmus enim quadam gradatione miserabilem statum Petri Antioch. hîc describi; quod omni Pontificia dignitate sit exutus, atque aded Pontificalem thronum ascendere minimè deberet: quod ab Hierarchico Ordine, sacerdotali scilicet & Diaconali pulsus, seu quod sacri Ministerii omni potestate privatus esset. Denique quod ab ovili Christi, & Ecclesiastica omni Communionem ejectus esset, atque ideo Hierarchicum Ordinem, ibi sumi animadvertimus pro eo, qui & Ordinem & Jurisdictionem complectatur, & cæterorum Christianorum, qui sacris initiati non sunt, ordine superior sit.

C A P. VII.

*Eadem Mens, Medii ævi scriptorum,
qui Theologiæ scholasticæ paren-
tes, dici possunt.*

Is, quæ ex antiquorum Ecclesiæ PP. testimoniis, ad Hierarchiæ Ecclesiasticæ notionem, & conditiones exponendas adduximus, splendorem adferent, egregia seqq. sæculorum DD. testimonia, eorum præsertim, qui Theologiam Scholasticam, primùm pepererunt, vel plurimùm promoverunt. Ab his discemus, quænam sit Hierarchia Ecclesiastica, & quas dotes potissimùm, si propriè sumatur & adæquatè, suo ambitu Complecti ac Comprehendere debeat. Discemus enim Hierarchiam Ecclesiasticam ab his vix sumi, nisi quæ tres prædictas dotes secum habeat: vel quæ saltem non ordinis potestatem includat: nunquam pro ea, quæ divinorum duntaxat Charismatum, absque ordine, & Jurisdictione, vel vim, vel aliquem usum habeat.

Primus in aciem prodit Hugo Victorin. qui fusè in ea Materia versatur, libris suis Annot. Elucid. in lib. Dion de Cæl. Hier. Ille ubique Hierarchiarum imperium;
B Hierar.

Hierarchicos ordines, Principantes & Dominantes, cæteros qui ab iis perficiuntur, subiectos vocat: ubique tria ista, quæ exposuimus, in unam Hierarchiam conflandam, necessaria putat.

Exempli Causa, lib. 1. hæc scribit: *Imperium per partes & divisiones, gradus & ordines distributum est: ab eo descendens, & respiciens ad eum, & sub eo ordinatum, qui fons & causa est omnium, & principium primum; unum opus, & artifex unus, unum imperium, & unus Rector, unus princeps, & una Respublica. Item eandem sub se dominantibus bonitatem ac virtutem, secundum Mensuram participationis, & Ministerii Rationem, per ordines & gradus multifariam dispensavit, excellentioribus quidem, & supra positis imperio, maiora & excellentiora dona impartiens: Inferioribus autem & suppositis gradibus minora Charismata: Et liberè famulantia, ad subiecta quoque sine oppressione prælata concedens.*

Collige ex ista, studiosè lector, Hierarchiam ibi ab Hug. Principatus & Imperii nomine insigniri, cuius varii, & ordines, & gradus, existant sub Deo, unico supremo principe, cuius auctoritas in alios, sub ipso dominantes transfunditur. Collige, imperii istius, seu Jurisdictionis facultatem, cum ordine, & Charismatum donis, esse conjunctam, & quantumlibet in gradus

us & ordines dividatur, tamen pro dignitate Ordinis, pro majori, vel minori participatione Imperii, & Jurisdictionis, Charismata communicari: ac proinde, nec ternionem Hierarchiarum, modernorum, nec Hierarchiæ absque respectu ad subditos, ullius admissionem, Hugoni nostro probari.

Patebit id amplius ex iis, quæ lib. 4. ad explicationem Hierarchiæ, à Dion. traditæ subjungit. Tria, inquit, in definitione Hierarchiæ principalia ponit, quæ perficiunt ipsam Hierarchiæ definitionem. Sunt autem hæc, ordo, scientia, & actio; horum trium si defuerit omnium aliquod, non constat Hierarchia. Primum est ordo divinus, quia non est potestas, si ordinata non est à Deo, propter hoc, ait, ordo divinus, omnis enim potestas à Deo est: Et quæ à Deo sunt, omnia bona & ordinata: Propterea qui potestati resistit à Deo ordinatæ, Deo resistit.

Propter hoc ergo Hierarchia est ordo divinus, id est, potestas à Deo ordinata, & secundum Deum disposita: à Deo quippe est, per ordinationem, & secundum Deum per imitationem, propterea ordo divinus, quia à Deo est, ut sit, & secundum Deum est, ut qualis, & quantus sit. Deinde quia omnis potestas, quæ à Deo ordinata est, ad aliquid perficiendum atque complendum ordinata est: sequitur in definitione, post ordinem, scientia & actio: Scientia

quidem, quâ, quid faciendum sit, intelligant: Actio verò, quâ quod intellexerunt agendum perficiant. In ordine officium, in scientia discretio, in actione ministerium: Sine ordine præsumptio est actio, sine actione negligentia est ordo, sine scientia verò, & actio reprehensibilis, & ordo inutilis. Quid iis verbis ad instituti probationem, aut expressiùs, aut clariùs dici potuit?

Sequitur Guil. Paris. Episc. qui Tract. de univ. 2. p. princ. 1. p. q. 166. Cælestis Hierarchiæ denominationem, iis verbis explicat, Hierarchia verò est ex Græco eloquio interpretatum, sacer principatus. Communiter igitur sacros principatus vocat omnes huiusmodi substantias, sacros propter elongationem & inaccessibilitatem ad omnem obsecrationem. Principatus verò propter sublimitatem & præcellentiam, quæ est eis super alias creaturas: Nec non & propter perfectionem subjectionis, quia primo principi atque principio subiectissimæ sunt, & à gubernatione sive Regimine ipsius nullo modo declinabiles, aut discrepabiles, similiter in eandem legem subjectionis, eandemque pulchritudinem gubernationis, prout posse acceperunt, & super hoc beneplacitum esse, sive injunctionem creatoris cognoscunt, vel intelligunt sibi subiecta & inferiora se summopere reducentes seu convertentes.

Audis Doctissimum istum Præsulem, Hierarchiam absque subjectionis & impe-

rii vicibus nullam agnoscere; eosque solum sacro principatu exornatos credere, qui subditi summo principi, non quosvis, sed sibi subditos & obnoxios, non quomodolibet, sed auctoritate à summo principe accepta, ad summi boni consecutionem, & ad Dei imitationem reducere debeant. Eodem modo ad politicum principatum in tantum pertinent, qui principalis auctoritatis sunt participes, & subditos habent, quibus imperent, vel jās imponant, aut reddant: quam comparisonem fusè eod. cap. prosequitur:

C A P. VIII.

*Argumenti Guil. Paris. & aliorum,
continuatio.*

SEd clariùs idem Guil. seq. c. Hierarchiam Ecclesiasticam exhibet nobis, definitione, & distributione partium, à recentiorum omninò diversam. *Addam,* inquit, *tibi, & aliam similitudinem, Regni scilicet Spiritualis, quod gens Christianorum clerum vocat, in quo Pontifex, vel sacerdos summus similitudinem tenet, primi, ac summi Regis; cuius loco esse, & cuius vices agere, quantum ad spiritualem gubernationem, ipsum dicunt in terris. Circa ipsum*

verò nulli intelligenti dubium esse, quin esse debeant, & assistere eidem jugiter tres ordines Clericorum, quorum primus instar Seraphim debet esse amore creatoris ferventissimorum, & totaliter ardentium: Secundus instar Cherubim debet esse sapientissimorum, & in rebus divinalibus eruditissimorum; Tertius instar Thronorum, seu sedium judicum, qui & jura Spiritualia, & leges Ecclesiasticas sive Clericales ad perfectum noverunt, & jura reddant petentibus, & ista Hierarchia trium istorum ordinum, vocatur apud Gentem Christianorum, sacer Cætus Cardinalium.

Manifestum autem est tibi, quia tribus istis ordinibus vehementer indiget Respublica Spiritualis, & gubernatio ejusdem. Et manifestè vides, quia nulla major perniciēs potest provenire Regno Spirituali sive Clericali, quam si loco istius Hierarchiæ, è contrario se habens cætus, loco istius constituatur, &c. Dominationibus verò Patriarchæ, sive primates, qui indubitanter post antedictos tres Ordines præ-eminētiōres sunt in clero: Principatibus Archiepiscopi, sive Metropolitani adaptantur, sicut & cognominatio eorum sonat: Potestatibus Episcopi; virtutibus Archidiaconi; Archangelis Archipresbyteri; Angelis Presbyteri convenienter respondent, juxta sermonem Prophetæ, qui dicit, quia sacerdos Angelus Domini exercituum est: Virtutibus autem idē Archidiaconos comparari, quia eorum est virtute

tute irrumpere iniquitatem, cum Iudices sunt, & ad eos jurgia pertineant. Quod si Presbyter Angelus Domini exercituum est, quis dubitat, consequens esse, quod & Archipresbyter Archangelus Domini exercituum sit. Potestates quoque non immerito Episcopis aptantur, quoniam ad istos maxime pertinet, exercitus Spirituales regere, legiones ducere, Spirituales acies ordinare atque instruere, militiam Spiritualem, seu docere, &c. Commentario ista non indigent.

Legis Hierarchiæ notionem, toto hoc discursu, eandem, quæ spiritualis Regni, ac clericalis, cum imperandi auctoritate, & habitudine ad aliquos subditos expressam. Legis in ea Hierarchia, non Monachis locum assignari, ut Monachi sunt, multò minùs monialibus, non conversis Religionum Monasticarum, seu fratribus, ut vocant laicis (nova ista sunt figmenta quorundam, prioribus sæculis inaudita) sed solis Clericis, in sacro ordine constitutis, ordinariam Jurisdictionem habentibus, iisque, qui iis dotibus præditi esse debeant, quæ sacrum principatum decent: secùs enim, ex inimicis Dei, insipientibus, & injuste judicantibus, collectum Cœtum, *Anti-Hierarchiam Ecclesiasticam malignantium, & Synagogam Sathanæ, & quodammodo Regnum spirituale ejusmodi, Diabolo præparatum fieri*, ibid. affirmat.

Legis Ecclesiasticæ Hierarchiæ, cum Cœlesti similitudinem, atque analogiam servandam, nihil opus distinctis Hierarchiis, *Charismatis, Ordinis & Jurisdictionis*, sed configuratam Cœlesti, Hierarchiam ternam reperiri posse, in qua & Jurisdictio ordini & ordo Jurisdictioni, & utrisq; Dei dona, seu Charismata, strictissima & indivulsa societate devinciantur. Is igitur Guil. Parisiens. quamvis, propter religiosæ perfectionis æquissimam commendationem, aliorum possit videri esse, totus noster est. In quibusdam, fateor, dotibus, Cœlestium spirituum sanctitatem, referre regulares aliquando prædicat, istas tamen Regularis privatas dotes, istas pietatis regularis functiones, Hierarchicas dicere, ne cogitavit quidem, nisi ex ordinis Ecclesiastici Characterē, & Jurisdictionis ordinariæ auctoritate, proficiscantur.

Comitem Guil. Parisiens. dabo alterum Guil. Antissiodor. Episc. Quàm egregiè ipse, quàm apertè Hierarchiam nobis indicat, non sine subditis, Ordine ac Jurisdictione pollentem, & consortium Charismatum consentaneè exigentem! Ita enim scribit lib. 2. summ. Theol. Tract. 3. c. 1. *Hierarchia est rerum sacrarum & rationalium ordinata potestas in subditis debitum retinens ducatum. Ordinata potestas, ponitur ibi genus; Rationalium, ad differentiam dæmo-*

dæmonum, & pravorum hominum, quorum etsi potestas sit ordinata, quia *omnis potestas à Domino Deo est*, sicut dicit Apostolus non est tamen eorum principatus in subditis. *Debitum retinens principatum*, ponitur ad differentiam subditorum, qui sunt res sacræ & rationales, sed eorum tantum est obedire, non principari, quia non habent subditos.

Petrus Lombardus Episc. Paris. licet ab Hierarchiæ nomine abstinere, tamen in eo favet lib. 1. sent. dist. 10. quod prælationem in superioribus Spirituum agminibus admittat, ac proinde & subjectionem in inferioribus, quod tres medios ordines inter utrosque superiores & inferiores, consistere doceat. *Non modò dignitate vel loco, sed etiam officio, quia præceptum Divinum à superioribus accipiunt, & deferunt ad inferiores.*

C A P. I X.

De usu ejusdem vocis, apud S. Thomam.

S. autem Thomas 1. p. q. 108. a. 1. in corp. evidentiùs Hierarchiam quidem *sacrum Principatum* describit, eoque nomine & principem, & multitudinem ordinatam sub principe, intelligi docet, atque adeò Hierarchiam omnem insinuat, in

imperandi auctoritate, & parendi necessitate constitutam : unde etiam colligit, manifestum esse, eos errare, & contra intentionem Dionys. qui ponunt in divinis personis Hierarchiam, quam vocant *supercaelestem* : in divinis enim personis, est quidam ordo naturæ, sed non Hierarchiæ. Nam, ut Dionys. dicit, c. 3. Cæl. Hier. *Ordo Hierarchiæ est, alios quidem purgari & illuminari, & perfici, alios autem purgare & illuminare, & perficere, quod absit, ut in Divinis ponatur.* Atque iterum a. 2. in corp. unam Hierarchiam dicit esse, *unum principatum, id est, unam multitudinem ordinatam, sub Principis gubernatione.* Ex quo concludit, ordinum in ea diversitatem requiri, ne inordinata ipsa & confusa sit.

Ad 3. quoque fatetur, quod objectum fuerat in Ecclesiastica Hierarchia, ordines distinctos esse, secundum diversas functiones purgandi, illuminandi & perficiendi, quas infimis etiam Angelis, respectu hominum convenire posse, subjungit : denique a. 4. ordinem Gubernationis, cum ordine Hierarchiæ confundit, & distinctionem Ordinum Angelorum completivè quidem, secundum dona gratuita, dispositivè autem, secundum dona naturalia peti affirmat.

Quæ quidem omnia, si Ecclesiasticæ Hierarchiæ, pro suo modulo applicentur, ut certè applicari debere, ipse insinuat, dum
Eccle-

Ecclesiasticam à cælesti exemplar desumere fatetur, ostendent Ecclesiasticam Hierarchiam nullam esse, secundum S. Thom. sine gubernandi potestate; ordines quoque Sacros, in Ecclesiastica Hierarchia, admittendos esse; Deumque, qui Angelis secundum naturalia, seu pro majori dignitate naturæ, nobiliores vel ignobiliores gratias distribuit, naturæ perfectionem in hominibus non attendere, Charismata sua, pro diversitate Ordinum Ecclesiasticorum, quos instituit, & quos istis gratiis ornatum promisit, distribuere solere, ac communicare, quemadmodum ostendit opusc. 15. contra impugnantes statum religionis, c. 4. ita ut Ecclesiastica Hierarchia, omnem simul *Ordinem, Iurisdictionem, & Charismata*, secum habere necessum sit.

Idem verò S. Doctor, plurima, fortè alibi commodius exponenda, docet: Quibus Monachos, ut Monachi sunt, à superiori Hierarchia amovet, opusc. 15. c. 4. cit. Unum hoc specimen doctrinæ profero, ex eodem cap. excerptum. Proposuerat sibi solvendum hoc Argumentum quod ab impugnantibus statum Religionis adversus Mendicantes solebat objici, quia *nec Papa, nec aliquis mortalium, potest Ecclesiasticam Hierarchiam, divinius ordinatam, aut mutare aut evertere, cum nulli prælatorum data sit potestas in destructionem, sed in ædifi-*

B 6

cationem,

cationem, ut dicitur 2 Cor. 10. sed iste est ordo Ecclesiasticæ Hierarchiæ, quod Monachi & Ordines, sunt in ordine perficiendorum, ut patet in 6. C. Eccl. Hier. ergo non potest hoc aliter immutare, ut scilicet Religiosi perficiendi habeant officium.

Aliter hoc arg. solvit D. Thom. aliter solverent neoterici : Dicerent, hîc non destrui Hierarchiam Ecclesiasticam, quantumvis ad Ecclesiasticas functiones exercendas, Mendicantes destinentur : Eos, quâ Monachi sunt, ad Hierarchiam Ecclesiasticam, & clericalem spectare: quâ Mendicantes sunt, etiam ad sacerdotium : quâ Theologi sunt, jurisperiti, vel aliis scientiis instructi, ad Charismatum Hierarchias pertinere, Episcopos & Curatos, nihil præ illis habere, quod *Hierarchiæ* nomen sibi vendicent.

At ille modestiùs & veriùs agnoscens, Hierarchiæ propriam maximè rationem, Episcopis, Presbyteris, & Diaconis ordinaria auctoritate præditis, convenire, ita respondit, *Dionys. ibi loqui, de Monachis Laicis, qui non sunt Episcopi, Presbyteri, vel Diaconi; Si tamen de omnibus intelligeretur, non destruere Hierarchiam Ecclesiasticam Papam, mittentem Monachos ad prædicandum, quia, sicut supra dictum est, in Ecclesiastica Hierarchia ille, qui est inferioris ordinis, potest superioris officium exercere, etiam in suo ordine manens,*

manens, sicut etiam, & in Cælesti, & ulterius potest ad superiorem ordinem promoveri, quod non est in Cælesti.

In qua solutione, supponit, Ecclesiasticam Hierarchiam, pro pastorum tam superiorum quàm inferiorum coordinatione, usurpari: Agnoscit Monachos, Hierarchici ordinis Clericis, inferiores esse; ex commissione tamen, superiorum ordinum Hierarchicorum officia Ecclesiastica peragere posse, manentes tamen in suo ordine, quia ut eodem cap. sæpiùs asserit, non idèd sunt gubernatores, quamvis delegatâ auctoritate populos pascant, nisi etiam ordinariâ pascerent; nec officium habent, sed officii tantùm executionem: Quod & confirmat, 2. 2. q. 188. a. 4. ad 1. docens; *quòd auctoritate Prælatorum aliquis prædicet, vel alia hujusmodi faciat, non supergredi discipulatus, vel subjectionis gradus.*

Ipsos tandem, infra ordinatam divino jure Hierarchiam, collocatos, ad superiorem istam Hierarchiam, per electionem legitimam, provehi posse, asserit: Quod in Hierarchia Ecclesiastica secùs quàm in Cælesti contingere observat; in qua unusquisque, in quo collocatus est gradu, semper permanet; nec Angelorum ullus v. g. ad Archangelorum gradum ascendere unquam potest: cum è contrà, ab uno Hierarchiæ Ecclesiasticæ gradu ad super-

riorem aliquis promoveri possit. Unde nec Monachos ut Monachos, statu Clericos, nec Monachos Mendicantium Ordinum, statu, sacerdotes aut sacerdotium sibi debitum arrogare, nec eo etiam statu, quo Hierarchicis functionibus occupantur, vel Hierarchicum officium habere, vel Hierarchicè prædicare, aut quippiam aliud facere, vel Hierarchicis ordinibus ex mente S. Thom. adnumerandos esse, adversus novitiam præsumptionem, innotescit.

C A P. X.

De eadem voce, apud S. Bonavent.

NEc dissimilis est sententia S. Bonav. I. enim, serm. 21. lib. qui in scribitur, *lumine Eccl.* Hierarchiam cum S. Dion. definit, *Ordinum divinum, scientiam & actionem, ad Dei-formem, quantum possibile est, assimilata, & ad inditas ei assimilationes, proportionaliter ad Dei similitudinem ascendentem.* Addit, *Ordinem respondere Patri, scientiam sacram Filio, operationem Spiritui Sancto.* Unde Hierarchiam dici potentiam, scientiam, actionem: *Potentia enim sine scientia, sine actione infructuosa est, &c.* Quibus verbis indicat, in omni Hierarchia, tria hæc conjuncta esse, *Ordinem, Scientiam, (quæ Charisma in Ecclesiastica Hierarchia, dicitur) & Operationem, quæ Jurisdictioni Ecclesiasticæ respondet.*

Et

Et ita quamvis singulæ Hierarchiæ, ut postea ostendit, aliæ Patri, aliæ Filio, aliæ Spiritui Sancto, ratione ejus, quod in eis excellit, approprientur, quamlibet tamen Hierarchiam, sigillatim sumptam, tria prædicta complectentem, Patri ratione ordinis, potentiam ad agendum Conferentis; Filio ratione scientiæ, de functionibus suis, Hierarchicos viros instruendis; Spiritui Sancto ratione Jurisdictionis, potentiam Ordinis complentis, respondere debere, putat. Ordinem verò in unaquaque Hierarchia primùm requiri, sed eum sine scientiæ charismate, vel sine operandi auctoritate, infructuosum esse, ait: quod acceptionem Hierarchiæ, apud antiquos usitatam, corroborat.

II. Parte 3. Centiloq. sect. 16. eandem definitionem tradit, Hierarchia est ordo divinus, scientia, & actio: ut ordo, id est, ordinata potestas respondeat Patri, scientia Filio, actio Spiritui Sancto. Aliam quoque ei connectit Ecclesiasticæ Hierarchiæ, quam *Magistram* vocat, & quam etiam Angelicæ convenire posse, affirmat, *Hierarchia est rerum sacrarum, & rationabilium ordinata potestas, debitum in subditis obtinens principatum.* Quæ definitio omnem Hierarchiam Ecclesiasticam, gubernationis esse, seu Jurisdictionis & sine subjectione cogitari non posse, probat.

III. Apo-

III. Apolog. Paup. 4. Resp. 3. p. a. I. Religiosos, ait, *Pensatis multiformi utilitate ac numerositate animarum, numerositate indigentium plebium, & raritate sufficientium Ministrorum, sub-cælestem Hierarchiam voluisse & debuisse approbare*: Nomine enim sub-cælestis Hierarchiæ opus est, ut Pastorum Ecclesiæ Ordinem, intellexerit Bonavent. A quo, Mendicantes, exigente Ecclesiæ non solum utilitate, verum etiam necessitate foveri, suscipi, ac probari debuisse, contendit.

IV. In declaratione terminorum Theol. *Hierarchia Angelica*, inquit, est *Angelorum multorum habitudo ad invicem, in scientia, in actione, Dei-formitate, illuminatione, & ad Deum ascensione. Hierarchia Ecclesiastica, est rerum sacrarum, & rationabilium, ordinata potestas, debitum in subditis retinens principatum*. Quam ultimam definitionem, idem Sanctus, in sent. d. 9. *Magistralem* vocat, & utrique Hierarchiæ, tam Cælesti, quàm Ecclesiasticæ, communem, dicit.

C A P. XI.

Duo difficilia loca, ex S. Bonavent.

V Erum iis in speciem repugnantia, duo loca Bonav. proponi possunt. I. ex libr. cit. qui *Luminar. Eccl.* inscribitur, serm.

serm. 20. & 22. Opuscul. ejus 1. p. Alterum, ex Tractat. de Hierarchia Ecclesiastica in varias partes distribut. 2. p. Opuscul. ipsius. Utrobique enim videtur Charismatum Hierarchiam statuere, à sacris ordinibus & Jurisdictione Ecclesiastica diversam: Posteriori quidem loco, in Ecclesiastica Hierarchia homines recensens, qui ordines Hierarchiarum Angelicarum expressius referant, tribus ordinibus I. Hierarchiæ, Cælestes comparat. Perfectorum quidem tres ordines, Hierarchiæ I. Angelicæ respondentes, statuit, docens: Spirituales & contemplativos, propter fervorem dilectionis, similes Cherubinīs, propter plenitudinem sapientiæ, Seraphinis; propter justitiæ & humilitatis virtutem, Thronis; quorum omnium exemplum ferè unicum profert, religiosæ vitæ sectatores.

II. Hierarchiæ dominationibus, Pontifices & Pastores, Imperatores ac Clericos propter prælationis officium, & Clericalis status libertatem, aliasque dotes comparat. Virtutibus quidem eos, qui viriliter Justitiam defendunt, Pastores ac Judices. Potestatibus, Reges ac Principes sæculares, generosè compescentes eos, qui Hierarchiam prælationis, & subjectionis ordinationem impediunt. III. Hierarchiæ principatibus, subditos bonos assimilat; eosque

eosque qui suis Majoribus humiliter obtemperant, per donum reverentiæ, Thronis; Archangelis verò, eos, qui virgineâ castitate conspicui sunt; Angelis, qui misericordes, & cæteris compatientes.

Priori verò loc. idem Bonav. plurimos Ordines Hierarchiæ Cælestis enumerat; serm. quidem 21. Hierarchiæ perfectivæ novem ordines statuit, totidem Ecclesiæ ordinibus respondentes. Scientiam Contemplantium, 1. Hierarchiæ Ecclesiasticæ, pro variis rationibus, Seraphim, Cherubim & Thronis, assimilat. Actionem infimæ Hierarchiæ, prout varia est, Dominationes, Virtutes, & Potestates, referre docet. Denique eos, qui vitam, ex scientia & actione permixtam ducunt, Principatibus, Archangelis, & Angelis similes tradit.

Serm. verò 22. prosequitur eandem Anagogicam Tractationem. ac 1. Hierarchiam illuminativam, novem ordines representantes enumerat, tres fundamentales, respondentes 1. Hierarchiæ Cælestis ordinibus, scilicet ordinem Apostolorum, Seraphim; Propheticum, Cherubim; Patriarchalem, Thronis. Tres ordines, Ecclesiæ splendorem promoventes, nempe Martyrum, Dominationibus; Confessorum Virtutibus; Virginum Potestatibus respondentes. Tres denique Consum-

mantes,

mantes, nimirum præfidentium seu Prælatorum, Principatibus; Magistrorum seu docentium, Archangelis; Regularium, Angelis; quos omnes novem, etiam Patri, & Filio, & Spiritui Sancto respondentes, facit.

Deinde, ratione ascensuum, & graduum Ecclesiæ, triplicis generis gradus, statuit, tres purgativos, Ostiariorum, Lectorum & Exorcistarum: Quorum primi, similes Angelis, excommunicatos, & alios immundos ab Ecclesia excludunt; secundi, Archangelos referentes, Catechumenos; Terti, Principatus, Energumenos, sacris adjurationibus, à Dæmone liberant. Tres item illuminativos: Acolythorum, qui per exempla illuminant, in quo respondent, Potestatibus; Subdiaconorum, qui per documenta mediocria, Epistolarum scilicet lectionem, illuminant, Virtutibus similes; & Diaconorum, qui per sublimiora documenta Evangelii, quod legunt, illustrare audientium mentes dicuntur, in quo dominationibus comparantur. Tres denique perfectivos, Sacerdotum, Episcoporum, & Patriarcharum, Thronis, Cherubim & Seraphim respondentes: Quibus omnibus summus Pontifex eminet.

Præterea, ratione exercitiorum, novem item ordines statuit: Contemplativorum
Mona-

Monachorum supremæ Hierarchiæ; Activorum seu Clericorum, infimæ. Et Mixtum, qui est Prælatorum, mediæ. In I. ordine, tres ordines Monachorum recenset, Contemplativorum, pro suis fundatoribus orantium, qualis est Carthusianorum, Cisterciensium, Præmonstratensium, Grandimontensium, & Canonorum Regularium, qui Thronos exhibent; alium eorum, qui contemplationi intendunt, per modum speculatorum, Cherubinis similes, quales sunt Prædicatores, & Minores; & tertium eorum, qui vacant Deo, per modum excedentium, Seraphinis Configurati, in quibus Consummabitur Ecclesia. Prælatorum tres similiter Ordines, Episcoporum, Presbyterorum, Diaconorum. Denique tres Ordines Laicorum, Principum, Consiliariorum, & Subditorum.

Quibus omnibus adjungit, & animæ Hierarchicæ, varios gradus statui posse, naturæ, gratiæ, & industriæ, quos iterum, cum aliqua comparatione, ad Hierarchias Cælestes subdividit. Passim ex iis argumenta depromunt, qui suam *Charismatum* Hierarchiam somniant, & cum per omnia, ordinibus istis, à Bonav. prolatis, non consentiant, suæ tamen sententiæ, ab iis locis, auctoritatem emendicare coguntur.

C A P. XII.

Solvitur difficultas, ex locis S. Bonav.

VErùm infirma ista probatio est. i. quia sermones isti, Opuscul. *de lum. Eccles.* toti sunt Anagogici ac Mystici: cujus etiam notæ est, tractatus de Ecclesiastica Hierarchia inscriptus, de quo si Bonav. ipsum consulas, hoc iudicium ab eo audies, *Impossibile est, ut dicit Dion. aliter nobis lucere divinum radium, nisi varietate sacrorum voluminum, anagogicè circumvelatum.* Ideò Theologia, Poëticiis informationibus usa est, ut ex rerum visibilium similitudinibus, allegoricæ allocutiones, & Mystici intellectus transumptiones formentur, & sic sensibilibus, & visibilibus, spiritualia & invisibilia coaptentur. Hujus rei gratia, præsens opusculum, etsi laboriosum, mihi tamen, & aliis parvulis in Christo, lac petentibus (ut spero) non infructuosum, offero ad ædificationem domus Domini, qui est sublimi & gloriosus in sæcula sæculorum. In quo agitur de proprietatibus rerum naturalium, quas secundum parvitatem meam nunc tropologicè, nunc allegoricè, nec non quandoque anagogicè, rebus Spiritualibus comparavi: Iunioribus relinquens materiam exercitii, sensibilia insensibilibus, & Carnalia Spiritualibus coaptandi.

Ex

Ex quibus vides, scopum S. Doctoris, in hoc opere, non esse Hierarchiæ doctrinam tradere, sed anagogicè ac figurativè, Cælestis Hierarchiæ dotes, ad homines transferre, relinquendo etiam cæteris liberum, ut in eadem materia, piè & ad ædificationem proximi, ludant atque excurrant. Unde in opusc. isto sicut & ferm. cit. opusc. *lum. Eccles.* super-cælestis Hierarchiæ, in Trinitate, mentio fit, quam S. Thom. supra nequaquam admittendam, credit; animæ quoque Hierarchicæ ordines varii statuuntur, cum certum sit, propriè dictam Hierarchiam, animam sibi ipsi esse non posse.

Temerarium itaque est, ex istis locis, in quibus, non doctrina Theologica traditur, neque asserendæ de Ecclesiastica Hierarchia veritates statuuntur, sed Mystici conceptus proponuntur, libertate unicuique relictâ, eosdem ad morum ædificationem, & Angelorum commendationem, magis ac magis ampliandi, ad eorum, inquam normam, Theologicam, de Ecclesiastica Hierarchia tractationem Metiri, neglectis iis, ejusdem Auctoris, in quibus se *Magistraliter* loqui, & receptam à Theologis doctrinam tradere, profitetur.

Dum ergò S. Bonavent. varios ordines Christianorum, Hierarchiæ cælestis, vel Ecclesiasticæ Ordinibus, comparat, non
ideò

ided illos Hierarchiæ Ecclesiasticæ, strictè sumptæ inferendos, aut sacri principatus propriè dicta subjecta esse putat; sicut nec Gregor. omnes bonos, omnes Hierarchiæ Ecclesiasticæ propriè dicta membra esse, putat, quamvis eos cælestis Hierarchiæ ordinibus conferat, hom. 34. in Euang.

II. Quia nec iis ipsis locis, quæ à nobis cit. sunt, Bonav. unquam dicit, se divisiones Hierarchiæ Ecclesiasticæ, aut propriè, aut impropriè dictæ, multò minùs propriè dictæ tradere; sed solum se comparationem quandam instituere hominum & Angelorum, secundum varias dotes, in illis præsertim, quì salvandi sunt, refulgentes, ratione quarum, Hierarchiæ Angelicæ assimilari possunt.

III. Quia tantum abest, ut in iis divisionibus, Hierarchiæ propriè dictæ partitionem agnoscat S. Bonav. ut prædicti opusc. de Eccles. Hier. par. I. Hierarchiam Ecclesiasticam propriè dictam, definiat ipse tribus prædictis dotibus, *Ordinis*, *Iurisdictionis*; & *Charismatum* plènè instructam, ad quam nonnisi per clericales gradus in Ecclesia receptos ascendatur, cæteras autem comparationes, quas postea subungere proposuerat, valere duntaxat insinuat, ad vitæ nostræ conformationem, cum beatis spiritibus, & ipsorum imitationem explicandam. Quod ne ex meo dixisse videar,

videar, ipsum loquentem audire præstat.

Tertia est sub-cælestis, scilicet humana, quæ in prædestinatis hominibus perficitur, & præcipuè in prælatis. Hæc autem Hierarchia humana, ad similitudinem Cælestis Hierarchiæ ordinata est, & disposita, & secundum maiorem, vel minorem gratiæ, sive potestatis perceptionem, in majori, vel minori, sive in excellentiori, & inferiori gradu, ordinatissime constituta. Unde in Iob dicitur, nunquid nosti ordinem Cæli? Aut rationem ejus pones in Terra! Nosse Cæli ordinem, est cognoscere supernarum virtutum ordinatissimam dispositionem: Ejus rationem in terra ponere, est vitam & officium hominum, quamdiu in terra sunt, secundum similitudinem Cælestium Spirituum, Sanctæ & reverenter ordinare. Unde novem sunt ordines ordinandorum, sicut novem sunt Sancti ordines Angelorum. Est enim ordo Episcoporum, Presbyterorum, Diaconorum, Subdiaconorum, Acolythorum, Exorcistarum, Lectorum, Psalmistatus, & Ostiariorum: Sicut Moyse dictum est, iustice & fac secundum exemplar, quod tibi in monte monstratum est, &c.

Nostra itaque exemplaria sunt SS. Angelorum Agmina ordinata, ut scilicet secundum ipsorum ordinationem & operationem, nostram (quantum possibile est) ordinemus conversationem. Ut igitur illa omittamus, ratione difficultatis, & prolixitatis, quæ dixit Dionys. in Eccl.

Eccl. Hier. hoc sufficiat de hoc ista vice, quod ecclesia militans, in suis membris, disponitur cundum similitudinem Ecclesie triumphantis, & hoc, quoad ordinationem, & quoad actionem. Est enim Hierarchia, (ut dicit Dion.) ordo divinus, scientia & actus, Deiforme similans, & ad inditas ei divinitus illuminationes proportionaliter ascendens. In ordine, notatur distinctio illorum, qui per ordinatum officium, majorem vel minorem recipiunt potestatem. In scientia, notatur discretio; in actione verò, ministerium: Sine ordine enim, præsumptio est actio: Sine actione, negligentia est ordo: Sine scientia & discretione est actio reprehensibilis, & ordo inutilis; & ideo tam in ordine, quàm scientia & actione, hominum potestas, Dei uniformitatem imitatur, & secundum modum & mensuram suæ illuminationis, in ordine suo proficit, & rectè discernendo, & benè operando, & ad Dei conformitatem, quantum possibile est, ascendit. Locus iste mutilus est. Tunc verò Angelorum Hierarchie, quibus per imitationem, & vitæ conformationem; dum tres electorum hominum ordines, secundum trinas condiciones sive differentias singulas appropriatas comparantur; & hi tres salvandorum status significantur, per illos tres, quos dixit Ezechiel liberandos, si fuerint, inquit, in civitate hi tres viri, scilicet, Daniel, Noe, & Job, &c.

Noli lector, itaque si sapis quæ de conformitate

C

formitate vitæ salvandorum ad Sanctos Angelos, & de illorum ab his imitatione, fructuosè à S. Doctore scripta sunt, ad sacri Principatus, & Ecclesiasticæ Hierarchiæ dignitatem transferre, neque qui dotes aliquas Angelorum magis, quàm alii imitantur, eos nobiliores Hierarchas dicendos putes; nam nostræ, & cælestis Hierarchiæ differentia est, quòd hæc potestatem gubernativam, præsertim significat, in actione positam: Illa verò, in contemplatione potissimum, & Dei possessione consistit. In hac majorem quis gradum obtinere possit, qui cæteris præfertur, & sanctus non sit: in illa verò, eadem sit dignitatis Ordinis, & sanctitatis in singulis, proportio.

C A P. XIII.

*Aliqui alii Celebriores Scholastici,
Theologi proferuntur.*

Is Scholæ Theologicæ Mag. adjungendus Gabr. Biel. in 2. d. 9. q. 1. docens, Hierarchiam dici, quasi sacrum principatum, definitionesque ejusdem Hierarchiæ creatæ, sup. traditas, probans, tum illam, quod nimirum sit, *Rerum sacrarum, & rationabilium ordinata potestas, in subditis debitam retinens principatum*; Tum istam, ut sit
ordo

ordo sacratus, & scientia & operatio, quæ ad Dei similitudinem pro viribus nititur, &c. Denique, hanc postremo loco adjungens, Hierarchia creata est sacra quædam potestas, plures continens ordines, communicans inferioribus determinato ordine, quod à prima potestate divina suscepit.

Quæ omnes definitiones Hierarchiam nullam esse demonstrant, quæ non Ordine, scientia, & actione, instructa sit; quæ non potestatem Ordinis & Jurisdictionis, simul cum Charismatis habeat; quæ non principantium & subditorum collectio sit, quæ totius præsentis disputationis summa est.

Adjungendus Rich. de Med. villa, Ordin. Minor. Doct. clarissimus, qui eadem d. q. 1. Magistralem nuncupat prædictam definitionem, Hierarchia est rerum sacram, & rationabilium (rationale interpretatur idem esse, quod intellectuale) ordinata potestas, debitum in subditis retinens principatum; quam utique definitionem, Ecclesiasticæ, & Cælesti Hierarchiæ communem, asserit. Ibid. quoque, non esse concedendum, ait, inter personas divinas, prædictam Hierarchiam esse, quod inter eas non sit ordo principandi, sed summa æqualitas; innuens proinde, Hierarchiam prædictam, non esse, nisi inter eos, quorum aliqui principantur, alii verò principantibus subjiciuntur.

Idem tandem in 4. d. 4. q. 3. comparans, Hierarchiæ Ecclesiasticæ, ac Cælestis ordines, novem hujus, septem duntaxat illius, esse contendit; disparemque utriusque Hierarchiæ rationem esse, quòd ordines omnes Ecclesiasticæ Hierarchiæ, ad corporis Christi consecrationem, ordinari debeant: quod ipsum docuerat S. Bonavent. ibid. Quæ doctrina, acceptionem Ecclesiasticæ Hierarchiæ confirmat, pro solis clericorum ad Christi corpus conficiendum ordinibus, exclusis cæteris.

Item Durandus de S. Port. Dominican. familiæ insigne ornamentum, Apostol. quondam Pœnitent. & Episc. Meldens. Qui Hierarchiam à Dionys. traditam, ut sit *ordo divinus, scientia & actio*, nobis ita explicat, in 2. d. 9. q. 1. Ut hæc tria, unam Hierarchiam conflare, necessum sit, nec Hierarchia sit, si aliquid eorum desit, nec absurdum esse putat, quod Hierarchia, quæ unitate tantum ordinis una est, per hæc tria diversorum generum, integra definiatur.

Qui pariter, in 4. d. 24. q. 2. objectioni, adversus numerum septem ordinum, satisfaciens, respondet, quòd licet Hierarchia Ecclesiastica sit exemplata à Cælesti, non tamen potest eam imitari in omnibus, unamque Hierarchiam Ecclesiasticam tamen esse, testatur, quamvis Cælestis, propter plures modos recipiendi, divinam

divinam illuminationem, diversa sit; cum è contra, homines in statu viæ, uno modo recipiant ordines: Ordines verò septem tantum in eadem Ecclesiastica Hierarchia, statuit, quia quotquot sunt Ecclesiastici Ordines, ad unum Eucharistiæ sacrificium referuntur.

Quæ omnia, quo sensu, Hierarchiam Ecclesiasticam pro ordinis Hierarchia, sumpserit, nec varias illas Hierarchias probaverit, manifestè demonstrant. Quòd verò nobis, in omni Hierarchia Ecclesiastica perfecta, Jurisdictionem admittentibus, non repugnent, postea explicabimus.

Nec silendus, Henr. Gandav. quodl. 6. q. 23. a. 1. Ubi Hierarchiam ratione Charismatum, sub uno Deo Monarchâ, in eo sensu dici, fatetur, quo sensu etiam creaturæ irrationales, sub Deo, ad Deum reduci possunt imperfectè, creaturæ verò rationales, ad Deum perfectiùs reducuntur; eamque reductionem, ac proinde Hierarchiam ipsam, in ea fundatam, in Ecclesia Militante incipere, in triumphante finiri docuit: eamque ab Ecclesiastica Hierarchia discriminat: Et ita oberrationem eorum detegit, qui dispositionem istam creaturarum, sub Deo, quatenus ad ipsum Deum referuntur, ut ei uniantur, à quo exierunt, cum Hierarchia Ecclesiastica confundunt: Et Bonav. aliisque Mysticis DD. similiter

locutis, lucem adfert, quam utique auget, dum consequente serie, de ordine Hierarchico, militantis Ecclesiæ, ita differit.

In qua, inquit, sub Deo Christus, secundum quod homo, caput est & Monarcha, non tantum in spiritualibus, sed etiam in temporalibus, &c. Unde de ipso dicit Dionys. c. 5. Eccl. Hier. in ipso perficitur, & completur, omnis Hierarchiæ nostræ dispositio: Ipse autem tanquam homo, peregrè proficiscens in altum, non absque regimine, & ordine, in terris relinquere nos voluit, ne tumultuaret juvenis contra senem, & contra sapientem fatuus, sed inferiores in donis, & naturalibus & gratuitis, per superiores in ordine debito custodiret, & sic in Hierarchia totius Ecclesiæ militantis, esset principans, & cui principaretur, invenire. Quæcunque enim ut dicit Philos. 1. Pol. Constituunt unum aliquod commune, sive in conjunctis, sicut homo ex corpore & anima, sive in divisis, sicut exercitus in militibus, in omnibus est, invenire principans, & subjectum: quemadmodum in Harmonia Musica, est unus sonus principalis; & in mixto, unum clementum prædominans: & in homine anima corpori, & intellectus appetitui sensibili, & in domo vir uxori, & universaliter masculus feminae, & homo bestiis. Unde quæcunque persone, talem habent inter se distantiam in gratuitis, sive naturalibus, sive acquisitis, sive à Deo datis, quamvis distent prædicta ad invicem,

cem, talem inter se habent dispositionem, quod unum natum est, & debet, alteri principari, & ipsum dirigere.

Ex iis, & aliis, quæ ibid. subdit, fundamenta contrariæ opinionis subvertuntur, & adversum eorundem insultus, Catholica sententia munitur.

C A P. XIV.

Itemque facultatis Theologicæ Parisiens.

& Conc. Provinc. Senon. ac Syn.

Diac. Carnot. decreta, ante

Conc. Trident.

INter ultimos patientur adversarii, Joan. quoque Gersoni, Cancell. Parisiens. honorificum locum esse, à quo scilicet Hierarchiæ varias acceptiones, ejusque præsertim, quæ omnibus suis numeris absoluta esset, addiscere potuerunt.

Audiamus eum loquentem de potestate Ecclesiastica, confid. 9. Ubi Hierarchiæ Angelicæ, & Cælestis, hanc comparationem instituit, *Papalis auctoritas suo modo, cum Cardinalibus, imitatur triplicem primam (Angelorum Hierarchiam;) alteram verò mediam, imitatur Patriarchalis, Archiepiscopalis, & Sacerdotalis auctoritas, in habentibus subiectos sibi: quod dicitur propter curatos,*

vel etiam propter solos titulares Episcopos, carentes plebe. Ulrimi sunt instar tertiæ Hierarchiæ, qui hierarchizantur in Ecclesia, sed non alios auctoritative hierarchizant, quemadmodum sunt populi, & simplices religiosi, secundum Dionysium.

Clarius certè & expressius, in prædictæ Hierarchiæ Hierarchizantis gratiam, ferm. contra Bull. Mendicant. Si quis, ergò, inquit, petat, quomodo stabit Christianitatis Regnum, in his inferioribus? Resp. Hæc erit, servando ordinem, & exemplar regni superioris, Regnum Cælorum, certo ordine, & essentialibus conditionibus, atque permanentibus (quas nos Hierarchias appellamus) institutum est. Hæc est determinatio S. Dionys. in libro suo, quem ea de causa edidit, de Cælest. Hier. & institutione S. Pauli, &c. Apparet per has duas considerationes, in sancta Ecclesia, ordinem esse Hierarchicum, & essentialem, hoc est, ordinatum, stabilem & permanentem, ad Ephes. 4. & 5. Exemplum in homine, qui regnum est personale, videmus, membrum unum alteri jungi, cer'o ordine.

Et hic est ordo in sancta Ecclesia, ut sit unus Papa, Iesu Christi Vicarius, sint Cardinales, Archiepiscopi, Episcopi, Apostolorum successores, sint curati, successores 72. discipulorum, quos dicemus in seqq. Patet si aliquis homo, aut status, sine causa vel necessitate, perturbare vellet hunc Ordinem, illi resistendum est, &c.

Item

De Hierarchia Eccl. generatim. 57

Item postea Christianitatis Regnum fundatum est, & institutum in ordine, & dispositione Hierarchicæ prælationis, hoc est, Deus sic suam ordinavit Ecclesiam, ut in sancta Ecclesia esset ordo prælaturæ ad gubernandos alios, & ad Deum dirigendos, secundum tres, quæ ad prælaturam spectant, operationes, purgare, illuminare, & perficere, & hunc servando ordinem, stare debet regnum Ecclesiæ sanctæ hîc inferius, sic enim est in superiori Regno Cælorum, &c.

Eorum autem omnium DD. ac PP. quos pro explicanda Hierarchiæ notione, proferendos judicavimus (nam inumeros alios proferre possemus, tam ex Sæcularibus, quàm ex Regularibus viris; quique huic Hierarchiæ acceptioni, ut pro Pastorum sub-ordinatione sumitur, non inviti faverunt, & quos, ne fastidium genere-mus) brevitati studentes, libenter omittimus: agmen claudet Henr. Kaltefl. Dominican. S. Theolog. Prof. in Acad. Colon. & Hæret. Pravit. inquisitor, Orat. habita per duos dies, adversus Bohemos, de libera predicatione verbi Dei, factâ continuatione, altero die, non longè ab initio.

Notandum, inquit, quod sicut in Ecclesia triumphante, sunt tres Angelicæ Hierarchiæ, quarum Trinitas beatissima, caput est, quarum supremam, illuminat ipsa Trinitas per se, suprema mediam, & media infimam, & non è converso: Ita in Ecclesia militante, sunt tres sta-

tus, suo modo illam imitantes, sub uno capite, quod est Christus secundum quod homo; summum Papa, loco Christi, tenet in terris; medium Episcopi, loco Apostolorum; tertium curati, loco 72. discipulorum: Ex quibus apparet, quod secundum divini principatus Ordinem, quæ Hierarchia vocatur, sunt ordinarii Ecclesiæ DD. ad quos inexcusabiliter, ratione qualitatis sui status pertinet, illuminare populum Dei, ac cæteros actus Hierarchicos exercere, scilicet ad Papam, Episcopos, ac plebanos, vel loca eorum tenentes, &c. Nam unguentum, id est, pinguedo totius Ecclesiasticæ sanctitatis, ut est in capite, scilicet in Christo homine, prout congruit Ecclesiæ Hierarchiæ, descendit in barbam suam, id est, in B. Petrum, proximum ejus vicarium, & quemlibet ejusdem legitimum successorem: dehinc in Barbam Aaron, id est, cujuslibet prælati, seu Episcopi; legitime succedentis: dehinc in vestimentum, id est, Ecclesiasticos: dehinc in oram vestimenti, id est, populares, qui sunt extrema pars Ecclesiasticæ Hierarchiæ.

Probat ex Bern. hanc sub-ordinationem necessariam esse; ac tandem concludit, quod summa diligentia invigilandum, ne hic ordo Hierarchicus, tam regulariter à Deo institutus, ab ullo infringi patiatur, &c. Quæ omnia, quàm perfectè iis consentiant, quæ nos de Hierarchia scripsimus, ex prædictis innotescet.

Jam

Jam verò turmatim, totius facultatis Theologicæ Paris. sensum, non nuperum, qui ex censurâ librorum Anglicanor. patuit, (qua de re eruditissimè agunt, duo illa præclarissima lumina, facultatis Paris. Petr. Aurel. & Franc. Hallier in suis respectivè elucubrationibus) sed antiquiorem profero, ex litteris ipsius facultatis, ad Reg. Francisc. I. datis, ann. 1535. cum à Rege, occasione nascentis, in Germania hæresis, rogata fuisset, proferre sententiam, in quibus de Hierarchia sic scripsit: *Firmiter tenendum est, Hierarchiam Ecclesiasticam, quam politicam Ecclesiæ, nonnulli vocant, sanctam esse, & utilem, sed etiam jure divino institutam, quæ usque ad consummationem sæculi perduratura est, nec in humana esse potestate, illam instituere aut destituere. Postea dividit illam, eadem facultas, in Papam, Episcopos, & Plebanos, seu Curatos.*

Similiter Conc. Prov. senon. sub Anton. A prato, Cardin. tempore Clem. VII. ann. 1528. in decr. Mor. c. I. Orandus, inquit, igitur benignissimus Deus, ut fatiscentem Petri naviculam, tutâ tandem statione recipiat, sanctissimum Dominum nostrum Papam, & statum Hierarchicum Ecclesiæ, in perfecta charitate contineat: & Christianissimum Regem nostrum, ac supremum Dominum incoltamen nobis servet, votorumque compotem efficiat,

ciat, ut commissus illi populus, &c. Quid eò loci, per statum Hierarchicum intelligi potest, quàm status Pastorum & Prælatorum Ecclesiæ, qui Papæ conjungitur, & unitur, & cujus mentio, in Ecclesiasticis precibus, Regum temporalium, ac populorum mentioni, præmittitur?

Syn. denique Carnot. ann. 1626. apud Bochell. lib. 3. tit. 2. decret. c. 81. Ad Ecclesiasticam Hierarchiam, nemini, nisi per susceptionem tonsuræ clericalis, aditum, patere, testatur; ac proinde, Hierarchiam Ecclesiasticam, collectionem esse, virorum sacramento ordinis initiatorum, satis evidenter insinuat; sic autem loquitur, ista Syn. *Cum secundum SS. PP. sanctiones, qui volunt, in Domini sortem, Ecclesiasticæ Hierarchiæ adscribi, ut primam tonsuram Clericalem accipiant, à suo Episcopo, eam petere debeant, &c.*

C A P. X V.

*De explicatione Hierarchiæ, per Conc.
Trident.*

AB iis verò gradus nobis faciendus est, ad Conc. Trid. de Hierarchia definitionem. Syn. enim Trid. Præcedentium utique scriptorum, insistsens vestigiis, nec
novam

novam sibi fingens, Hierarchiæ acceptio-
nem, sed usitatam supponens, c. 4. sess. 23.
apertè & evidenter, Hierarchiam definit,
potestatem Ordinis, Jurisdictionis, & Charis-
matum donis, constantem.

Quòd si quis, inquit, omnes Christianos
promiscuè, N. T. Sacerdotes esse, aut omnes
pari inter se potestate Spirituali præditos, affir-
met, nihil aliud facere videtur, quàm Eccle-
siasticam Hierarchiam, quæ est, Cant. 6. ut
Castrorum acies ordinata, confundere, perinde,
ac si contra S. Pauli, 1 Cor. 11. ad Ephes. 4.
doctrinam, omnes Apostoli, omnes Prophetæ,
omnes Euangelistæ, omnes Pastores, omnes sint
DD. Proinde Sacro-Sancta Syn. declarat, præ-
ter cæteros Ecclesiasticos gradus, Episcopos, qui
in Apostolorum locum successerunt, ad hunc
Hierarchicum ordinem, præcipuè pertinere, &
positos, sicut ait idem Apost. Actor. 20. à Spi-
ritu Sancto regere Ecclesiam Dei: eosque Pres-
byteris superiores esse, &c. docet insuper, &c.
eos, qui tantummodo à populo, aut seculari
potestate, ac Magistratu vocati, & instituti,
ad hæc ministeria ascendunt, & qui ea propria
temeritate sibi sumunt, omnes non Ecclesiæ
ministros, sed fures, & latrones, per ostium non
ingressos, habendos esse.

Potestatem ordinis, iis verbis contineri
fatentur, sed solam volunt contineri: cæ-
teras dotes, ab Hierarchia, à Trid. ibi ex-
plicata propellunt, quòd hæc doctrina,

sacramenti ordinis explicationi, inserta sit. At quàm aperta etiam Jurisdictionis in ea Hierarchia necessitas, insinuat, dum scilicet ipsa, ut Castrorum acies ordinata, sub Episcopis, tanquam potissimis Hierarchis, describitur, ita ut sicut omnis exercitus, suis ducibus paret, atque ordinatâ dispositione subjicitur: Similiter tam Presbyteri, quàm reliqui inferiores ministri, Episcoporum Jurisdictioni, ex Christi institutione subdantur: Dum nonnisi accepta facultate, ab Ecclesiastico præposito, ad Ecclesiasticos gradus ascendi, aut ipsorum ministeria exerceri posse, definitur?

Quid enim est, quæso, ista licentia, quæ inferioribus ad ista ministeria Ecclesiastica, liberè exercenda, conceditur, ordinis est, an Jurisdictionis? certè Jurisdictionis particula quædam est, quâ in hac vel illa Ecclesia, huic, vel illi populo, sacrorum ministeriorum fructus impendere, ab habente ordinariam Jurisdictionem, conceditur. Gratiarum quoque seu Charismatum, implexas Hierarchiæ Ecclesiasticæ notioni dotes, eadem Syn. ostendit, dum ad ejusdem explicationem, quam Hierarchiam Ordinis fatentur, nos etiam Jurisdictionis esse, monstravimus, Apostoli ea loca proferuntur, ex quibus potissimum, suam Charismatum Hierarchiam conficiunt & confirmant.

Fixum

Fixum ergo ac ratum sit, non ita de Hierarchia Ordinis, Conc. Trid. loqui, ut ad ejus perfectionem atque integritatem, ordinem solum Ecclesiasticum sufficere, sed insuper Jurisdictionis potestatem, & Charismatum divinorum subsidia, necessaria esse, censeat; quam proinde Hierarchiam, ita cumulatè dotibus istis instructam, ita munitam, in tres ordines distribuit, c. 6. dum ait, *Si quis dixerit in Ecclesia Catholica, non esse Hierarchiam, divina ordinatione institutam, quæ constat ex Episcopis, Presbyteris, & Ministris, anathema sit.* Quibus verbis, licet summi Pontificis, qui jure divino præest omnibus Hierarchis, & Fidelibus populis, licet Archiepiscoporum, Primatum, Patriarcharum, non meminerit, quos constat, non divina, sed Ecclesiastica ordinatione institutos, ab Hierarchia tamen nec gradus istos, nec Jurisdictionem excludit; sed duntaxat, sacrum principatum, omnibus suis numeris absolutum, dividit in eos ordines, quibus Jurdictio connaturalis esse potest, quibus officia Jurisdictionem inferentia, consentanea sunt, & Charismata ordini, atque officio, adnexa debentur.

Quos ordines esse docet, Episcoporum, Presbyterorum, & Ministrorum: Quo nomine *Selectos*, quos vocat Dionys. *Ministros*, id est, Diaconos interpretamur, quos
Mini-

Ministrorum nomine duntaxat, significavit Trid. Conc. definire scilicet nolens, quæstionem duplicem, primam, an reliqui etiam ordines, à Diaconatu diversi sint, ex divina ordinatione, an verò ex Ecclesiæ institutione additii: Alteram, an eisdem, principatus quoque sacer, connaturalis sit, v. g. num etiam Subdiaconorum Ordini, & aliis inferioribus, officia Jurisdictionis, adnecti consentaneè possint, sicut Episcoporum ordini, Amplissima jurisdictio congruit, & Presbyterorum ordini, & curatorum; Diaconis, Archidiaconorum officia, Jurisdictionem adnexam habentia, demandantur. Unde Syn. Trid. haud dubiè, tam ordinis, quàm Jurisdictionis mixtionem, Hierarchiæ Ecclesiasticæ conflandæ, necessariam censuit; eamque fuisse mentem, omnium PP. Conc. Trid. Auctor alioqui damnandus, sed in iis, quæ hæresi minimè favent, nequaquam gratuito mendax censendus, testatur, lib. 6. Hist. Conc.

Unde monitum hîc velim, eos, qui eas dotes, quas Trid. Syn. ut perfectam Hierarchiam constituent, conjunctas exposcit, divulsas à se invicem, atque abstractas, quasi distinctas, perfectas Hierarchias conficere contendunt, eos inquam, nec Concilii mentem, nec totius antiquitatis, quam Conc. secutum est, sensum percepisse, fatea-

fateamur, necessum est: Quis enim probet, Conc. Trid. mentem, cum affecutum esse, qui fateatur, novam se, & sine cuiuspiam auctoris præcedentis ductu, Hierarchiæ divisionem, invexisse? Scilicet, Trid. Syn. vestigia sequitur, qui primus à nemine calcata viam terit? Longè itaque à percipienda Conc. Trid. mente aberrant, qui novam viam adaperiunt redeundumque eis ad communem, & antiquam Hierarchiæ notionem, si quidquam appositè ad sensum Trid. Syn. voluerint loqui.

C A P. XVI.

*De ejusdem nominis acceptione, apud
Recentiores Societatis Jesu,
scriptores.*

NEc tantum, hanc Trid. Syn. mentem affecuti sunt, inter Scholasticos, Scot. in 4. d. 24. q. 2. a. 2. aut Albert. Pigh. toto libro, de Eccl. Hier. aut Sander. lib. 7. de visib. Monarch. eccl. & alii passim, qui Hierarchiam, juxta nostrum sensum acceperunt. Sed & plures, è Societate Jesu scriptores, qui non minimam Doctrinæ ac pietatis laudem affecuti. Hanc Syn. Trid. mentem perceperunt: Card. Bellarm. dum lib. 1. contr. gener. de

de Menbr. Eccl. seu de Cler. c. 11. Respond. ad object. Kemnit. Numerum ordinum Ecclesiæ septenarium, ex eo impetentis, quòd tres tantum ordines Hierarchiæ, à Dionys. referantur, consecutionem negat. *Tres enim sunt; inquit, Hierarchiæ in Ecclesia militante, ut etiam tres sunt in Ecclesia triumphante: Prima est Pontificum, secunda Sacerdotum, tertia Diaconorum: Diaconi enim etsi ministri dicuntur, & sint, si comparentur ad Sacerdotes, tamen sunt etiam principes & præfules, si comparentur ad plebem, & idè dicuntur Hierarchæ. Ordines autem inferiores, non præsumt populis, sed tantum ministrant Diaconis, & Sacerdotibus.*

Potuitne clariùs Bell. non solùm nostræ sententiæ, de Diaconibus, in principantium ordinem, præ cæteris inferioribus clericis transferendis, assentiri, quàm iis verbis assensus est? Potuitne certius insinuare, præter ordinem, Præsulatum quoque, seu potestatem gubernationis, ac Jurisdictionis, ad Hierarchiam requiri: defectu cujus, inferiores Diaconatu ordines, licet veri ordines essent, Hierarchici tamen non essent: Putasne eum, qui ministeria, & functiones ministrorum Ecclesiæ, Hierarchica negavit, secundum Dionys. mentem, quòd Jurisdictionem connaturalem minimè obtinerent; Monachorum ut monachi sunt, etiam eorum quos fratres
Laicos

Laicos dicimus, etiam monialium, Hierarchica putasset? Respuisset sanè novam istam præsumptionem, quam nequidem in ullius mentem venturam, suspicatus est.

Hunc sensum ejusdem Trid. Syn. agnovit, & tradidit, Henr. Henriq. in Acad. Salmat. S.T. Prof. de Sacram. lib. 10. c. 25. §. 1. dum ait, *Hierarchia Ecclesiastica constituitur ex variis membris, cum dispari gradu dignitatis, & cum potestate clavium*, cui Hierarchiæ Papam, Cardinales, Legatum à Latere, ac Nuntium Apostol. Patriarchas, Primates, Archiepiscopos, Episcopos, vicarios Episcoporum, & alios inserit, & c. seq. §. 1. *In Ecclesiastica Hierarchia, sunt varia membra, & unum excellit alterum, in gradu & potestate ordinis: quod vero est ordine æquale, aut inferius interdum excellit gradu dignitatis Ecclesiasticæ, quam §. 2. à attendi docet, respectu Jurisdictionis in Foro Contentioso.* Ex quo colliges, mentem ipsius esse, Hierarchiam Ecclesiasticam, & Ordinis, & Jurisdictionis complexione constare: Ita scilicet, ut in membris istius Hierarchiæ unicæ, inter se comparandis, tam hujus, quam illius habeatur ratio, & fieri possit, ut uno respectu, unum alteri præcellat, & ab alio, alterius ratione vincatur.

Nec ignoravit hanc Trid. mentem,
Franc.

Franc. Turr. vir ex eadem Soc. Doctissimus, not. suis, in cap. 44. lib. 8. Constit. Apost. Ubi ex eo, quod Episcopi, Presbyteri, & Diaconi, *Dynastæ* dicantur à S. Clem. novatores nostri temporis hæreticos, tanquam ordinis Hierarchici turbatores, refellit, quod in eam, alios, quàm eorum graduum viros, intrudent. *E. go*, inquit, *Apostolicam doctrinam negant, qui clerum & Ecclesiasticam Hierarchiam, quæ ex clero constat, non separant à Laicis, quin eam prorsus tollunt*: Ergo secundum ejus mentem, Hierarchia solum ex clero constat, nec nisi ex Episcopis, Presbyteris, & Diaconis, quos *Dynastæ* appellat S. Clem. & qui secus sentiunt, Apostolicam doctrinam evertunt: Audis, quàm severe, Turrian. doctrinam aliorum stringat?

Nihil tandem de Conc. Trid. audiisse videbitur, Magallian. S. Script. olim in Hispania Professor, dum Proæm. in tres D. Paul. Epist. scilicet utramque ad Timoth. & unicam ad Tit. Sect. 8. Ecclesiæ gubernationem, prout est in summo Pont. rectè vocari dicit Monarchiam. *Si autem*, inquit, *speçtetur, quatenus ab illo derivata, ad inferiores prælatos funditur, Hierarchia, id est, sacer principatus, rectè appellatur*. Tum Sect. 9. in qua, tam Ordinis, quàm Jurisdictionis, potestatem Hierarchicam explicat, & unam ab alia, in Hierarchiæ constitutione,

tutione, nequaquam distinctam esse, ostendit. Plurium expressiora alia testimonia daturus, nisi hæc sufficiant.

Sed quid necessum est, varia auctorum testimonia colligere, quibus placuerit, non ex una potestate, vel Ordinis, vel Jurisdictionis, multo minus, ex liberali in aliquos, Charismatum sacrorum diffusionem, Hierarchiam conficere, aut ex una, ex iis dotibus, perfectè aliquos Hierarchicos, & principantibus ordinibus insertos dicere, sed nonnisi ex complexione istorum omnium, perfectè Hierarchiæ statum conflare? Quid, inquam, hæc referre necessum est, cum facilius sit, & expeditior, adversariorum constringendi ratio, si cogantur ipsi, aliquem nominare, qui Hierarchiam, aut Ordinis, exclusa Jurisdictione, aut Jurisdictionis, excluso Ordine, aut (quod vel leviter insinuatam nunquam legent) Hierarchiam Charismatum aliquam, ab Ordine Ecclesiastico, & Jurisdictione separatam, apertè statuerit.

Si aliquem, ex Antiquis auctoribus nominaverint, herbam porrigo: si ex recentioribus, ante enatas istas controversias, temeritatis apud me, se utcunque excusabunt, quamvis auctoritatis, parum inde sententiæ, conciliaturi sint: si vero (quod indubiè speramus futurum) nec ex antiquis, nec ex recentioribus, ante enatas istas con-

controverſias, qui ſecum in acceptione Hierarchiæ, omninò conſenſerint reperire poſſint, ullum proferre poſſint: nemo eſt, qui non videat, vocis innovationem, doctrinæ innovationi, tanquam neceſſariam, excogitatam fuiſſe; doctrinæ verò novitatem, vel hoc unico præjudicio, eſſe damnamam.

QUÆSTIO II.

De Hierarchiæ Eccleſiaſticae, propriè dictæ, Natura.

CAPUT I.

Definitio Eccleſiaſticae Hierarchiæ traditur, & explicatur.

Hierarchiæ Eccleſiaſticae propriè dictæ, ex prædictis natura, facile colligitur, varias ejus definitiones, ex Dionyſ ſuper. prolatas, in animum revocare oportet, quibus conſentiunt Maxim. & Antioch. Palæſt. Monach. deſcriptiones, quas item illuſtrant Hug. à S. Viçt. & aliorum Theologor prolatae ſuper. explicationes.

Expe-

Exedit etiam meminisse ejus definitionis Hierarchiæ, juxta quam dicitur, Hierarchia, rerum sacrarum, & rationabilium, ordinata potestas, debitum in subditos retinens principatum.

Circa quam observare conveniet, istos auctores, qui eam tradiderunt, cit. nempe Guil. Antissiod. Bonavent. Rich. Gabr. Biel. itemque Dionys. Carthus. in 2. d. 9. aliosque plures, qui eandem, tanquam Magistralem, ac celebrem in scholis, commendarunt, istos, inquam, voluisse hac definitione, Hierarchiam, non solum personarum, verum etiam actionum comprehendere, ideoque nomine communi, rerum, non personarum usos fuisse: quamvis, ut mox dicemus, Hierarchiæ personarum, hæc definitio convenire possit; itemque voluisse, Hierarchiam Ecclesiasticam, etiam & Cælestem, hac definitione complecti, nec ullam aliam Hierarchiam propriè dictam, inter homines atque Angelos, quam istam, cui hæc definitio conveniret, agnovisse, nec ad Sacerdotalis Ordinis seu Clericalis, quæ in Angelis locum non habet, Hierarchiam, definitionem suam restrinxisse.

Quia verò de Hierarchia jam loquentes: de personarum Hierarchia, non functionum, loqui solemus, nec de Hierarchia Cælesti, verba hæc facimus, ideo nos
Hierar-

Hierarchiam Ecclesiasticam, in eo sensu fumentes, Hierarchiam definimus, *hominum Sacrorum ordinatam potestatem, debitum in subditos, retinentem principatum*, seu ducatum. Quâ definitione tam veteris, quàm novæ legis Hierarchiam, complectitur: Non enim ab Ecclesiastica Hierarchia, seu Sacro Ecclesiastico principatu, legalem rejicimus, cui novæ legis status succedit, qui ab initio mundi, vel saltem à receptione legis, sicut & Ecclesia decurrens successionis non interruptæ tramitem, regiminis eandem quodammodo formam servat, eatenusque diversus est, quatenus fœcunditatis in nova lege successibus copiosior, gratiarum copiâ uberior, rerum prædictarum eventu illustrior, promissorum præstantiâ clarior, antiquæ legis principatum, ampliori longè gloriâ superat, qui tamen nostri & principatus, & sacerdotii, & initium videtur esse & origo.

Unde sicut idem fluvius dicitur, & qui primum, aquarum paucitate, inglorius, accurrentium undique rivulorum copia, intumescit, & deinde profluentes largiter alveos suos, latius emittit; robur unum est, quod tenaci radice fundatum, ramos exinde suos felicius expandit: Ita una est Ecclesiastica Hierarchia, quæ in statu naturæ confusior, in statu Mosâicæ legis ordinatior, in statu gratiæ optimè composita multo-

multoque sacratior, fecundior, & locupletior effecta est. Quod respiciens Apost. ad Ephes. I. *Super omnem Ecclesiam, tam quæ in Cælis, quàm quæ in Terra est, Christum caput datum esse scribit: Ecclesiæ, quæ in Terra est, nomine, tam fideles in nova lege futuros, quàm qui in veteri fuerant, haud dubiè intelligens, quibus scilicet utrisque, caput est Christus, utrosque connectens, & utrorumque Redemptor agnoscendus.*

Potestas dicitur [*Hierarchia*] nullus enim principatus, absque potestate, & agendi auctoritate: duo enim ista, nomine *potestatis* significantur, nomenque istud, & pro ordine Sacro, qui potestas quædam est ad actiones Ordinis, cujusmodi sunt Sacrificii, & Sacramentorum confectiones, ac celebrationes, aliaque sacra ministeria; & pro Jurisdictione sumitur, quæ potestatem actus quosdam legitimos faciendi, & agendi in sibi subditos, importat. Dicitur [*potestas Sacrorum*] hominum, eorum scilicet, qui in alios, eosque purgandos, illustrandos, perficiendos (in quibus potestas sacra consistit) ordinati sunt ac consecrati.

Dicitur [*potestas ordinata*] *Quæ enim à Deo sunt, ordinata sunt*, ad Rom. 13. ideoque Dionys. c. 13. Cæl. Hier. Hierarchia omnis, *ἡ ἐκ τῆς*, seu sacer ordo dicitur. Consistit autem iste ordo, 1. in au-

D

toritate

etoritate superiorum circa inferiores, ut docet Dionys. eodem c. *Ordo Hierarchie hoc postulat, ut alii purgentur, alii purgent: alii illuminentur, alii illuminent: alii perficiantur, alii perficiant: quod fusiùs prosequuntur Nazianz. Orat. 26. Idid. Pelus. lib. 2. Epist. 116. & alii passim.*

II. Consistit etiam in eo, quod tota virtus inferiorum Hierarchiarum, in superiori contineatur, & non è contra, ut docet Dionys. c. 5. Cæl. Hier. asserens, *Eos quidem ordines, qui superiores sunt, inferiorum etiam illustrationibus, virtutibusque, esse præditos, extremos etiam iis, quæ superioribus insunt, carere.* Item c. 11. ejusdem lib. *Summi Spirituum ordines, abundè etiam inferiorum, sanctas proprietates habent, ultime autem excellentes, nobiliorum in totum perfectiones non habent.* Quibus similia habentur c. 1. Eccl. Hier. Quod ipsum confirmat Ambr. in c. 4. Epist. ad Ephes. docens, *in Episcopo omnes Ordines esse, qui primus sacerdos est, &c.*

III. In eo, quod vetitum sit, supra suum Ordinem, cuiquam aliud aggredi, quod ipsum & Dionys. jubet, c. 3. Hier. Eccl. loc. à nobis super. cit. Atque in eo, Constit. Apost. lib. 3. c. 11. *Ἐκκλησιαστικῆν ἀρχιερωσύνην, Ecclesiasticum Concensum & Ordinem, collocant.*

IV. Quod inferiores in superiores omnem

omnem actionem Hierarchicam rejicere, ac refundere debeant, & per inferiores superiores agere dicantur, tanquam per ministros suos, quemadmodum sup. ex eodem Dionys. c. 13. Cæl. Hier. docuimus. Quod etiam ex ejus Epist. ad Demoph. discere poteramus.

v. Quòd omnia consentire debeant, nec ullum aliud contemnere, ut fusè docent Naz. Orat. sup. cit. Nyss. Hom. 13. in Cant. S. Leo. serm. 10. in quadrag. & alii passim.

vi. Quòd unumquodque Hierarchiæ membrum, suo loco stare, nec unquam alterius officia, usurpare debeat, singulæque singulorum utilitatibus deserviant: in quo, *Harmoniam Ecclesiæ omnium membrorum*, collocat, Ambr. lib. 3. de Off. c. 3. *Ordinem Ecclesiæ*, Naz. Orat. 26. cit. Quod si secus fiat, ut præpostero ordine ponantur, Hierarchiæ Ecclesiasticæ membra, & unum supra aliud indebitè efferatur, totum exinde corpus deformari, tradunt Aug. de civ. lib. 14. c. 12. Bern. de Confid. ad Eug. lib. 3. c. 4.

vii. Denique, quòd divinæ gratiæ, motiones, illustrationes, virtusque omnis operandi divina, à Deo ad supremum Hierarcham, eoque Mediante, ad supremos Ordines, ab iis ad Medios, à Mediis ad inferiores transferantur, quod

copiosè pariter divin. Dion explicat, c. 9. 10. & 13. Cæl. Hier. & Epist. ad Demoph. & Breviùs, c. 5. Eccl. iis verbis: *Mos quidem divinitatis hic est sanctissimûs, per primam, secundam & inferiora, ad divinissimam lucem suam deducere*, quod fusè postea, tam in ordine naturæ, quàm gratiæ, prosequitur. Explicat id ipsum eleganter Clem. Alexand. lib. 7. Strom. egregia ista comparatione, *quemadmodum ergò vel minima pars ferri, lapidis magnetis spiritu, movetur per multos annulos ferreos extensa: Ita etiam qui sunt virtute præditi, divino Spiritu attracti, cum primâ mansione conjunguntur, deinceps autem alii, usque ad postremam.* Confirmant Athan. lib. de Comm. Essent. nec non qq. ad Antioch. Resp. ad 31: Nazianz. Orat. 12. S. Leo Epist. 84. & Serm. 3. in die Anniv. Assumpt. suæ; Pifid. de Mund. Opif. S. Maxim. Schol. in S. Dionys. Pachym. & alii passim.

Adduntur in prædicta definitione, ista verba, *debitum in subditis retinens principatum*, quibus duo significantur, 1. Hierarchiam omnem, subditos habere, in quos exerceatur; alterum, debitum inter eos ordinem, observari debere, nec indebitam potestatem, quemquam usurpare oportere: hanc verò mutuam, inter agentia & patientia, necessitudinem: hanc perficiendi alium,

alium, obligationem, recipiendi ab alio perfectionem, indigentiam: hanc necessitatem parendi, & auctoritatem imperandi, Hierarchiæ pulchritudinem, non solum, verum etiam unitatem fovere, ostendunt, S. Greg. lib. 4. indict. 13. Epist. 52. Episcopis Galliar. & Greg. 7. lib. 6. Epist. 35. Rothomag. Turon. & Senon. Archiepisc. his verbis; *Ad hoc dispensationis divinæ proviso, gradus diversos & ordines constituere esse distinctos, ut dum reverentiam minores, potioribus exhiberent, & potiores minoribus dilectionem impenderent: vera Concordiæ fieret ex diversitate contextio, & rectè officiorum gereretur administratio singulorum; neque enim Universitas, aliâ poterit ratione subsistere, nisi ejusmodi magnus eam differentiæ ordo servaret, &c.* Vide etiam ea de re fusiùs differentem, eundem Greg. Magn. lib. 28. Moral. c. 6.

Ex quibus, definitio Hierarchiæ, non recens fictæ, sed à Majoribus traditæ, nobis constat, qui Ordinem connotet, ac consecrationem eorum, quos suo ambitu complectitur, item eorum dein Jurisdictionem, potestatis Ordinatæ nomine, debitoque in subditis principatu, significatam, Charismataq; tandem, quæ ad actus Hierarchicos facultatem agendi, ipsis tribuunt non auctoritatem: excluditur autem per hanc definitionem, fictitia Hierarchia Charisma-

tum, cui nec subditi ex adverso respondent, in quos principatum exerceat suum, ac potestatem ordinatam agendi tribuat, modo super. explicato: excluditur temporalis principatus, ad quem, non consecratione, non ordinatione opus est: excluditur ordinatio dæmonum, quæ & inordinata est, quia à Deo non habet initium; nec sacra est, vel Sacrorum, nec debitum exercet principatum: excluditur Hierarchia Cælestis, quia hominum non est, sed Angelorum; vel si hominum est, non jam humanâ consecratione, illustrium, nec humano principatu fruendum, sed hominum, in Angelicos Ordines, & Hierarchias, quodammodo translatorum, qua de re Theologi, i. p. differunt, cum S. Thom. q. 108. a. 8.

C A P. II.

Quædam observationes, circa istam definitionem.

V Erùm aliqua circa prædictam definitionem, ulteriùs observanda sunt: 1. Quidem, ad definiendam Hierarchiam actionum, retineri potuisse, traditam ab antiquis, definitionem, *Ut sit rerum sacram, & rationalium ordinata potestas, in subditis debitum retinens principatum.* Eo enim, quòd

quòd sit rerum rationalium potestas, id est, quæ ratione geruntur, & disponuntur, à naturali potestate differt. In eo, quòd sit *rerum sacrarum*, à temporali potestate, quæ circa prophanas versatur. In eo, quòd debitum in subditis retineat principatum, ab usurpata, & illegitima, rerum sacrarum invasione, quæ *potestas facti*, dicitur, *non juris*, discriminatur, & à privata potestate, quâ unusquisque in seipsum agit, non in subditos, discernitur: & ita Hierarchica potestas, à cæteris potestatibus, separatur.

Sed hæc definitio, Cælesti, & Ecclesiasticæ Hierarchiæ conveniet: ideoque adhibendæ erunt, aliquæ particulæ, quibus Angelicam Hierarchiam ab humana, Ecclesiasticam à Cælesti distinguas, ut quòd *hominum Viatorum* esse dicatur: Ita enim humanam ab Angelica, Ecclesiasticam Hierarchiam à Cælesti separabis.

Alterum observandum est, in prædicta definitione, utroque illo modo explicatâ, aliò modo Charismata includi, aliò verò, tam Ordinem, quàm Jurisdictionem: nam Hierarchia directè potestas dicitur, tam Ordinis, quàm Jurisdictionis, potestas autem Charismatum directè non dicitur. Etenim potestas, quam Hierarchicam esse, prior definitio ostendit, habet tres conditiones, quarum nulla potestati seu facultati, quam Charismata tribuunt,

æquè convenit ac potestati Ordinis vel Jurisdictionis.

1. Dicitur potestas sacrorum hominum, quod propriè potestati Ordinis convenit, quæ sacros homines facit, & nonnisi per consecrationem, ad altaris ministerium tribuitur: Convenit etiam potestati Jurisdictionis, tum quòd potestatis Jurisdictionis pars potissima, quæ v. g. in absolutione à peccatis, & in ordinatione sacrorum ministrorum, aliisque consistit, in potestate ordinis fundetur, & ab eâ separari ac divelli nequeat: tum quod cæteræ Jurisdictionis partes, licèt per accidens aliquando, ab ordine separentur, tamen hæc sèparatio violenta sit, & accidentaria, nec ex divina Institutione perpetua, nec officia Jurisdictionis qualiscunque, in Ecclesia Dei, ullis præterquàm sacro ordine initiatis, debita sint, aut connaturalia, ut ostendemus: è contra verò, quod ad Charismata spectat, *Spiritus ubi vult, spirat*, Joan. 3. & effunditur nonnunquam *super omnem carnem* Joël. 2. & Actor. 2. Ideoque non potest æquè dici potestas sacrorum hominum, ac potestas Ordinis ac Jurisdictionis.

II. Eadem potestas dicitur ordinata propter varios gradus sibi sub-ordinatos, & ab uno principio dependentes qui gradus vel attenduntur secundùm potestatem Ordinis, quæ in Episcoporum, Presbyterorum

rorum & Diaconorum ordinibus, sibi subordinatis, diversa est; vel secundum potestatem Jurisdictionis, quæ in Patriarcharum, Archiepiscoporum, aliorumque gradibus, à summo Pontifice dependentibus, ordinata resplendet: non item potestas Charismatum, quæ dividitur singulis, prout *vult spiritus*, & ita diversa censetur, ut ab eodem tamen spiritu, immediatè, singulorum animis infundatur, ut colligitur ex I Cor. 12.

III. Dicitur potestas ista, *in subditis debitum retinens principatum*, quod potestati Charismatum, præcisè non competit, cui nulli solitariè spectatæ, subditi debentur, sive speciatim, sive generatim: cum è contra, potestati ordinis, subditi aliqui, generatim saltem & indeterminatè respondeant: potestati verò Jurisdictionis, saltem perfectæ, determinati aliqui subditi debeantur.

Similiter in definitione posteriori, potestas *circa res sacras & rationabiles*, est potestas Ordinis, quæ circa res sacras & rationabiles, dicitur versari, quatenus potestas, est Ordinis, cui proprium est, circa sacra mysteria, quæ ratione & consilio fiunt, non bonitate aut sanctitate ministri, perficiantur; & idèd *res rationales* vocantur, *sacra* verò *officia* sunt, quia ad Altaris ministerium referuntur, in quo omnis sancti-

tatis & consecrationis fons Christus; & idè *res sacræ*, dicuntur. In subditis verò debitum retinet principatum, quatenus est potestas Jurisdictionis: Charismatum autem potestas, tanquam solum annexa potestati Ordinis, ac Jurisdictionis, in Hierarchia consideratur, sive tanquam dispositio, ad utramque potestatem, consentaneè & congruenter recipiendam; sive tanquam utramque adjuvans, & in suis officiis, utrique deserviens.

Unde Charismatum ista virtus, homines non quidem Hierarchas efficit sed Hierarchicos, nec ullos Hierarchiæ inferit; sed dignos facit, qui vel Hierarchiæ, tanquam primores inferantur, eo nempe sensu, quo apud Sidon. *Sacerdotes viri*, dicuntur, non *sacerdotes*, qui morum sanctitate præcellunt, lib. 4. Epist. 9. & in conc. *Episcopales* vocantur, qui non sint Episcopi, sed Episcopatu digni; vel certè dignos facit, qui Hierarchicis functionibus intersint, iisque subjaceant: quam acceptionem videtur amplexus Dionys. c. 3. Eccl. Hier. in Theor. *Hierarchicorum*, ab omni admixtione, liberam prudentiam, commendans; eorum nomine, sanctum omnem populum complectens, iisque opponens, qui desertâ divinâ vitâ, ac moribus, cum perniciosis dæmonibus consentiunt; & idè ministri voce illos à sacris expel-

expellentis, hos verò retinentis, discerni docens.

Non itaque principatum ullum, potestas ista Charismatum tribuit, sed ornat, & ad sua officia habilem facit: non hominem ad gradum majorem promovet, sed suo gradu dignum, & officiis ac gradui parem præstat: Actionibus potius necessaria est, quàm gradui. Atque idè Dionys. Hierarchiam præsertim, tam pro functione sumens, quàm pro gradu Hierarchico, Hierarchiam & *scientiam*, & *operationem* definivit. Theologi verò Hierarchiam, potius pro gradu sumentes, quàm pro actione, non *operationem*, sed *potestatem* eam definiunt, nec *scientiam* esse dicunt, sed *potestatem*, scientiâ, aliisque Charismatis; ad sua munia ritè obeunda, ad gradum legitimè tenendum, indigentem definiunt.

Quamvis utrique convenient, quòd nec Dionys. Hierarchiam sine potestate ordinata, quam *ordinem* vocat, interprete Hug. lib. 3. Cæl. Hier. Nec Theologi Hierarchiam, omnibus suis numeris absolutam, putent, nisi & scientiam & operationem habeat.

QUÆSTIO III.

Quòd omnis Hierarchia, subditos habeat.

CAPUT I.

Probatür ista veritas, variis rationibus, ex præcedentibus.

EX prædicta definitione patet, Hierarchiam agentium, nullam esse, quæ non subditos habeat, circa quos, suam activam potentiam exercent, & in quibus, debitum principatum retineat. Quod cum à nonnullis, novitati magis, quàm antiquitati, studentibus, passim negetur, fusius hîc nobis, & accuratùs probandum est. Omitto definitionis præcedentis auctoritatem, non à nobis fictæ, sed à maioribus nostris acceptæ, ex qua apertè id convincitur. Omitto nominis *Principatus* vim, & *regiar*, quem absque subditis statuere, vel cogitare, ridiculum omninò est, & à nativa vocis significatione, penitùs alienum. Omitto eodem modo, servata proportionè, de Hierarchia, seu sacro principatu

cipatu, loquendum, quo modo de temporali; at temporalem principatum, sine subditis. nemo haftenus somniavit. Omitto omnes actus Hierarchicos, in subditos terminari, ac proinde & ipsam Hierarchiam.

C A P. I I.

Probatur à consensu Theologorum, & PP. circa Quæstionem, utrum detur aliqua Hierarchia divina.

VErùm prætermittere non possum Theologorum, & PP. Consensum. 1. enim, Theologi, inter personas divinas, nullam Hierarchiam idè admittunt, quòd nulla aliâ superior sit, nulla aliâ inferior. ea est ratio D. Thom. q. 108. a. 1. in corp. Ubi enim docuit, distingui Hierarchias; *ratione multitudinis subjectæ*; mox subdit, *Unde manifestum est, eos errare, & contra intentionem Dion. loqui, qui ponunt in divinis personis, Hierarchiam, quam vocant, super-cælestem, nam ut Dion. dicit, 3. c. Cæl. Hier. Ordo Hierarchiæ est, alios quidem purgari, & illuminari, & perfici: alios autem purgare, & illuminare, & perficere.* Ea Ratio Rich de Med. Vill. inter personas divinas, Hierarchiam non esse, asserentis, quòd inter eas, non sit ordo principandi, sed summa

æqualitas : eadem cæterorum plurium Theologorum est ratio.

Eadem quoque est sententia & ratiocinatio PP. Dionys. mentem ex loc. cit. colligere possumus; verbis enim à D. Thom. cit. subdit, beatitudinem divinam, ab omni dissimilitudine liberam esse, purgare quidem, illuminare & perficere, seu potius, *non tantum esse purgationem, illuminationem, perfectionem, sed esse supra omnem purgationem, supergredi imitationem illuminationis, imò ipsam perfectionis auctorem esse principalem, & omnis quidem sacri principatus causam esse, eo omni quod sacrum est, per excellentiam præstantiorem.* Quibus verbis satis, ni fallor, ostendit, non solum sacram Trinitatem supergredi, Hierarchiam omnem, sed & divinam beatitudinem, quia ipsa videtur transcendere omnem Hierarchicam functionem; causam tamen ipsam esse totius Hierarchiæ, quæ ad eam assimilationem, quam Dei visione assequimur, tendit, quemadmodum eodem c. docet.

Athan. eadem sententia est, qui Hierarchiam à Trinitate excludit, Resp. ad q. 13. var. qq. tom. 2. inter ejus opera. Ibi enim jubet tam patrem, quàm Filium, & Spiritum S. dici *τοῖς ἀρχαῖς, durationis principio, & principatu dignitatis carentes, καὶ τοῖς ὑψίστοις, simul principii, & principatus expertes.* Nazianz. pariter carm. de Princ. abso-

absolutè Deum *ἀρχον*, statuit. Quamvis de patre possit intelligi. Cum ergò Principatus, & Principii expertes, personas divinas, Athan. saltem velit, ab iis quoque Hierarchiam excludit, quam scilicet recentiores, & *sacrum principium*, & *sacrum principatum*, præ se ferre, asserunt: & in Trinitate, *principii*, non *principatus*, rationem inferre, affirmant. Veteres verò, à principio sacrorum, non à principio sacro, æque ac à principatu sacro, deducere, docuimus.

Esto itaque, ponamus, principium aliquod originis, & principatum in divinis personis, admitti, non tamen una persona princeps est sacrorum, respectu alterius, nec alterius princeps dici potest. Hilar. siquidem lib. 6. de trin. hanc, ut Arrianam propositionem damnat, *principatur autem, (Pater) ei (Filio) utpote Deus ejus*, cum sit ante ipsum: Atqui Hierarchia, ut inter personas divinas, admitteretur, oportet unam esse alterius principem, seu principium sacrorum, movens & dirigens aliam, ad actiones sacras: igitur nulla, in personis divinis Hierarchia.

Dionys. tamen c. 3. Cæl. Hier. Ign. Epist. ad Trall. Guil. Parisiens. & Hug. de S. Vict. in c. 3. Dionys. itemque Sophron. in Encom. Ang. & S. Bonavent. in Apol. Paup. Resp. q. 3. p. a. 1. Hierarchiæ increatæ,
in:er

inter personas divinas, testes proferunt. Sed nullus eorum sententiam ipsorum probat : iique omnes, duntaxat in Deo Hierarchiam, seu sacrum principatum, respectu Creaturarum admittunt, non personarum divinarum inter se, aliquam Hierarchiam, adstruunt. De Dionys. ex prædictis, certa res est. Hug. Vict. eadem quoque mens est, qui Comm. in istud c. Dionys. non semel, Hierarchiam seu sacrum principatum Deo tribuit, in quantum omnia moderatur, virtutem, & potestatem omnibus tribuit, seu, in quantum (ut idem Hug. loquitur) lib. 1. c. 3. cit. *Sacrum omne imperium, per partes, & divisiones, & gradus, & ordines distributum est, ad eum, & sub eo ordinatum, qui fons, & causa est, omnium, & principium primum; unum opus, & artifex unus, unum imperium, & unus Rector, unus princeps, & una Respublica.*

Quod etiam sibi velle Ignat. haud dubium est, apud Trall. dum Angelicis Hierarchiis, quas se intelligere non posse, dicit, subjungit, *Spiritus sublimitatem, & Domini Regnum, & incomparabilem Dei Patris omnipotentis divinitatem.* Etenim Ign. vel nullam Hierarchiam Deo hic tribuit, vel eam, quæ βασιλεία, seu Regnum, importat. Atqui hæc, testibus modernis, non admittitur in Trinitate, quam principium esse, non principatum, dicunt: & certum est,

est, inter divinas personas, non esse βασιλειαν, seu Regnum. Igitur Ign. solum respectu Creaturarum, Deum Hierarcham statuit, seu ut convenientius cum Dionys. loquamur, ὑπερίσχυον, super omnes Hierarchas, & Hierarchias, principem scilicet omnium creaturarum, quibus cum societatem habere dici non possit.

Quo etiam argum. probatur, Sophron. vel nullam Hierarchiam admittere, vel solum respectu creaturarum, eam admittere: quòd enim meminerit, *trini unicusque Principatus, undecunque perfecti*, id utique verum est, sed addendum, ejusdem meminisse à creaturis participati: etenim Sophron. ita alloquitur, *Vos secundaria, luminaria, emanatione planè beata, è prima luce prodeuntia, rectè appellamini, ut quæ immensum infinitumque, trini, unicusque principatus illius, numeris omnibus absoluti, splendorem, quantum fas est, citra ullum medium excipiat, exceptumque cæteris mentibus, ut intelligentiis communem faciat. Quà simili phrasi, Principatus paulò post affatur, ò flecti, moverique nescii principatus, qui à divino principatu, omnis principii experie, omnisque principatus auctore, & nomen & dignitatem principatus, citra controversiam accepistis.* Quibus verbis, ita principatum in Deo admittit, ut omnis iste principatus, in creaturas tendat, non in ipsa Trinitate se contineat.

Nec

Nec aliud intendit Guil. Paris. p. 1. 2. p. c. 173. & 175. fusiùs, ubi de Ordinum Angelicorum, cum sanctissimæ Trinitatis assimilatione, differitur, & beatissima Hierarchia trium puerorum, Angelicorum Ordinum, *imago est pulcherrima gloriosissima, atque super-eminentissima Trinitatis, & representatio ejusdem expressa, prout possibile est, creaturis affirmatur.* Quam imaginem repetit, ex affectibus, qui in istis ordinibus elucet, & patris potestatis, Filii sapientiæ, Spiritus Sancti Bonitatis seu amoris, appropriatis dotibus, seu attributis, respondent; quantumvis à tota Trinitate perficiantur: quæ quidem probant, divinam essentiam exemplarem esse causam, omnium Hierarchiarum, sicut & effectiorem, & Hierarchiæ creatæ finem, in assimilatione cum Deo, consistere, sed non probant, inter personas divinas, dari aliquam Hierarchiam, seu sacrum principatum.

Similiter nec Bonavent. loc. ex Apol. paup. cit. inter personas divinas Hierarchiam statuit, sed respectu sub-cælestis Hierarchiæ, cujus acta disponit, & approbat, ut ibid. insinuat, mentemque suam clarè aperit, in 2. d. 9. in Enarr. Ubi inter Hierarchiæ increatæ definitionem unicam, & tertiam, quæ creatæ Hierarchiæ descriptiva est, hanc distinctionem ponit, quòd prima illarum attenditur principaliter,

ter, penes *Egressum à Domino*, sed ultima, penes *regressum*. Ac si diceret, Deo Hierarchiæ rationem convenire, quatenus ab ipso creaturæ egrediuntur: creaturis verò, Hierarchiæ rationem tribui, in quantum Hierarchica omnis actio, nititur pro fine habere, assimulationem cum Deo, quam superiores in inferioribus perficere adnuntantur.

Quæ differentia satis ostendit, Hierarchiam, si quæ in Deo sit, attendendam esse, penes creaturas: divinæque essentiae simplicitatem ac pulchritudinem, veluti fundamentum solum esse, divini principatus, consummativam verò vim divinitatis, rationem esse, quodammodo formalem ipsius, seu diffusionem liberalem divinitatis ad extra, (ut vult Biel in eâ. d. q. 1.) ejus principatus statuendi, potissimam esse rationem.

Ex quibus proinde tantum abest, ut quis, Hierarchiam inter personas divinas, absque inferioribus colligere, aut aliquam sine actione ulla, cum sola passione, exemplo ejusdem Hierarchiæ, prout Spiritui Sancto tribuitur, deducere possim, aut ex eo, quòd dicatur, Angelos inferioris Hierarchiæ, quia in alios nihil agunt, improprie tantum in Hierarchia esse, jure coargui possit. Mitto, improprie loqui nonnullos, dum passionem in Trinitate admit-

admittunt, quandoquidem terminatio, quæ verbo passivo exprimitur, in Deo quidem, non tamen ulla passio locum habere queat: quæ duo valdè differre, vel hoc exemplo percipies, quòd propriè pati oculus videns, à visione dicatur; paries verò, eò quòd videatur, non pati, sed terminare visionem censeatur: & universim id tantùm quod subjectum est actionis ac passionis, dicatur patiens, non autem id, quod terminus est actionis: Nam ut etiam istud exemplum subjungam, verbum mentis non dicitur patiens intellectionem, sed terminans: eodemque modo, nec verbum divinum pati, dum producit à patre, sed terminare productionem patris, dicendum erit.

Hæc obiter tantùm monenda erant. Regredior ad susceptam disputationem, convinco, cùm Theologi, quicunque hactenus scripserunt, vel Hierarchiam Trinitatis nullam admiserint, qui & plures sunt, & nobilioris notæ, quòd in Trinitate, superiores & inferiores gradus non agnoscerent; vel si qui admiserunt, qui paucissimi sunt, ii à prioribus tantùm voce differentes, Hierarchiam istam, in Sanctissima Trinitate, respectu creaturarum, quarum effectrix & exemplaris causa est, adstruant, eique proinde inferiores assignent; convenire omnes, quotquot scripse-

scripserunt unquam Theologos, nullam esse Hierarchiam propriè dictam, quæ non inferiores habeat, in quos agat.

C A P. III.

Idem probatur, ex notione Hierarchiæ, tam latè, quàm strictè sumptæ, quòd sit ordo, vel ordinatio inferioris & superioris.

Theologorum etiam consensus, ex eo innotescit, quòd illi ipsi, qui Hierarchiam, in latiori significatione usurpant, nusquam tamen eam concipiant, nisi in imperantiùm & parentiùm; mutua relatione, positam: Nam v g. S. Thom. eò loci, quo Hierarchiam, latius usurpare videtur, pro agentium & patientium collectione, ac societate; eam tamen ita sumit, ut non in seipsis singula agere, & pati possunt, nullumque inter se imperantium, vel parentium, principum & subditorum Ordinem retinent, sed ut ordine isto, mutuaque relatione se respiciunt; sic enim loquitur, 1. p. q. 108. in corp. *Resp. dicendum, quòd Hierarchia est sacer principatus, ut dictum est, in nomine autem principatus, duo intelliguntur, scilicet ipse princeps, & multitudo ordinata sub-principe.*

Proinde

Proinde Hierarchiam negat S. Thom. concipi ullam posse, in qua, non in eo, in quo Hierarchia constituitur, necessum sit, vel agentem respectu alterius, vel patientem esse: vel principis vel subditi locum tenere eum, qui in ea collocatur: vel imperantium, vel parentium ordini, adcenferi. D. Thom. sequuntur cæteri: quare qui Hierarchiam alio modo explicant, non *isegexiar* nobis exponunt, sed *anagexiar*. Sed ulterius illi ipsi Theologi, qui communi illi Hierarchiæ acceptioni consentiunt, fatentur penes eos, qui principatus participes sunt, Hierarchiam longè meliori titulo residere, ac proinde strictæ sumptæ Hierarchiæ rationem, solis iis tribuunt, qui subditos habent, in quos suum principatum exerceant.

Neque verò aliud sibi vult Trid. Syn. dum sess. 23. c. 4. Hierarchiam latius acceptam, esse, *ut Castrorum aciem ordinatam*, docet. Nam strictiùs sumptam, ex solis Episcopis, Presbyteris & Ministris constantem, asserit, c. 6. ejusd. sess. non admittit frivolas aliorum distinctiones, Trid. Syn. quasi nempe de sola Hierarchia Ordinis locuta sit, & aliam agnoverit: Licet enim Can. hæc solutio utcunque applicari possit, quo ordinatorum quidem, sed non exclusâ Jurisdictione, fit mentio. At c. 4. Syn. cit. hæc restrictio non convenit, in
qua

qua universim, & fusissimè, de omni Hierarchia loquitur Ecclesiastica, etiam prout ad populum ipsum extenditur, qui tamen neutiquam in Hierarchia collocatur, nisi in quantum suis pastoribus subest; nec pastores, nisi in quantum suis populis præsunt, ut ex utrisque, *Castrorum acies ordinata*, consurgat: Sed pastoribus præcipuè Hierarchiæ rationem, in strictiori, & magis proprio significato tribuens, solos eos Hierarchiæ adnumerat, qui imperii sacri, & potestatis spiritualis activæ in subditos, ex sua consecratione, & ordine, capaces sunt: in Hierarchia proinde latè sumpta, neminem collocandum putans, nisi agentium in alios, vel patientium ab aliis, initiantium alios, vel initiatorum ab aliis, imperantium, vel parentium loco: in eadem verò strictiùs accepta, & magis propriè, eos solum collocans, qui subditos habere possunt, & ex eo ordine suo, ac gradu, connaturaliter debeant.

Nec alio modo loquuntur PP. ex quibus, ut aliquos præferam, i. mihi nominandus, Hierarchicæ scientiæ Mag. S. Dionys. qui lib. Cæl. Hier. passim, Angelos diversorum ordinum, vel superiores, *ὑπερβητικούς*, vel inferiores, *submissos*, *incirvatos*, *ὑποκείμενους*, esse, asserit: quod lib. de Eccl. Hier. non minùs frequenter repetit, eosdem

eosdem gradus superioritatis, & subjectionis, inter Ordines Hierarchiæ admittens, ut supra ostendimus, quod c. i. Enucleatè tradit, iis verbis, Hierarchiæ vim, in eo sitam esse, docens, *Ut & ipse Hierarcha, pro sua natura, modo, & ordine, in divinis Mysteriis ac rebus perficiatur, atque divinitatem consequatur, eisque, qui ipsi parent, divinam similitudinem, pro sua cuique dignitate impertiat: & inferiores tum superiores imitentur; tum inferiores ad majora se excitent; tum ipsi progressum faciant: tum pro virili parte, alius se duces præbeant: atque hæc ipsa divinitus tradita, Hierarchicique Ordinis consensione, & quasi conspiratione, pro sua quisque parte, id, quod verè est, & bonestum, & sapiens, & bonum consequatur.*

Discimus enim ex istis verbis, omnem Hierarchiam, superiorum & inferiorum ordinem esse, superiorumque munus esse, ut postquam ipsi divinitatis formam in se susceperunt, aliis imprimant, medii verò Ordines, ut à superioribus moti, inferiores se excitent, eos verò, ut dignè opus suum exequantur, oportere quidem medii Ordinis viros, superiores imitari, sicut ipsos omnium infimi, imitari pariter debent; illos vero, Dei in se formam exprimere; eaque conspiratione, Hierarchiæ finem, qui, divina est similitudo, obtineri,

Nihil verò adversarios juvat, quod & suæ

Quòd Hierarch. subditos habeat. 97

suæ perfectionis, singuli Ordines studiosi esse debeant, quatenus perfectionem, quam acquisierunt, in alios refundant, neque enim dubitamus, quin etiam, qui virtutis Hierarchicæ capaces sunt, satagere debeant, ut ad Hierarchicas functiones, circa inferiores ritè obeundas, per sui perfectionem admittantur, & ita alios perficiant, ut & ipsi perficiantur. Sed hoc præsertim urgemus, nullam agentium Hierarchiam à Dionys. admitti, quæ non sit superiorum erga inferiores, quæ non subiectas habeat sibi personas, in quas pro suo jure, agere possit. Vide eund. Dionys. loc. sup. cit. ex c. 5. & 6. Eccl. Hier. ubi initiantium, & initiatorum ordines describit, & fusè Epist. ad Demoth.

C A P. I V.

Aliorum PP. testimonia, hac de re.

I Gnat. Dionys. subjungo, qui Epist. ad Philipp. quòd Episcopis Presbyteri, Presbyteris Diaconi, populus Presbyteris & Diaconis obediant, *in iurisdictione, decorem Ordinis Ecclesiastici*, seu Hierarchici esse, admonuit, quod & passim alibi inculcat. Nazianz. testem etiam adduco, Orat. 1. Apol. ita de ordine, haud dubiè Hierarchico, differentem: Nam quemadmodum in
E. corpore,

corpore, aliud membrum Principatum habet, & velut præsidet, aliud subest & regitur: ad eundem quoque modum Deus, vel æquitatis lege, quæ meritum cuiusque perpendit, vel etiam providentiæ, per quam omnia velut inter se devinxit, hoc in Ecclesiis constituit, ut alii pascantur & parcant, quibus videlicet id utilius est, ac tum sermone, tum opere ad officium dirigantur: alii autem ad Ecclesiæ perfectionem, Pastores ac Magistri sint, nimirum qui virtute, conjunctioneque, ac familiaritate apud Deum, vulgo sublimiores sunt, rationem animæ ad corpus, aut mentis ad animam obtinentes. Nazianz. Hierarchiam Ecclesiæ hîc describit, superiorumque & inferiorum Ordinum, eam diversitatem inferre, docet, ita ut Hierarchia non sit, nisi per respectum superiorum ad inferiores, quæ propriè dicta est Hierarchia, vel inferiorum ad superiores.

Fusiùs autem idem Nazianz. Orat. 26. Hierarchiæ eam esse rationem ostendit, ut in ea, nonnisi superiorum & inferiorum gradus, ordinesque statuantur; quodque superioritatem, ut vocant, vel inferioritatem, non dicit, illud ad Hierarchiam, per se & formaliter neutiquam spectare; nec aliquod membrum, in Hierarchia collocari posse, nisi in superiorum, vel inferiorum ordine. Athan. quidem Orat. advers. Gent. Concinnam dispositionem universi, ex eo oriri, con-

contendit, quòd superiora contra inferiora, veri moderatoris ductum sequentia, non insurgant, sed omnia in commune, unum ordinem efficiant mirificum; concentum unum ex diversis sonis contingere, arte Musici, omnes sonos, ad concentum Harmoniæ miscentis, superiores scilicet & inferiores: Quibus exemplis patefacio, Hierarchiæ Ecclesiasticæ unitatem, absque inferiorum & superiorum ordinum distinctione, sub uno moderatore, nullam esse.

Ad quod etiam probandum, utor ratione Chrys. Hom. 26. in c. 11. prior. ad Cor. *Nam in honore æqualitatis, contentionem facit.* Quod confirmat, Hom. 37. ordinem ex eo præsertim nasci docens, quòd tam maiora, quàm minora, debito suo loco constituantur. Quod Imper. paucis constringit, lib. 1. de Offic. Præf. Urb. *Sit, inquit, Societas muneris, ita ut inferior gradus, meritum superioris agnoscat.* In eo ergo, in quo membra alicujus totius, sunt ordinatè disposita, in eo, unum rationem superioris, alterum rationem inferioris, habere, necessum est: atqui membra Ecclesiæ Hierarchica dicuntur, quatenus ordinatè disponuntur, sub uno aliquo principe: Hierarchiam enim qui dicit, sacrum ordinem, vel sacram ordinationem, intelligit; igitur eo ipso, quo membra Hie-

archica dicimus, ea, vel ut superiora aliis, vel ut inferiora cogitamus.

Atque ita latè sumpta Hierarchia, non nisi superiorum & inferiorum, sub ea ratione, complexionem, sub uno principe Christo, vel summo Pontifice, significat, duosque habet ordines, quos explicuit Nazianz. superiorum & inferiorum; ad quorum unum, si restringere ipsam velimus, quis non proculdubio fateatur, satius esse, ut tam ad superiorum, quàm inferiorum ordinem, Hierarchia restringatur; atque ita ut strictiùs sumpta Hierarchia, *superiorum sit ordo*, inferiores habens; latiùs sumpta, *ordinatio sit superiorum*, & *inferiorum*, quatenus mutuâ istâ relatione se respiciunt.

Prior verò hujus argum. propositio, probatur, exemplo acervi lapidum, domus, corporis humani. Etenim acervus lapidum, ideo ordinatam dispositionem partium habere, negatur, quia tumultuariè lapides in eo collocantur, absque eo, quòd necessum sit, unum potiùs, quàm alium, superiorem, vel inferiorem locum occupare. E contra, ordinata dispositio domus, & corporis humani, dicitur, quia partes singulæ, cùm domus, tum corporis humani, suum locum exigunt, superiorem hæ, inferiorem illæ. Igitur eo ipso, quo partes aliquæ, ordine dispositæ dicuntur, secun-

secundùm superiorum & inferiorum respectum considerari debent.

Alterum argum. ex priori sequitur: Etenim rerum diversarum unio, nonnisi beneficio ordinis, & ordinatæ dispositionis, unitatem alicujus totius efficit; atqui partes omnes Hierarchiæ, unum quid efficere debent: partes quidem Hierarchiæ, latius sumptæ, unum Ecclesiæ corpus, continens initiatores & initiandos omnes, ipsosque etiam Catechumenos, exteriori voto, & professione Fidei, ad Ecclesiam (licet non sacramento) pertinentes: Ejusdem verò, strictius sumptæ membra, unum principatum efficiunt, unumque sacrum ordinem, cæterorum initiatorem. Ad quam utramque significationem Hierarchiæ, Cyr. alludens, lib. de unit. Eccl. & *Ecclesiam unam, & Episcopatum unum* esse, demonstrat, quia ad Ecclesiæ unitatem requiritur, ut totum Ecclesiæ corpus, gregum, Pastorumque adhæsiōe, unum sit, Principatus ipse Ecclesiæ, Pastorum omnium mutuâ Charitate, ac sub-ordinatione, in unum coalescat, quod fusè, toto isto lib. Sanctus iste Doct. demonstrat.

Igitur Ecclesiæ unitatem scindit, qui principatus sacri unitatem violat, qui potestates, Ecclesiasticæ Hierarchiæ, aliquas inserit, non ordinatas, id est, ut mox ostendimus, diversos ordines Hierarchiæ, inter

se minimè subordinatos, & quorum neuter, respectu alterius, superioris, vel inferioris, rationem habeat, constituit.

C. A P. V.

Continuatio Præcedent. Capituli.

PRæcedentibus PP. adjungo auctoritates aliorum duorum gravissimorum PP. primùmque Leon. testimonium profero, qui Epist. 61. ad Maxim. Antioch. negat, prædicandi officium, extra sacerdotalem ordinem, cuiquam esse concedendum: *Cum, inquit, in Ecclesia Dei, omnia ordinata esse conveniat, ut in uno Christi corpore, & excellentiora membra, suum officium impleant, & superiora inferioribus non resultent.* Ac si nempe ita argueret S. Leo, nemini Hierarchica officia, extra sacerdotalem ordinem tribuenda: utpote cùm Ecclesiæ ordo postulet, ut nonnisi superiores gradus in inferiores agere, nec inferiores, turbato Ecclesiæ ordine, in superiores assurgere debeant: ordinemque Ecclesiæ in eo consistere, ut & superiora, & nobiliora Ecclesiæ membra, ratione ordinis S. & Jurisdictionis, auctoritatem habeant, in inferiora, ut in ipsa, ex officio publico agere possint: deteriora verò in suo loco subsideant,

deant, & superioribus ad perfectionem majorem obtinendam subijciantur.

Ex Hier. verò ista profero, quibus in omni Hierarchico ordine, legali, Ecclesiastico, & Cælesti, superioritatis cujusdam & dominationis vim, & potestatem, necessariam scribit, eodem modo, quo in exercitu, & publico regimine. Audiatur lib. 2. contra Jovinian. c. 15. ex eoque loco, ea præsertim verba pendantur: *Archangelus utique aliorum minorum est Angelorum Archangelus: & potestates, & dominationes habent aliqua, super quæ exerceant potestatem, & quæ in subiecta dominemur. Hoc in Cælis est, hoc in ministerio Dei, ne nos solito more irrideas, atque sub sannæ, si imperatores posuerimus, & præfectos, & comites, & tribunos, & centuriones, & manipulos, & reliquum militiæ ordinem.*

Audiatur lib. 1. advers. Ruffin. *Quæ distributiones officiorum, inquit, non solum in præsentiarum, sed etiam in futuro sæculo erunt, ut per singulos profectus, & honores, & ascensiones, & descensiones, vel crescat aliquis, vel decrescat, & sub alia, atque alia potestate, virtute, principatu, & dominatione fiat. Et post exemplum terreni Regis, totamque palatii descriptionem, per quam diversa ministeriorum Dei officia demonstrabam, addidi: & putamus Deum Dominum Dominorum, Regemque Regnantium, simplici tantum ministerio*

E 4.

sterio esse contentum, quomodo Archangelus non dicitur, nisi qui prior est Angelorum: Sic principatus, & potestates, & dominationes non appellantur, nisi subiectos aliquos habeant, & inferiores gradus. Lege etiam lib. 1. comm. ejusd. in c. 1. ad Ephes. lib. 2. in c. 3. Ubi eadem ferè repetita habentur.

Iis itaque omnibus repugnant, qui Hierarchiam Charismatum aliquam comminiscuntur, in qua, superiorum & inferiorum gradus nulli sunt, nec subjectionis ordo, nec subditi, sed collaterales ordines existant: cùm etiam in ista Charismatum diversitate, quatenus Ecclesiæ, seu Ecclesiasticæ Hierarchiæ membra distinguit, superioritatem & inferioritatem agnoscat Bern. lib. 3. de Conf. c. 4. nec eorum Charismatum ministros publicos, quos subjunxit Deus, comparandos doceat, sed superioribus subjiçiendos: nec id immerito, nemo enim publico nomine, vel ex officio publico, ullam cujusvis etiam Charismatis, v. g. scientiæ, aut liberationis à Dæmone, aut cujusvis alterius functionem exercere potest, nisi qui supremus est Hierarcha; vel si inferior sit, à supremo potestatem habeat, aut legitimum duntaxat in ejus communione usum: inferioresque sortitur, aut commodatos à superiore, à quo mittitur, aut proprios: atque ita Charismatum falsò sibi aliquis fingit Hierarchiam

rarchiam nullis superiorum & inferiorum gradibus distinctam.

Probationem istam firmo, auctoritate Hug. à S. Viçt. lib. 9. in c. 9. Cæl. Hier. quæ in tantum Hierarchicum aliquod opus statuit, quo prælationis & auctoritatis in subditos, particeps magis fuerit, *Ducere*, inquit, dico Hierarchicè, id est, *secundum modum & mensuram prælationis suæ*. Et paulò post, *ideò Hierarchicè ducunt, quia in eo, in quo prælati non sunt, duces esse non possunt.*

C A P. VI.

Probatur, Hierarchiæ Ecclesiasticæ ordo necessarius, in superiorum & inferiorum collocatione, exemplo Hierarchiæ Cælestis.

PAtet prædicta veritas, exemplis Hierarchiæ Cælestis, in quâ jam testimonio Hier. docuimus, subjectionis & prælationis gradus esse; proprièque loquendo, Hierarchiam Cælestem admitti, in superioribus respectu inferiorum.

Sed id ulteriùs est confirmandum, I quidem auctoritate S. Dionys. qui c. 4 lib. de Cæl. Hier. ordinem à Divina lege fancitum, Theologorum consensu firmatum, ait, nempe *ea, quæ secundum locum obtinent*

ab iis, quæ primùm ad divinitatem excitari. Etenim non solum in iis Spiritibus, qui superioris & inferioris ordinis; verùm etiam in iis, qui sunt ejusdem: hæc lex ab ordinante principatu, super-essentia omnia superantibus, sancita est, ut in unaquaque Hierarchia primi sint, & medii, & postremi ordines; ac virtutes, & inferiorum sint diviniore initiator, & manu-ductores ad divinum aditum, & illustrationem & communicationem. Deinde idem Dionys. ejusd. lib. c. 7. 8. & 9. passim superiores Angelos, ἀγγέλους, erga inferiores se gerere; seu cum imperio, ὑπὸ ἡγεμονίας, καὶ ἐπιστάτης, præsidere, & præcipere, docuit. Etiam c. 15. ubi fusè, superiores inferioribus ἡγεγυῖαν, inferiores verò ὑπογεγυῖαν, demonstrat.

Athanas. libell. de comm. essent. Patr. Fil. & Spir. S. prope fin. Hierarchiam Angelicam, ita nobis describit, ut nullus sit eorum ordo, qui non subjiçatur, nullus, qui non præsit, Throni scilicet, Cherubim & Seraphim, qui continuo, & sine ullo mediatore, aut interprete, à Deo discunt, in pote cæteris sublimiores, & Deo propinquiores, & ab iis erudiuntur inferiores ordines, atque ita cæteri pro suo gradu. Postremi autem omnium sunt Angeli, qui & hominum pædagogi sunt censendi. Quæ omnia repetit, iisdem ferè verbis, Resp. ad interr. 31. qq. ad Antioch. Nazianz. similiter Orat. 26. & in Angelis, ordinem.

ordinem istum superioris & inferioris esse, testatur.

Fusè etiam Greg. Magn. prælationis & subjectionis gradibus, Angelorum distinctiones metiri oportere, differit, Hom. 34. in Euang. Quod expressius affirmat, principatum & dominationum (quos in secunda Hierarchia ordines statuit) nomen explicans, iis verbis: *Principatus etiam vocantur, qui ipsis quoque bonis Angelorum viribus præsumt, qui subiectis aliis, quæ sunt agenda disponunt, eis ad explenda divina ministeria principantur. Dominationes autem vocantur, qui etiam potestates, dissimilitudine altâ transcendunt. Nam principari, est inter reliquos, priorem existere: Dominari verò, etiam subiectos quosque possidere. Ea ergo Angelorum agmina, quæ mirâ potentia præminent, pro eo, quod eis cætera ab obediendum subiecta sunt, dominationes vocantur.*

Quod etiam eleganter explicat, lib. 28. Moral. c. 2. *In conspectu conditoris, Angelica ministeria, ordinatâ graduum dispositione, distincta sunt: ut & pro communi felicitate, beatitudinis opificem suum, simul videntes gaudeant: & tamen pro dispositione dignitatis, alii aliis subministrant. Ad Prophetam Angelus Angelum mittit, & quem secum de Deo gaudere, communiter conspicit, & docet, & dirigit: quia eum, & per superiorem scientiam virtute cognitionis, & per præstantio-*

rem gratiam, culmine potestatis excedit.

Nec minùs clarè id ipsum annuit Iſid. Hiſpal. lib. 1. ſent. c. 12. *Inter Angelos, inquit, diſtantiâ potestatum eſt, pro graduum dignitate, miniſteria eiſdem ſunt diſtributa, aliique aliis præferuntur, tam culmine potestatis, quàm ſcientiâ virtutis. Igitur alii aliorum præceptis obediunt, atque juffis. Id iſum etiam aſſerit, S. Ephrem, Orat. ad correct. eor. qui vitioſè vivunt, & honores appetunt: Nam, inquit, ſi in Cæli etiam, ubi omnes incorrupti & immortales, cùm miniſtratorii ſint ſpiritus, noluit Deus unicum cunctorum eſſe ordinem; ſed in iis quoque potestates inſtituit, & dominationes, nulluſque ſibi præſcriptum ordinem excedit, cùm omnia debito ibi modo & ordine, conſtituta ſint: cur nos injuſtis in invicem contentionibus exerce- mur. Angeli & Archangeli, imperata ſibi non tranſgrediuntur; at nos invicem collidi- mur, &c.*

Ex ordine Hierarchiæ Cæleſtis, Greg. Magn. ordinem prælationis & ſubjectionis in Eccleſia fervandum, concludit, lib. 4. indiſt. 13. Epist. 52. *Quia verò, inquit, quæque creatura, in una eademque qualitate gubernari, vel vivere non poteſt, Cæleſtium militiarum exemplar nos inſtruit: quia dum ſunt Angeli, & ſunt Archangeli, liquet, quòd non ſunt æquales, ſed in poteſtate & ordine ſicut noſtis, differt alter ab altero. Si ergo*
inter

Quodd Hierarch. subditos habeat. 109

inter hos, qui sine peccato sunt, ista constat esse distinctio; quis hominum abnuat, huic se libenter dispositioni submittere, cui novit etiam Angelos obedire.

Item Bern. lib. 3. de cons. c. 4. Nec vilem reputes formam hanc, quia in terra est, exemplar habet in Cælo, &c. Ego enim propter similitudinem dictum reor, quod sicut illic Seraphim & Cherubim, cæteri quique usque ad Angelos & Archangelos, ordinantur sub uno capite Deo: ita hic quoque sub uno summo Pontifice primates, vel Patriarchæ, Archiepiscopi, Episcopi, Presbyteri vel Abbates, & reliqui in hunc modum. Non est parvipendendum, quod, & Deum habet auctorem, & è Cælo ducit originem. Et lib. de Ord. vitæ. Si enim Angelus Angelo imperat, & inter jubentem & obedientem, summa manet concordia, videat ille, quàm graviter peccat, qui debitam suis majoribus, exhibere reverentiam, non curat.

C A P. VII.

Nonnullæ objectiones proponuntur, & explicantur fusius.

AT, inquit, ultimus saltem tertiæ Hierarchiæ Angelus, non habet subditos, igitur Hierarchia, absque subditis consistit. Item, etiam circa Deum Hierar-

chicè, beati isti spiritus occupantur, eum laudando, magnificando, clarificando, benedicendo; ergo saltem Hierarchia non consistit, formaliter in eo, quòd habeat subditos. III. Etsi superiores Angeli in inferiores agant, tamen ab iis ordinibus abesse Jurisdictionem, & principatum Hierarchicum, siquidem prohibitionis, minarum, coërcitionis, fori interni, aut externi, nullam, in pacatissima Pacis visione, mentionem esse; quorsum igitur nos Hierarchiam omnem, ad Ordinem & Jurisdictionem reducimus? Item, videtur sequi, tertiam Hierarchiam Angelicam improprie Hierarchiam esse, sublato ad homines respectu; eamque, sistendo in solis Angelicis ordinibus, Hierarchizatam, non Hierarchizantem.

Nituntur præcipuè, ex objectiones, auctoritate Gerson. triplicem Hierarchiam, iis verbis distinguentis, de Pot. Eccl. confid. 9. *Tres primi Ordines Hierarchizant, non Hierarchizati ab aliis, tres medii Hierarchizantur & Hierarchizant, tres infimi Hierarchizantur & non alios Hierarchizant.* Quæ omnia hîc accuratius sunt expendenda, ex quibus & solutio object. per se declarabitur.

C A P. VIII.

Judicium PP. de sententia Gersonis.

HAnc quidem Gerson. sententiam, tanquam communi omnium sententiæ contrariam, impetunt nonnulli moderni, docentes, Principatus Archangelos, hos Angelos illuminare, quibus consentaneè docere debent, Seraphim Cherubim, Cherubim, Thronos.

Sed res ista non adeò constat, ac ipsi putant: Nam sententiæ Gerson. favent plurimi PP. ipse Dionys c. 6. Cæl. Hier. docet, primam Hierarchiam, *circa Deum semper existentem, & præ cæteris, eum nullâ re interjectâ, conjunctam esse.* Eod. quoque cap. primam Hierarchiam, ex tribus constantem ordinibus, ait, *unam, & ejusdem generis, ἑνα, καὶ ὁμογενῆς*: Eamque totam, *primoribus effectivis divini principatus splendoribus, immediate conjunctam.* Fusiùs quoque c. 7. toti primæ Hierarchiæ, proprium facit, edoceri à Deo, ideòque Hierarchia ista *πίσις ὑψίστης ἀμύνης*, ab illo dicitur, nihil subjectionis admixtum habens; seu non Hierarchizata. cap. quoque 8. mediam Hierarchiam à primâ purgari, perfici, & illuminari, asserit, & c. 9. Angelorum primam Hierarchiam, circa secundam, Hierarchicas

rarchicas functiones exercere; secundam tertiar, tertiam hominum Hierarchiis imperare, dicit, ac si diceret, ergo homines solum Hierarchizantem esse; quod ipsum repetit c. 102.

Athan. supra, tres primæ Hierarchiæ ordines, nullo interprete aut mediatore, à Deo immediatè condiscere, non alios ab aliis discere, testatur. Quod etiam Greg. Hom. 32. in Euang. ordines totiùs superioris Hierarchiæ, ab intimis *nunquam recedere, nunquam mitti, docet, sic contemplatione intimâ perfrui, ut ad explenda foras opera, minime mittantur.* Legimus tamen aliquando mitti, utrum vero per seipso mittantur, an verò mitti dicantur, quod per subjecta agmina agantur, quæ in eo, quod à maioribus veniunt, majorum vocabula sortiuntur, determinare non audet. Angelos item ab Archangelis, in eo distinguit, quod hi summa, illi infima annuntient.

D. Thom. q. 108. a. 6. in corp. tres istas Hierarchias ita distinguit: quia *prima Hierarchia accipit rationes, verum in ipso Deo: secunda verò in causis universalibus; tertia verò secundum determinationem, ad speciales effectus.* Quod ipsum dixerat fusiùs a. 1. in corp. & propter istam rationem, primam Hierarchiam secundum Dionys. 57. Cæl. Hier. immediatè ad Deum extendi, & quasi in vestibulis Dei collocari, asseverat:

rat: Ibid quoque principatus, ab Angelis & Archangelis, distinguit, quòd & nationibus præsideant: quam distinctionem clariùs tradunt Bonavent. in 2. d. 9. in explic. text. Richard. ibid. q. 2. & alii, ordines istos distinguentes; quòd principatus Regnis, Archangeli Provinciis, Angeli singularibus hominibus præsent.

Sed & Richard. explicare videtur clariùs hanc sententiam D. Thom. de distinct. trium Hierarchiarum, dicens, primæ Hierarchiæ Angelos, *in Deo non tantùm videre rationes, secundùm quas Deus de lege communi, regit aliquas partes mundi determinatas, vel universum orbem, sed etiam rationes, quibus prædicta regit, secundùm leges; quas dispensat ex privilegio speciali, secundæ Hierarchiæ, quamvis in Deo non conspiciant rationes, quibus Deus regit universum, & ejus partes determinatas, secundùm leges, quas dispensat ex privilegio speciali, sed eis revelatur à Deo, mediantibus Angelis primæ Hierarchiæ, tamen in Deo immediatè conspicere rationes, quibus Deus regit universum de lege communi. Denique tertiæ Hierarchiæ spiritus, nec ad primam, nec ad secundam cognitionem attingere; sed tantùm immediatè conspicere in Deo rationes, quibus regit universum de lege communi.* Quæ sententia, si vera est, videtur, nullus ordo primæ Hierarchiæ, illuminatione alterius egere, quan-

quandoquidem Deus eos æternas rationes gubernationis suæ edoceat. Secundæ verò Hierarchiæ spiritus, eas, quas nescit speciales rationes, à solis primæ Hierarchiæ ordinibus, edoceri: sicut etiam tertiæ ordinis, nonnisi à secundæ spiritibus illuminari.

Ipse quoque D. Thom. a. 6. ad 4. explanationem principatum à Greg. traditam, quòd bonis spiritibus præint, virtutibus mediæ scilicet Hierarchiæ convenire, affirmat, quibus quædam fortitudo convenit, dans efficaciam inferioribus spiritibus, ad exequenda divina mysteria, quasi nempe vis & efficacia Hierarchica, non uni ordini tertiæ Hierarchiæ in aliam, sed superioris Hierarchiæ alicui ordini tribuenda sit. Suares quoque lib. 1. de Ang. c. 13. n. 10. *Probabile esse, ait, Angelos secundi Ordinis, dictos esse Archangelos, propter aliquam majorem dignitatem, in opere ministrandi, non propter aliquam potestatem, quam habeant in Angelos primi Ordinis, quasi ad regendos, vel movendos illos: Nam Angeli ad custodiendas privatas personas deputantur; Archangelis verò, Regum, Principum, Pontificum, & similium personarum cura committitur; Angeli ad privata beneficia communium hominum, Archangelis verò ad graviora negotia, & publica commoda hominum destinantur.*

C A P.

C A P. I X.

Quibus auctoritatibus, contraria sententia nititur.

SEd & sententia contraria, suis non caret auctoribus : Dionys. apertius eam docere videtur, c. 7. Cæl. Hier. ubi loquens, de ordine Seraphim, ait, ipsum propinquissimum esse Deo, ideóque subdit, *primas effectrices Dei revelationes & initiationes ad eum, ut maximè vicinum, principalius ordinari.* Quo etiam cap. de ordine Cherubim, affirmat, eum habere vim, largè communicandi inferioribus sapientiam : item sub fin. c. ait, primum ordinem, eos, qui deinceps sequuntur, scientiæ suæ participes facere : c. 9. secundam Hierarchiam, tertiæ imperare, affirmat. Tertia verò, quæ ex principatuum, Archangelorum, & Angelorum ordinibus constat, hominibus, δι' ἀγγέλων ἰπσταῖν, id est, uno per alium præfiliere. cap. verò 10. ex eo, quòd scribitur, Isa. 6. *Seraphim clamare, alter ad alterum, infert, quod Theologicarum notionum, primi secundos, participes faciant.* Item c. 12. ordines subditos Cherubim, participes fieri cognitione, cum respectu ad ipsos : c. 13. seqq. ordinibus omnibus, Seraphim, suæ lucis

lucis splendorem, eximiè & priùs cæteris communicare, omnesque sacras expiationes, I. Seraphim, ut auctori, tribui debere, contendit.

His similia, passim leguntur, apud S. Maxim. Dionys. Comment. Quæ omnia probant, non solum, subjectam esse unam Hierarchiam alteri, verum etiam ordines unius Hierarchiæ, superioribus esse subditos, ab iisque purgari, perfici, illuminari, seu *ἡγιασθῆναι*, id est, ut loquitur Gerf. *Hierarchizari*; imo & in uno, & eodem ordine, posse unum aliquem superiorem, inferiorem alium, seipso inferiorem, illustrare.

Athan. videtur id ipsum sentire, loc. cit. asserens siquidem ordines inferiores deinceps semper doceri à superioribus: videtur id etiam de ordinibus intelligere, non solum de Hierarchiis; concludit enim, Angelos infimos esse; eosque hominum esse DD. Quibus verbis insinuare videtur, eos à superioribus illuminari, & quia alios Angelos, ipsi illuminare non possunt, hominum illuminandorum curam, eis esse demandatam.

Greg. Magn. lib. 4. indict. 13. Epist. 52. cit. Angelos, Archangelis subditos esse, non obscurè insinuat; nec non Hom. 34. in Euang. cit. quæ post enumerationem istorum omnium ordinum, subdit, *Super-*

nas

nas istas distinctiones, beatorum spirituum, ita esse conditas, ut aliæ aliis sint prælatæ.

Darnasc. lib. 2. de Fid. c. 31. de Angelis hæc habet, Cæterum splendor & ordinis ratione, inter se differunt: sive pro splendoris portione, sedes illis sua constituta sit: aliisque alios, ob ordinis vel naturæ præstantiam, illustrent. Quibus verbis videtur asserere, non solum Hierarchias superiores, verum etiam ordines inferioribus lucem suam communicare.

Apertissimè Bern. lib. 4. de confid. c. 4. Ubi Episcopos, qui Archiepiscopis, Abbates, qui Episcopis, parere nolunt, hoc modo constringit, Nisi tu fortè Angelorum quempiam, dicentem audisti, nolo sub Archangelis esse, aut ex alio quolibet inferiorum ordinum aliquem, non ferentem subesse cuiquam, nisi Deo.

Communiter etiam PP. tam Luciferum, quàm Michaëlem, Angelorum duces fuisse, docent, quos ita interpretari, ut inferiorum tantum Hierarchiarum, atque ordinum, non ejusdem etiam Hierarchiæ, & Ordinis, Angelorum, Rectoris ac Principes exstiterint; vel, ut singulari quodam privilegio, non ex connaturali ordine, inter omnes Angelos servari solito, ducatum in cæteros habuerint, minùs eorum menti videbitur fortè consentaneum: Ideoque non tantum diversarum Hierarchiarum

lucis splendorem, eximiè & priùs cæteris communicare, omnesque sacras expiationes, 1. Seraphim, ut auctori, tribui debere, contendit.

His similia, passim leguntur, apud S. Maxim. Dionys. Comment. Quæ omnia probant, non solum, subjectam esse unam Hierarchiam alteri, verum etiam ordines unius Hierarchiæ, superioribus esse subditos, ab iisque purgari, perfici, illuminari, seu *ἡραρχειῶν*, id est, ut loquitur Gers. *Hierarchizari*; imo & in uno, & eodem ordine, posse unum aliquem superiorem, inferiorem alium, seipso inferiorem, illustrare.

Athan. videtur id ipsum sentire, loc. cit. asserens siquidem ordines inferiores deinceps semper doceri à superioribus: videtur id etiam de ordinibus intelligere, non solum de Hierarchiis; concludit enim, Angelos infimos esse; eosque hominum esse DD. Quibus verbis insinuare videtur, eos à superioribus illuminari, & quia alios Angelos, ipsi illuminare non possunt, hominum illuminandorum curam, eis esse demandatam.

Greg. Magn. lib. 4. indict. 13. Epist. 52. cit. Angelos, Archangelis subditos esse, non obscure insinuat; nec non Hom. 34. in Euang. cit. quæ post enumerationem istorum omnium ordinum, subdit, *Super-*

nas istas distinctiones, beatorum spirituum, ita esse conditas, ut aliæ aliis sint prælatæ.

Darnasc. lib. 2. de Fid. c. 31. de Angelis hæc habet, *Ceterum splendor & ordinis ratione, inter se differunt: sive pro splendoris portione, sedes illis sua constituta sit: aliique alios, ob ordinis vel naturæ præstantiam, illustrent.* Quibus verbis videtur asserere, non solum Hierarchias superiores, verum etiam ordines inferioribus lucem suam communicare.

Apertissimè Bern. lib. 4. de confid. c. 4. Ubi Episcopos, qui Archiepiscopis, Abbates, qui Episcopis, parere nolunt, hoc modo constringit, *Nisi tu fortè Angelorum quempsam, dicentem audisti, nolo sub Archangelis esse, aut ex alio quolibet inferiorum ordinum aliquem, non ferentem subesse cuiquam, nisi Deo.*

Communitè etiam PP. tam Luciferum, quàm Michaëlem, Angelorum duces fuisse, docent, quos ita interpretari, ut inferiorum tantum Hierarchiarum, atque ordinum, non ejusdem etiam Hierarchiæ, & Ordinis, Angelorum, Rectoris ac Principes extiterint; vel, ut singulari quodam privilegio, non ex connaturali ordine, inter omnes Angelos servari solito, ducatum in cæteros habuerint, minùs eorum menti videbitur fortè consentaneum: Ideoque non tantum diversarum Hierarchiarum

chiarum Angelos, inferiorum Hierarchiarum alios illuminare, verum etiam superiorum, in eadem Hierarchia, ordinum; imo & in eodem ordine, aliquorum vim istam esse, ex sensu PP. communi, interpretari debemus: Ac proinde non simpliciter dicendum esse, tres inferiores Angelorum nullatenus Hierarchizare, sed tantum infimum ordinem, nec infimum totum, sed aliquos, vel aliquem, ex isto infimo ordine.

D. Thom. quoque q. 108. cit. a. 5. ad 3. principatus tertiæ Hierarchiæ, *Cæterorum ductores* esse asserit, *cum ordine sacro: illi enim, qui alios ducunt, primi inter eos existentes, principes propriè vocantur, secundum illud Psal. 67. prævenierunt principes conjuncti psallentibus.* ibid. ad 4. docet, *Archangelos dici, quasi principes Angelos, quia respectu Angelorum, sunt principes, respectu vero principatum, sunt Angeli.*

Similia plura habentur apud cæteros Theologiæ Scholasticæ DD. quorum tamen plurimi ita exponi possunt, ut per accidens tantum, propter majus bonum & universalius, quod procurant ordinem tertiæ Hierarchiæ, cum è contra, inferiore tertiæ, bona minora, minusque universalia fatagant; consentaneum esse, ut in iis, inferiores superioribus obsequantur, quemadmodum interpretatur Suar. loc. cit.

CAP.

C A P. X.

Quanam harum sententiarum; probabilior.

PRobabiliorem longè, posteriorem istam sententiam arbitror, utpote quæ ordini magis faveat, & ordinatiorem Angelorum societatem constituit. Alteram tamen, si quis defendat, absit, *ut omnium convitiis vapulet.* Unde temperatè Aug. in Enchr. ad Laur. c. 57. in Quæst. magis enodatâ, non faciliè se quemquam reprehensurum, nec faciliè quicquam certi se pronuntiaturum, profitetur iis verbis, *Quomodo autem se habeat beatissima illa, & superna societas, quæ illi sunt differentie personarum, ut cum omnes, tanquam generali nomine, Angeli nuncupentur, &c. Sint tamen & ibi Archangeli: & utrum iidem Archangeli nominentur virtutes, &c. Et quid inter se distent, quatuor illa vocabula, quibus ipsam Cælestem societatem videtur Apostolus esse complexus, dicendo, sive sedes, sive dominationes, sive principatus, sive potestates, dicant qui possunt; si tamen possunt probare, quid dicant: Ego me ista ignorare, confiteor.*

Et libello adversus Priscill. & Orig. ad Oros. c. II. ¹¹⁹Altiora, inquit, te, ne quæstieris, & fortiorate, ne scrutatus fueris, sed quæ tibi præcepit

præcepit dominus, illa cogita semper, ut magis in istis, temeraria præsumptio, quàm cauta ignoratio, culpanda videatur. Certè ait Apost. siue sedes, siue dominationes, siue principatus, siue potestates: Et esse itaque sedes, dominationes, principatus, potestates in Cælestibus apparatibus, firmissimè credo, Et differre inter se aliquid, indubitatâ fide teneo. Sed quomodo contemnas, quem magnum putas esse Doctorem, quanam ista sint, Et quid inter se differant, nescio. Nec eâ sane ignorantia periclitari me puto; sicuti in obedientia, si Domini præcepta neglexero, &c.

Ab sit itaque, ut alterutram sententiam, qui defenderit, convitiis omnium vapulet: quamvis, ut dixi, probabilior, posterior sententia longè videatur, quæ potest dici non displicuisse Gersoni; quem explicare licet, quasi tres infimos ordines, collectivè sumptos, nullos Angelos Hierarchizare docuerit, licèt distributivè sumptos, aliquos, puta superiores, Hierarchicam auctoritatem, in inferiores, habere posse, crediderit.

Eodem modo, & ipsum Angelorum ordinem, Dionys. complere, & determinare omnes Cælestium naturarum ordines, ac distinctiones, & extremo loco nuntiandi hominibus proprietatem obtinere, docet, c. 9. Cæl. Hier. Quamvis & inter ipsos, secundum istam sententiam, aliqui sint

sint extremi, alii verò ab hominibus remotiores sint, qui & nuntianda hominibus, non ipsi annuntient, sed inferioribus patefacienda commendent. Quam explicationem qui renuerit, Dionys. ejusdem, quo Gerson. falsitatis incuset, necessum est, iisdem ferè verbis utentem, c. scilicet 15. supremæ Cælestium naturarum descriptiones, *ἡγερχόους*, seu *presidentes* & *Hierarchizantes*, & *ἡγερχηδῶνας*, seu *Hierarchizatas* & *subditas* asserendo, medias verò modò Hierarchizatas, modò Hierarchizantes esse, quod ipsissima est Gerson. sententia.

Quid autem senserit Gers. nostra parum interest; dicimus duntaxat, supponendo sententiam Gerson. eamque minimè exponendo, vel approbando, nullatenus ex ipsa, quocunque modo explicata, sequi, Hierarchiam propriè dictam esse, quæ activâ virtute careat, tertiamque Hierarchiam, collectivè sumptam, impropriè Hierarchiam dicendam, quatenus nempe ei competit Hierarchizari, non Hierarchizare: quòd si ejus ordinibus, Hierarchizare conveniret, non negamus, quin propriè Hierarchiæ titulo gauderent; sed duntaxat iis, quibus conveniret, passiva Hierarchizatio, non activa, Hierarchiæ strictè sumptæ rationem, denegamus.

Addimus, id respectu Angelicæ Hierarchiæ,

chiæ, prout in seipsa concluditur, intelligendum esse: etenim ut ad homines refertur, nullum esse Angelicum ordinem, nullum Angelum, cui non Hierarchia, seu sacer principatus saltem in homines conveniat.

C A P. X I.

Confirmatur amplius hæc doctrina.

NEque enim nova est; sed PP. & Theologorum, qui de hac re scripserunt; qui omnem Hierarchiam propriè dictam, in activa virtute constituunt, eiq; proprium munus adscribunt, *ἱεραρχεῖν ἢ ἱεραρχεῖσθαι*, Hierarchizare, non Hierarchizari, ut sup. passim ostendimus. In eoque divinus ordo magis elucet, quod Angelicam, & humanam Hierarchiam ita conjunxerit, ut quemadmodum divina Hierarchia, non intra ipsum Deum exerceatur, sed ad creaturas, extra ipsum fertur, ita Hierarchiam Angelicam, postquam in seipsa completa fuit, in homines extendi oporteat, ut principatus ejus amplitudo cernatur, & per Angelicam Hierarchiam humana Deo societur.

Quod eleganter describit nobis Dionys. c. 9. lib. cit. de Cæl. Hier. docens, Principatum, Angelorum & Archangelorum ordines, superiorum interpretes, hominum Hierarchiis, uni per alium imperare, *ut sit ordine, & excitatio in Deum, & conversio, & cum*

Et cum eo Societas & unio, non à Deo, omnibus Hierarchiis optimè indita, Et cum communicatione superveniens, Et cum sanctissimo decore progressio. Confirmatque Athanas. loc. cit. quibus ita Angelicam Hierarchiam cum humana conjungit, & ultimi beatorum spirituum, ἡ ἀνθρώπων διδάσκαλοι, hominum præceptores existant.

Itaque principatus sacer propriè dictus, subditos habere debet, ipsique Angeli eatenus principatu isto potiuntur, quatenus vel subditos habent Angelos, vel homines: quatenus enim ipsi Deo subjiciuntur, vel Angelis superioribus, neutro respectu, propriè loquendo, principatus participes sunt, nec, ut ex Dionys. ostendimus, Hierarchizant, sed solum Hierarchizantur, rationemque subjectionis nanciscuntur, ad principatum quidem necessariam, non ut ejus partem, sed ut oppositam relationem. Eodem scilicet modo, quo filiationi paternitati necessaria est, & paternitas filiationi, quæ tamen vicissim opponuntur: unde quemadmodum filius, sub ea ratione, non est paternitatis particeps, nec pater filiationis; ita nec subjectionis ordo, Hierarchiæ sub ea ratione, seu sacri principatus, particeps dici potest.

Quam veritatem confirmat, quòd factentur communiter, post resurrectionem hominum generalem, nullas Hierarchias

Angelicas fore, quoad officia illa, & actiones, quæ in prioribus statibus habentur, id est, secundum rationem Hierarchicam, quæ in officiis, muniisque consistit; quamvis remaneat ista inæqualitas naturæ, gratiæ, & gloriæ, quam fundamentum fuisse, distributionis inæqualis istorum officiorum, probabile est: cui consentit Apost. 1 Cor. 15. Ita de istis ordinibus Hierarchicis loquens, ac si in eo statu remanere omnino non debeant. Deinde, ait, *finis, cum tradiderit Christus Regnum Deo, & Patri, cum evacuaverit omnem principatum, & potestatem, & virtutem.* Quod idem est, inquit Aug. lib. 1. de Trin. c. 8. *ac si diceretur, cum perduxerit credentes ad contemplationem Dei, & Patris, &c. tunc revelabitur Filio Pater, cum evacuaverit omnem principatum, & omnem potestatem & virtutem, id est, ut necessaria non sit dispensatio similitudinum per Angelicos principatus, & potestates, & virtutes.* Cui interpretationi, Anselm. in eum loc. Alenf. 2. p. q. 41. m. 4. a. 19. S. Thom. 1. p. q. 108. a. 7. ut idonei testes adiunguntur.

Ex quibus arguere, in hunc modum licet, *Si quamdiu, ut loquitur Anselm. præsentis vitæ conversatio tenetur, necessarios hætenus Angelicos principatus, & potestates, & virtutes habemus, per quorum dispensationem gubernemur, & bona opera, & mala su-*
perare

perare possimus, & ideo in futuro seculo evacuabuntur omnes hujusmodi praelationes. Si teste Aug. cit. sublatâ necessitate dispensationis, respectu hominum, per Angelos procurandæ, ordines Angelicæ Hierarchiæ evacuantur, sequitur, 1. nihil esse absurdum, si Angelorum Hierarchiam, saltem tertium & ultimum, per respectum ad homines, constitui dicamus, eo verò respectu sublato, improprie tantum ipsam Hierarchiam dici; quandoquidem tota dispositio officiorum & ordinum, in Angelis, propter homines fiat, ad quorum gubernationem, Deus quædam, sibi vicinioribus Angelis communicat, quæ ipsi remotioribus patefaciunt, ut per inferiores executioni demandentur.

Sequitur II. nec in actionibus Angelorum erga Deum, Hierarchiam consistere, nec in divinis gratiis, quos à Deo recipiunt, quippe cum remanentibus jugiter actionibus ipsorum, circa Deum, quibus nempe in perpetuas æternitates, ei acclamabunt, gratias agent, laudes concinent, cæterisque ejusmodi actionibus, cultum indeficientem, & venerationem impendent, remanentibus circa ipsos, divinis influxibus; Hierarchica tamen dispositio, ac distinctio cessabit.

III. Sequitur, in prælaticæ, & gubernatione, Hierarchiam, ex istorum rpe

mente, interpretantium Apost. consistere, qui nempe doceant, nonnisi propter istam gubernationem, & dispensationem, sacram illam ordinationem, in Angelis, quam Hierarchiam dicimus, institutam esse, ejusque necessitate sublata tollendam ipsam, atque evacuandam.

Quod si aliquando, apud Divin. Dion. vel apud S. Thom. legimus, in divinarum illustrationum recipiendarum varietate, totius quoque Hierarchiæ Cælestis distinctionem, fundari; ex eo demum concludere licebit, in passionem radicaliter, ordinum Hierarchicorum distinctionem, fundatam, licet formaliter Hierarchiæ ratio, in relatione superiorum ad subditos, consistat. Sicut enim potentia videndi, radicaliter respicit animam, cujus est proprietas, & à qua naturali emanatione profluxit: Formaliter autem respiciat visibile, circa quod, ut proprium objectum versatur, & cujus percipiendi essentialiter vis est, & facultas naturalis.

Ita Hierarchia omnis, seu, sacer principatus, radicaliter respicit Deum, à quo omnis principatus emanat, & ex quo, ut loquitur Apost. ad Ephes. 3. *Omni Pater-
nitas in Cælo; & in Terra nominatur*: respicit & superiores, per quos scilicet, ad inferiores, vis omnis Hierarchica defertur, principatusque, & virtutis agendi divina
commu-

communicatio trajicitur : Formaliter autem respicit inferiores, in quos agendi vis, & officium datur, & propter quos auctoritas, potestas, ac dignitas Hierarchica conceditur : quos proinde subditos, qui non habet, nequaquam dignitatis, vel virtutis Hierarchicæ, particeps dici potest.

C A P. XII.

Enucleatur magis responsio, ad objectiones, cap. VII. præc.

NEque verò, dum subditos, in omni Hierarchia, tanquam necessarios, ad principatus sacri exercitium, & splendorem exigimus, eos subditos necessariò requirimus, qui minis, coërcitionibusque ducantur : aut eam, in Cælesti præsertim Hierarchia, Jurisdictionem requirimus, quæ contentiosa sit, litigiosa, & poenarum inflictrix. Absit, ut hæc unquam, animum nostrum cogitatio subierit, sed pro conditione status Jurisdictionem, potestatem prælationis disparem ponimus.

Et quidem in Cælesti Hierarchia, inter bonos Angelos, eam Jurisdictionem, seu potestatem prælationis, vimque principatus sacri desideramus, quæ in directione & imperio, seu injussionum divinarum manifestatione ac promulgatione consistit,

ut ex prædictis patet : quamvis & boni Angeli, in malos potestatem habeant coërcitivam ; ut ostendit Michaël. pugna ac victoria, cum Dæmonum principe, *Apoc. 12.* & ligatio Satanæ, ab Angelo bono, *Tob. 8.* & *Apoc. 20.* & explicatio nominis *potestatum*, à Greg. tradita, *Hom. 34.* in Euang. juxta quam nempe, potestates vocantur, *Hi, qui hoc potentius cæteris, in suo ordine, perceperunt, ut eorum ditioni, virtutes adversæ subiectæ sint, quorum potestate reformantur, ne corda hominum tantum tentare prævaleant, quantum possunt.*

Quod ipsum tradunt pariter Aug. lib. 20. de civ. c. 7. item S. Greg. lib. 2. mor. c. 11. & seqq. & lib. 4. c. 12. Andr. Episc. Cretenf. in 20. c. Apoc. Bed. in c. 8. Tob. D. Thom. 1. p. q. 64. a. 4. ad 3. & lib. 4. contr. Gent. c. 90. Abul. in c. 20. Math. q. 506. & alii. Extenditur etiam eorundem Angelorum bonorum principatus, nonnunquam ad coërcendos homines, eosque castigandos, quemadmodum variis exemplis constat, quæ tum ex scripturis SS. tum etiam ex vitis PP. colligi possunt.

Similiter autem esto principatus sacer, hominum coërcitivam potestatem nonnunquam includat, quando nempe, omnis generis Jurisdictionem includit, & culpam reperit, quam plectat, nihilominus ex prædictis patet ; sufficere aliquando ad principatum

patum sacrum, restrictam saltem, ac limitatam potestatem, perficiendi actus legitimos, cum aliquâ potestate immutandi personas sibi subiectas; seu, sufficere vim, auctoritatem & facultatem dirigendi homines, ad suum finem, etiam sine coërcitione, cum ordine Hierarchico, conjunctam; nec esse necessum, ut qui imperandi potestatem habet, & obligandi, illico coërcendi. puniendi, & in foro exteriori judicandi habeat potestatem.

Nam nec curati, secundum hodiernam Ecclesiæ consuetudinem, forum habent externum, aut legislativam potestatem, quamvis Jurisdictionem habeant, ratione potestatis, quam habent, tum absolvendi, in foro poenitentiae, & ligandi; tum subditis imperandi hîc & nunc, quæ ad salutem eorum, necessaria videntur, legesque superiorum manifestandi ac promulgandi: atque idè ab Ecclesiastica Hierarchia, à nemine rejiciantur: ac proinde nemo earum rerum peritus, aut forum contentiosum, aut legislativam virtutem, aut omnimodam coërcitivam potestatem, ad Ecclesiasticam Hierarchiam simpliciter requisivit.

Multominus verò principatus mutilatus, aut imperfectus dici potest, si coërcitiva facultas, seu punitiva, principi desit, defectu culpæ, in quam animadvertas, &

peccati, in quod sæviat: neque enim minùs Apostolorum Hierarcha fuit S. Petrus, quamvis in illis, confirmatis in gratiâ, nihil esset, quod plectere excommunicatione posset, nihil quod censuris puniret: neque bonorum minùs principes sunt, sacræ nostræ Religionis Antistites, quàm malorum, quamvis, ut rectè monet S. Greg. lib. 1. indict. 9. Epist. 24. Joanni Episc. Const. & aliis Patriarchis, ita affectus, Rector esse debeat, *Ut & benè agentibus, sit per humilitatem socius, & contra delinquentium vitia per zelum justitiæ erectus: quatenus & bonis in nullo se præferat, & cùm pravorum culpa exigit, prioratus sui potestatem agnoscat: ut & honore suspensò, æqualem se subditis benè viventibus deputet, & contra perversorum culpas, ex zelo justitiæ crescat, &c.*

Quæ eadem ferè inculcat, Hom. 18. in Ezech. & p. 2. past. cur. c. 6. repetit verò l. 7. Epist. 64. iis verbis, *Si qua culpa, in Episcopis invenitur, nescio quis Episcopus, sedi Apostolicæ subjectus non sit: cùm verò culpa non exigit, omnes secundùm rationem humanitatis, æquales sunt.*

Quidni igitur principatus Angelicus, integer, perfectùsque censeatur, quamvis prout inter bonos Angelos exerceatur, coërcitionis expers sit: non quòd non posset superior Angelus, inferiorem coërcere, si de-

Quòd Hierarch. subditos habeat. 131

si delinqueret, cùm & malum Angelum aliquando corripiat, & flagellet, dum delinquit, sed quòd in isto statu beatissimo, quo pacificè perfruuntur omnes, nec ipsi delinquere, nec divinæ voluntati contradicere, nec inter se rixari, vel seditiosè contendere possint.

C A P. XIII.

Probatur ultimò, Hierarchiæ Ecclesiasticæ ordo, in superiorum & inferiorum collocatione, exemplo Hierarchiæ legalis.

ULtimum argument. quo Hierarchiam novæ legis, ordinationem esse superiorum, & inferiorum, probamus, ita ut regentium, & initiantium, sacer principatus dici, & superiorem quemdam, in subditos auctoritatem, continere debeat, sumitur ab exemplo Hierarchiæ legalis, qualis à Moyse, divini numinis interprete, composita, atque ordinata fuit: hæc siquidem principatus fuit, cum subjectione, in eaque soli Mystæ, quibus sacerdotalis ordinis viri respondent, principatus sacri, & Hierarchiæ, propriè participes dicti sunt.

Audiatur Dionys. c. 5. Eccl. Hier. *Ea verò secundam legem Hierarchia, consecratio.*
F 6 *quidem.*

quidem seu ceremonia, & ad spirituales cultum introductio. Duces autem ad eum ii fuerunt, qui sacri illius tabernaculi ritum, à Moyse, primo Hierarcharum, secundum legem, mysta, seu initiatore, ac duce didicerant.

Audiatur Greg. Nazianz. Orat. 26. circa med. Ubi scilicet ordinem in Ecclesiis necessarium esse, ut alii jubeant, alii pareant, alii doceant, alii discant, persuadere nititur, exemplo V. Testamenti, in quo unus cæteris præerat Aaron, sub quo Levitæ alii, præstantiores divini mysterii partes implebant, *Nec quicquam non distinctum, non ordinatum erat, ne quidem minimarum rerum.*

Innumeros ejusdem ordinis testes, Judæos, Christianosque, citare possem si res ista dubia, vel controversa foret; si non, & à Neotericis doceretur, qui Hierarchiam agentium, in ordine sacerdotum, & Levitarum, præcipuè constituunt: quibus prophetas ad censent, eosque nec ordine valde dispares, nec Jurisdictione inferiores.

Et tamen quasi sacerdotii Christiani vis, minor esset, aut necessitas, Hierarchiæ agentium, in novâ lege, plurimos inscrunt nullo ordine insignitos, nullâ prælatione illustres, nullâ Jurisdictione cæteris valentiores, scilicet, in nova lege, absque auctoritate, Hierarchicarum functionum participes

ceps aliquis erit, & tamen in veteri, si istis credimus, publicè vaticinandi auctoritas desiderari videtur, ut actio illorum Hierarchica dici possit.

Sufficiunt ista generatim, ad naturam Hierarchiæ intelligendam, quæ utique magis innotescet, ex iis, quæ in seqq. qq. fusiùs differemus.

QUÆSTIO IV.

De necessitate Ordinationis, ad Ecclesiasticam Hierarchiam.

C A P U T I.

*Utrum ordo sacer, seu consecratio personæ,
per Sacramentum Ordinis, ad Eccle-
siasticam Hierarchiam re-
quiratur.*

PRO solutione Quæst. quædam præ-
supponenda. 1. Hierarchiam om-
nes, *ordinem* definiunt; sed or-
dinis diversa est acceptio: Nam
cùm generatim ordo pro statu sumitur, ut
in L. Div. Mar. ff. de Offic. præf. accipi-
tur

tur aliàs, pro dispositione qualibet superioris & inferioris, l. 4. ff. de Sen. solet tamen sæpiùs sumi pro statu, seu conditione sublimiori, & principali personæ, gradûque dignitatis, quo quis aliis excellit, & supereminet, ab eaque significatione profluxit, ut sacramentum istud, quo nempe quis novitate benedictionis, à communitate vulgi, segregatur, & *populi doctor rectorque consecratur*, quemadmodum loquitur Greg. Nyss. Orat. de S. Bapt. seu, quo quis in Divinorum ministrorum ordinem coaptatur, seu ut verbis Nazianz. utar, *Magnum hunc gradum assequitur, atque in eorum, qui appropinquant Deo, appropinquant, numerum adscribitur, ac sacri status & honore Ordinis afficitur*. Sacramentum, inquam, illud, Ordinis Sacramentum dicitur, quia statu, ordine, gradu, honore sublimior ac superior evadit.

De hujus ergo Sacramenti necessitate, quæstio instituitur: Utrum hoc Sacramento Ordinis initiatum esse oporteat, qui Hierarchiæ Ecclesiasticæ inseritur. Ubi II. distinguendum, quodd alius, perfectum in Hierarchia locum obtineat, alius imperfectum: alius Sacramento Ordinis initiatus sit, alius per accidens, nondum Sacramento Ordinis sit initiatus, quamvis inchoatâ, per electionem ad dignitatem Ecclesiasticam, ordini necessario connexam

xam, quodammodo videatur ejus ordinatione, jam quodammodo ordinatus dici possit; sicut ipso nomine Ordinis, quo nondum initiatus est, insigniri solet, *Episcopi*, v.g. *Archipresbyteri*, *Archidiaconi*, qui ad ejusmodi dignitates electus est, eo quod nempe Ordinem sibi destinatum omnium votis complectatur, & ad eum certâ spe atque expectatione tendat, & jus petendi conceditur. Hac adhibita distinctione, responsio facilis est, eaque trimembris.

C A P. II.

*Nemo perfectè in Hierarchia esse potest,
qui non Sacramento Ordinis actu,
de facto sit insignitus.*

HÆc est communis omnium PP. & DD. Scholasticorum, qui de Hierarchia propriè locuti sunt, nam PP. omnes, qui Ecclesiasticæ Hierarchiæ nomen hætenus sumpserunt, Dion. Maxim. Germ. Constant. Syn. 7. PP. Anast. Biblioth. Dion. Monach. El. Cret. S. Greg. & alii DD. quos omnes, postea secuti, Hug. Vict. Guil. Par. Antiss. & cæteri, aliique supra cit. ad initiatos Sacramento Ordinis, hanc vocem restringunt, ut supra fusè ostendimus:

mus: Nec ullum adversarii citare possunt, qui ad Hierarchiam Ecclesiasticam, ullos quàm ordinatos clericos, perfectè in ea collocandos admittat.

Quorum omnium sensum complexa, Syn. Trid. *Hierarchiam divinà ordinatione institutam, ex Episcopis, Presbyteris & Diaconis, constare*, definit can. 6. sess. 23. Quibus proinde omnibus, propriè & perfectè, aliquos, nullo Sacramento Ordinis initiatos, Hierarchiæ inferendos, contendere, à temeritatis notâ, & gravi periculo erroris, excusari non potest; sicut nec excusari, omnium Catholicorum judicio posset, aut à suspitione hæresios, notâque temeritatis, qui octo vel novem, propriè dicta sacramenta, admittenda esse, propugnaret, quantumcunque à Sacramenti Ordinaria, & usitata inter Catholicos definitione deflecteret.

Ratio hujus assert. multiplex; integra & generalis petitur ab institutione Christi, qui principatum Ecclesiasticum hunc constituit, ad quem, non nisi per consecrationem divinam, ascenderetur. *Nec enim*, inquit Apost. ad Hebr. 5. *quisquam sumit sibi honorem: sed qui vocatur à Deo tanquam Aaron, sic & Christus non semetipsum clarificavit, ut Pontifex fieret, sed qui locutus est ad eum, Filius meus es tu, ego hodie genui te.* Quem locum fortiter urget Clem. Rom. lib. 2.

lib. 2. Const. Apost. c. 27. & iterum lib. 3. c. 10. Quo loco hanc rationem, seu explanationem, Apost. adjungit: *Hujusmodi namque dignitas, per impositionem manuum Episc. datur: qui verò non est ad eam ordinatus, sed potius sibi jam rapuit, hic supplicio Ozie afficietur.* Divina ergò ista institutio fuit, ut nemo in Ecclesia cæteris superponeretur, nemo in sublimiori gradu collocaretur, ac sacri principatus particeps fieret, nisi Sacramento Ordinis initiaretur, & ut loquitur Tert. Scorp. c. 9. *Cum toto Sacramento, cum propagine nominis, cum traduce Spiritus S. traditam Apostolis & Discipulis potestatis saltem particulam aliquam hæreditaret.*

Altera, ex natura Hierarchiæ sumitur. Hierarchia ex Dionys. Maxim. & cæteris *ἱεραρχία*, id est, *sacer ordo* definitur: atqui ordo dicitur, propter distinctionem graduum, quos Christus in suo principatu instituit; sacer propter sanctitatem sacramenti gradui annexam. *Sine ordine*, inquiunt Hug. lib. 4. Cæl. Hier. Bonavent. Tract. de Eccles. Hier. & alii passim, *presumptio est actio* sine sacramento periculosa dantibus, sacrorum attrectatio, recipientibus sæpe inutilis: certè inordinata & præpostera.

III. Ex officio, & scopo Hierarchiæ nostræ. Illam Dionys. c. 1. Eccles. Hier. ejusque

ejusque interpretes *θεοποιῶντες*, seu *Deificantem* vocant, ejusque munus esse docent, subditos sibi Deos efficere, divinamque similitudinem singulis pro suo modulo impertiri: quod confirmat Naz. Orat. 1. & 23. ubi sacerdotalis Ordinis viros, *θεοποιῶντες*, & *θεοποιῶντες*, *Deum efficientes*, & *Deum operantes*: quemadmodum & Ambr. sacerdotalem Ordinem seu Hierarchiam, *Deificam professionem* vocat, de dign. sac. c. 3.

Nemo verò Deificare potest ex officio, statu & gradu, Deique formam impertiri, nisi Deificetur, divinam in se formam atque imaginem prius recipiat per ordinationem: quod eleganter ostendit, Dion. c. 5. Eccl. Hier. inferiores ordines, immun-
dorum scilicet, sanctæ Plebis, & Monachorum, negans, ad Hierarchica munia purgandi, illuminandi & perficiendi, pertingere posse; quæ Episcoporum, Presbyterorum & Ministrorum ordinibus conceduntur, de quibus subdit, *Diviniores autem virtutes una cum suis, inferiores quoque sua perfectione ac virtute, sanctas scientias agnoscunt. Quoniam tamen sacerdotales distinctiones divinarum actionum imagines sunt ornatissimi, atque inconfusi divinarum operationum Ordinis, insitos sibi fulgores indicantes. Subdit eas in primas, ultimas & medias esse distributas, experimento in seipsis divinas actio-*

actiones ordinatas esse atque impermixtas.

Itaque consentaneè concludere possumus, non ordinatum in eo statu & ordine, cui Deificationis munus conveniat, neminem esse posse; sicut Deificare velle, non Deificatum, absurdum est: ita Hierarchica munia, quibus Deificationis scopus propositus est, non ordinatum, adire velle præsumptuosum esse: temerè affectare principatus gradum ac munia, eos, qui non habent Characterem præfecturæ suæ; Characterem, inquam, *Dominicum, Dei imaginem, potestatis à Deo acceptæ notam, sacerdotii Christi signaculum.* Legatur Pachym. in paraph. 3. c. Cæl. Hier. Dionys. Quo nullus expressius hoc argumentum urget.

IV. Ratio, quia si credimus recentioribus, Hierarchia dicitur quasi, *ἡ ἱερωσύνη, sacerdotum principium*, quibus verbis intelliguntur illi, quicunque ad sacra ministeria, publico nomine, & ex officio publico cooperantur: Nam privatim, & apud se, unusquisque Christianus, sacras Deo victimas offert, à quibus, *Regale sacerdotium*, denominatur, ut explicant fusiùs Orig. Hom. 9. in c. 16. Levit. & Hom. 4. in c. 6. Basil. lib. 2. de Bapt. q. 8. Isid. Pelus. lib. 3. Epist. 75. S. Leo serm. 3. in anniv. assumpt. suæ, & alii passim: neque tamen Hierarchicum habent sacerdotium, sacrumque principatum gerunt, sed suis terminis contenti manere

manere debent, non altioris Ordinis ad se functiones rapere, aut dignitatem usurpare.

Eorum autem, qui sacra administrant, secundum Dionys. duo sunt genera: quidam enim dicuntur *ιερείς*, Latine sacerdotes, ita dicti ab Isid. Hisp. lib. 17. Orig. c. 12. quasi *sacra dantes*: ex quibus aliqui sunt *ἀρχιερείς*, Pontifices, qui primis sæculis passim, *summi sacerdotes*, dicebantur, iique sunt Episcopi; alii sunt iis inferiores, id est Presbyteri. Posterioris verò generis dicuntur, *λειτουργίαι*, qui sacra facientibus *ministrant*, (quod potius dicendum, quam qui *obsequuntur*; nam & laici, quos nemo *λειτουργίαι*, dixerit, sacra facientibus obtemperant) juxta quam proinde divisionem, sequitur, nullos sacrorum publicos ministros, publicaue principia dici posse, nisi qui Episcopi, vel Presbyteri, vel Diaconi, seu ministri, inferiores Diaconis, sub-Diaconi, Acolyti, Exorcistæ, Lectores, Ostiarii, ordinati fuerint. Atque idèd Sacramentum ordinis, ad perfectum in Hierarchia locum, necessarium esse.

Prædictam verò divisionem, sequitur Bas. lib. 2. de Bapt. q. 8. cit. ubi sacram omnem functionem, duplicem facit: unam, quam *ἡ ἁγία*, alteram, quam *λειτουργίας*, nomine indiget, quibus etiam nominibus, cæteri Græci PP. seqq. sæculorum

lorum auctores, sacra omnia publica ministeria continent, & inter se distinguunt, sed eorum primum solis Episcopis, & Presbyteris, alterum solis iis, qui ordinati sunt, λειτουργοι, Diaconi scilicet seu ministri, tribuunt, ex ejusd. Bas. & cæterorum testimonio.

Igitur principem esse rei sacræ, seu functionis ministrum, nullum, nisi sacramento ordinationis insignitum, majores nostri putaverunt: ac proinde, nec ullum, in Hierarchia, saltem perfectè collocandum, nisi qui eodem sacramento initiatus sit.

C A P. III.

*Confirmatur præcedens assertio, aliis
Rationibus.*

Igitur Ratio est, quia, ut quis perfectè sit in Hierarchia, strictiori significatione, nemini vel earum rerum mediocriter perito, dubium est, quin ex officio publico & ministerio, debeat sacras aliquas functiones exercere; etenim Hierarchiam ita strictè sumptam nemo cogitat, nisi tanquam statum, ordinem, gradumque aliquem, qui sacer dicatur, propter sacrorum functionem publicam ipsi adnexam; atqui officium publicum sacrarum functionum nemini perfectè convenit nisi ordinato.
Igitur

Igitur nec ulli, nisi in ordine sacro constituto, perfectus in Hierarchia locus concedatur.

Probatur minor, I. Quia sacrarum functionum potestas, nemini in lege Mosaïca ordinariè concessa est nisi ordinatis, quorum gradibus Episcopi, Presbyteri, Diaconi, cæterique ministri succedunt: imò & naturæ veluti quodam ductu, quibuslibet, omnium ferè populorum consensu, inditum est, ut quos sacris præficiunt, eos consecratione quadam cæteris, sanctiores & augustiores reddant.

II. Quia sacræ omnes functiones, vel sunt ad Deum, cui nomine totius Plebis hostiæ, preces, sacrificia offeruntur; vel ad plebem, cui sacra traduntur, & explicantur. Utrúmque verò ordinationem requirit, quâ quis deligatur è populo, tanquam internuntius pro populo ad Deum, Dux populi & Doctor futurus, quâ segregetur pro populo apud Deum intercessurus, vicissimque Dei Oracula revelaturus, & ejusdem potestate sacris cæteros initiaturus: quem delectum ex divina institutione sæquitur destinatio ab Episcopis Dei vicariis, quorum est Dei nomine, quos Deo placituros putant, gratos habere, & ad opus divinum approbare, sanctificare, ac divino Characterè seu notâ dignitatis insignire.

III. Ad

III. Ad hoc etiam opus est consecratione publicâ, nomine publico factâ, ut delecti ministri apud plebem sanctiores & augustiores fiant, utpote superiores cæteris, & dignitate quadam publicâ ornati, & sacro quodam Magisterio præditi, ad quem gradum inauguratione opus est; tum ut ipsi sanctiores sint, atque augustiores; tum ut majori venerationi sint apud populum, quatenus ipsis facilius Laïcorum colla subdantur; tum ut excitentur ipsi consecratione sua, ad sanctè pièque vivendum; tum denique, ut gratiâ divinitus concessâ, ad eadem officia, multis difficultatibus obsita, valdeque ardua, juventur & confirmentur: talis autem consecratio, non est aliâ à Sacramento Ordinis: igitur ad perfectam Hierarchiam, opus est Sacramento Ordinis.

Confirmatur hæc ratio, innumeris PP. testimoniis, passim toto hoc Tract. inserta leguntur, quibus Ordinationis Sacramentum ad functiones sacras obeundas, necessarium esse constat, ex divina Christi institutione. Quibus addimus testimonia Viêt. ad c. 3. Marc. docentis, *Presbyteros ad sacra ministeria ordinari*. Et Justinian. nov. 137. c. 1. *Episcopos, Presbyteros, Diaconos, & cæteros clericos, ad orandum pro populo destinari*. Ex iis enim concluditur, sacra officia, ac publica, rectè saltem & consentaneè, absque

alio disciplinæ genere institutum dicentem; quòd de Laicali vita ad Pontificatum emerisset. Item Græci PP. passim secuti Dionys. libr. de Cæl. & Eccl. Hier. Clem. Rom. lib. 3. Constit. c. 10. sacramunia, τὰ ἱερωτικὰ ἔργα, vocant, quasi sacerdotalia, eaque Episcopis, Presbyteris, ac Ministris, propria faciunt; innuentes sacrum ministerium cum sacerdotali confundi, & sacerdotalis Ordinis viris, sive in primo, sive in secundo, sive in tertio sacerdotio constitutis, convenire, quam sacerdotalis Ordinis acceptionem Dionys. c. 2. Eccl. Hier. Maxim. in Schol. ejusd. c. Opt. Milev. lib. 1. contr. Parm. & alii passim, sufficienter illustrent.

C A P. I V.

Ne quidem imperfectè quisquam in Hierarchia esse potest, cui non Sacramentum Ordinis debitum sit, cui non servatâ Ecclesiæ lege atque institutione sui officii, illicò sit conferendum.

ASSERTIO hujus cap. facillè ex probatione præc. deducitur Et quidem quòd ne quidem imperfectè sit aliquis in Hierarchia propriè dictâ, nisi vel ordinatus sit, vel esse debeat, patet: quia nemo potest

G

test

test ne quidem imperfectè Hierarchiam propriè dictam cogitare, nisi tanquam sacrum Principatum, eam concipiat. Sacer autem non est absque ordine sacro, vel debito ad habendum ordinem sacrum: duobus enim modis dicitur sacer, 1. ratione principii. 2. ratione objecti: utròque modo dicatur, non tamen sacer dicetur, nisi vel adsit ordo sacer, vel adesse debeat.

Si dicatur sacer, ratione principii, res clara est: nam ideò sacer dicetur, quia Ordini sacro vel conjungitur, vel conjungi debet. Si ratione objecti, ex prædictis, res non minùs evidens est: Nam ad functiones sacras docuimus, & sacra publica ministeria neminem consecrari, nisi per ordinem sacrum: qui ergo eas exercet absque ordine, vel indebitam sibi functionem usurpat; vel ad tempus solum concessam: ac proinde in principatu sacro nemo est, nisi qui vel ordine sacro initiatus est, vel esse debet.

Principatus quoque in Ecclesia nullus est, cui non debeat sacer ordo, ut enim principatus dicatur, debet includere ordinariam Jurisdictionem, vel voluntariam, vel necessariam: neque sufficit, quòd officii alicujus publici executionem tribuat, quin etiam tribuat officium: Sicut nec in civili Resp. dicitur principatus, aut magistratus,

stratus, nisi officium habeat, & potestatem ordinariam: atqui nulla jurisdictio ordinaria, ne quidem voluntaria, est in Ecclesia, cui non ordo debeatur: quibus enim Deus aliquorum actuum legitimorum exercendorum, & officium, & ordinariam potestatem dedit, quos aliis præfecit, eos voluit esse ordine sacro sublimiores, sicut statu & officio sunt superiores.

Multò magis verò iis, quibus ordinaria necessaria Jurisdictio convenit, ordo aliquis sacer debitus est: nam Ordinis & Jurisdictionis sanctissima connexio est, ita ut etiam si fortè ad horam, vel ad breve tempus, Jurisdictio separetur ab ordine sacro, cum eo tamen debeat, secundum Christi institutionem, quantò citiùs fieri poterit, esse conjuncta.

Confirmatur; nam ad Hierarchiam, ascensus fingi tantùm potest, vel ratione Charismatum, vel Ordinis, vel Jurisdictionis, testibus etiam modernis: atqui certissimum est, ratione Charismatum præcisè neminem esse in Hierarchia, quòd fortè latius, aliàs sumus explicaturi: constat omnes, qui sunt in Hierarchia Ordinis, verè ordinatos esse debere, & de ordine propriè dicto sermonem esse, ubi de Hierarchia est mentio: superest ergo Jurisdictio, quæ vel ordinaria est, vel delegata: delegata autem non constituit hominem in

Hierarchia ex prædictis; ordinariæ debetur sacerdotium, vel saltem diaconatus; atque ita nemo in Hierarchia propriè esse potest, cui non debeat sacerdotium, vel diaconatus.

C A P. V.

Imperfectus ei in Hierarchia locus est, cui expedita Ordinis potestas relinquitur, cum Jurisdictione scilicet saltem voluntaria; etsi per accidens desit forte necessaria, eaque ordinaria Jurisdictio.

Liquet similiter hæc assertio: etenim quis dubitet, non ordinatum aliquem, qui electus sit in Episcopum, v. g. aut Presbyterum curatum, aut Archi-Diaconum, eo ipso, facti principatus esse aliquatenus participem? Quandoquidem Episcopus jam dici soleat, curatus, aut Archi-diaconus; jam Jurisdictionis officia, munia exerceat, ut constat ex toto tit. de elect. & electi potest. aliisque passim: jam subditos habere censeatur; eique ordo iste debitus sit, quem gradus exposcit, ad quem scilicet ab Ecclesia admissus est. Confirmans enim electionem alicujus in Episcopum, eo ipso concedit, ut Episcopus consecratur, cum dignitas

dignitas Episcopalis confeſſionem includat : qui admittit aliquem ad curam animarum , cum Presbyterum ; qui ad Archi-diaconatum , illum Diaconum ordinari permittet.

Igitur electi ad ejuſmodi dignitates , aut alias , quibus ſacer ordo annexus eſt , verè in Hierarchia , licèt nondum perfectè , propter defectum alicujus , quod ei debetur , locum tamen habere aliquem , dici debent.

C A P. V I.

*Ignat. malè , auctor Hierarchiæ Ordinis ,
à Jurisdictione diuulſæ , profertur ,
qui contrarium doceat.*

Quidam , ſtudio contentionis magis , quàm ductu Veritatis , nituntur , Hierarchiam Jurisdictionis , ut diſtinctam , ab Hierarchiis Ordinis , & Charismatum , adſtruere. Adducunt PP. testimonia , ad Hierarchiam Ordinis , ſolitariè ſumptam , probandum : Sed ſi benè expendantur , eam Jurisdictioni ſtriſtiſſimè alligatam , eandemque Jurisdictionis Hierarchiam eſſe , oſtendunt. Citant ergò ign. verba , ex Epist. ad Smyrn. quæ mutila ex parte , reſtituimus : *Honora , fili mi , inquit ſcriptura , Deum & Regem. Ego autem dico , honora*
G 3 *quidem*

quidem Deum, ut omnium auctorem & Dominum: Episcopum autem, ut principem sacerdotum imaginem Dei referentem: Dei quidem propter principatum; Christi vero propter sacerdotium: & secundum hunc oportet & Regem honorare. Neque enim Deo quisquam præstantior est, aut similis ei in rebus creatis: nec Episcopo, qui Deo consecratus est, pro totius mundi salute, quidquam majus in Ecclesia, &c. Nam sacerdotium bona omnia transcendit, &c.

Rectè quidem, in iis verbis agnoscunt recentiores, ordinem, sed non eum, quem ad actiones Monachatus dejiciunt, & privatæ vitæ functiones: sed ordinem sacerdotii, cujus fastigium tenet, ordo Episcopalis: Ordinem, inquam, qui in sacrificiis, pro totius mundi salute, offerendis, versatur sed in iisdem etiam agnoscunt Jurisdictionem, propter principatum, ratione cujus, Dei imaginem Episcopus refert, & Regi assimilatur. Quare si consentaneè concludere aliquid vellent, ordinem Episcopi, (& idem dicas de cæteris) ad illam Hierarchiam spectare, colligerent, quæ simul Ordinis Sacramento instructa & Jurisdictione, integrum, suisque pumeris absolutum, sacrum efficiunt principatum.

Etenim subdunt, *Ignat. expressius eo loco, Hierarchicos Ordines, dignitatemque describere, Epist. scilicet ad Trallian. ubi hæc habet:*
quid

quid enim est Episcopus? nisi qui omni principatu, & potestate superior est, & cunctis dominatur, quantum quidem homo dominari potest, factus pro virili sua, Dei imitator: quid autem ordo sacerdotum? nisi sacer cœtus, & consilarii, atque assessores Episcopi: quid verò Diaconi? nisi virtutum Angelicarum imitatores, purum & immaculatum ministerium exhibentes, ut S. Stephanus, S. Iacobo, Timotheus & Linus Paulo, & Clemens Petro.

Quid ex eâ sententiâ, vel à subtili Logico exspectares, nisi & Ordinis, & Jurisdictionis, mixtim hîc referri, functiones, ut pateat Hierarchiam Ecclesiasticam & Ordinis & Jurisdictionis esse, nec earum dotum unam, ab alia separandam, aut dividendas eas esse, quas Deus indivulfas esse voluit, & Ignat. conjunctim retulit? Concludunt insuper ita, quæ dicta, licet Jurisdictionem sapiant, ad Ordinem tamen melius videntur referenda, cum eximius iste principatus Episcoporum, in Ordinis ministerio positus sit, ipso Ign. interprete, Epist. ad Heron. Diac. Nihil absque Episcopo facias: ipsi enim sunt sacerdotes, tu autem minister sacerdotum. Illi baptizant, sacrificant, eligunt, manus imponunt, tu autem ipsis ministras. Hos autem Ministros & Diaconos, nonne Ordinis potius, quàm Jurisdictionis ministerium, postulat & excipit?

Sed nonne & Ordinis & Jurisdictionis

ministri, sunt Diaconi? lege constitit Apostolicas, ex quibus discemus, quæ Jurisdictionis essent, omnia, ferè ab Episcopis, per Diaconos, actitata olim fuisse, preces quasvis ad Episcopum, per eos directas, responsa, relata, monita, jussa Episcoporum, per Diaconos insinuata: nonne & actus illi, quorum apud Ign. mentio est, & ad Jurisdictionem, & ad Ordinationem spectant? nam v.g. Baptismus & ordinatio, ut legitimè fiant, tam Ordinem, quàm Jurisdictionem requirunt; & electio solam Jurisdictionem, non actualem Ordinem requirit.

Concludere ergò debebant, Ign. Jurisdictionem ab ordine, & Ordinem à Jurisdictione separare, minimè voluisse; duo hæc, ut sibi invicem complicata, ad unius principatus Ecclesiastici & potestatis Episcopalis, ac sacerdotalis complementum, necessariò requisita, fuisse complexum.

Sed iterum divinum istum virum, Ign. nempe, unam Ordinis, non autem Jurisdictionis Hierarchiam, attigisse, se conficere putant; tum quòd personæ eadem, ab illo numerentur, quæ à Dionys. *Episcopus, Presbyteri, & Diaconi*; tum quòd eadem officia: Primum probant, nam, Epist. ad Smyrn. *Omnia, inquit, inter vos, bono ordine fiant in Christo: Laici Diaconis subditi sint, Diaconi Presbyteris, Presbyteri Episco-*

Episcopis, Episcopi Christo, quemadmodum ipse Patri. Et Epist. ad Antiochenf. Saluto S. Presbyterorum collegium, saluto sacros Diaconos, & amabile mibi nomen: saluto subdiaconos, Lectores, Ostiarios laborantes, exorcistas confessores: saluto custodes sacrarum portarum, Diaconissas in Christo: saluto ascriptas Christo virgines.

Circa quem textum hæc commentantur, fortassis, cantores Ign. appellare, eos, quos ætas posterior Psalmistas: qui tam in statu & ordine, non sunt, quàm in officio: quemadmodum neque confessores sacrum statum obtinent; sed quasi sanguine ipso dedicati, à Laicorum vulgo exempti, ad SS. Personas adjunguntur. Virginum alia ratio est, quas votiva castitas in statu perpetuo collocat.

Alterum, quod eadem sint officia, apud Dionys. probant, ex Epist. ad Smyrn. Nemo absque Episcopo, quidquam eorum faciat, quæ ad Ecclesiam pertinent, non licet absque Episcopo, neque Baptizare, neque offerre, neque sacrificare, neque agapem celebrare. Item ex Epist. ad Ephes. Omnes in gratiam nominatim congregamini, communiter, obediens Episcopo, & Presbyteris, animo inseparabili, unum panem frangentes, qui est immortalitatis medicamentum; nemo erret, nisi quis sit intra altare, pane Dei privatur. Quorum verborum hunc sensum adstruit, ut in ipsa Ecclesia, uni Episcopo, & Presbyteris, fidei & orationis

unitate, communicare omnes debeant.

Quod confirmant, ex Epist. ad Trallian. Qui intra altare est, mundus est : inde & Episcopo obedit, & Presbyteris, & Diaconis : qui verò foris est, (hæreticus & schismaticus) hic est, qui sine Episcopo, & Presbyteris, & Diaconis, quippiam facit : ejus inquinata est conscientia, & est infideli deterior. Ipsum Diaconorum ministerium, non aliter, (pergunt) quàm per Eucharistiæ dispensationem explicat eodem loco, dicens, oportet & Diaconis, Mysteriorum Christi Iesu, omni modo placere ; nec enim ciborum, & potionum sunt Diaconi, sed Ecclesiæ Dei ministri. Hæc ex Ignat. moderni, non satis fideliter.

C A P. VII.

Conclusio Præc. Cap.

SEd jam adverte lector, quam conclusionem ex Præc. eliciant : Cum, inquit, in personis Jurisdictio, neque in actione coercitio, vel imperium appareat, nemini dubium esse debet, quin solum ordinem respuerit magnus Ignat. Quid dicitis ? nonne vobis videtur satis expressisse Jurisdictionem Ign. satis coercitionem indicasse, satis imperium insinuasse, dum toties Episcopis Presbyteris, Diaconis, obediendum præ-

præscripsit? nonne subditos legitis? eos verò Jurisdictionis correlativa esse, quis dubitat? obedientiæ mentionem, apud Ign. frequentem inspicitis: at Jurisdictioni & imperio respondet, *parendi atque obediendi debitum*: exclusionem à sacris, inobedienti Episcopo, Presbyteris, & Diaconis inflictam, videtis: sed ea maxima, gravissima & ultima, Ecclesiasticæ Jurisdictionis poena, Can. *Corripiantur*, 24. q. 3. c. sacro de sent. excomm. & aliis passim.

Electionis, & ordinationis ministratio-
num, ac Baptismi solemnis, apud Ign. mentionem attenditis: Negativne esse functionem Jurisdictionis, vel imperii majoris esse, jus constituendi Magistratus, Rectores, DD? Itemque cooptandi solemni ritu, & auctoritate propria, aliquem, in societatem aliquam? seu corporis cujuslibet, ac communitatis, tam civilis, quàm Ecclesiasticæ; tam sacræ, quàm prophanæ juribus donandi? quorum primùm per electionem, atque ordinationem, alterum per baptismum solemnem, faciunt Episcopi, vel Ecclesiastici Ministri, quibus Episcoporum vice conceditur.

Quid ergo, ex iis Ign. locis, Jurisdictionem, ab ordinis consortio excludunt, quibus arctissimè connexam, ostendit Ignatius? si fatentur *obedientiæ nomine* Jurisdictionem

ditionem sufficienter innui, insulsiſſima est argumentatio : non enim solum non inferunt quod intendunt, sed contrarium inferre debent ei, quod intendunt. Si eodem nomine negant, Jurisdictionem Ecclesiæ, sufficienter innui, videant, ne exarment Ecclesiam, potissimis suis telis, quibus Hæreticos, politicoſque, Jurisdictionem ei adimenes, confodit : quibus enim potissimum armis, pugnat Ecclesia, pro Jurisdictione suâ tuendâ, nisi quia dixit Apost. *obedite præpositis vestris, & subjacete eis, ipsi enim pervigilant, quasi rationem, pro animabus vestris reddituri*, ad Hebr. 13. & *si quis non obedit verbo nostro*, ad Theſſ. 3. nisi quia & scriptura S. & PP. plebi fidei, Pastoribus ab Ecclesia constitutis, parendum obediendumque præscribunt.

Ignat. ajunt, Episcopos, Presbyteros, Diaconos, nominasse, colligunt exinde, Jurisdictionis Hierarchiam, non texuisse; contrarium colligere debuerant. I. Enim, Jurisdictionis, isti Ordines sunt capaces, ipsis, solisque, Ecclesiastica debetur Jurisdictione. II. Vel ipsorum nomina, Jurisdictionem sonant : Episcopi siquidem *speculatores* dicuntur, & super-intendentes propter Jurisdictionem, eminentiam in omnes, & regendi sollicitudinem: Presbyteri quasi *seniores* dicuntur, & senatores;

con-

consilarii scilicet, assessores & coadjutores Episcoporum, quales in sua ordinatione memorantur, & ab ipso Ign. Epist. ad Tralian. disertè afferuntur; cui Greg. Naz. Orat. 23. Cypr. de singul. Cleric. Ambr. in c. 5. prior. ad Timoth. Themist. Orat. 13. adstipulantur.

Diaconi tandem, superiorum ordinum ministri dicuntur, sed in populum Jurisdictionem exercentes potentissimam: quippe, *imitatores Angelicarum virtutum*. & ita in Episcoporum nomine, Principatissimam, in Presbyterorum voce, consulatissimam, in Diaconorum appellatione, efficacissimam Jurisdictionem, intelligis. Desinite ergo ita ratiocinari, ut quia Episcopi, Presbyteri, Diaconi, ab Ignat. nominantur, Jurisdictionis mentionem nullam, eum facere, dicatis; quinimò, quia eorum mentionem facit, Jurisdictionem quoque cum ordine comprehendit.

C A P. VIII.

Dionys. quoque ordinem cum Jurisdictione conjunxisse, in explicanda Hierarchia.

Sed inquit, Dionys. consentit Ignatius, eosdemque nominat. Quid tum? ad

ad tribunal ipsius Dionys. me sisto, judicem ipsum non recuso: superius enim toties demonstratum est, Jurisdictionis etiam mentionem, Dionys. fecisse; Episcopisque, Presbyteris, ac Diaconis, ac generaliter omnibus, qui in Hierarchia, strictiori significatione sumpta, consisterent, Jurisdictionem tribuisse, ut eo judice, lite eos cadere, oporteat.

Sed quoniam eum solum, functionum Ordinis, mentionem fecisse, gloriantur, quas, fateor ipsum diligentius explicasse; ipsarumque mysteria, ut par erat, exposuisse: Jurisdictionis tamen necessariæ, eum etiam mentionem fecisse, vel ex iis, quæ citavimus, vel ex istis, quæ subdimus, discere potuerant. An non Episcopos passim *ἐπισκοπος*, vocat, & *ἐπαρχος*, quæ nomina Jurisdictionem haud dubiè sonant? An non c. 5. Eccl. Hier. sacerdotem, non acceptâ ab Episcopo licentiâ, nihil aggredi, nihil tentare præcipit, quæ Jurisdictionis Pontificiæ, Prærogativa est, non ordinis.

An non eod. cap. & aliis, de immundorum à sacris exclusionem, & expiationem poenitentium, meminit, qui Jurisdictionis necessariæ potissimi sunt effectus? Annon sponsonis baptizandi, mentionem facit, c. 2. p. 1. quâ se scilicet obstringit ejus decretis, ac voluntati perfectè obtemperare? eâne insufficientia videntur, ad firmandum

dum sacrum Episcopi imperium? An non eod. cap. p. 3. Baptizatus quivis, decretis, legibusque Episcopi, devinctus & obligatus esse dicitur? Nónne hæc Episcopalis Jurisdictionis vestigia sunt, ac monumenta?

Hæc omnia, aliâque plura, reperire poterunt, quæ Episcopalem Jurisdictionem, toto hoc opere, non omisisse, nec reticuisse Dionys. persuadere poterant, nisi obfirmato adversus veritatem tam apertam animo ad scribendum sese accinxissent.

Sed unum est, quod pertinaciam eorum frangere fortè queat, quòd definiens Dion. Hierarchiam istam, de qua ipse ageret Jurisdictionis etiam strictissimè sumptæ, non fuisse illam, expertem, significet. Quid enim, quæso, Jurisdictio strictissimè sumpta, nisi *potestas de publico introducta, cum Jurisdicendi, & æquitatis statuendæ necessitate?* ut notant Alciat. ad fin. c. 24. lib. disp. 2. Gloss. & ibi Barthol. in l. 1. ff. de Jurisdic. omnium Iudic. Gloss. in Authent. de defens. civit. §. jurisjur. & alii passim.

Atqui Jurisdictionem ita sumptam, Hierarchiæ suæ, tribuit Dionys. c. 3. Hier. Eccles. in Theoria, *Est enim Divina Hierarchia, justitiæ plena, ac unicuique pro dignitate, salubriter consentaneam tribuit, rerum divinarum communionem, sanctæque pro modo & capta, secundum tempus concedit.* Igitur

Igitur propriam Jurisdictionem Dionys. isti Hierarchiæ, quam tractat, attribuit.

C A P. I X.

De Ignat. mente iterum disputatur, & recentiorum periculosa expositio, refellitur.

Consentiens itaque Dionys. Ignatius, Jurisdictionem similiter, veris Hierarchiæ membris adscribit, ut patet ex variis testimoniis cit. Quibus, Episcopis, Presbyteris, & Diaconis, quos solos in suam Hierarchiam transcribit, obediendum esse, præcipit; quod utique Epist. ad Antiochen. consequenti serie, post salutatos *Presbyteros*, & *Diaconos*, quos à cæteris separat, *sub-Diaconos*, *Lectores*, *Cantores*, *Ostiarios*, *Laborantes*, *Exorcistas*, *Confessores*, nominat; eisque postea *Diaconissas*, & *Sacratas Deo Virgines*, adjungit; noli tibi fingere, Lector, perfectam in iis verbis haberi Hierarchiæ enumerationem.

I. Enim sibi ipsi esset contrarius, dum alibi solos Episcopos, Presbyteros & Diaconos nominat. II. Quia, quibus locis, solos Episcopos, Presbyteros, & Diaconos memorat, manifestè se de Ecclesiæ principibus, & primoribus agere, ostendit, iis obedi-

obediendum docens: at loco isto ad Antioch. de Hierarchia se agere, nullatenus significat; quinimò divertorum Ordinum, vel conditionum homines salutandos, suo nomine duntaxat præscribit, quæ res alienissima est ab Hierarchiæ assignatione. III. Inter eos numerat *Confessores*, quos nemo dixerit, ad Hierarchiam ordinis spectare, nec, testibus ipsis recentioribus, in eam inferi possent, *quod neque sacrum statum obtineant*. Imo nec *Psalmistæ*, seu cantores ipsi, videntur in eam coaptandi, si benè verba eorum intelligantur, quibus, eos admitti, *tam in statu & ordine non posse, quàm officio*, asserunt.

IV. Imprudenter proindè, & sine fundamento, contra omnium sensum, quod Confessoribus, quod Psalmistis denegant, virginibus attribuunt; quasi virginum alia ratio sit, *quas votiva castitas, in statu perpetuo collocat*. Unde non est probabile, Ignat. contrariam habuisse sententiam, ei, quàm disertè constit. Apost. produnt, lib. 8. sicut enim istius libri, c. 23. Confessorem, quantumvis magno honore dignus habeatur, non ordinari asserit, ita nec virgines, quas proindè falsò, Ignat. inter ordinatos; in Hierarchia ordinis, reposuisse, contendunt moderni. V. Inaniter etiam id asstruunt, ex eo, quod post ordinatos, eorum fiat mentio; quasi non etiam, mère

merè Laïcorum mentio, fieri non potuerit post clericos: cùm ipsi confessorum factam fuisset, fateantur, quos Laïcorum numero non eximunt: officia verò, & functiones, Ignat. non ordinis solùm, verùm etiam Jurisdictionis protulisse, ex aliis locis probare, non est opus.

Quòd si pergant novitii isti Scholaistici, ea, quæ de obedientiâ Episcopis, Presbyteris, & Diaconis, exhibendâ, à populo, dicta sunt à PP. ita interpretari, ut de unitate, & communione populorum, cum eorum graduum viris, in unitate fidei, & orationis, solùm intelligantur; & in ea tantùm communione, Ecclesiæ unitatem constituisse, caveant, ne in suspensionem Calvinianæ hæreseos veniant, à cujus auctoribus, istam unitatis Ecclesiæ explicationem mutuati sunt; & quibuscum, Ecclesiæ unitatem, in sola fide, & oratione communionis, non autem, in subordinatione populorum, tanquam verè subditorum Pastoribus suis, veram Jurisdictionem habentibus collocare reformident.

Augēt certè hanc suspensionem, quæ ipsi, in diminutionem potestatis Episcopalis, & inficiationem popularis obedientiæ, subdunt, in Resp. ad object. ex sententia Ign. Epist. ad Philadelph. decerpta: obijciunt enim sibi, eandem, ex Ign. in Ecclesia, subjectionem requiri, cum eâ, quam in
pro-

prophana politia, videmus, dicente scilicet Ign. *Principes pareant Cæsari, milites principibus, Diaconi, & reliquus clerus, simul cum omni populo, & militibus, & principibus, & Cæsare, pareant Episcopo: Episcopus Christo, sicut Christus Patri, & ita unitas servabitur.*

Constat verò propriè dictâ Jurisdictione, Cæsarem principibus, principes militibus imperare: Ergo eandem Jurisdictionem, in Episcopo, & Presbyteris, desiderare videtur Ignat. Resp. *Comparisonem in illa specie subjectionis, non fieri, sed tantum in genere, ut Ecclesiastici ritus, non minus pacatè, Religiosèque tractentur, quàm externa negotia.*

Quid est, quod te adeò vexas, Philosopho Scholastice, ut Jurisdictionem Episcopis abneges? An quia hanc putas, Episcopis deesse? Hæreticus es, si hoc sentis. An quia adesse quidem credis, sed non ab Ignat. memoratam fuisse: sed quibus velles, clarioribus verbis, Ignat. uti potuisset, si explicare eam voluisset: Parendum Episcopis, Presbyteris, Diaconis, prædicat, ut milites Imperatori, ut subditi principibus, ut Episcopi Christo, ut Christus homo Patri?

Majoremne aliquam, aut strictiorem subjectionem assignare potuit? cur ergo, nec iis verbis contentus es: sed solum expressam

pressam dicis ab Ignat. *pacis, unitatis, & tranquillitatis* commendationem? quasi verò pax & tranquillitas, in humanis rebus, absque imperio haberi, vel unitas Ecclesiæ, absque subjectione populorum suis pastoribus, foveri posset. Hanc strictam subjectionem, si negas, suspicionem præbes æquissimam, quod nostris novatoribus faveas; si non negas, imperitum te argumentatorem exhibes, qui iis verbis, quæ imperium, & Jurisdictionem involvunt, Hierarchiam Ordinis, expertem omnis Jurisdictionis, elicis.

C A P. X.

Ignat. Epist. ad Heron. Diacon. adversus Neotericos.

UT autem te, Doctor Neoterice, efficacius convincam, quandoquidem ex una particula Epist. 13. Ignat. ad Heron. quâ Diaconum istum, in Altaris solum ministerio deservientem, nobis ab Ignat. exhibitum, contendis, ut sicut Stephanus Jacobo, & Presbyteris ministrabat, ita Episcopo, & Presbyteris duntaxat, in altari eum ministrare debuisse, inferas, ex Ign. testimonio: ego è contra, & infirmam omninò, & imbecillem tuam probationem ostendo, quia nec *ministerii* nomen, ad solum

solum Altaris ministerium restringere oportet: constat enim Stephanum, & in Dominici verbi prædicatione, & in aliis, Hierosolymis ministrasse: & falsam assertionem tuam, ac mutilatum à te Ignat. testimonium proferri, ostendo.

Etenim alia utique tota Epist. Diaconorum officia, describit, quæ imperium aliquod in plebem, ostendunt, ut quoddam aliis, leges Dei interpretari jubeatur; quoddam contra traditionem docentes, pro lupis habere, moneatur; quoddam viduam honorare; pupillis patrocinari; omnes ad Synaxim nominatim inquirere; sine Episcopo nihil facere; sorores fratresque hortari; virgines servare; ut pretiosa Christi monilia; pauperes non negligere, depositum custodire præcipiatur: quoddam & Ecclesiam Antiochenam ei commendet.

Hæc omnia diversa sunt, à ministerio Altaris, & Jurisdictionis, à Diaconis participatæ, insignia testimonia sunt: Igitur falsum est, Diaconorum officia, Ecclesiâ & altari, ab Ignat. circumscribi.

Quod autem de Jurisdictione fori exterioris, addis, & adversum fideles, frustra à te factum, implicandæ quæstionis gratiâ: non enim hic agitur, de sola Jurisdictione fori exterioris, in quo ex formula disceptari oporteat, litesque agitari: non de foro, in quo, adversus aliquem pronuntiari, necessum

sum sit, eumque lite repellere: simplicior ut plurimum fuit, Jurisdictionis Ecclesiasticæ formula, prioribus iisæ sæculis.

Contendo, itaque, non solum Jurisdictionem voluntariam, quæ ad Hierarchiam imperfectam sufficit, & necessariam, quæ necessitatem, obtemperandi inducit, Ignat. agnitam, & ab Ignat. expressam, etiam in Diaconis, tanquam ordini Diaconorum, tunc temporis, vel adnexam, vel connaturalem: ac proindè non solum insufficienter, verum falsò, Ignat. auctorem Hierarchiæ Ordinis, sejunctæ ab omni Jurisdictione proferri.

De Tridentinorum PP. sententia, jam non disputo, superiùs enim satis à nobis discussa, & examinata est: sufficienterque demonstratum, nec ordinem sine Jurisdictione, nec Jurisdictionem sine ordine Tridentinis PP. ad perfectam Hierarchiam, sufficere visa; utrâque desiderari, nec sine gratiarum divinarum consortio.

C A P. X I.

*Utrum electi Pontifices , non ordinati ,
imperfectè sint in Hierarchia
collocandi.*

EX quibus omnibus patet, quàm frivolæ sint objectiones eorum, qui Ordinis Hierarchiam, ab Hierarchia Jurisdictionis distinctam, non unam, & eandem Hierarchiam, duabus istis dotibus instructam, probare conantur; quas omnes, hîc non retexo, utpote quæ tam ex iis, quæ dixim. quam quæ sparsim, toto hoc opere dicemus, nullo negotio diffuari possint. Levis tantum mora nobis, in ea sola object. expungenda, terenda est, quo nos summo Pontifici, & Episcopis, contumeliosos esse, probare quis contenderet; quodd eos, si electi tantum fuerint, nondum ordinati, imperfectè tantum, de Hierarchia esse, docuimus.

Ubi imprimis desidero, in tali homine modestiam, quodd exinde nos, tanquam contumeliosos, Episcopis non consecratis, audacter inculcare vellet, quia Pontificem, vel Episcopum electum, nondum perfectè de Hierarchia Ecclesiæ, ex ordine & Jurisdictione constanti, esse, docuimus:
quodd

quòd ad Theologiam, & DD. provocet, utrum hoc admitti possit : quasi non Theologia id admittat quod canones, quod usitata in Ecclesiâ loquendi forma, quod ratio manifesta persuadent. Si enim canones consulis, nondum Pontifex, vel Episcopus dici debet, qui nondum Episcopus consecratus est, quamvis electus; imò etiam confirmatus fuerit: Nondum, inquam, dicitur Pontifex, vel Episcopus, tantum abest, ut perfectè dicatur Pontifex, vel perfectè Episcopus, aut perfectum in Hierarchia, tanquam Pontifex aut Episcopus, locum tenere, asseratur.

Hæc qui ignorat, consulat plurimas Romanorum PP. Epistolas, quæ si Episcopo, nondum consecrato, scriptæ sint, nunquam ad Episcopum inscribuntur, sed simpliciter electo diriguntur. Legat & varios passim canones, præsertimque toto tit. *de elect. & electi pot.* In quibus eadem ratio loquendi servatur. Notet etiam & cap. *Tua nup. de iis, quæ fiunt à Prælat. sine consensu capit.* Cujus statim initio, electus antistes, Episcopo opponitur, & tanquam distinctum membrum, scribitur. Observet etiam id adeò pro constanti haberi, ut Glossa in Clement. I. *de pœn.*, verbo, *ut quemvis Pontific.* ausa fuerit tueri constitutionem, pœnas inferentem iis, qui Episcopis injurii sunt, offendentes *electos, nondum*

*nondum consecratos, qui Pontifices, id est :
Episcopi non sunt, non videri includere.*

Quod si quis etiam speciatim circa summum Pontificem, aliqua quærat, quibus hanc sentiendi rationem, & loquendi morem istum, perspectum habeat, legat recitatam à Greg. Turon. Rom. Gregorii ad summum Pontificatum, tam electionem, quàm ordinationem, descriptam, lib. 10. Hist. c. 1. electionem quidem, iis verbis, *Gregorium Diaconum plebs omnis elegit, ordinationem verò istis, majoribus data perceptione, ipsum jussit institui.* Item, *ad Pontificalis gratiæ officium, consecratus Papa, urbi datus est,* quasi tunc primùm perfectè instituat, & Pontifex detur, cum demum consecratur.

Eandem phrasim olim observatam referre pigeret, cum passim occurrere possit : sed prætermittere non possum, eximiam summorum Pontificum, circa hæc tempora, modestiam, quos, notat Baron. tom. 8. ad ann. 690. electos Pontifices, antequam consecrarentur, neque solos Ecclesiam gubernasse, neque tanquam omnium primos, se gessisse, sed Archi-Presbyterum, post hunc electum, tum primicerium, quarto loco consiliarium : quod utique probat, ex Epist. Cleri Rom. ad Scotos, apud Bed. lib. 2. Hist. Angli. c. 19. in qua, hoc ordine subscribunt. Hilar. Archi-

H

Pres-

Presbyter, Joann. Diaconus electus, Joann. Primicerius, & Joann. Consiliarius.

Neque desunt rationes, ob quas asseri debeat, Episcopus, nondum Consecratus, nondum plenè ac perfectè esse Episcopus. 1. Quia in Consecratione, electo crimina iterum obijci possunt, quæ eum ab ordinatione repellant, ut constat ex c. *illud*, dist. 23. & aliis passim; ex Justinian. Novell. 63. p. 1. §. *si quis*, & 123. c. 14. & ex formula, in ordinationibus observari solita, contestandi coram populo, ut si quis intercedere voluerit ordinationi, eâ animi moderatione, & cautelâ, quâ decet, id faciat, ex Cypr. Epist. 68. ad Cler. & Pleb. in Hispan. consist. Orig. Hom. 6. in Levit. c. 8. Euseb. lib. 6. c. 55. & p. 1. c. 2. a. 2. §. 4. Oper. Hall. de S. Elect.

Altera quia juxta doctrinam Innoc. III. c. *licet de Transl. Episc.* Illud spirituale fœdus conjugii, quod inter Episcopum & Ecclesiam, intercedit, in electione initiatum, ratum in confirmatione, & in consecratione intelligitur confirmatum. III. Quia nec ipsa Jurisdictio in variis actibus, liberè sese explicat, nisi ordinationi jungatur: imò & judicandi, ac deponendi clericos officium, nemini connaturale est, nisi cui ordinandi potestas est connaturalis: quippe cùm ejusdem sit destituere, cujus est instituere, ejusdemque judicare, cujus est ordinare, ut
ex

ex PP. sententiis manifestè patet. IV. Quia Episcopus non est alius, à summo sacerdote, ex communi PP. loquendi more: At summus sacerdos, quâ fronte perfectè dici potest, qui sacerdos ordinatus non fuerit?

Itaque cùm ex iis omnibus, liquidò constet, nec quemquam perfectè Episcopum, aut Hierarcham, nec Pontificem, seu Hierarcharum Hierarcham, perfectè constitutum, dictum olim fuisse, cui deesset consecratio, ad confirmationem electionis, ad amplitudinem maiorem Jurisdictionis, ad connaturalem agendi modum, ad sanctiorem & augustiorem electi maiestatem, ad vigorem sacerdotalem, & facilitatem operandi, ex gratia provenientem. Quis aded ineptus erit, ut contumeliosam Episcopis, hanc formulam loquendi probet, quod Episcopi electi, nondum consecrati, negentur perfectè in Hierarchia locum tenere, quibus nempe perfectio aliqua debita deest, ad consummationem potestatis, ad cumulum dignitatis, ad denominationem omnimodam sui ordinis?

CAP. XII.

Continuatio Præced. Cap.

SCrupulosè scilicet moderni, imperfectè de Hierarchia, aut summum Pontificem, aut Episcopum quemlibet, nondum consecratum, dicere reformidant, quia nunquam putant, caput *incompletè* dici posse de corpore; cum tamen nunquam nisi *incompletè* dici possit, si videlicet integritas spectetur corporis, quæ nunquam in solo capite consistit, vel eâ solâ parte completur. Sed præterea pars aliqua, imperfectè & *incompletè*, quantum ex se est, de corpore esse dicitur, quando perfectum & integrum existendi in corpore modum, nondum est affecuta.

Ex prædictis autem constat, eum, qui nondum est consecratus Episcopus, nondum perfectè, Ecclesiæ suæ caput, constitutum dici, nondum Ecclesiæ suæ perfectè sponsum esse; & ideo Ecclesiam, aliquâ saltem ratione, dici manere viduatam, donec consecratum habeat antistitem, ut colligitur ex Conc. Chalced. c. 25. Worm. c. 76. Pelagii Pontif. c. *quoniam*, d. 100. aliisque; & explicat Innoc. III. c. *inter corpor. de transl.* ac proinde quis neget, etiam hoc sensu, Episcopum electum ac confirmatum, si consecratus nondum

nondum fuerit, incompletè caput esse dicendum, quòd rationem capitis, plenam, omnique suâ vi ac potestate instructam, nondum habeat, habiturum utique cumulatius, cùm electioni ac confirmationi, consecratio accedet.

Quantò periculosius in ea re loquuntur, novitii auctores, dum Antistitem, ac ipsum summum Pontificem, in Hierarchia Jurisdictionis constituunt, & ab Hierarchia Ordinis, in qua locum habeant monachi & monachæ remonent: scilicet, monachis, etiam foeminis, in pluribus Hierarchiis locus erit, quàm summo Pontifici electo, nondum consecrato: scilicet, propter debitum (ut falsò credunt) sacerdotium, fratri alicui, ex mendicantibus, in Hierarchia Ordinis, non infimus locus tribueretur, à qua electus Episcopus, vel ipse etiam summus Pontifex, cui haud dubiè sacerdotium, ac summum sacerdotium debetur, exscindi debebit, *nisi propter clericalem tonsuram, & habitum*, ut ipsi loquuntur.

Quasi verò, non contumeliosum sit, caput pedum loco, cum simplicibus clericis collocari. Scilicet licebit Hierarchiam Ordinis, non habentem Hierarcham, constituere, tunc scilicet, cùm continget, Ecclesiam aliquam, Episcopo non consecrato, viduatam reperiri: denique honorificentius erit, summum Pontificem, vel

electum Episcopum, nondum consecratos, ab aliqua Hierarchia excludi, vel ad infimum locum dejici, quàm imperfectè, in totali Ecclesiastica, constitui. Apagethas nœnias, quas solidè refutant, duo illi, intrepidi Hierarchiæ Vindices, Petr. Aurel. & Franc. Hall. in suis respectivè commentariis, aliique.

QUÆSTIO V.

De Divisione Hierarchiæ, ratione Ordinis, in Episcopos, Presbyteros, & Ministros.

C A P U T I.

Episcopalem, Presbyteralem, & Diaconalem, veros ordines Hierarchicos esse.

AUctoritatibus PP. id generatim probatur. Trident. Conc. Sess. 18. de Sacram. Ord. Can. 6. post Dionys. lib. de Eccl. Hier. Maxim. Scholiis in Dionys. Antioch. Monach. Lauræ sabbæ in Palest. Hom. 122. Theophil. in c. 19. Luc. & alios passim, tres ordines

nes Hierarchicos, Episcoporum, Presbyterorum, & Diaconorum, statuit: nam per *ministros*, quos ibi Episcopis & Presbyteris conjungit, non dubium est, quin saltem Diaconos intelligat, quos Dionys. nonnunquam simpliciter *λειτουργοῖς*, seu *ministros*; aliquando *λειτουργοῖς ἐκκλησιῆς*, *selectos ministros* vocat.

Pluribus id supra testimoniis PP. confirmavimus, quibus nempe Principes, Duces, Patres, Dominationes, hos tres ordines dictos, & prioribus Ecclesiæ sæculis existimatos, tutati sumus.

Fusiùs id jam probaturi sumus, i. variis PP. auctoritatibus, quibus Episcopos, Presbyteros, & Diaconos, Ecclesiasticæ gubernationi præfectos, ac proinde, Ordines Hierarchicos, Jurisdictionis coercitivæ, ex suo statu atque ordine capaces, comprobamus. Taceo Dionys. ejusque sequaces, quorum supra varia testimonia, pro ista Hierarchiæ distributione, in istos ordines, retulimus. Constitutiones Apost. Clem. passim, tres istos ordines, ut Jurisdictionem & auctoritatem habentes, numerant, præsertim lib. 7. c. 32. & lib. 8. c. 45. itemque lib. 2. c. 16. 17. 18. 25. 26. 28. & aliis passim, quibus scilicet locis, dum referuntur Ordines, quorum auctoritate populus continetur, quibus laici obtemperare, quorum prudentiâ regi debent, eorum

tantum trium Ordinum fit mentio. cap. quoque 30. Episcopum Deum, Diaconos et Dei Prophetas honorandos, scribunt.

Canones quoque Apostolorum, quæ spectant ad Ecclesiæ regimen passim Episcopis, Presbyteris, Diaconis tribuunt, quos solos in Ecclesiæ regimine nominant: reliquos autem clericos, ubi de disciplina agitur, memorant: Sed quidam ex ipsis id expressius significant; ex eis 35. seu 32. apertius, Episcopos, Presbyteros & Diaconos, curam populi suscipere posse, & ordinariam Ecclesiæ Jurisdictionem ostendit iis verbis, *Si quis delectus Episcopus, Officium publicum, curamque populi suæ fidei commissam, non acciperit, hunc excommunicatione puniri, donec susceperit, eodem quoque modo, & Presbyter & Diaconus.* Supponit enim iste canon, etiam Presbyteros & Diaconos curam populi suscipere, eisque committi alicujus loci fideles solere, ad quem scilicet locum regendum qui post ordinationem suam pergere negligerent, punirentur.

Ostendit & can. 38. apud Zonar. quo scilicet solis Presbyteris, & Diaconis vetatur, non autem cæteris clericis, ne quid novi, circa Ecclesiæ disciplinam, inconsulto Episcopo moliantur: eò quod nempe solis ipsis disciplinam procurare Episcopi auctoritate, per singulas regiones conveniret:

niret : quare hunc Canon. interpretatus Zonar. *Presbyteris & Diaconis, qui sub Episcopis, per vicos seu Regiones dant operam sacris*, hoc Can. vetitum dicit, ne à seipsis aliquid moliantur, v.g. ne mulctent aliquem ; ne ab Ecclesia repellant, sententiamque ab Episcopo latam aut laxent, aut imminuant, aut intendant : Pontificalis enim ista potestatis hæc esse, quam nisi de gratia, & per indigentiam acceperint ab Episcopo, tale quid non eis esse permissum.

Quibus conformia habet Balsam. in can. eundem, sed num. 39. apud ipsum. Quæ quidem ostendunt, tam Presbyteros quam Diaconos aliquos in vicis fuisse, quibus ita gubernatio populi credita erat, ut tamen majora negotia, sine Episcopi sententia exequi non possent. Demonstrat & Can. 44. aliàs 45. qui Episcopum, Presbyterum, vel Diaconum, cum hæreticis, vel solum comprecantes, segregatione punnit : *Sin autem eis tanquam clericis aliquid operari permiserit*, depositione. Ostendit enim hic Can. non solum Episcopum, sed & Presbyterum, quin etiam Diaconum clericalia officia exercendi, tanquam Hierarchicam habentes auctoritatem, quibusdam aliis potestatem facere potuisse.

Qui Canones rectè consistunt cum
H 5 Can.

Can. 58 ubi Episcopi tantum & Presbyteri mentio, quorum uterque punitur, si nullam cleri, vel populi curam gerat, neque doceat pietatem ac religionem: sermo enim ibi est de clero, & populo civitatis, qui nonnisi ab Episcopis, & Presbyteris civitatensibus, non à Diaconis edoceri solebant, non de vicaneis Ecclesiis, quæ aliquando Diaconis etiam administrandæ tradebantur, ut mox confirmabimus. Itaque patet ex Canonibus Apostolorum, tam Episcopis, quàm Presbyteris & Diaconis, animarum curam committi solitam: ac proinde eos ordines Hierarchicos esse, quibus nempe Jurisdictio, & principatus sacer convenire possit.

Idem Constit. Apost. Auctor. qui dicitur Clemens, Epistolis ejus nomine inscriptis, quæ à Rufino Latinitate donatæ, non possunt non habere maximam ab antiquitate commendationem: iis, inquam, Epistolis, tres istos Ordines Hierarchicos commendat, nam Epist. I. Ecclesiam navi comparat, *Cujus Dominus sit omnipotens Deus, gubernator verò Christus. Tum deinde Prorætæ officium Episcopus impleat, Presbyteri navitarum, Diaconi dispensatorum locum teneant.* Epist. verò 3. tres istos ordines Episcoporum, Presbyterorum & Diaconorum, populorum gubernationi, & directioni præfectos, memorat, dum ait,
Audite

Audire Episcopum attentius oportet, & ab ipso suscipere doctrinam fidei: monita autem vitæ à Presbyteris inquirere; à Diaconis verò monita disciplinæ. Ignatius Antioch. discipulus S. Joan. Christianos pluribus Epist. rogat, ut eorum Ordinum viris, tanquam Ductoribus & Rectoribus suis pareant. Epist. quidem ad Trallian. hanc Ordinationem præclarè demonstrat; nam de Episc. primùm hæc habet, Episcopo subiecti estote velut Domino, ipse enim vigilat pro animabus vestris, quasi rationem Deo redditurus. Et paulò post, Necessè itaque est, quicquid facitis, ut sine Episcopo nihil tentetis. De Presbyteris & Diaconis statim subdit: Sed & Presbyteris subiecti estote, ut Christi Apostolis, qui spes vestra est, hoc autem pacto viventes, in eo inveniemur. Oportet & Diaconis minorum Christi ministris, per omnia placere, nec enim ciborum & potuum ministri sunt, sed Ecclesiæ Dei administratores: ipsi itaque tales sunt: At vos reveremini illos, ut Christum Iesum, cuius vicarii sunt.

Eadem etiam Epist. prærogativas singulares principatus Episcopalis, Presbyteralis, & Diaconalis, explicat iis verbis, *Qui verò foris est, hic is est, qui sine Episcopo, Sacerdote & Diacono quippiam agit, & ejusmodi inquinatam habet conscientiam, & infideli deterior est. Quid enim aliud est Episcopus, quàm is, qui omni principatu & potestate*

Superior est, & quoad hominē licet, pro viribus imitator Christi Dei factus? Quid verò Diaconi, quā imitatores Angelicarum virtutum, quæ primum & inculpatum ministerium illi exhibent, ut S. Stephanus, B. Iacobo; Timotheus & Linus Paulo; Anacletus & Clemens Petro? Qui igitur iis non obedit, sine Deo prorsus, & impius est, & Christum contemnit, & constitutionem ejus imminuit.

Quibus verbis, quod inter legendum aliquos PP. & Concilia, observari singulis ferè paginis potest, hoc expressius nobis explicat S. Ignat. nimirum cū omnis principatus, ritè ac sapienter ordinatus, tribus præsertim constare debeat, auctoritate nimirum ad imperandum; prudentiā ad judicandum ac deliberandum; virtute & diligentiam ad exequendum: Triplicem in Ecclesia Ordinem principantem, à Christo constitutum fuisse, Episcoporum, quorum auctoritas & principatus, omni potestate superior est; Presbyterorum, qui prudentiam conspicui, Episcopis tanquam consilarii & senatores adsident; Diaconorum, qui industriā, fortitudinem, & celeritatem præditi, quæ ab Episcopis sancta, à Presbyteris deliberata fuerint, perficiunt, eaque executioni mandari procurant.

Idem quoque Ign. Epist. ad Magnesiam. eandem, secundum prædicta officia Ordinum

num Hierarchicorum , distributionem confirmat, dum ait, *Hortor, ut hoc sit omnibus studium, in Dei concordia omnia agere, Episcopo præfidente Dei loco, Presbyteris loco Senatus Apostolici, Diaconis mihi suavissimis, ut iis, quibus commissum est, Iesu Christi ministerium.* Qui locus, si diligenter attendatur, Episcopis, Presbyteris, & Diaconis præfidentiam, seu sacrum principatum, differentem tamen, attribui demonstrabit.

Tharsensibus eundem ordinem servandum præscribit, ut scilicet Presbyteri Episcopis, Diaconi Presbyteris, populus Presbyteris & Diaconis pareant : adeoque illum necessarium putat, ut libenter se eorum animarum vicem subiturum dicat, qui ipsum custodierint, quibuscum nempe dominus sit indeficienter. Philippensibus, Philadelphiensibus, Smyrnensibus, eandem legem inculcat, quos omnes alloquens, ordinem Hierarchicum hunc statuit, ut Laici Diaconis subditi sint, Diaconi Presbyteris, Presbyteri Episcopis, Episcopi Christo, sicut ipse Patri.

De Ordinibus quoque Presbyterorum & Diaconorum, suis Antiochenis eandem sententiam scribit; de primo quidem, *Presbyteri pascite gregem, qui inter vos est, donec Deus designaverit, eum, qui principatum in vobis habiturus est.* De altero verò

Diaconi agnoscant, cujus sint dignitatis, & enitentur, ut inculpati sint, ut sint Christi imitatores. De utroque statim subjungit, *populus pareat Presbyteris & Diaconis.* Denique idem Ignat. ad Ephesios scribens, ejusdem sub-ordinationis servandæ, eos admonet.

Polycarpus ejusdem *ὁμολογῶν*, & Apostolorum similiter discipulus, sciens, quantum Ecclesiæ Dei interesset, si singuli, Ordines Hierarchicos, quibus sibi parendum esset, agnoscerent, eodem proinde studio ductus, scripsit ad Philippenses, *subditi estote Presbyteris, & Diaconis, sicut Deo, & Christo.*

C A P. I I.

Idem Confirmatur testimoniis PP. seqq. sæculorum.

SEquenti sæculo, in Ecclesia Dei, eadem Hierarchia, ordinumque dispositio, in honore & pretio fuit. Clem. Alex. apud Græcos celebris, eam nobis commendat, lib. 6. strom. post med. his verbis, *Nam hinc quoque in Ecclesia progressiones Episcoporum, Presbyterorum, Diaconorum sunt, ut arbitror, imitationes gloriæ Angelicæ illius æconomiae, ac dispensationis.*

Ex Latinis, Tert. de Fug. in perfec. c. 11.

Hoc,

Hoc, inquit, sentire & facere omnem servum Dei oportet, etiam minoris loci, ut majoris fieri possit: Si quem gradum ex persecutionis tolerantia ascenderit: Sed cum ipsi auctores, id est, ipsi Diaconi, Presbyteri & Episcopi fugiunt, quomodo Laicus intelligere poterit, quâ ratione dictum, fugite de civitate in civitatem: itaque cum duces fugiunt, quis de gregario numero sustinebit, ad gradum in acie figendum suadere. Eo siquidem loco, minoris Ordinis clericos, Episcopis, Presbyteris & Diaconis, quos populi auctores, id est, in eum auctoritatem habentes, & duces, statuit. lib. de cor. Mil. c. 3. Præfidentium nomine, tres istos ordines, completitur, dum ait, Eucharistiæ sacramentum, nec de aliorum manu, quàm præfidentium sumi, convenisse. At certum est ex Just. Apol. 2. à trium Ordinum istorum viris, sumi hoc sacramentum. Ideoque Pamel. hoc nomine, Episcopos, Presbyteros & Diaconos intelligit. lib. quoque de Monog. c. 11. Episcopos, Presbyteros & Diaconos nominat, à quibus Matrimonium peti oporteret, Presbyterosque & Diaconos ejusdem sacramenti vocat, quia ambo sunt Ordinis Hierarchici.

Tertio sæculo, Orig. & Cypr. præceptorum suorum Clem. & Tert. mentem clariùs exprefferunt: hic enim ubicumque de Ecclesiæ gubernatione & regimine agitur,

tur, Presbyteris & Diaconis scribit, quatenus auxiliares manus adhibeant, ut patet ex ipsius Epist. 4. 5. 6. 8. 10. 13. 14. 15. 18. 23. 24. 28. 29. 32. 33. 34. 35. 36. 37. ad Presbyteros & Diaconos inscriptis: ipse penes Diaconos passim auctoritatem regendi, monendi, corripiendi populum constituit; nam, v. g. Epist. 6. Presbyteris & Diaconis scribit, se ad eos debuissè accedere, *Ut ea, quæ circa Ecclesiæ gubernacula, utilitas communis exposcit, tractare simul, & plurimorum Consilio limata, examinare possent.*

De Confessoribus etiam quæritur, eos nec à Presbyteris, nec à Diaconis regi posse. Epist. 10. de Martyribus, in officio per Presbyteros & Diaconos, continendis ita scribit, *Et credideram quidem Presbyteros & Diaconos, qui illis præsentibus sunt, monere vos, & instruere plenissimè, circa Euangelii legem, sicut in præteritum semper sub antecessoribus nostris factum est, ut Diaconi ad carcerem committentes, Martyrum desideria Consiliis suis, & scripturarum præceptis gubernarent.* Epist. 12. Presbyteris & Diaconis oves concreditas, ait, ab iisque monendas & instituendas iis verbis, *quod quidem nostros Presbyteros, & Diaconi monere debuerant, ut commendatas sibi oves foverent, & divino magisterio (id est, divinâ lege, & ordinatione suscepto) ad viam deprecandæ salutis instruerent.*

Epist.

Epist. 13. lapsis concedit, ut si infirmitatis periculo occupati fuerint, non expectatâ præsentia Episcopi, si Presbyter repertus non fuerit, apud Diaconum quoque exomologesim facere delicti sui possint. Epist. 15. auctoritatem regiminis Presbyteris & Diaconis attribuit: Item, inquit, Presbyteris & Diaconibus non defuit Sacerdotii vigor, ut quid minus disciplinæ memores, & temerariâ festinatione præcipientes, qui cum lapsis communicare jam cæperant, comprimerentur intercedentibus nobis. Epist. 24. Presbyteris & Diaconis, de ordinatione Saturi in Lectorem, & Optati in Hypo-diaconum, illis nescientibus factâ, scribens, Quod, inquit, communi consilio omnium nostrum cæperat, necessitate urgente promotum est. Epist. 27. communicationem fidelium in Ecclesia, cum Presbytero vel Diacono fieri significat. Epist. 49. ministerium Diaconi, Diaconium sanctæ administrationis vocat. Epist. 64. Diaconos Episcopatus, & Ecclesiæ ministros nominat.

Leguntur etiam apud eund. Cypr. litteræ Presbyterorum & Diaconorum urbis Romæ, quibus constat, vacante per Fabiani mortem, Romanâ sede, poenes Presbyteros & Diaconos urbis Romæ, auctoritatem regiminis totius Ecclesiæ, ex antiquo more pertinuisse.

Ex Græcis, Orig. apertè tres istos ordines Episcoporum, Presbyterorum, Diaconorum,

norum, tanquam Principantes, & Hierarchicos nobis depingit, Hom. 1. in Pl. 37. *Omnes Episcopi, Presbyteri, atque Diaconi erudiunt nos, & erudientes adhibent correctionem, & severius reprehendunt.* Et in Math. Tract. 24. Ubi quod fuit olim apud Judæos, velle vocari Rabbi, illud ipsum apud Christianos, ait, velle vocari Episcopum, Presbyterum aut Diaconum: Hom. quoque 7. in c. 6. Jos. observandi fidelem curam & auctoritatem, Sacerdotibus & Diaconis tribuit, *Observemus, inquit, nos invicem, & unuscujusque conversatio nota sit maximè Sacerdotibus & Diaconis.*

Notanda etiam inscriptio Conc. Antioch. adversus Paul. Samos. apud Euseb. lib. 7. c. 24. *Dionysio & Maximo, & omnibus ubique in orbe terrarum, in administratione collegis Episcopis, Presbyteris, Diaconis, & universæ Catholicæ sub cælo Ecclesiæ.* Nam iis verbis, Episcopi, Presbyteri, Diaconi, in administratione Ecclesiæ, collegæ vocantur: iisque speciatim Epistola Synodica dirigitur, & isti gradus Catholicæ universæ Ecclesiæ, tanquam pastores gregi, tanquam duces exercitui opponuntur.

C A P. III.

Prosecutio Præcedent. Capituli.

Quarto sæculo, Conc. Nyc. Can. 14. secundum Verf. Isid. Merc. Episcopis & Presbyteris, populum colligendi, sacramque Synaxim habendi, & offerendi ordinariam potestatem; Diaconis verò in eorum absentia, eandem tribuit. Quibus Diaconis, Conc. Ancyr. c. 2. similiter eandem potestatem competere potuisse, significat. Conc. verò Antioch. c. 1. eandem potestatem innuit, & clarissimè inter præfides atque præpositos Ecclesiarum, Episcopos, Presbyteros, & Diaconos, recenset, juxta Verf. Latinam Dionys. Exig. *Si quis autem eorum, qui præesse noscuntur, Ecclesiæ, aut Episcopus aut Presbyter, aut Diaconus post hanc definitionem tentaverit, aut subversionem populorum, Ecclesiarumque Perturbationem seorsim colligere, & Pascha cum Iudæis peragere, &c. Idem Conc. c. 5. plebem sub præpositura Presbyteri & Diaconi colligi, clarissimè ostendit, dum seorsim ab Episcopo colligentes, punit. Si quis Presbyter, vel Diaconus, contempto suo Episcopo, seipsum ab Ecclesia sequestravit, & seorsim colligens, altare constituit, & commonenti Episcopo, non acquievit, &c.*

Qui-

Quibus consentiunt plurimi PP. unum profero Bas. & S. Ephrem hic p. 2. Opusc. quod *interrogation.* & *respons.* inscribitur, prope fin. hos ordines tanquam principantes conjungit, *Pontifices, Sacerdotes, & Levitas.* Sed apertius seq. Opusc. quo variis qq. de abrenuntiatione in Bapt. & aliis satisfat, trium istorum ordinum viros, tanquam animarum curam habentes, in Dei iudicio, interrogandos, asserit, *Tunc fratres interrogabuntur pastores, Episcopi scilicet, & principes, de proprio statu, & de grege ipsorum, requirenturque ab unoquoque oves rationales; quas à summo pastore Christo pascendas susceperunt. Quòd si ex negligentia ipsius Episcopi, vel Principis, ovem disperi contigerit, de manu ipsorum requiretur sanguis ejus. Similiter quoque Presbyteri rationem reddent, pro Ecclesiæ sibi creditæ populo: Præterea Diaconi, & cuncti fideles, pro animabus eorum, qui in illorum sunt familia, pro uxore & filiis, pro servis & ancillis, daturi sunt Rationem.* P. quoque 2. in Serm. paræn. de 2. Adv. Dom. Tunc, inquit, sanguis eorum, qui ex Episcoporum, & Pastorum ac Presbyterorum negligentia perierunt, ex eorum manibus requiretur; tunc quod quisque talentum accepit, & apposuit, repetetur; & omnis quidem Christianus, de iis, quæ audivit, exquiretur; præcipue autem Pontifices, Sacerdotes & Levitæ; nam potentes potenter tormenta patientur.

Basil.

Basil. verò in Anaph. tres Hierarchias Angelicas statuit, quas *tres Ecclesias* vocat, quibus Episcoporum, quos Archi-Presbyteros, eò quòd Presbyteris præsideant, nominat, Presbyterorum & Diaconorum Ordines respondententes facit, à quibus Trinitas celebretur; ita enim juxta interpr. Masii, ex Syriaco factam, loquitur Basil. de SS. Trin. *In tribus Divinæ Majestatis Ecclesiis, ternis sanctificationibus, sancta pronuntiabunt, & in hac etiam nostra terrena Ecclesia, ab Archi-Presbyteris, Presbyteris, & Diaconis suis, exaltatur, celebraturque.*

Ex Latinis autem Opt. Millev. lib. 1. cont. Parm. & 2. tres istos Ordines, ut Sacerdotales & Hierarchicos, memorat: lib. quidem 1. dum ait, *Quid commemorem Laicos, qui tunc in Ecclesia multi fuerunt, nullâ dignitate suffulti? Quid ministros plurimos? Quid Diaconos in tertio, quid Presbyteros in secundo Sacerdotio constitutos? Ipsi apices & principes omnium aliqui Episcopi, &c.* lib. verè 2. dum Ecclesiam in eadem membra distribuit, dicens, *certe membra sua habet Ecclesia, Episcopos, Presbyteros, Diaconos, Ministros, turbam Fidelium.* Etenim videtur Ecclesiam ita partitus fuisse, ut in ea graduum ista ascensio esse videretur; primò, sunt aliqui nullâ dignitate suffulti puta Laici, quibus emineant Ministri, seu inferiores Clerici, nullâ quidem

quidem dignitate Hierarchicâ superiores, sed tantum purè ministeriali : Iis præcellant Diaconi, in tertio Hierarchico gradu, Diaconis præferantur Presbyteri in secundo : Episcopi omnium sunt apices & principes.

Quem sensum esse Opt. Mill. confirmat locus ejus alter ex 2. lib. ubi non jam quinque, sed quatuor in Ecclesia Ordines seu gradus statuit ; unum eorum, qui Hierarchicis gradibus præferuntur, tres verò Hierarchicos Ordines, *Cum sint*, inquit, *sicut supra dixi, quatuor genera capitum in Ecclesia, Episcoporum, Presbyterorum, Diaconorum, & Fidelium.* Quam divisionem, tanquam cum priori eandem tradit, etsi prior quinque membris, posterior quatuor tantum concludatur : Atqui eadem dici non potest, utraque ista divisio Ecclesiæ, nisi sub uno membro posterioris divisionis, duo aliqua prioris contineantur ; puta sub eodem membro Fidelium, turba Fidelis, & Ministri comprehendantur, in quantum scilicet, nec turbæ Fidelium, nec Ministris convenit Hierarchica auctoritas, quæ Diaconis in tertio Sacerdotio, & Presbyteris in secundo, atque Episcopis in primo constitutis, seu cæterorum apicibus, ac summis convenit. Unde tres istos gradus Episcoporum, Presbyterorum & Diaconorum, Laïcis paulò post opponit, dicens,
Inve-

Invenistis Diaconos, Presbyteros, Episcopos, fecistis Laicos. Ac si diceret, quos invenistis in gradu principantium, redegistis ad gradum subditorum.

C A P. I V.

Proferuntur PP. Quinti sæculi.

Hisce subjungo, tres quoque insignes, quinto sæculo, Ecclesiæ DD. ex Latinis, Hier. & Aug. prior variis locis, tres prædictos Ordines Hierarchicos, & principantes facit: Duo duntaxat ejus testimonia, hic subjicere liceat. 1. ex lib. 3. comm. in c. 5. Mich. *Principes domus Jacob, & reliqui de domo Israël (sive ut melius in Hebræo scriptum est Iudices domus Israël) non sunt alii, nisi Episcopi, Presbyteri & Diaconi.* Alterum ex lib. 1. adv. Jovin. c. 19. *Episcopus, inquit, & Presbyter, & Diaconus, non sunt meritorum nomina, sed officiorum.*

Posterior verò, Epist. 148. ad Valer. tres quoque istos Ordines, propter Ecclesiasticum regimen, difficultatibus innumeris obsitos: propter auctoritatem verò & dignitatem, hominibus acceptabiles esse solere, pronuntiat, *Ante omnia, inquit, peto, ut cogitet religiosa prudentia, nihil esse in hac vita, & maxime hoc tempore, facilius & lætius, & hominibus acceptabilius, Episcopi,*
Pres-

Presbyteri & Diaconi officio, si perfunctoriè atque adulatoriè res agatur; sed nihil apud Deum miserius, tristiùs & damnabiliùs: item nihil esse in hac vita, & maximè hoc tempore difficiliùs, laboriosiùs, periculosiùs, Episcopi, aut Presbyteri, aut Diaconi officio, sed apud Deum nihil beatiùs, si eo modo militetur, quo noster imperator jubet.

Hom. quoque 7. inter 50. seu serm. 15. in Append. de div. ab Episcopis, à Presbyteris & Ministris, id est, Diaconis, animarum curam exigi, tanquam à præpositis, asserit. Ac proinde eorum Ordines Hierarchicos esse demonstrat: Si, inquit, diligenter attenditis, charissimi, omnes Sacerdotes Domini, non solum Episcopos, sed etiam Presbyteros, & Ministros Ecclesiarum, in grandi periculo esse cognoscitis: ipsis enim contestatur Spiritus S. dicens, clama, ne cesses, &c. Et iterum, Si non aununtiaveris iniquo iniquitatem. De ipsis etiam Apostolis, obedite præpositis vestris, & subjacete eis, ipsi enim pervigilant, tanquam rationem reddituri, pro animabus vestris.

Ex Græcis autem Cyr. Alex. lib. 13. de Ador. in Spir. & Ver. tres istos Ordines Hierarchicos, ex Analogia V. T. colligit, quemadmodum niox proferemus: iis quoque addo Can. 3. ex iis, qui Canones Romanorum ad Gallos dicuntur, & Innoc. I. tribuuntur à Sirm. quo tres isti spe-

speciatim ordines, Episcoporum, Presbyterorum & Diaconorum, Magistrales dicuntur, *Qui, inquit, militat Christo, qui in sede residet magistri, qui militiae disciplinam non potest custodire.*

C A P. V.

Speciatim Diaconatum Ordinem Hierarchicum esse, ostenditur, variis Argumentis.

EX dictis exploratam habere possumus, cæterorum Ecclesiæ PP. mentem ac sententiam, nempe tres istos, in Ecclesia Dei, sacro principatu præditos, atque Hierarchicos ordines esse. De quorum duobus primis, quia dubitari non potest, ideo de Diaconatu. quod & ipse principantis, seu Hierarchici rationem ordinis, in Ecclesia Dei habeat, quibusdam aliis argum. §§. seqq. conficimus.

§. I. *Diaconos quibusdam plebibus olim præfectos.*

I. Enim certum est, Ecclesiarum quarundam spirituali regimini, atque administrationi, non solos Presbyteros, verum etiam Diaconos olim, licet rariùs, præfectos

ctos fuisse. Id utique constat ex canonibus Apost. sup. cit. Antioch. quoque Conc. can. 1. & 2. mentio etiam Diaconorum, regentium plebem in Conc. Eliber. c. 77. *Si quis Diaconus regens plebem, sine Episcopo vel Presbytero, aliquos baptizaverit, Episcopus eos per benedictionem perficere debet.* Nec non in Conc. Tol. sub Recar. c. 12. quo jubetur, ut in Ecclesia vicana, si Presbyterum ejus facultas habere non permittit, vel Diaconus instituatur. Tol. IV. c. 26. *Quando Presbyteri, vel Diaconi constituuntur per Parochias, oportet eos primam professionem Episcopo suo facere.*

Exemplum etiam habemus, tum apud Greg. Tur. de glor. Confess. c. 30. referentem. Cantinum, qui postea Arvernorum fuit Episcopus, Ecclesiam vici Isiodorensis rexisse in Diaconatu. Et apud Bed. lib. 2. c. 12. In quo mentio fit Jacobi Diaconi, à Paulino in sua Ecclesia relictì, *Qui magnas antiquo hosti prædas, docendo & baptizando eripuit.* Eoque sensu, intelligi debet, decretum illud Leon. IV. Epist. 2. *Regendam esse, dicentis, unamquamque Parochiam, sub provisione ac tuitione Episcopi, per Sacerdotes, vel cæteros Clericos, quos ipse cum Dei timore providerit.* Si enim Clerici à Sacerdotibus distincti, non sunt alii, quàm Diaconi, qui ex Tol. IV. cit. aliquando in parochiis ordinantur.

§. II. Dia-

§. II. *Diaconos Virginibus sacris, & monialibus olim præpositos.*

II. Eosdem quoque Diaconos certum est, quibusdam Collegiis, vel personis in Ecclesia Dei regendis, olim destinatos fuisse. Cypr. eos, Virginum sacrarum directores narrat, Epist. 62. ad Pompon. *Et cum, inquit, omnes omnino disciplinam tenere oporteat, multò magis præpositos & Diaconos curare, hoc fas est, qui exemplum & documentum cæteris de moribus suis præbeant;* Iisdem proinde Diaconis, Virginum directoribus, Ambros. lib. 1. de Off. c. ult. potestatem facit, *ut pudicitie ulciscantur injuriam.*

Habemus etiam exemplum Amonis Diaconi, qui Virgines sacras erudierat in fide, ex Martyrologio Rom. & Menologio Græcor. 1. Sept. Monacharum quoque rectores esse solebant: Nam, inquit Iulian. Nov. 123. c. 36. *Monachæ sibi eligunt vel Presbyterum, vel Diaconum, pro sacris ab Episcopo confirmandum.* In monasteriis virorum idem fuit in usu. S. Bened. c. 62. suæ reg. *Si quis, inquit, Abbas sibi Presbyterum, vel Diaconum ordinari petierit, de suis eligit, qui dignus sit Sacerdotio fungi.* Diaconus Sacerdotio fungi dicitur, id est, Hierarchica potestate, juxta loquendi modum,

dum, ab Opt. Millev. super. usurpatum. Exstant & exempla superioris ævi, & ante S. Bened. nam apud Sever. sulpit. Dial. 3. c. 13. Cato Diaconus refertur, *Ad quem Monasterii administratio pertinebat.*

§. III. *Diaconos immundorum præcipuam curam habuisse.*

III. Speciatim etiam personarum certum genus, tanquam maximè proprium, regendum ac purgandum, toti Diaconorum ordini assignatur. Dionys. c. 5. Eccl. Hier. & 6. Immundos huic Ordini purgandos, ex proprio statu eorum, subjicit: de quo ordine immundorum, c. 6. ita loquitur, *Unus quidem arceatur, propterea quod etiam à ministris, scriptis divinis, quæ vim obstetricandi habent, ad vitalem portionem efformetur, & effingatur.* Dionys. sequuntur Maxim. Pachim. & alii interpretes, Antioch. Pal. Hom. 123. & alii.

Circa eos verò hæc potissima Diaconi officia esse solebant, quod eos ad S. Synaxim suo tempore accedere & recedere præciperet; quod capita inclinare eos juberet; omnesque pro ipsis ad precandum suâ comprecatione moneret, ut constat ex Const. Apost. lib. 8. c. 5. 6. 7. 8. Liturgiis Basil. & Chrys. testimonio ejusd. Chrys. de incompr. Dei nat. Hom. 3. & 4. in 2. ad Cor.

Cor. Hom. 2. & 3. in Epist. ad Ephes. & 61. ad pop. Antioch. quòd eos per doctrinam, adhortationes & monita, ut Ecclesiæ Dei, tanquam sancti exhiberentur, reformaret, ut docent Dionys. & Maxim. & alii Cit.

Quomodo verò id intelligendum sit, Diaconos, immundos præsertim sibi subditos habere, quos & plebi Fideli, & Virginitibus SS. atque Monachis præfuisse diximus, facile utique colligi potest, quia nempe Diaconi, nec sacras Virgines, nec Monachos aut Monachas, ad perfectionem adducere poterant, ad quam illæ ex suo statu tendebant: nec plebi fidei sacramenta ista conficere, vel administrare poterant, quibus ordinariè indigent, non ipsis v. g. poenitentiae sacramentum administrare, non corpus ac sanguinem Christi, sed solum sanguinem distribuere poterant: atque ita quamvis illorum omnium directioni aliquando præficerentur, in absentia scilicet Presbyteri, iis tamen etiam in vita spirituali, per media ordinaria fovenda ac promovenda, nequaquam sufficiebant, sed accersiri sæpius oportebat Presbyteros, qui Diaconorum impotentiam supplerent.

At verò circa immundos, ea omnia præstare poterant, quæ eorum statui conveniebant; purgare siquidem eos tum

doctrinâ, tum exhortationibus ac correctionibus poterant; tum etiam manuum impositionibus, & precationibus salutari-
bus, ac benedictionibus. Aliisque præviis ritibus, ad baptismum, vel perfectam altari reconciliationem præparare. Quorum proinde propria veluti materia, in quam se propria Diaconorum, virtus κατεργαζομένη, seu purgativa exerceret, immundi dici poterant scilicet catechumeni, energumeni & poenitentes.

C A P. V I.

*Quædam officia publica, nonnisi præ-
sente Presbytero, vel Diacono, cele-
brata. Varia officia publica explican-
tur.*

IV. **O**fficia publica in Diocesanis Ecclesiis, nonnisi præsente Presbytero, vel Diacono, celebrari poterant; ita ut cæteri Clerici, in persolvendis istis officiis, Presbytero inservirent: ipsi verò Ecclesiæ vicariæ capita essent. Conc. siquidem Tarrac. sub Horm. Papâ, can. 7. secundum editionem Garfiæ, hoc statuit, *De Diocesanis Ecclesiis, vel clero; id placuit custodiri, ut Presbyteri, vel Diaconi, qui inibi constituti sunt, cum Clericis septimanas ob-*
ser-

servent: id est, ut Presbyter unam hebdomadam, quâ expletâ succedat ei Diaconus similiter: eâ scilicet conditione servatâ, ut omnis Clericus die Sabbathi ad vespervas sit paratus; quo facilius die Dominico solemnitas, cum omnium præsentia celebretur. Tolet. verò 1. tempore Anastasii, uno & amplius antea sæculo, can. 9. decreverat, ut lucernarium nisi in Ecclesia non legatur, aut si legatur in villa, præsentem Episcopo, vel Presbytero, vel Diacono legatur.

Nec obstat, quòd prioribus verbis ejusd. c. ad officium Ecclesiæ, Episcopi, vel Presbyteri præsentiam requirere videatur, dum ait, *Nulla professa vel vidua, absente Episcopo, vel Presbytero, in domo sua Antiphonas cum Confessore, vel servo suo faciat* Videtur enim prioribus istis verbis, solemnior officii divini recitatio, quum alternantibus Choris fieret in Hispania, vetita nisi præsentem Episcopo & Presbytero: Minus verò sollemnis, quæ *lucernarium* vocabatur, præsentibus non solum Episcopo, vel Presbytero, sed etiam præsentem Diacono permissa.

Vel certè prior pars Can. prohibet in civitate, in quâ & professæ Virgines, & viduæ seu Diaconissæ esse solebant, ne istæ cum Confessore suo, id est, oratorii procuratore (nam Confessio erat sacellum seu cubiculum, vel tabernaculum ex auro,

argento, aut pretiosâ materiâ, fabrefactum, ut passim apud Anast. Biblioth. videre est) ac seruo alternatim in domo sua canant. Sed preces istas, nonnisi præsentibus Episcopis, vel Presbyteris in urbe celebrent: Posterior autem, lucernarias preces in villis, Presbytero vel Diacono præsentem fieri concedit.

Probabiliter etiam conijcere possumus, tempore Conc. Tolet. Antiphonas canendi morem in villis, propter raritatem ministrorum, nondum receptum fuisse, sed tantum in civitatibus Episcopalibus, in quibus numerosior clerus, alternis cantare poterat: quæ conjectura, ut explicetur, observari convenit, Antiphonam dictam à particulis ἀντί, & φωνή, quasi *vox contra vocem*: Antiquitus proinde Antiphonam dictam, alternam & reciprocam cantionem, cum vicissim, vel psalmi Choris alternis psallerentur, vel Antiphonæ, quæ versiculis tunc temporis constabant, alternatim concinerentur.

Quòd utique explicat Isidor. lib. 6 Orig. c. 19. *Antiphona*, inquit, ex Græco interpretatur *vox reciproca*, duobus scilicet Choris, alternatim psallentibus, ordine commutato; sive de uno ad unum, quod genus psallendi, Græci reperisse dicuntur: Responsorios Itali tradiderunt, quod Carmen, inde Responsorios cantus vocant, quòd alio desinente, id alter respondet:

spondeat: Inter Responsorios autem & Antiphonas hoc differt, quod in Responsoris unus versum dicit, in Antiphonis autem versibus alternant Chori. Socrat. lib. 6. c. 8. & Niceph. lib. 13. c. 8 ab Ignat. Antioch visione cælestium Chorum alternis ita canentium incitato, hanc alternis Choris canendi formam, Ecclesiæ Antioch. relictam, ad alias Ecclesias dimanasse, tradit. Sigeib. in Chron. ad ann. 382. & Suid. verbo Chorus, eundem morem ad Flavian. Antioch. Præfulem, & Diodor. Tharsenf. auctores referunt.

Idem tamen Sigeib. ad ann. 387. ab Ignat. hujus originem repetit, & ab Ambros. primùm ad Latinos delatum tradit: cui, in eo, quod ad Ambros. pertinet assentiri videntur Aug. lib. 9. Conf. c. 7. & Paulin. in vit. S. Ambr. qui innovationem istam sub Siricio ponunt, cùm Justina Valentiniani mater Arriana, in Catholicos fureret. Syn. autem Tol. 1. sub Anast. Sir. successore ut probabilius est, anno 400. habita, tredecim scilicet annis post, Justinæ in Ecclesiam Mediolanensem furores, Hispanienses Ecclesias, Mediolanensis Ecclesiæ secuta exemplum, hunc alternis canendi morem docuisse videtur: maximam enim cum Ecclesia Mediolanensi necessitudinem, Hispaniæ Episcopos tunc habuisse, patet ex actis ejusd. Syn. in quibus

Episcopi dicuntur *expectantes pari exemplo, quod Papa, qui nunc est, quod S. Simplicianus Mediolanensis Episcopus, reliquique Ecclesiarum rescribant Sacerdotes.*

Tam recentem itaque morem, primum Ecclesiam civitatis pervasisse, non vicanas, seu rusticas, in quibus propter penuriam clericorum, alterna ista Psalmorum, Hymnorumque modulatio, servari minus commodè poterat, omnino probabilè est. Atque adeò ubi de Antiphonis, nonnisi præsentibus Episcopo, vel Presbytero canendis, prohibitio est, de officiis divinis, quæ in civitate peragerentur, videtur esse sermo: Ubi verò de officiis illis, quæ agerentur in villis, nominatim de lucernariis precibus mentio facta est, satis visum est, si Presbytero, vel Diacono præsentem celebrarentur.

Lucernares autem illæ preces fusè describuntur, lib. 8. Const. Apost. c. 35. 36. & 37. ab Epiph. verò in Syn. *λυχνικὴ ψάλμοι* vocantur. A Basil. lib. de Spir. S. c. 29. & S. Greg. Nyss. in Vit. S. Macrinæ, *πάλυχνος ὑπαεσις*, *Lucernarum gratiarum actio.* In Liturg. Præsanctif. *ὑπαὶ τῇ λυχνικῇ*, *preces ad Lucernam.* *λυχνικόν*, seu *Lucernarium*, à Pallad. c. de Tabennes. & à 6. Syn. c. 91. ab Ambr. lib. 3. de Virg. *hora incensi.* Ab Hier. Epist. ad Læt. *Sacrificium Vespertinum.* A Conc. Emerit c. 2. à Cassian. lib. 3. de.

de Diurn. Orat. c. 3. *Lucernalis hora.* In regulis Monasticis, tam eâ, quæ est S. Aug. c. 1. quàm quæ est Isid. c. 9. & Mag. c. 34. §. 2. *Lucernarium.* Eas autem idè, vel Episcopo, vel Presbytero, vel Diacono præsentibus, non autem aliquo eorum absente, celebrari permissum est, quia Synaxim S. nonnisi ab istis hierarchicorum ordinum viris haberi permittitur.

C A P. VII.

Diaconis olim Ecclesiasticæ Disciplinæ cura permissa.

v. **D**iaconis similiter disciplinæ cura commissa, & coërcendi potestas attributa, passim legitur. Clem. Epist. 1. ex vers. Ruff. *Diaconi verò Ecclesiæ,* inquit, *oculi sunt Episcopi oberrantes, & circumlustrantes, cum verecundia aëus totius Ecclesiæ; & perscrutantes diligentius, si quem videant vicinum præcipitio, & proximum esse peccato, ut referant hæc ad Episcopum, & commoneri posset is, qui in præcipitium lapsus est, uti revocetur, & non corruat in peccatum. Negligentiores quoque, & eos, qui rariùs ad audiendum verbum Dei accedunt, nec sollicitè ad Episcopi tractatum conveniunt, ipsi commoneant & hortentur.* Et paulò post: *Sed de peregrinis;*

I 6

*peregrinis similiter Episcopo suggerant refoven-
dis, & cætera his similia, quæ ad cultum Eccle-
siae, & disciplinam pertinent, Diaconis curæ
sint.*

Diaconos certè oculos esse Episcopo-
rum Archi-Diaconum verò totum esse
oculum, ait Isid. Pelus. lib. 1. Epist. 29. &
lib. 4. Epist. 188. ab eod. Clem. in Const.
Apost. 1. 2. c. 4. Diaconus vocatur Episcopi,
auris, & oculus, & os, & cor, & anima: Ratio
subditur, *ne Episcopus sollicitudine multarum
rerum, sed graviorum tantùm urgeatur.* Eiusd.
verò 1. c. 30. Diaconus similiter, *Angelus, &
Propheta Episcopi*, esse dicitur. Diaconos
verò eosdem *Dei Archangelos*, vocat Orig.
Tract. 14. in Math. cit. quoque lib. 2. Cont.
Apost. c. 57. iidem Diaconi nobis exhi-
bentur, populum fideliem cum imperio, in
Ecclesiis disponentes atque ordinantes,
observantes eundem, eique invigilantes,
cum auctoritate etiam corripientes, & cor-
rigentes, si minùs modestos se, vel negli-
gentes exhibeant. Quod ipsum Chrys.
Hom. 2. in 2. ad Thessal. Hom. 83. in
Math. & alibi, suo testimonio confirmat.

Legimus ejusd. Clem. lib. 2. c. 57. &
lib. 8. c. 11, Const. Diaconorum judicio
relictum, qui ad Ecclesiam admittendi,
qui rejiciendi essent; excitant populum
iidem Diaconi, orationem altâ voce indi-
cant; item silentium, quo quisque debeat
in

in Ecclesia gestu consistere proclamant, ut constat ex omnibus Liturgiis antiquis, item Chryf. Hom. 2. de script. Obscur. Ambr. Præf. in Ps. Cyr. Alex. lib. 13. de ador. in Spir. Greg. Tur. lib. 7. c. 8. Isid. Hisp. lib. 2. de Off. c. 8. & aliorum passim luculentis testimoniis.

Quantæ auctoritatis etiam illud est, quod ad eum spectaret, Laicum quantalibet sæculari dignitate præstantem, indignum à S. mensæ communione rejicere, ut expressiùs testatur Chryf. Hom. 83. in Math. Possunt & Diaconi excommunicare, non item inferiores Clerici, quod expressè docent Constit. Apost. lib. 8. c. 28. *Diaconus excommunicat Hypo-diaconum, Lectorem & Cantorem, & Diaconissam, si hoc facere opus sit, absente Presbytero: Hypo-diacono non licet excommunicare Lectorem, aut Cantorem, aut Diaconissam, aut Clericum aut Laicum: ministri enim sunt Diaconorum.*

Mentio apud Optat. lib. 1. Lucillæ potentissimæ feminæ, à Cæciliano Diacono correptæ. Eum qui corripere potuit, eundem Ecclesiasticam poenam inferre potuisse, probabile est. Mentio quoque in actis Conc. Chalced. act. 10. Maræ cujusdam Diaconi, à proprio Archi-diacono, non ab Episcopo suo, excommunicati. Plura etiam hujusmodi exempla apud antiquos

tiquos auctores occurrunt. Itaque dubium non est, quin Diaconi, Ecclesiasticæ Jurisdictionis, ex statu suo & ordine, capaces sint, ac proinde sint Hierarchici.

Denique, ut ab aliis innumeris referendis abstineam, quorum aliqua ex seqq. constabunt, hoc solum adjungam, Diaconorum ordini, tam ex Ecclesiæ Græcæ, quàm Latinæ usu, plurimas dignitates adnexas esse, cum jurisdictionis officio. Archidiaconatus in utraque Ecclesia celebris, sed in Latina celebrior, *Qui*, ex Conc. Later. sub. Alex. III. c. 3. *animarum curam habet annexam*. Cancellarii quoque, Primicerii, Camerarii, & similes dignitates, in Diaconali ordine effulgent. In Ecclesia verò Græca supponit Cabas. interr. 4. factâ Joanni Episc. Citri, in Resp. ejusd. Joan. lib. 1. Resp. seu lib. 5. totius juris Græco-Romani, à Leunclav. editi, Diaconis propria officia Ecclesiastica attributa esse. Ipsi quoque ἑξακρεῖτοι, quos Balsam. discept. de Off. Chartophil. & Proterd. tanquam quinque sensus Patriarchæ, commendat, quos ἀρχαῖος vocatos Balsam. ibid. docet; itemque Citrius in resp. quos tandem Conc. Florent. in clero Græcanico, tanquam *excellentes* nominat. Illi, inquam, ordine Diaconi, saltem posterioribus temporibus erant, teste Cedreno, c. 9. de Off. Eccl. Constantinop. n. 4. Itaque
ex

De Divisione Hierarchiæ, &c. 207
ex Ecclesiæ disciplina apparet, Ordinem
Diaconorum principantibus, id est, ju-
risdictionem habentibus, jure merito ad-
cenferi posse.

QUÆSTIO VI.

Solos istos Ordines Episcoporum,
Presbyterorum, Diaconorum, non cæterorum inferiorum,
Hierarchicos esse.

C A P U T I.

Auctoritatibus PP. id suadetur.

QUæ hætenus diximus nempe tres
istos ordines, Episcoporum,
Presbyterorum, & Diaconorum,
Hierarchicos esse, salvâ & incolu-
mi fide. negari non possunt, quandoqui-
dem constat, ex definitione Conc. Trid. su-
perius allatâ, Hierarchiam ex tribus ordi-
nibus illis constare, Episcoporum, Presby-
terorum & Ministrorum; ex quibus cum
potissimi sint Diaconi, si qui Ministri Ec-
clesiæ, Hierarchiæ inferi debent, eos præ-
sertim

fertim huic principatui sacro, adnumeros, tanquam potissimos ministros, esse constabit. Per ministros autem, Diaconos (quo nomine passim apud PP. Diaconi significati reperiuntur) Synodus intelligit. Ministrorum autem nomine potius quam Diaconorum usa est, propter quæstionis illius, quam jam aggredimur, obscuritatem, *Sintne scilicet alii etiam ordines, inferiores Diaconatu, dicendi Hierarchici*, quam, propter loquendi morem, apud Catholicos quosdam usurpatum, qui illos Ordines Hierarchicos etiam appellitant, dirimere noluit.

Porro Hierarchici ordinis nomine propriè sumpto, quemadmodum explicuimus, pro eo, qui radicem aliquam in sua consecratione, jurisdictionis habet, & cui consentanea est aliqua ordinaria Ecclesiastica jurisdictio propriè dicta, quam coercitivam & necessariam diximus indubitatum est, nullos alios formaliter ordines Hierarchicos esse dicendos, quàm tres super. assignatos Episcoporum, Presbyterorum & Diaconorum. Omnes PP. auctoritates super. adductæ, id probant, cum omnes PP. super. cit. qui Hierarchicos ordines enumerantes, tres istos solum numerant, incuriæ & oscitantæ argui deberent si reliqui, quos prætermittunt, Hierarchici eodem titulo & jure dicendi essent.

Argu-

Argumentum itaque optimum ab universali sibi PP. desumi potest, non putasse eos, inferiores Diaconatu Ordines Hierarchicos esse, quandoquidem nunquam eos Hierarchicorum, seu principantium numero comprehendunt; nunquam ubi de Ecclesiastica gubernatione agitur, sub-Diaconos in ejus partem vocant; nec sub-Diaconis, aut aliis inferioribus clericis, ut eam tueantur, rescribunt, sicut Presbyteris & Diaconis; nec ullæ, ex Ecclesiæ disciplina, dignitates, jurisdictionem annexam habentes, sub-Diaconis, aut aliis inferioribus ordinibus addictæ leguntur; nec excommunicandi potestas his attribuitur. Quinimò in Const. Apost. lib. 8. c. 28. expresse denegatur, licet Presbyteris & Diaconis tribueretur; nunquam ordinaria populi Christiani cura, sub-Diaconis, vel aliis infra sub-Diaconos clericis, sicut superioribus sub-Diacono ordinibus, ab Ecclesia demandata, in tota antiquitate reperitur.

Tertull. quoque sup. cit. minores ordines, dispositiones ad Episcopatum, Presbyteratum & Diaconatum: hos verò, & principantes ordines, & ducatum habentes, commendat. Ignat qui sub-Diaconorum, & aliorum Ecclesiæ graduum inferiorum meminit, nunquam iis obediendum, sed solis prædictis tribus gradibus, præ-

præcipit. Clem. Alex. & Basil. sicut tribus Hierarchiis cælestem, ita tribus ordinibus Episcoporum, Presbyterorum, Diaconorum, terrestrem Hierarchiam, adinstar cælestis effectam, absolvunt. Nec si alios Hierarchicos Ordines in Ecclesia agnovissent, rectè ternarium in utrâque Hierarchia, terrestri & cælesti, numerum, tanquam solemnem observassent. Opt. ut sup. probavimus, tres tantum gradus Sacerdotii, idest, Hierarchicos statuit, extra eos, ministros inferiores statuit. Hier. in c. 5. Mich. loc. cit. non alios; judices domus Israël, seu Hierarchica præditos in Ecclesia dignitate, expressè affirmat, *Nisi Episcopos, Presbyteros, & Diaconos.* Expressior auctoritas ejusd. Hier. in c. 2. Epist. ad Tit. Quo loco, tres prædictos ordines præsentium statuit, eosque minoribus ordinibus opponit, iis verbis, *Non solum Episcopi, Presbyteri & Diaconi, debent magnoperè providere, ut cunctum populum, cui præsent, conversatione, sermone ac scientia præcedant, verum & inferioris gradus exorcistæ, lectores & adiutui, & omnes omninò qui domui Dei serviunt.* Canones Rom. singulari lege speciatim Episcopo, & Diacono, injunctam castitatem probant, quod in sede magistrorum sedeant.

Has autem omnes probationes concludo, cum auctoritate Conc. Laod. c. 24.
quod

quod ἱερεῖς, seu eos, qui in sacerdotio constituti sunt, id est, Hierarchicæ dignitatis participes, Presbyterum & Diaconum ponunt, iis opponens, ἐκκλησιαστικὴν ταξίν, ordinem Ecclesiasticum, sub quo Sub-Diaconos, Cantores, Exorcistas constituit: cui subnectit, τὸ τάγμα ἀσκητῶν, *Ordinem Monachorum*. Item testimonio Theoph. in c. 19. Luc. loc. cit. quo scilicet ex tribus operationibus Hierarchicis, purgatione, illuminatione, perfectione, ex quibus unaquæque uni, ex tribus istis Ordinibus Episcoporum, Presbyterorum, & Diaconorum, sit propria, tres Ordines Hierarchicos, nec plures, nec pauciores his verbis concludit, *Vides omnes ordines cum operationibus, & neque plures, neque pauciores.*

Et Philippi Abbat. Bonæ-val. qui ordines sacros, cum Hierarchicis confundens, tres illos duntaxat sacros esse, non inferiores, tradit, de Contin. Cleric. c. 107. *ii duo, tertium, puta Episcopatum, qui supremus est, quia minùs vulgaris est, scilicet Presbyter & Diaconus, sacris ordinibus dicuntur insigniti, & sacrarum scientiâ scripturarum debent esse præ cæteris eruditi: ut non tenebris ignorantiae, sed sapientiæ compedibus, laudabiliter irretiti, & ad docendum, quæ didicerint, & ad faciendum, quæ docuerint, inveniantur expediti. Sunt præter istos alii, qui etiam circa Altaris ministerium occupantur,*

Pantur, & ad id peragendum, à Pontificibus ordinantur: Qui etsi gradum sanctitatis habere non negantur, non tamen eorum sacri ordines appellantur. Non enim quisquam Sub-Diaconum, Acolythum, Exorcistam, Lectorem, Ostiarium, locum sanctitatis negabit obtinere; quamvis constet, eos, Presbyteris & Diaconis subjacere, quia & illa sancta sunt, quo illi debent, jure sui ordinis, providere, & ista sacrosancta, & si quid amplius potest dici, quæ Presbyter & Diaconus jubentur adimplere.

Probat scilicet Philip. ille vir, suo sæculo, non exigui in Ecclesia nominis, hos solum gradus sacros esse, quod ad regendum destinati essent, reliqui solum ad ministerium, & spirituale Presbytero & Diacono exhibendum officium. In quo non re, sed nomine duntaxat, ab ipso dissentiunt. Urban. II. summus Pontif. can. nullus, dist. 60. Petr. Bles. c. 47. Mag. sent. in 4. d. 24. qui eos ordines sacros præ cæteris dictos volunt, quod eos solos primitiva habere videretur Ecclesia, vel ut interpretatur Can. Urban. Innoc. III. c. *A multis*. de ætat. & qual. ordin. quod eos solos pro facris, primitiva Ecclesia habuerit.

C A P. II.

Rationibus id ipsum demonstratur.

Porro variæ rationes, pro demonstranda bonitate, & integritate divisionis Hierarchiæ, in ordines Episcoporum, Presbyterorum, & Diaconorum, exclusis aliis, proferri possunt.

I. A Theoph. loco mox cit. expressè traditur, non plures scilicet esse debere, Hierarchicos ordines, quàm diversa sint functionum Hierarchicarum genera: sicut enim artificum collegia diversa statuuntur, pro diversis functionum generibus, quibus operam suam addicunt, ita diversi ordines Hierarchici statuuntur, prout ad diversas functiones obeundas homines diversimodè consecrantur: atqui consecrantur duntaxat homines, ad tria genera sacrarum functionum obeundarum, Diaconi ad purgationem immundorum, Presbyteri insuper ad illuminationem plebis fidelis, & sanctæ, Episcopi ad perfectionem præterea sanctissimorum Monachorum, ex Dion. Maxim. Antioch. & aliis, sup. cit. Igitur neque plures, neque pauciores ordines Hierarchici statuendi sunt.

Quòd si quis contendat, inferiores ordines etiam purgare, Resp. erit, non auctoriori-

toritative, ut vocant, id ministerium exercere, sed purè ministerialiter: neque enim possunt, immundum, quem purgant, aut punire, aut aliquid ei imperare, vel præcipere, aut ordinare, nisi quòd à Diacono ordinatum & imperatum fuerit: ideòque Const. lib. 8. c. 28. cùm excommunicandi Diacono potestatem dedissent, eamque Sub-Diaconis, & cæteris inferioribus Clericis abdicassent, hanc rationem subdunt, *Ministri enim sunt Diaconorum*. Ex quo proinde concluditur, eos, quamvis actus aliquos Hierarchicos attingant, non tamen Hierarchicè attingere, proindeque nec Hierarchicos esse posse.

Altera ratio huic omninò affinis est, tot debent esse ordines Hierarchisantium ordinum, quot Hierarchisatorum, & quot diversi ordines sunt subditorum, tot diversi ordines principantium, quorum singuli singulos subditorum ordines, ex suo præferto officio, moderentur: atqui in Ecclesia tres sunt ordines Hierarchisandi à Dionys. statuti, puta immundi, plebs fidelis, & SS. Monachi: igitur & tres ipsis respondentibus ordines Hierarchisantes, neque plures, neque pauciores Episcoporum, Presbyterorum, & Diaconorum.

III. Ratio, quæ ex dictis S. Ign. sup. prolatis colligi potest, ea est, quia, ut ex ipso inferebamus, principatus omnis tribus præ-

præsertim constat, nempe auctoritate, consilio & exequendi industriâ, atque celeritate: atqui hæ tres dotes, in tribus Ecclesiæ ordinibus præsertim elucet, auctoritas in Episcopo, qui idèd *ισχυρὸς* dicitur, à principatu & auctoritate: Consilium in Presbyteris, qui idèd dicuntur *πρεσβυτεροι*, quasi senes & senatores, consilio potentes, consiliarii & assessores Episcopi: celeritas & industria exequendi in Diaconis, quorum nomen aptum, & consentaneum ministerium, seu *διακονία* sonat, & in quibus industria præsertim & peritia rerum agendarum laudatur ab Hier. Epist. 18. ad Evagr. *Diaconi eligant de se, quem industrium noverint, & Archi-Diaconum vocent*: quæ tamen industria in exequendo, ita Diacono convenit, ut à potestate minimè separetur. Quâ de re Sid. Apollin. lib. 4. Epist. 25. de Joanne, in Cabilonensem Episcopum electo, in Archi-Diaconatu diu retento, loquens, *In quo, inquit, seu gradu, seu ministerio, multum retentus propter industriam, diu dignitate non potuit augeri, ne potestate posset absolvi*; è contra verò, esto industria & celeritas in sub-Diacono, aliisque inferioribus ministris laudari possit, quia tamen à potestate, hæc industria sejuncta est, idèd Hierarchicos istos ordines non constituit.

I v. Ratio, tot debent esse ordines in
nova

nova lege, quot in veteri, nam Hierarchiæ nostræ umbra & figura & typus fuit, quæ ad ejus exemplar, quod Moyfi in monte Synai exhibitum erat, firmata est, ex Dion. c. 3. Eccl. Hier. p. 1. at in veteri lege, tres tantum erant ordines, summi Pontificis, Sacerdotum minorum, & Levitarum, quibus in nova lege respondent Ordines Episcoporum, Presbyterorum & Diaconorum, ut docet Hier. Epist. 85. ad Evagr. in fine, iis verbis, *Et ut sciamus translationes Apostolicas sumptas de V. T. quod Aaron & Filii ejus, atque Levitæ in templo fuerunt, hoc sibi Episcopi, Presbyteri & Diaconi vindicent in Ecclesia.* Quod ipsum fusiùs narrant, Isid. Hisp. lib. 2. de Off. c. 5. 7. & 8. Aquigran. Conc. PP. sub Ludov. pio lib. 1. c. 7. 8. & 9. atque passim rituum, & officiorum divinorum tractatores: Igitur tres tantum sunt in Ecclesiâ Hierarchici ordines Episcoporum, Presbyterorum, & Diaconorum.

Simili argumento usus est Cyr. Alex. probans, tres in Ecclesia, sicut & in lege, ordines esse Hierarchicos, seu sacro principatu præditos, & in populum auctoritatem habentes, verba ejus ex lib. 13. de ador. in Spir. & Ver. hæc præsertim excipe: *Quod si quis velit, etiam Ecclesiæ ordinem perquirere, illam legis præfigurationem jure admirabitur, Episcopis enim, utpote qui duces creati sunt, nec non etiam iis, qui inferioris dignitatis*

nitatis

nitatis gradum gerunt, Presbyteris, inquam, concreditum est altare, & quæ intra velum continentur : quibus etiam dici convenit [& custodient Sacerdotium suum] Diaconis vero illud [custodient custodias tabernaculi, & omnia vasa ejus] & custodias populi] Quid? nonne ipsi præcipiunt, clamantes in Ecclesiis, nunc quidem tempus esse, ut populi Hymnum dicant, & modestè ac decenter stent, interdum verò ut quiescant : præterea ad orandum excitat? &c. Principatus hîc Ecclesiæ describitur, ad formam Mosâicæ compositus, in quo duplex potestas Diaconis adscribitur, una ad altaris ministerium, alterâ ex ea consequens, ad populi regimen in sacris & gubernationem. Quod argumentum fusiùs postea explicat, Hierarchiam in veteri lege adumbratam, ex iis tribus ordinibus constantem, nobis haud dubiè proponens.

C A P. III.

Potissima ratio petita, à potestate, in corpus Christi verum; Episcopis, Presbyteris, & Diaconis, præ cæteris clericis, communi.

v. **R**atio, eaque potissima, hoc principio
innititur, quod apud Theologos
K rece-

receptissimum est, potestatem in ordine ad corpus Christi mysticum, in potestate ad corpus Christi verum fundari: ita nempe, ut nemo consecratus dici possit, ad sacrum populi Christiani regimen ac gubernationem, nisi primum ad sacrificii Christiani administrationem sit consecratus. Quod principium nobis illustrandum est, quia per ipsum præsertim distinctio Ordinum Hierarchicorum, à non Hierarchicis explicanda est. Veritas autem hujus principii multifariam explicatur.

I. Enim homines, in iis, quæ ad sacra & divina pertinent, nonnisi sacris personis se subiectos esse putaverunt, nec ullis nisi sacris, Deoque devotis hominibus, ad sacrificia Deo offerenda destinatis, in iis, quæ ad religionem spectant, parere religiosum putaverunt; ab iis divinam legem voluntatemque discendam crediderunt; quos ipsi Deo devoverant, & ad victimas offerendas destinaverant, tacito scilicet naturæ instinctu credentes, Deum se familiariter iis communicare, qui Deo devoti essent, ab iisdem divina responsa ad nos referri debere, per quos dona nostra ipsi divino numini offerrentur. Atque ita sacerdotium, & sacrificandi potestatem, cælestis magisterii fontem & originem esse crediderunt.

Hoc Ethnici ipsi sibi persuaferunt; hoc

ab

ab ipso Deo traditum Judæi tenuerunt, solos religionis duces summos Pontifices, secundi ordinis sacerdotes, & Levitas habentes, qui & ipsi ad sacrificandum constituti erant: priores quidem duo ordines, ad sacrificia Deo offerenda destinabantur: Levitæ verò & templi ministeriis, & tabernaculi vasis, & iis, quæ ex sacrificio in sartagine frixa Deo offerebantur, aliisque ejusmodi ministeriis circa sacrificium præerant, ut ex 1. Paralip. c. 6. 9. & aliis colligere est: tres ergo isti ordines populi institutioni à Deo præfecti fuerant, iique maximè, quibus sacrificandi munus præsertim competeat, juxta illud Aggæi 1. *Interroga Sacerdotes legem. Malach. 2. Labia enim Sacerdotis custodiunt scientiam, & legem requirunt ex ore ejus: c. 17. Deut. Veniesque ad Sacerdotes Levitici generis, aliaque passim.*

Sed & tertius Levitarum ordo, cui pars aliqua circa sacrificia concredebatur; idem quoque ad populi magisterium, licet inferiori loco, accersebatur: Nam ex antiqua haud dubiè traditione, Josaphath, Synagogæ Judaicæ collapsam disciplinam restaurans, 2. Paralip. c. 17. Sacerdotes & Levitas misisse dicitur in civitates Juda, habentes librum legis, *qui circuibant cunctas urbes Iuda, atque erudiebant populum. Quæ quidem lex & disciplina, si à Gentilibus, Judæisque servata est, ut nonnisi Sacerdotibus*

tibus & ministris ad sacrificia, quæ Deo offerrentur destinatis, sacrum circa religionis observantiam imperium, sacerque principatus conferretur; eadem potiori ratione lex Evangelii censi debet, in qua sicut sacrificium est præstantius, & ministrorum prærogativa dignior: quatuorque proinde in nostra lege rationes (de quibus §. seqq.) occurrunt, propter quas necessarium videtur, ne potestates istæ disjungantur: Sed iis tantum ordinibus, quibus circa sacrificium Evangelicum potestas committitur, potestas & auctoritas circa populum Christianum ordinaria, stabilis, & ex consecratione concedatur.

§. I. Ratio I.

Ut magis innotescat, Christum potestatis, in populum auctorem esse, cæterosque Ecclesiasticos Magistratus, nonnisi ejus esse vicarios, & locum tenentes; idcirco voluit ipse Christus, ut nemini in populum, quem passionis suæ, seu sacrificio crucis cruento suum effecit, & à servitute redemit, potestas conveniret, cui non ipse corporis sui & sanguinis, in sacro Missæ sacrificio distribuendi potestatem contuleret.

§. II. Ratio II.

Tum propter eandem causam, tum ad dig-

dignitatem Hierarchici Magistratus, & ductoris populi consentaneum fuit, ut sicut omnes Christiani populi, notâ quadam, signaculo & charactere Dominico consignantur, tum ut inter oves Dominico gregi socientur, tum ut Christi castris ad specialem militiam aggregentur, ex Aug. lib. 6. de Bapt. c. 1. lib. 2. contr. Parmen. c. 13. lib. 2. contr. Crescon. c. 30. serm. ad Cæsar. Eccl. Pleb. de Emer. & tract. 6. in Euang. Joan. ita & signaculo quodam & charactere exornentur, qui Christiani populi duces sunt consecrandi, ex eod. Aug. de Bon. Conjug. c. 24. & serm. cit. de gest. cum Emer. cujus testimonium confirmant Conc. Flor. decretum union. & Trid. sess. 5. c. 9. necnon sess. 23. c. 4. & can. 4. atque character ex D. Thom. 3. p. q. 23. a. 3. in corp. est character Christi, & participatio quædam sacerdotii Christi ab ipso derivata: constatque ex Theologis, præter characteres Laicis omnibus Christianis baptisatis, & confirmatis communes, nullos alios esse characteres, quàm qui ad Eucharistiæ sacramentum & sacerdotium sunt instituti; ideoque Characterem quemcunque qui a Laicorum sorte & conditione hominem eximit, & in superiorem ordinem translatum exornat, potestatem aliquam vel remotam, vel proximam in Christi corpus & sanguinem, conferre-

oportet : proximam quidem solis sacerdotibus , five secundi ordinis ad consecrandum , Diaconis verò duntaxat ad distribuendum : remotam verò cæteris inferioris ordinis clericis.

Atque aded Theologi post D. Thom. Supplem. Quæst. 37. a. 2. in corp. numerum septem ordinum, ex diversa habitudine ad Eucharistiæ sacramentum ac sacrificium colligunt. Idem etiam ex eodem principio, nec Presbytero potestatem absolvendi à peccatis, aut extremam unctionem conferendi; nec Episcopo potestatem confirmandi convenire posse, statuunt, nisi cui potestas consecrandi Christi corpus conveniat. Igitur ad spiritalem sacrumque Ecclesiæ principatum nemo consecratur, nisi per characterem, qui potestatem tribuit circa istud sacramentum, in quo proinde, potestas circa corpus Christi mylticum, ex consecratione debitâ fundatur.

§. III. Ratio III.

Quia totius Hierarchiæ finis, est Eucharistiæ distributio, vel participatio, quod apertè docet, Dionys, lib. de Eccl. Hier. c. 3. p. 1. Qui ut baptismum, omnium divinarum illustrationum principium, ita Eucharistiam finem & consummationem esse, docet, *finis autem unicuique propositus, atque*

atque summa est divinarum mysteriorum, ei qui initiatur communicatio. Quod ipsum cum Dionys. duplici argum. comprobare facile est, 1. quidem, quia ut ead. p. c. docetur, Neque enim ferè licet, nullum sacramentum perfici Hierarchici muneris, nisi divina Eucharistia necessario (summam eorum, quæ in singulis sacramentis peraguntur, complectens) ejus, qui initiatus est, cum uno Deo conjunctionem collectionemque sanctè efficiat.

Alterum, quia Hierarchiæ nostræ scopus est assimilatio & unio cum Deo, ex Dionys. c. 1. Eccl. Hier. Antioch. Hom. 122. & aliis; atqui Dei unio per Eucharistiam maxime & perfectissime procuratur; nec in hac vita major ulla contingere potest, quam quæ homini per Eucharistiæ sacramentum contingit, quod utique fusiùs docet idem Dionys. c. 3. ejusd. lib. p. 3. nec dubitare poterit ullus, qui præsentiam Dominici corporis & sanguinis, in eo sacramento, & certò crediderit, & piè veneratus fuerit; cui proinde nos concorporèos & conformes imagini filii ejus, hujus virtute sacramenti fieri necessum est; imò etiam secundum Apost. 1. ad Cor. 10. *Unus panis, unum corpus multi sumus omnes, qui de uno pane participamus.* Igitur scopus & perfectio totius Hierarchiæ, in corporis Dominici sumptione & traditione consistit.

Ratio prætereà Dionys. Epist. ad Demoph. cuius verba inferiùs proferentur, est, quia priùs debent à Deo instrui Hierarchici viri, quàm populum purgare, perficere, illuminare possint, quod ipse etiam passim docet lib. de Cæl. & Eccl. Hier. atqui per communicationem, quam in exhibendo altaribus ministerio, recipiunt Hierarchici viri, Episcopi, Presbyteri, Diaconi, à Deo instructi redduntur, & ut idem S. Doctor, lib. de Eccl. Hier. c. i. explicat, *Divinis istis signis Deiformes fiunt, & Deificantem scientiam acquirunt.* Ut verò Epist. ad Demoph. explicat, *ii qui mysticè semper ad Divinum altare præstò sunt, cernunt, audiuntque Divina, quæ eis apertè ostenduntur, & cum modo benigno ad ea, quæ extra Divina vela & integumenta sunt, prodeunt, Monachis morem gerentibus, sancto populo & ordinibus, qui expiantur, sacra enuntiant pro dignitate.* Igitur potestas in ordine ad populum, supponit potestatem in corpus Christi verum.

Alio modo potest hoc formari argum. Ut priùs aliquem debere consecrari dicamus, ad familiarem cum Deo societatem, antequam consecretur ad divinorum communicationem: ac proinde priùs ad altaris ministerium, quàm ad populi purificationem, illuminationem & perfectionem.

§. IV. Ratio IV.

IV. Denique Ratio, quia poena præcipua, quâ Disciplina Ecclesiastica continetur, est privatio à sacris, & sacramenti Dominici susceptione, quam excommunicationem dicimus, quæ olim in sacris conventibus infligi delinquentibus solebat, dicente Tert. Apol. c. 39. *Ibidem etiam exhortationes, castigationes, & censura divina: nam & judicatur magno cum pondere, & apud certos de Dei conspectu: summumque futuri judicii præjudicium est, si quis ita deliquerit, ut à communicatione orationis & conventus, & omnis sancti commercii relegatur.*

Consentaneum verò est, & connaturale potestati isti excommunicandi, ut nemini ordinaria sit, seu ex statu debita, nisi cui potestas communionem impertiendi, ac sacramentum corporis & sanguinis Dominici (cujus susceptio communionis Ecclesiasticæ consummatio est) distribuendi conveniat: ejusdem enim est rejicere, cujus est admittere. Igitur nemini convenit potestas, in corpus Christi mysticum, seu in populum, qui excommunicationis poenâ terretur & corrigitur, nisi cui distribuendi sacramenti corporis, & sanguinis Dominici, potestas concessa est.

Quam rationem expressit S. Greg. Naz.

Naz. Orat. I. iis verbis, *Ubinam porro, & à quibusnam Deus mysticis illis, & sursum ferentibus sacris coleretur (quibus nec majus quicquam, nec præstantius apud nos est) si nec Rex nec præfectus esset, nec Sacerdotium, nec sacrificium, nec alia omnia, quibus inobedientes homines & contumaces, ob ingentia peccata mulctati sunt.*

C A P. IV.

Conclusio argumenti, cap. præced.

EX hoc itaque principio, ita probato & explicato, argumentari licet. Tot sunt ordines Hierarchici, seu sacrum in populum principatum exercentes, neque plures, neque pauciores, quot sunt ordines sacri, potestatem in corpus Christi mysticum habentes: atqui tres tantum sunt illi ordines: supremus Episcoporum, ad quos ex institutione Christi, suprema, summa ac independens ab alio ordine, sacramentorum administratio, refertur; quique ideo passim sacerdotes *κατὰ ἐξουσίαν* vocantur, v. g. ex Cypr. Epist. 29. & 52. ab Ambr. de dign. Sacerd. c. 2. de Sacram. lib. I. c. I. lib. 2. c. 5. lib. 3. c. 2. Chrys. toto ferè libro de Sacerd. Leone mag. Epist. 89. ad Episc. Vienn. Prov. Conc. Sard. c. 10. & 20. imò & *summi Sacerdotes*, atque *Antistites* vocantur, ut

ut ab Euseb. Epist. ad Episc. Tusc. & Camp.
ab Ambr. Epist. 34. & lib. 2. de Sacram.
c. 6. Gaud. Brix. tract. in die ordin. suæ,
Fausto in Præf. lib. 1. de lib. Arb. & Hom.
de vid. quæ ei à quibusdam tribuitur. Si-
don. Epist. 11. & 25. lib. 4. Epist. 5. & 6. lib. 7.
in fin. conc. Conc. Hisp. 2. c. 7. Car. Mag.
lib. 7. c. 323, & aliis passim: quos ideo
Hierarchas appellavit Dionys. tanquam à
supremo Sacerdotii gradu nomen fortitos,
de Eccl. Hier. c. 1.

Medius Presbyterorum est ordo, qui
sacrificandi quidem potestatem habent, sed
dependentem à potestate Episcoporum, à
quo & fiunt, & suæ potestatis exercitium
ac leges, & altaris ac templorum consecra-
tionem accipiunt: Quorum ideo potestas
inferior minus libera ac soluta, sed depen-
dens circa ipsum Domini sacrificium, ut
ostendunt Ignat. Epist. ad Trall. & ad
Smyrn. Clem. Epist. 3. Arel. 1. Conc. c. 19.
Laod. c. 19. Carthag. 2. c. 9. & 3. c. 32.
Atque ideo & angustior illorum, circa
corpus Christi mysticum potestas; & ab
Episcoporum ordine ita dependens, ut
jurisdictionis usum ei omnino subtrahere
Episcopus possit.

Tertius tandem & infimus Diaconorum,
qui circa corpus Christi imminutam tan-
tum potestatem habent, ad illud scilicet ex
commissione Presbyteri distribuendum,

non autem ad consecrandum, seu ex proprio officio illud dispensandum, sed ad intervendum immediatè sacerdoti sacrificanti, non ad sacrificandum. Qui proinde in corpus Christi mysticum, cæteris ordinibus inferiorem tantum potestatem habent, executricem nempe decretorum & imperiorum, à superioribus ordinibus promanantum: ut sicut ab aliis consecrata distribuere possunt, ita & ab aliis imperata, executioni demandare, poenas etiam Ecclesiasticas infligendo ac decernendo possint: quod cæteri ordines, quibus dispensatio sacramenti Dominici, & immediatum altari ministerium denegatur, facere non possunt.

Eo argumento usus est Ignat. Epist. ad Trall. locis sup. cit. probans ipsis parendum esse, quòd non ciborum & potuum ministri tantum essent, sed inculpatum ministerium consecranti exhiberent. Accedit ad prærogativam Diaconorum circa corpus Christi verum, quòd calicem consecrandum simul cum sacerdote, Deo offerant, dicendo cum eo, *offerimus tibi Domine.*, ut notant Rubr. Missal. & Gavant. argumentum ex plurali locutione sumens, quòd non solus Presbyter ea dicere debeat.

C A P. V.

*Ecclesiæ Ritus, praxim & disciplinam,
ternarium Hierarchicorum ordinum
numerum, probare, ampliorem impro-
bare.*

I. *Ex Episcopis, Presbyteris, & Diaconis,
S. R. E. Cardinalibus.*

PRædictis rationibus, quibus adæqua-
tam Hierarchiæ divisionem, in tres
ordines Episcoporum, Presbyterorum &
Diaconorum probavimus, accedunt pluri-
mæ aliæ, ex ritibus Ecclesiæ, praxi, & dis-
ciplinâ, quibus ordinibus istis quædam pri-
vilegia conceduntur, præ cæteris inferiori-
bus quæ Hierarchicos eos ordines ab Ec-
clesia creditos, non alios, significant.

I. Enim cùm Romanæ Ecclesiæ Car-
dinales, ad totius orbis regimen, à Rom.
Pontifice assumuntur, ex omnibus ordini-
bus Hierarchicis, aliquos ad eam dignita-
tem promoveri necessum est, at ex iis tri-
bus ordinibus assumuntur, non ex aliis, ex
usu in Ecclesia recepto, cujus meminit
Glossa, *ut ii* in Clement. 2. de ætate &
qual. ordin. Confirmatque Conc. Basil.
singulis etiam istis ordinibus commodè
officia distribuens, ut supra ex Sess. 23.

ejusd. conc. protulimus. Igitur tres tantum inferri possunt esse ordines Hierarchici, Episcoporum, Presbyterorum & Diaconorum.

C A P. V I.

*Episcopi, Presbyteri, & Diaconi,
in Conciliis.*

II. **C**onciliis quoque generalibus, ex omni ordine Hierarchico, aliqui regulariter interesse solent, ad disceptationem causæ, quamvis Episcopi soli tanquam principes judicent, ut proprio jure subscribant: atqui iis, ex Ecclesiæ veteri consuetudine, intersunt Episcopi, Presbyteri, & Diaconi duntaxat: quod cum innumeris exemplis pateat, aliqua solum proferemus, Romani, sub Cornelio adversus Novatum, in quo 60. Episcopi, Presbyteri totidem cum Diaconis convenere, teste Euseb. lib. 6. c. 35. Eliberitani, sub Marcello, in quo resedisse Presbyteri, adstitisse dicuntur Diaconi, cum universa plebe. Arelat. 1. sub Sylvestro, in quo plurimi Diaconi, non alterius ordinis clerici numerantur. Rom. item 2. sub eod. in quo Presbyteri assedisse, Diaconi adstitisse, sed & alii clerici adfuisse, sed ad testimonium solum, narrantur. Et Conc. Tol. 1. sub Innoc. in quo idem ordo

ordo servatus, & aliorum passim. Id verò Tol. i v. can. 4. præsertim constat, in quo, quis in concilio ordo servandus sit, accuratè iis verbis cautum fuit, *Post ingressum omnium Episcoporum, atque confessum, vocentur deinde Presbyteri, quos causa probaverit introire. Nullus se inter eos ingerat Diaconorum, post hos ingrediantur Diaconi probabiles, quos ordo poposcerit interesse; & coronâ factâ de sedibus Episcoporum, Presbyteri à tergo eorum resideant, Diaconi in conspectu Episcoporum stent. Deinde ingrediantur Laïci, qui electione concilii interesse meruerint.*

Quòd Laïci etiam concilio interfunt, Diaconorum prærogativæ non officit; non enim ad discussionem causarum, in conciliis agitarum, neque ad ullum officium Ecclesiasticum, aut Laïci, aut inferiores clerici, locum unquam habuerunt, sicut Diaconi, quorum aliqui etiam legatorum sedis Apostolicæ personam sustinuisse, & inter præsidentes concilio recepti fuisse leguntur, v. g. ad Ephes. 1. Hilarius Diaconus missus à S. Leone, apud eund. Leon. Epist. 25. Syn. 6. generali; Joan. Diac. & 8. Marinus item Diaconus, uterque Apostolicæ sedis fuit legatus.

Absentium quoque Episcoporum loco, interdum mittebantur, v. g. Diaconi duo, Herennius & Agapetus à Lucif. Calarit. alii à Paulino, Maximus & Calemerus, ad Syn.

Syn. Alexand. missi referuntur, ab Athan. Apol. 2. Besula Diaconus Carthagin. à Capreolo, Carthag. Episc. missus, ad Syn. Ephes. 1. qui litteras excusatorias omnium Episcoporum Africæ deferret, & eorum nomine concilio interesset, quem inter PP. conc. act. 1. nominatim subscribentem, in fine act. 6. animadvertere licet. Ætherium quoque Diac. passim ab Episcopo suo, non benè valente, in eod: conc. subscripsisse legimus. In Chalced. Calosirium Episc. Arsinoitensem, per Eliam primum Diaconum suum subscripsisse, per eum interpretem locutum fuisse, act. 1. ejusd. conc. notatum observamus. act. 2. & 6. Dionysium Diac. nominatum, tanquam locum tenentem Photini Episc. Chysiorum, ac subscribentem animadvertimus. act. 8. Photinum Archidiaconum locum tenentem Theoctisti, Episc. Pessinuntis: quibus similia in aliis actionibus ejusd. conc. atque in aliis passim conciliis deprehendi possunt.

Quamvis enim in conc. Emerit. c. 5. loco suo, Diaconos, Episcopis mittere vetitum fuerit, ne cum Episcopis, in contemptum Presbyterorum, priori loco sedere viderentur, tamen Trullana syn. c. 7. Diaconis & Episcopos suos repræsentare, & tunc temporis Presbyteris præferri concessit: neque Emerit. Conc. decretum, aut
ex

ex usu prioris ævi scriptum, aut in usu postea fuisse etiam in Hispania constat: nam ante istud, concilio Tol. v. Petrus Diac. subscripsit, agens vicem Episcopi sui Antonii. Sexto Wamba & Severinus Diaconi. In 7. Clem. & Ambros. post idem verò Emerit. conc. decem circiter annis, in Tol. xi. Liberatus & Egila Diaconi inducti, Segobienensis & Mumuli Arcanicensis Episcoporum vicarii admissi sunt. Tol. xii. Asturius Diac. agens vicem Hospitalis, Valentinae Eccl. Episc. subscripsit. Tol. xiii. Spasandus, Lamesus, Gisibertus, Dexter, Unicomalus, Boromellus, Calumnosus, Habitus, Diaconi nomine variorum Episcoporum subscripserunt.

Quod in seqq. conciliis potest facile adnotari, cum tamen nullum unquam sub-Diaconum, aut in inferioribus solum ordinibus constitutum, aut tanquam legatum, conciliis præsedisse, aut absentium Episcoporum locum tenuisse, legamus: nisi fortè quis Atarbium, concilio Constant. I. per Cylum lectorem suum interfuisse, ex concilii subscriptionibus colligat: quod exemplum, quia rarum, pro nihilo haberi potest.

C A P. VII.

*Propria quæque Diaconorum officia,
in conciliis.*

ERant autem & propriæ quædam Diaconorum partes, in conciliis, quæ nullis inferiorum ordinum clericis communicatæ leguntur. I Enim officium Diaconorum erat, adventantes in concilium deducere: quod officium collige ex Athan. Apol. 2. qui Arrianorum Synodum reprehendit, quod in ea Commentariensis, seu Carcerarius, loco Diaconorum Ecclesiæ adventantes introduceret.

II. Erat, acta publica legere, eaque evolvere, & synodo proponere: quo officio Sabinianum Diaconum in conc. Aquilejensi, præside S. Ambr. ex actis ejusd. conc. Itemque Ætium Archidiaconum Constant. Calchedonenſi functum, singulis plurimis actionibus legimus, quibus duobus officiis successit Carophylax Constant. ex ordine Diaconorum, in Ecclesia Orientali, quem Anastas. Biblioth. ad act. 2. syn. 8. chartarum custodem asserit, ab eoque quoslibet tum Patriarchæ, tum Ecclesiastico conventui præsentari, & intromitti, præter eos, qui à cæteris Patriarchis mittuntur. Quæ eadem officia

officia confirmat Balsam. in Medit. de off. Chartular. ac I. defens. eundem Cartophylacem commendans, quod citra meditationem, in synodo ea proferat, quæ vel ipse, si dicendum ei foret (nota Græcam adulationem) adferret Moyses; Aäroni ideò & Baruch ipsum comparat: cui etiam extra Patriarchale tribunal, tanquam referenti personam Patriarchæ, rectè primam sessionem dari ante Episcopos contendit.

III. Querimonias clericorum ad conc. deferebat Archi-diaconus, ex Tol. IV. can. 3.

IV. Diaconorum officium erat, gesta conciliorum significare aliis, seu ut ajunt, intimare: hoc enim Archi-diaconis, tanquam proprium munus, tribuit Tol. I. c. 28.

V. Erat, quod publicè in iisdem conciliis ventilandis & discutiendis, Diaconi etiam adhibentur, quemadmodum Athan. exemplo patet, quem nondum Episcopum dignitate virtutis magis, quam gradu spectabilem, in syn. Nyc. inter primos fidei defensores fuisse, atque exinde Arrianorum odium in se concitasse, refert Naz. Orat. 21. in laudem ipsius: quem pariter strenuum cum Eustathio Antioch. veritatis defensorem, & certaminis adversus Arrianos, participem, tradit Theodor. lib. I. Hist. c. 8. Quo tempore eum Diaconum solum

folùm fuiffe, imò & Archi-diaconum Alexandr. ex ejusd. Greg. ead. orat. & ex Epiph. Pan. Hær. 68. & aliis, passim constat.

Quibus omnibus præstat auctoritas Syn. Alex. apud eund. Athan. Apol. 2. testatur, Arrianos in Athanasium Alex. Diac. iras convertisse, *Quia jam antea ejus pro Christo pietatem, in Syn. Nyc. ubi magnâ cum libertate contra Arrianam hæresim differuerat, experti essent.* Patet etiam exemplo Paulini Diac. quem eundem esse putant cum eo, qui lector antea Ecclesiæ Mediol. tempore S. Ambr. fuit, ac ejus vitam, rogatu S. Aug. scripsit. Is autem adversus Cælestium, in concilio Episcoporum, strenuè decertavit, teste Aug. de pecc. Orig. cont. Pelag. lib. 2. c. 2. & 3. Victorem quoque testatur liber Pontif. Damaso adscriptus, *Quòd fecerit Concilium, & collatione factâ cum Presbyteris & Diaconibus constituerit, ut à decima tertia Luna primi mensis, usque ad Vigessimam primam die Dominica custodiatur sanctum Pascha:*

VI. Subscribebant nonnunquam proinde Conciliis Diaconi, etiam suis nominibus, quibus nunquam inferioris ordinis clerici subscripsisse leguntur. Hinc accidit, ut, teste ipsomet Athan. Apol. ad Constant. non longè ab init. Episcopi, Presbyteri & Diaconi, in exilium à Constantio abire

abire jussi, quòd in Athanasium subscribere recusassent. Hinc etiam legitur Jacobus Diac. & Archimandrita, in con. Constant. sub Flaviano, adversus Eutychetem subscripsisse: Conc. quoque Antissidior. duo Diaconi, Conc. Tol. xi. Archi-diaconus Tol. & alii subscripsisse leguntur.

vii. Leguntur & Epistolæ Synodicæ, nomine Episcoporum, Presbyterorum & Diaconorum aliquando conscriptæ; nam v. g. Epistola Synod. Conc. Antioch. adversus Paul. Samosat. ad Dionys. Papam, apud Euseb. lib. 7. c. 24. & Episcoporum, Presbyterorum & Diaconorum nomine inscripta legitur, & ad Episcopos, Presbyteros & Diaconos hoc modo, *Dionys. Maximo, & omnibus ubicunque in orbe terrarum collegis, Episcopis, Presbyteris, Diaconis, & universæ ac Catholicæ sub cælo Ecclesiæ, Helenus, Hymeneus, &c. Et reliqui omnes Episcopi, & Presbyteri, & Diaconi, qui civitates, & regiones finitimas apud nos incolunt, & Ecclesiæ Dei, quæ apud nos sunt, dilectis fratribus.*

Ex quibus omnibus patet, admitti in Concilium solitos, non solum Episcopos & Presbyteros, verum etiam Diaconos: quam quidem prærogativam profero, non quòd Presbyteros & Diaconos, jure id exigere posse credam, quasi illegitimum sit Concilium, ad quod ipsi convocati non fuerint,

fuerint, quandoquidem sciam Concilium Episcoporum esse, ut fortè alio tractatu docebitur: sed quòd exinde contendam, ordinem Presbyteratus, & Diaconatus, àliquem aptiorem, magisque idoneum efficere, qui Concilio interesse, & ad negotiorum Ecclesiasticorum tractationem, discussionem, iudicium, præ cæteris advocari debeat: utpote quòd isti ordines Hierarchici sint, ac proinde Ecclesiasticæ jurisdictionis, non solum ordinariæ, verum etiam delegatæ magis capaces, ipsisque consentaneum sit, rei Ecclesiasticæ iudicium, quod alios ordines nequaquam deceat.

C A P. VIII.

*Episcopi, Presbyteri & Diaconi
benedicunt.*

III. **I**D ipsum nobis indicat prærogativa Episcoporum, Presbyterorum & Diaconorum, supra cæteros ordinum inferiorum clericos, quod soli benedictionem super populum fundere possint, quam & antiquam ostendemus, & in Ecclesiæ lege firmatam. Nam benedictionem dare, videtur esse superioris & principantis, ex eo enim Apost. ad Hebr. c. 7. Melchisedech Abrahamo superiorem ostendit, quòd ei bene-

benedixerit, *Sine ulla autem contradictione, quod minus est, à meliore benedicitur.* Et Nicol. 1. Epist. ad Michaël. cujus testimonium refertur à Grat. dist. 12. c. *denique*, colligit, superiorem ab inferiore benedici minimè debere. Ergo cum Ecclesia, his tribus solùm ordinibus, benedicendi populo potestatem faciat, sequitur, Ecclesiam eos solos ordines pro Hierarchicis & principantibus habere.

Quòd autem iis solùm ordinibus, benedictionis conferendæ potestas, ex Ecclesiæ lege concedatur: 1. Constat, ex Constit. Apost. Clement. lib. 8. c. 28. in quo primum de Episcopo habetur, *Episcopus benedicit, non benedicitur.* De Presbytero postea subditur, *Presbyter benedicit, non benedicitur:* Quam Lectionem Gretser. lib. 1. de Bened. c. 7. rectè corruptam esse coniecit, alioqui nullum esset inter Presbyterum & Episcopum discrimen: quod consentaneè statueretur, si dicamus, Presbyterum benedicere & benedici ab Episcopo: Episcopum verò benedicere, & à nullo benedici: quam textus restitutionem, seqq. de Presbytero verba, necessariam ostendunt. Subjungitur enim, *benedictionem accipit ab Episcopo aut com-Presbytero, item dat com-Presbytero*, id est, benedicitur ab Episcopo, seu potius benedicendi potestatem ab eo accipit, vel à com-Presbytero, cui popu-

populus subiectus est, & com-Presbytero similiter benedicendi facultatem tribuit, populo nempe sibi subdito : de Diacono verò paulò post dicitur, *Diaconus non benedicet, neque dat benedictionem, accipit verò ab Episcopo & Presbytero*, id est, Diaconus non benedicet propriâ auctoritate, sed ministeriali acceptâ ab Episcopo & Presbytero, atque adeò nec benedicendi alteri potestatem tradere potest, licet ab alio accipere potest.

Hoc ergo sensu dicendum est, Diaconum à se non benedicere, sed ab alio, puta Episcopo, vel Presbytero acceptâ potestate: quod tamen privilegium eod. cap. Constit. Apost. clericis & Diaconissis denegant, quibus scilicet neque benedicendi, neque aliquid eorum faciendi, quæ Presbyteri, vel Diaconi faciunt, potestatem permittunt. Atque idèò dicendum est, dignitatem istâm Hierarchicam, quam vetustissimus huiusce libri scriptor, in ordine Diaconorum potius, quàm in aliis inferioribus agnovit, causam fuisse, ob quam benedicendi populo potestatem, quæ maximè Episcopo, & eo absente, Presbytero convenit; Diaconis etiam attribuerit.

Maximè verò propriam dixi Episcopis & Presbyteris, benedicendi auctoritatem, iis enim Hierarchicè populum benedicere convenit, qui, ut ait Hier. Epist. I. ad Heliod.

Heliod. Christi corpus sacro ore conficiunt.

Nam cum juxta principia, à nobis sup. statuta, potestas in corpus Christi mysticum, à potestate in corpus ejus verum diffluat, iis proprium esse debet, suâ auctoritate populum benedicere, quibus divinitus concessum est, Christi corpus consecrare, ideoque S. Athan. in vit. S. Ant. *Ipsum Episcopis & Presbyteris, quasi humilitatis discipulum, ad benedicendum caput submittere, Diaconibus verò ad se venientibus inter orandum cedere, eosque tanquam DD. interrogare solitum, refert; proprium scilicet faciens, Episcopo & Presbytero benedicere, Diacono verò cum iis commune docendi munus tribuens. Hinc etiam ostendit Isid. Hisp. epist. ad Ludefr. relatâ can. Perlectis dist. 25. ad Presbyterum pertinere dicens, sacramentum corporis & sanguinis Domini in altario Dei conficere, orationes dicere, & benedicere dona Dei. Hinc Gratian. 16. q. post can. Hinc etiam benedictionem dare non nisi Sacerdotum esse, docuit. Quia verò Diaconi, ab aliis consecrata, ministrare possunt, ideo benedictionem pariter Sacerdotis nuntiare, & tanquam ministri superiorum ordinum proferre possunt. Quod utique permissum iis, in officiis divinis conjicio, dum nempe, ut sup. docuimus, vel vicanis Ecclesiis præficerentur, vel alternis cum sacerdote diebus,*

L bus,

bus, intra septimanam, officio divino præessent.

Superfunt vestigia istius in Ecclesia potestatis, 1. quod benedictio cerei Paschalis, publicè Diacono in Ecclesia concedatur: cujus rationem mysticam tradit. Rupert. lib. 6. c. 30. Alterum, quòd Diacono hoc sit commune cum Episcopo & Presbytero, ut recitans horas Canonicas, dicat verba ista, *Dominus vobiscum*, quæ salutationis populi & benedictionis rationem obtinent, quod nullius inferioris ordinis viris conceditur: Sed eorum loco dicere jubentur, *Domine exaudi rationem meam*, quemadmodum præscribit Rubrica Brev. Rom. inter Gener. 30. n. 3. quæ *versum istum non dici notat ab eo, qui non est saltem in ordine Diaconatus, nec à Diacono præsentante Sacerdote, nisi de ejus licentia*: vide Gavant. in Rub. Brev. sect. 5. c. 16.

Porro Diaconi dignitatem praxis ista comprobatur, quandoquidem, ut docet Petr. Dam. Opusc. 11. c. 10. qui istam orationem recitat, totam Ecclesiam representet, eamque, ut ait Gloss. in c. *Hoc quoque, de Consecr. dist. 3.* alloquitur; at representare totam Ecclesiam, eique benè precari ac salutare, videtur ad præpositum solum spectare. Ideoque excommunicati, à quibus per excommunicationem aufertur jurisdictio, verba ista dignitatis & auctoritatis dicere

Tres solum esse ordines Hierarch. 243

dicere prohibentur, secundum Hostiens.
in c. *Illud*, de Cler. excom. ministr. Gloss.
Pragm. sanct. tit. *qualiter hore Canon. sint*
Celebr. extra Chor. verbo; tenentur. Abbat.
in c. 1. de *Celebr. Miss.* q. 12. Navarr. Misc.
77. de Orat. n. 3.

C A P. IX.

Inter Episcopos Archi-Episcopi, inter
Presbyteris Archi-Presbyteri, inter
Diaconos Archi-Diaconi.

IV. **P**Rærogativæ prædictorum ordi-
num, efficacius argum. est, quod
Ecclesiastica nomina istorum ordinum,
cum præfixâ principatus voce legantur,
non cæterorum, nam Archi-Episcopos,
Archi-Presbyteros, Archi-Diaconos pas-
sim legimus, Archi-subdiaconos verò, Ar-
chi-Acolytos, Archi-Lectores, Archi-
Exorcistas, vel Archi-Ostarios non legi-
mus, nisi fortè quod semel Archi-Subdia-
coni mentio fiat in Conc. Altiſſiod. c. 3.
cujus officium fuerit, Chrisma ad Presby-
teros Parochitanos deferre; absque ulla ta-
men jurisdictionis, vel principatus sacri
prærogativa. Quod verò vox ἀρχι, quæ
principatum sonat, voci significanti, infe-
riora Diaconatu ministeria, non præficia-

tur, superioribus verò ordinibus præficiatur, causa hæc est, quia principatus ii ordines capaces sunt, illi non item.

Nec in nominibus tantum, vim facimus, sed in rebus; nam ideo Archi-Episcopi admittuntur, quòd inter Episcopos, aliqui, & dignitate potiores, & jurisdictione majores esse possint. Idèd Archi-Presbyteri, quia & inter Presbyteros, aliquis præesse cæteris, eorumque curam habere solet. Idèd Archi-Diaconi, quia non ex alio ordine, quàm Diaconorum, necesse est eligi, qui Diaconis præsit, cùm ex illo ipso, ordines, sacri principatus moderatores, eligere possint, & sacri DD. quales Archi-Diaconi, teste Maximo in c. 1. Eccl. Hier.

E contra verò, quia cæteri ordines, sacro principatui minùs idonei sunt, ideo ad principandum illis ordinibus, non ex ipsorum singulis ordinibus, sed ex superiorum numero eliguntur: constat enim ex Isid. Epist. ad Ludifred. Archi-Diaconum imperare Sub-diaconis & Levitis; ad Primitivum pertinere Acolythos, Psalmistas, atque Lectores; ad Thesaurarium Ostiarios. Quos omnes, ex ordine saltem Diaconorum fuisse, colligitur ex cap. *Cùm in cunct. §. inferiora, de elect. & electi. pot.* Itemque ex c. fin. *de Fil. Presbyt.* quibus istæ dignitates, beneficiis, curam animarum habentibus,

tibus, æquiparantur : & ex c. unic. de Offic. Primic. in quo etiam circa Diaconos officium ejus extenditur, ac proinde saltem Diaconus esse debere, declaratur : Denique ex c. 2. de Offic. Custod. Ubi præcipuæ istæ dignitates statuuntur., Archidiaconus Primicerius & Custos, quem Thesaurarium aliter vocant..

Et sanè sub Diaconi alicujus regimine, & custodia, inferiores Clericos multos legimus, v. g. Majorinum Lectorem, *In Diaconio Cariliani Archidiaconi*, tradit Optat. lib. 1. contra Parmen. Theodoretum Lectorem, Theodoro Diacono in custodiam datum ad erudiendum, Chryf. Epist. 61. Paulinum vitæ S. Ambr. scriptorem, primùm Mediolani sub cura Casti Diaconi, deinde Carthagene apud Fortunat. Diacon. resedisse, ipse de se testatur in vit. Ambr. Gregorium Agrigent. Episc. Donato Archidiacono erudiendum traditum ab Episcopo, scribit Metaphr. ejus vit. c. 2. S. Patroclum Clericum factum ab Arcadio, Bituricæ urbis Episc. traditum, refert Greg. Turon. lib. 1. de vit. PP. c. 9. Joannem verò quendam puerum, ab Innoc. Rutenæ Episc. cum Clericus factus esset, Archidiacono datum, lib. 10. Hist. c. 8. memorat. Innumeri alii referri possunt, qui in Diaconorum potestatem dati sunt è Clericis : cùm in potestatem Sub-Diaconorum,

norum, aliorumque inferioris ordinis, nunquam Clerici instituendi traderentur.

Quare syn. Rom. sub Zachar. c. 7. (quam nomine syn. Rom. sub Sylv. refert Gratian. d. 93. c. *A Sub-diac.*) licet monachum Abbati, Abbatem Ostario, Ostarium Lectori, Lectorem Exorcistæ, Exorcistam Acolyto, Acolytum Sub-diacono, in omni loco obsequium representare jubeat, sive in publico, sive in gremio Ecclesiæ: quia scilicet æquum est, ut minor majori serviat, & *consueti in ordine suo servitia* exhibeat, eisque assurgat, ex c. *statum.* junctâ glossa, *consueti, de majorit.* & obed. in gratiam tamen Diaconatus ordinis decernit, ut à Sub-diacono, usque ad Lectores omnes, subjecti sint Diacono Cardinali urbis Romæ, in Ecclesia representantes ei honorem, subditi, inquam, sint, & in ejus potestate consistant.

C A P. X.

*In Episcoporum, Presbyterorum, &
Diaconorum ordine, Clerici
Consistebant.*

¶ **E**st, quod nemo in minoribus ordinibus, vel Sub-diaconatu initiaretur,

tur, ut ibi sisteret, quemadmodum ad Diaconatum, Presbyteratum, & Episcopatum, in iisdem ordinibus moraturum aliquem (nisi Ecclesiæ utilitas, eos ad altiorum gradum vocaret) Ecclesia consecrabat. Quæ observatio colligitur, ex Tert. Phrasi, c. 11. cit. de fuga, *Hoc sentire & facere omnem servum Dei oportet, etiam minoris loci, ut majoris fieri possit, si quem gradum ex persecutionis tolerantia ascenderit, sed cum ipsi auctores, id est, ipsi Diaconi, Presbyteri, & Episcopi fugiunt, &c.* Videntur enim his verbis, inferiores gradus Diaconatu, ita cum superioribus conferri, ut hi principatum habeant, illi ad eum principatum tendant.

Colligitur ex Cypr. qui vix de gradibus inferioribus Diaconatu meminit, nisi factâ mentione destinati ad superiores ascensus: nam v. g. de ordinatione Saturi in Lectorem, & Optati in Sub-diaconum, verba faciens, Epist. 24. examinatum ait, an congruerent illis omnia, quæ esse debent in his, qui ad Clerum parabantur, quasi nempe ad Clerum paratur, qui in his gradibus constituitur: de Aurelii promotione ad Lectorum scribens, Epist. 33. *Merebatur, inquit, tales Clericæ ordinationis ulteriores gradus, & incrementa majora: non de annis suis, sed de meritis æstimandus: sed interim placuit, ut ab officio Lætionis incipiat.* Et

Epist. seq. de ejusd. Aurelii & Celerini Lectoratu, *Hos tamen Lectores interim constitutos sciais, & cæterum Presbyterii honorem, destinasse nos illis, jam sciais.*

Quod ipsum insinuat Nazianz. Orat. 1. non longè ante finem asserens, *quod prius oportet, ut quisquam Ecclesiâ dignus sit, id est, ut Ecclesiastico gradu, vel Ecclesiasticâ societate dignus videatur; ac deinde sacratio, quod Sub-diacono committebatur; vel suggestu, quem Lectores ascendere solebant* (nam τὸ βήμα utrumque significat, ejusque ascensum Juliano Lectori, idem tribuit Orat. 3.) *ac postea sedis principatu, id est, aliquo ex Hierarchicis ordinibus.* Annuit Paulin. Nol. qui se, cum Lector creatus esset, ab officio Lectoris, optasse decurrere S. ministerii gradus, scripsit ad Sever. Epist. 6. *Quia nempe ii ordines, verè gradus erant ad majorem ascensum.* Favet S. Leo, Epist. 87. ad African. c. 1. circa fin. statuens, *Ne primum, vel secundum, vel tertium, (id est, Episcopi, Presbyteri, & Diaconi) in Ecclesia gradum, quisquam Laicorum, quibuslibet suffragiis fultus ascendat, priusquam ad hoc meritum per legitima argumenta perveniat: ac si diceret, ad primum, secundum & tertium gradum, in quibus stari potest, per legitimas & constitutas, cæterorum ordinum probationes, tanquam dispositiones quasdam, esse conscendendû.*
Colli-

Tres solum esse ordines Hierarch. 249

Colligitur ex Syric. Epist. 1. ad Himer. c. 9. Zozy. Epist. 1. ad Hesich. c. 3. Quorum uterque post quædam interstitia, si sanctæ vitæ meritum adfuerit, ab uno ad alium Clericum ascendere, usque ad Diaconatum, debere præcipit, sed ubi ad Diaconatum aliquis pervenit, hunc Zozy. non ait, debere consecrari Presbyterum, sed posse *Presbyteri Sacerdotium promereri*. Siricius autem ex Diaconatu, qui dignus judicatus fuerit, *non immerito Presbyterio, vel Episcopatu sacrandum*, pronuntiat: quod uterque de Presbyteratu pari ratione sentit; prior quidem verbis mox allatis; posterior autem illis, quibus Presbyterum benè meritum, & sufficienti tempore probatum, si exactior ad bonos mores vita perduxerit, Episcopatum non assequi, sed sperare debere, dixit.

Quibus certè locutionibus, indicant inferiores ordines gradus tantum esse ad Diaconatum, Presbyteratum & Episcopatum; ad eos verò iri demonstrant, ut & in iis sistatur, nisi Ecclesiæ utilitas exposcat, ut à Diaconatu quis ad Presbyteratum, à Presbyteratu ad Episcopatum sublimetur. Atque hinc est, quod tot SS. viros, in Diaconii, Presbyterii, & Episcopatus munere obiiisse legamus, & toto vitæ tempore ad senium usque perstitisse, quod de aliis non ita frequenter legimus.

VI. Petitur præsertim ex integro tit. de off. Archi-Diac. lib. 1. & 6. decret. in quo judicandi, visitandi, corrigendi, officiales constituendi potestas Archi-Diacono (quem sufficit esse Diaconum) imò qui non poterat olim esse nisi tantum Diaconus vendicatur: totque prærogativæ conceduntur, ut de jici se, non promoveri interdum crederent, qui ex hoc gradu ad Presbyteratum promoverentur, ut patet ex Querimonia Ætii Archi-Diaconi Constant. apud S. Leon. Epist. 56. ad Julian. Coens. 57. ad Martian. 58. ad Pulcher. & Honorati Archi-Diac. saloni. apud S. Greg. lib. 1. Epist. 10. ad Honorat. & 20. ad Natal. Episc. lib. 2. indict. 10. Epist. 14. ad Natal. 15. ad universos Episcopos Dalmat. 26. ad Anton. Sub-diaconum.

C A P. XI.

Plures aliæ, Episcoporum, Presbyterorum, & Diaconorum, prærogativæ.

VII. **R**atio sumitur, ex variis aliis prærogativis Episcoporum, Presbyterorum, & Diaconorum, supra cæteros inferiores ordines, ut quod soli Diaconicum seu sacrum ingrederentur, ex conc. Laodic. c. 19. & Theodor. lib. 3. Hist.

c. 17. quem etiam morem habuit Ecclesia Gallicana, ex conc. Agath. c. 69. Quo argum. Dionys. Epist. ad Demoph. Monachorum, quod sancta sanctorum non ingrediantur, ordinem *ιεραρχι* non esse, nec ad populum docendum, atque illustrandum, vim & auctoritatem habere, defendit.

Item quòd soli isti ordines apud Græcos, intra sanctuarium ante altare conferantur, reliqui extra sanctuarium; quo ritu significari videtur, eos solùm tres prædictos ordines, in Ecclesia sacrum gerere principatum. Quòd etiam in ordinatione significant Latini, apud quos soli Episcopi, Presbyteri ac Diaconi, manuum impositione sacrantur: quo ritu, S. Bonav. in 4. d. 24. q. 2. a. 2 & a. 2. q. 1. Eximiæ, excellentis, & universalis potestatis collationem significari, testatur, quandoquidem manus sit organum organorum, & instrumentum universalissimum, ad omnes effectus.

Præterea; quòd olim nonnisi ex Presbyterorum, vel Diaconorum ordine, Episcopi eligi permitterentur, c. *final.* d. 60. Quòd Sub-diaconi, & inferiorum ordinum Clerici, Diaconis oppositi, *insacratii ministri* dicantur, ab Agath. conc. c. cit. quòd ea ratione dictum interpretatur, quia ad Hierarchicas actiones minimè consecrati erant, sicut Diaconi & superiorum ordinum Clerici.

Quòd eorum ordinum, utpote ad Ecclesiæ gubernationem magis necessariorum, scriptura S. mentionem fecerit, cæteros verò omnes filuerit. Denique quòd Chorepiscopis Sub-diaconos, & Cæteros inferioris gradus clericos, ordinare liceret, non item Diaconos, ex Conc. Ancy. c. 12. Antioch. c. 10. Nic. Epist. ad Radulph. Bituric. & aliis.

C A P. XII.

*Objectiones in contrarium proponuntur,
ac dissolvuntur.* III

Liquidò constat, ex iis omnibus, non gratis, neque perperam, aut sine fundamento, Episcoporum, Presbyterorum & Diaconorum ordines, præ cæteris inferioribus Hierarchicos esse dicendos: superest ut & peritioribus in ea scientia satisfaciamus; nonnullasque objectiones, quæ contra hanc sententiam proponi possunt, subministremus, easque diluamus. Objici enim possunt, adversus prædictam divisionem, in gratiam Sub-diaconatus, & minorum ordinum.

I. Auctoritas Trid. Syn. quæ sess. 18. de Sacram. Ord. c. 6. Hierarchiam divinâ ordinatione institutam, adversus impugnantes,

Tres solum esse ordines Hierarch. 253
tes, hanc statuit, quæ constat ex Episcopis,
Presbyteris & Ministris. Atqui ministri
etiam sunt Sub-diaconi; & reliqui inferio-
ris gradus Clerici. Igitur ii pariter ad Hie-
rarchiam spectare debent.

Alterum expressius Syn. Diæc. Carnot.
ann. 1526. quæ tonsuram Clericalem adi-
tum, ad Hierarchiam Ecclesiasticam, con-
stituere videtur: tit. siquidem de Sacram.
Ord. hæc habet, Cum secundum PP. sancti-
nes, qui volunt in sortem Domini, Ecclesiasticæ
Hierarchiæ adscribi, ut primum tonsuram Cle-
ricalem accipiant, à suo Episcopo eam petere
debeant, &c.

III. S. Aug. qui lib. I. de mor. Eccl. c.
33. non solum Episcopos, Presbyteros &
Diaconos, sed & alios Sacramentorum
ministros, populis Christianis præesse si-
gnificat, iis verbis: Quàm enim multos Epif-
copos, optimos viros sanctissimosque cognovi,
quàm multos Presbyteros, quàm multos Dia-
conos, & hujusmodi ministros Divinorum Sa-
cramentorum, quorum virtus eo mihi mirabi-
lior, & majore prædicatione dignior videtur,
quò difficilius est, eam in multiplici hominum
genere, & in ista vita turbulentiore servare:
non enim sanatis magis, quàm sanandis homi-
nibus præsent.

eb. IV. Quia ordines omnes personarum,
vel sunt initiantium, qui propriè sunt Hie-
rarchici, vel initiandorum, qui impropriè

tantum dicuntur Hierarchici, quod Hierarchicis subint ordinibus: atqui Subdiaconi, & cæterorum inferiorum ordinum Clerici, non sunt inter initiandos constituendi, nam ex Dionys. c. 5. & 6. Eccl. Hier. & aliis sup. cit. initiandorum ordinum primus est sanctissimorum Monachorum, secundus, plebis fidelis; infimus immundorum: Ergo debent Subdiaconi, & cæteri inferioris gradus ministri, inter Hierarchisantes statui; ac proinde eorum ordines sunt verè ac propriè Hierarchici.

v. Quia ex Theophyl. in c. 19 Luc. sup. cit. tot sunt ordines Hierarchici, quot sunt actiones Hierarchicæ, & unaquæque actio Hierarchica, ordini Hierarchico respondet: atque adeo ordo iste erit Hierarchicus cui una ex istis actionibus Hierarchicis, puta vel perfectio, vel illuminatio, vel purgatio conveniet: atqui inferioribus Diaconatu ordinibus, purgatio saltem convenit; nam, ut ait S. Thom. q. 37. Supplem. 2. 2. in corp. *Solis Episcopis convenit perficere; illuminare autem Presbyteris; purgare autem ministris omnibus.* Et in resp. ad 1. *Sed tertius (supple ordo) habet unam ex functionibus, scilicet purgare: ipse scilicet Diaconus, qui minister dicitur, & sub hoc omnes inferiores ordines comprehenduntur.* Ad quod etiam explicandum juvat, quod
tanquam

tanquam ex aliorum sententia profert ibid.
S. Thom. in corp. Quia Ostiarius purgat ex-
terius, segregando bonos à malis etiam corpora-
liter: interius verò Acolytus, quia per lumen,
quod portat, significat se interiores tenebras
pellere, & utroque modo Exorcista, quia Dia-
bolus, quem expellit, utroque modo perturbat:
sed illuminatio, quæ fit per doctrinam, quan-
tum ad doctrinam Propheticam, fit per Lecto-
res, quantum ad Apostolicam, fit per Sub-dia-
conos, sicut quantum ad Evangelicam, per
Diaconos fit. Ad singula ista sigillatim, per
tria seqq. cap. respondendum est.

Ad I. Trid. Syn. determinare tantum vo-
luisse, quod ab hæreticis impugnabatur,
esse nempe in Ecclesia Dei, vel divinâ or-
dinatione Episcopos, Presbyteros, & ali-
quos ministros, ad regendum populum
specialiter consecratos, nec *ἀναρχία* istam,
quam inducunt novatores nostri, qui dig-
nitatem Sacerdotii, populo ex æquo cum
sacerdotalis ordinis viris communicant,
admitti posse, sine divinæ institutionis
perversione. Determinare noluisse, quod
ab iis nullatenus in dubium vocabatur, sed
à Catholicis, quorum aliqui negant, infe-
riores Diaconatu ordines, à Christo insti-
tutos, quidam ab Apostolis, quidam ab
Ecclesia, post Apostolos statutos dicunt;
alii verò eorum etiam auctorem Deum fa-
ciunt, aliqui verò de nomine potius, quam
de

de re disputantes, suppositâ istorum ordinum divinâ institutione, in duas tamen diversas sententias abeunt, & quidam eorum Hierarchicos eos esse, affirmant, alii negant.

Ad definitionem itaque Trid. Syn. integram habendam, mentemque ejus assequendam, sufficit, aliquem ministrorum ordinem Hierarchicum dicere: non enim dixit syn. ex omnibus ministris Ecclesiæ Hierarchiam, sed ex ministris constare; ad quod sufficit, quòd aliquis ministrorum ordo sit Hierarchicus. Dici etiam potest, prolatos indefinitè ministros, sumi posse pro Diaconis, quia qui sunt potissimi ministri, ideo sumpto, analogo, pro præcipuo analogato, absolutè & sine additò ministri dicuntur *Διάκονοι*, cui voci nomen *ministri* respondet, quâ voce prolatâ simpliciter, apud Ambr. lib. 1. de off. c. 5. & lib. 1. de Sacram. c. 2. Isid. Hisp. lib. 2. de off. c. 2. Aquisgran. Conc. 1. c. 7. & alios passim scriptores, Diaconus intelligitur.

Ad 2. dicendum est, Syn. Carnot. (cui & alii DD. consentiunt) dum aditum ad Hierarchiam, clericalem tonsuram esse, insinuat, nihil aliud velle, quàm eam necessariam esse dispositionem, ad ordines Hierarchicos, non quidem dispositionem duntaxat, ut ii dignè recipiantur, vel exercentur, sed præterea, ut legitimè & recipi
&

& exerceri possint, pietas quidem, sanctitas, scientia, necessariae sunt dispositiones, ut quis licite possit, ad ordines superiores admitti, eorumque functiones exercere: sed non requiruntur istae conditiones, nisi ratione subjecti, ut nempe dignus sit aliquis, functionum gradu & ministerio: non ut legitimus sit minister ab Ecclesia probatus, & ad suam functionem legitima auctoritate praeditus: sublatâ siquidem pietate, scientiâ, & sanctitate, deest aliquid ad dignitatem personae, & dignam ministerii executionem, nihil autem deest auctoritatis, & juris, ad functiones istas legitime exercendas.

Monachatus similiter dispositio est, ad S. ordinationem, non respuenda, sed nullatenus necessaria: at verò Clericalis tonsura, ipsique minores ordines, dispositiones sunt, ut legitima sit ad Diaconatum, & ad Sacerdotium promotio: sine tonsurâ, & minoribus ordinibus, ac Sub-diaconatu, non Diaconis jus est integrum, non potestas plena, non auctoritas legitima. Nam ut de tonsurâ aliquid dicam, nonne verum est, Presbyterum, qui Clericus tonsuratus non fuerit, ad Ecclesiastica beneficia jus minime consecutum existimari, ex praxi Ecclesiasticorum Judiciorum? atque ideo dixit Isid. apud Gratian. c. *Sicut*, d. 40. *sicut viri & mulieris digna conjunctio unum facit*

facit matrimonium: & sicut duorum copulatio, unum perficit corpus, ita Clericatus, & Sacerdotium, unum faciunt Presbyterum, & electio & consecratio, unum faciunt Episcopum: quæ omnia unum faciunt corpus.

Nonnè etiam verum est, eum, qui Subdiaconatu, vel minore ordine prætermisso, Diaconus, vel Presbyter ordinatus fuerit, in functionibus Subdiaconatus, (quas tanquam Presbyter & Diaconus eminentius continet) exercendis, minùs juris & potestatis habere, quòd ad eas specialiter, per singularem consecrationem destinatus non fuerit? Atque adeo nec legitimum ministrum superiorum ordinum quos recepit ab Ecclesia, judicari, nec ipsi eorum exercitium permitti, donec prætermissos ordines quanto citius recipiat; ut de eo, qui Subdiaconatus ordine prætermisso, Diaconus ac Presbyter ordinatus fuerat, expressè statuitur, *c. sollicitudo, d. 52.*

C A P. XIII.

*Prosecutio solutionis argumentorum
præc. cap.*

AD 3. præc. & arg. Dico, 1. non esse necessarium, quòd verba Aug. quibus præesse Clericos dicit, hominibus sanandis, ad

ad omnes ab ipso enumeratos referantur , sed sufficere , quòd ad aliquos solùm , quorum proinde virtutem supra Monachos extollat , referri possint neque enim dum alicujus dicti ratio redditur , opus est , quòd singulæ rationis partes , omnibus membris enumeratis conveniant : unde sicut non omnes Episcopi , Presbyteri & Diaconi , quorum sanctitatem ibi laudat Aug. in vita turbulentiore degebant , cùm ex iis etiam aliqui in monasteriis degerent , ita nec omnes isti Clerici populis præerant , sed soli Episcopi , Presbyteri , & Diaconi.

II. Possent etiam inter præsidentium ordines , seu Hierarchicos , ministros Diacono inferiores referri , tribus titulis , puta *dispositivè* , *finaliter* , & *ministerialiter* atque imperfectè , seu privatim non publicè. Dispositivè quidem , quia sicut in aliqua religione novitii dicuntur religiosi , quia novitiatus est dispositio necessaria ad religiosam professionem ; ita & dici possunt clerici inferiores , qui disponuntur ad gradus Hierarchicos , ad eosque ex statu suo præparantur , aliquo pacto Hierarchici , & inter præsidentium ordines comparatè ad Laicos referuntur : eodem modo , quo primo-geniti regum in regnis , quæ successione ad eos deferuntur , & designati ad imperium Cæsares , principes dicuntur , non quòd principatum gerant , sed quòd ad prin-

principatum ex suo gradu disponantur, & jam destinantur.

Sed & notandum est, illas dispositiones folere potius *formæ* nomine donari, quæ homogeneæ sunt, quam quæ heterogeneæ; propter hanc enim rationem, rectè dispositio in Philosophicis vocatur *habitus*, & passio *paribilis qualitas* dicitur, licet forte specie differant, quia tamen ejusdem generis sunt, & unum est alterius incrementum, unum alterius veluti semen, ideo quod tale dispositivè est, tunc temporis absolute tale dicitur: at ubi diversa generis dispositio est, à forma non accipit nomen formæ, neque enim v. g. ob eam causam calor accipit nomen ignis, nec pietas & sanctitas nomen ordinis S. ad quem disponit, sed rectius *dignitas minor*, alterius, cujus initium & inchoatio quædam est, nomine donari potest.

II. Finaliter, isti ordines dicuntur Hierarchici, quæ ratio à priori non valdè differt: quandoquidem dispositio fit propter formam, & ideo in ratione dispositionis, ad eam tanquam ad finem referatur; nihilominus, quia quædam ad formam disponunt, in quibus tamen per se sisti potest, sine ulteriori relatione ad finem, ad quem scilicet ex sua natura minimè tendunt, v. g. calor dispositio est ad ignem, & tamen per se calor intendi potest, etiam sine relatione
ad

ad ignem, & ita est medium, ut possit esse finis, in quo agens naturale conquiescat, eumque intendat, absque eo quòd productionem ignis appetat: ideo connexio dispositionis cum fine, aliquando major, aliquando minor: tunc verò à fine præsertim denominatur dispositio, quando naturâ suâ ad finem tendit, nec in ea per se sistitur.

Tales autem dispositiones sunt minores ordines, & Sub-diaconatus respectu superiorum, ut in iis per se minimè sistatur, ut supra docuimus, sed ad ordines Hierarchicos naturâ suâ gradus isti referantur: unusquisque enim minoribus initiatur ordinibus, Sub-diaconatu, ut vel Diaconus, vel Presbyter, vel Episcopus fieri possit, & ut ait Tert. sup. cit. c. de fug. *Hoc sentire, & facere omnem servum Dei oportet, etiam minoris loci, ut majoris fieri possit.* Ex sunt ascensiones, quas disposuit in Ecclesia Dominus. Itaque finaliter ordines isti Hierarchici sunt, quia per se naturâ suâ, ad Hierarchicum ordinem referuntur.

Potest & alio sensu, ordo quivis Diaconatu inferior, dici finaliter Hierarchicus, quia ad finem Hierarchiæ, S. Eucharistia, ex institutione sua, refertur, altaris autem ministerio, & SS. Eucharistiæ Sacramenti, legitimæ celebrationi omnes destinantur, ex S. Thom. Suppl. q. 37. a. 2. in corp.

III. Ministerialiter ordines minores simul cum Sub-diaconatu, Hierarchici dici possunt, quia, ut sup. explicuimus, officia eadem, quæ ab Hierarchicis ordinibus attinguntur, possunt non Hierarchicè, & absque cognitione causæ, ac sine auctoritate puniendi inferiores ordines, obire, quibus defunguntur Hierarchici ordines, qui vi suâ, potestatem aliquam in corpus Christi obtinent, in qua potestate jurisdictio omnis Ecclesiastica, ex prædictis, radicatur; eadem inquam, officia ministerialiter inferiores Clerici obire possunt: non quidem singuli omnia, sed aliqua duntaxat: nam potestatis integræ Diaconorum officia, sibi quodammodo partiti sunt.

Sub-diaconus, Acolytus, & cæteri inferiorum ordinum Clerici, qui ideo Diaconorum ministri dicuntur, neque habent cognitionem causæ, neque judicandi, ne quidem hîc & nunc, potestatem, sed sub manu Diaconi sunt, & in ejus directione: Exorcistæ v. g. ut exorcismos super hunc vel illum fundant, absque eo, quòd de ejus possessione à Dæmone, judicium ferre debeant: Ostiarii, ut hunc vel illum ab Ecclesia ejiciant, vel ad Ecclesiam admittant, non concessio eis judicio cujusquam excludendi, vel admittendi, Diaconi verò, licèt exequendi potestate præditi sunt, tamen

tamen in casibus singularibus habent iudicandi auctoritatem.

Denique nec inferiores Diaconatu ordines, ad corpus Christi, vel sanguinem consecrandum, vel dispensandum ordinantur, in qua tamen consecratione ordinariâ, quævis potestas Hierarchica circa populum radicatur; ac proinde quæcunque ex officio sui muneris peragunt, sine ista ordinatione ac consecratione, Hierarchicè non censentur agere.

Materialiter autem operationes *præfaturæ*, spectavit Aug. si fortè eas minoribus Ordinibus, & Sub-diaconatui attribuit, non autem formaliter, quasi purè, ut ab iis proficiscantur, sint Hierarchicæ, cum tantum sub ea ratione sint ministeriales.

Denique ad imperfectè Hierarchisandum, minorum ordinum Clerici ordinantur, qui nempe ad privatim singulos fideles commonendos, adhortandos, excitandos ad pietatem, instruendos in fide, jus, potestatem & auctoritatem ab Ecclesia recipiunt, insuperque obligationem, ut cæteris ordinibus initiandorum præluceant. Ex quorum nempe numero, & ad exemplum, & ad privatam eruditionem, & ad Dei cultum specialem segregati, & pro populo, exemplo Levitarum consecrati sunt.

C A P. XIV.

Solutio arg. IV. & V.

POtest & prædicta hæc solutio, IV. quoque argum. applicari; nam cum actiones easdem, quas exercent Hierarchici ordines, sed non eodem modo, obeant inferiores; hinc partim ad initiantium ordines spectant, partim ad initiandorum; partim ad sacra administrantium, partim ad patientium classem referuntur. Initiantes sunt, quia initiandi actiones, purgandi & illuminandi, inferiori modo eliciunt: initiandi sunt, quia radice potestatis initiandi cum careant, non suâ; sed delegatâ potestate, videntur initiationem sacram, sive *ἱερεργίας*, sive *ἱερολογίας* perficere.

Agentes sunt, quia movent: patientes, quia moventur: agentes sunt patientes, quia non movent, nisi moti, quomodo enim Baculus non movet, nisi à Brachio motus, quia principio vitæ, & motus, in omnem differentiam loci, caret. Illudque principium jurisdictionis circa populum fidelem, nonnisi in ordinibus Hierarchicis reperitur, ideo inferiores ordines; si quid agunt, nonnisi ab Hierarchicis ordinibus moti, agunt, non propriâ virtute, sed alienâ. Brachium verò, etsi instrumentum animæ

animæ dici possit, nihilominus propriâ virtute, sibi naturaliter inditâ, agere dicitur, sed quæ, qualiscunque est, animæ est.

Similiter & Diaconus, quia habet potestatem dispensandi corpus Christi sibi connaturalem, quæ virtus ministerialis, & instrumentalis Sacerdotis virtus est, ideo & instrumentum dicitur, ac minister Sacerdotis, sed ad modum instrumentorum conjunctorum, quæ & ipsa vivunt, & virtutem habent sibi ingentam, quia suppositorum sunt instrumenta, non vim tantum extrinsecus advenientem, qualis est virtus instrumentorum separatorum, quibus inferiores Diacono ordines assimulantur, ministri ministrorum, & deservientia Diaconis instrumenta.

Quæ sanè ratio, explicandi Hierarchicam Diaconorum virtutem, ostendit, inter ordines verè Hierarchicos, & Laicorum statum, medios esse ordines Ecclesiasticos ministerialiter Hierarchisantes, non Hierarchicè, & auctoritativè operantes, qui proinde propter participationem extremorum, modò ad Hierarchicos ordines revocantur, & sub ordine Diaconali constituuntur, modò verò ad initiandorum ordines revocantur.

Quod quidem insinuat Syn. Laodic.
c. 24. *Ministros altari deservientes atque Hie-*
M *rarchicos,*

266 *Quæstio VI. Cap. 14. Tres solum, &c.*
rarchicos, & quodam modo Sacerdotales, à
Presbyteris, usque ad Diaconos, alios deinceps
admittit, & ἐκκλησιαστικὴς πείρας, Ecc-
lesiastici ordinis, inter quæ refert. ὑποεπίσκοπος,
id est, Sub-diaconos, Lectores, Psaltes,
Exorcistas & Ostiarios, Ecclesiastici ordi-
nis, non tamen Hierarchici, quibus τοῖς
ἀσκήταις, id est, monachos, iisdem ferè le-
gibus constrictos, adjungit, qui nec ad
Hierarchicum (ἱεραρχικόν) nec ad Eccle-
siasticum (ἐκκλησιαστικόν) ordinem perti-
neant.

Eadem etiam solutio arg. postremo satisfacit: etenim patet ex dictis, inferiores ordines Diaconatu, actiones Hierarchicas materialiter tantum, non formaliter attingere: purgare scilicet & illuminare, sed non Hierarchicè, nec purgandi vel illuminandi rationem, quatenus Ostiariis, Lectoribus, Exorcistis, Acolytis, Sub-diaconis tribuitur Hierarchicam; licet eadem actio, ut fit à Diaconis, Hierarchica censeatur, quippe quæ ab his auctoribus fiat ut Hierarchicis, ab illis purè ministerialiter, quemadmodum explicuimus: atque hæc de his satis, nunc aliqua, de excellentia ordinum Hierarchicorum, ac præcipuè sacerdotii delibanda.

QUÆ-

QUÆSTIO VII.

Functiones Hierarchicæ, Ecclesiasticorum ordinum, præponendæ, cælestis Hierarchiæ, seu Angelicæ custodiæ, officiis.

C A P U T I.

Præcellentiam Sacerdotii, supra officium Angelicæ custodiæ, non officere Angelorum dignitati.

Sunt neoterici, qui officium Angelicæ custodiæ, officiis Sacerdotum & Episcoporum, præferunt. Et quia prælatio omnis, unius officii, supra aliud, illius, quod inferiori loco ponitur, videtur quædam esse depressio, idè conantur, quicquid de præstantia Sacerdotalis & Episcopalis officii dicitur, criminari, quasi in contemptum Angelicæ custodiæ, cui plurimùm debemus dicatur.

Sed æquissimè ferent, beatissimi illi spiritus, si hominibus à Christo demandata

quædam officia, quæ sine Christi ipsius contemptu, officiis ipsorum postponi non possunt, pro rei veritate præferamus; non invident dignitati Christi, non dignitati hominum, quæ cum Christi dignitate conjuncta est. Sequamur ergo exemplum Apost. quomodo in ejusmodi comparationibus loquendum sit, nobis præmonstrantibus, Epist. ad Hebr. c. 2.

I. Enim, Christum naturam inferiorem Angelicâ assumpsisse, fatetur, Angelis tamen hypostaticâ unione, potestate & auctoritate longè superiorem esse, prædicat, auctoritate Proph. Reg. Psal 5. in cujus explicationem hæc addit, *Eum autem, quimodico quàm Angeli minoratus est, videmus Iesum propter passionem mortis, gloriâ & honore coronatum: ut gratiâ Dei pro omnibus gustaret mortem. Decebat enim eum, propter quem omnia, & per quem omnia, qui multos filios in gloriam adduxerat, auctorem salutis eorum per possessionem consummare. Qui enim sanctificat & sanctificantur, ex uno omnes.*

Nec dubitat idem Apost. ex eadem Christi Domini præcellentiâ, super Angelos, aliquam similiter nostrum omnium supra Angelos prærogativam deducere, ut Angeli Dei ministri sint, nos autem fratres dici possimus, subjungit enim, propter quam causam non confunditur fratres eos vocare, dicens, Psal. 21. *Narrabo nomen tuum*

tuum fratribus meis : in medio Ecclesiæ laudabo te. Et iterum Psal. 17. Ego ero fidens in eum. & iterum If. 6. Ecce ego, & pueri mei, quos dedit mihi Deus : quia ergo pueri communicaverunt carni & sanguini, & ipse similiter participavit eisdem, ut per mortem destrueret eum, qui habebat mortis imperium, id est, Diabolum, & liberaret eos, qui timore mortis, per totam vitam obnoxii erant servituti. Nusquam enim Angelos apprehendit, sed semen Abrahamæ apprehendit : unde debuit per omnia fratribus similari.

Quod si licuit Apost. Angelos naturâ nobiliori præditos, illâ, quam Christus assumpsit, Christo non solum subicere in pluribus, (quod sine summa impietate negari non potest,) verum etiam nobis ipsis hominibus, lutea vasa portantibus, in ea dignitate postponere, quæ nobis, ex confortio ejusdem cum Christo naturæ, provenit, ratione cujus, Dei fratres vocari, & ejusdem cum Christo Deo substantiæ, dici possumus : quo etiam titulo hoc summum nobis divinâ dignatione beneficium contigit, & ad hoc dignitatis fastigium erecti sumus, ut nostram naturam divinæ personæ unitam, gloriari possimus, communicantes gloriæ Christi, cui carnis & sanguinis communione, conjungimur, secundum quam homo verbo divino unitus, Deus incarnatus, & homo Deus factus est.

Similiter & licebit nobis ratione Sacerdotii, cujus per ordinationem fuimus participes, Angelis non solum coæquare, verum etiam præferre.

Quis Vice-Regem, cui Rex omnem suam potestatem commisit, temeritatis arguat, si eo se titulo, ministris & domesticis Regis, quantumvis honoratioribus, ac genere nobilioribus, præferat? si non patiat vicariam suam potestatem, ac dignitatem vilescere, si loci sui dignitatem implere satâgat? Quis enim non potius eum, tanquam loci sui immemorem carpat, si aliquid sibi de Majestate Regiæ potestatis, quam representat, delibari patiatur? Nonne absque ambitionis notâ licet, imaginem pulcherrimæ formæ, & optimè elaboratam, etiam si apud te existat, alteri imparis artificii, & pulchritudinis simulachro, apud alium existenti præponere? etiam in lutea materia, Praxitelis, ac Phidiæ industria, imperitorum statuariorum circa marmor impensæ operæ, præferri solet.

Non ergo Angelos contemnimus, dum Sacerdotium Christi, in delegato sacerdote, Angelorum custodiæ præferimus; dum vicariam potestatem magni Regis, ministrantium circa nos officiis, antitypum & apographum Sacerdotii Christi, effectam potestatis ejus, exemplo ab ipso imaginem, Angelicæ virtutis delineationibus,
vir-

De præcellentiâ ordinum Hierarch. 271
virtutem & influxum Spiritus S. per Sacerdotes, tanquam per canalem quendam prodeuntem Angelicæ operationi ante ponimus. Angelos itaque naturâ, statu, conditione, Sacerdotibus præstare, non abnuimus: at officium Angelicæ custodiæ, pastoralis officio inferiùs esse, sine contemptu Angelorum; contra quosdam, contendimus, in seqq. cap.

C A P. II.

Insignes prærogativæ Sacerdotii, in productione corporis, & sanguinis Christi, ac sanctificatione hominum.

Hoc itaque deterſo: Pro dignitate Sacerdotii, ſupra munus animarum cuſtodiendarum, Angelis conceſſum, hoc potiſſimum argum. urgendum ducò, non conceſſa nempe eſſe, Angelorum cuſtodix, plurima, quæ Sacerdotio conceſſa ſunt. Prærogativa ſiquidem Sacerdotii inſignis eſt, quod Chriſtus, cum dilexiſſet ſuos, qui erant in mundo, in finem dilecturus eos, ſine fine, ſine modo, & ad Patrem rediturus, eximiæ ſuæ erga nos delectationis, ſtupenda teſtimonia exhibere voluerit: huiusque rei cauſa, duo, ſupra om̃em cogitationem miranda, ſupra om̃em, cui vi-

M 4. un-

unquam (si fortè dignitatem matris Dei exceperis) dignitatem concessam, efficere decreverit, quæ in uno Sacerdotio reperiuntur.

I. Enim, ut nobiscum semper versaretur, nec nos deseruisse dici posset, qui & moriturus erat, & ad Patrem ascensurus, de Sacerdotum ordinatione, & creatione cogitavit, per quos nobis & corpus suum, & sanguinem communicaret, & Spiritum S. effunderet, ut per eos & nobis, & in nobis viveret, & nos à peccati morte liberati, cum ipso, & Spiritu ejus viveremus, & carnis ejus manducatione, ac sanguinis potu, ad immortalem cum ipso vitam pareremur. Ex quo fit, ut Sacerdotium quodammodo semen sit spirituale, quo Christus in hominibus non solum per gratiam, verum etiam per substantiam vivit: quod innuisse visus est Tert. Scorp. c. 9. dum Apostolos missos ait, *cum toto Sacramento, cum propagine nominis, cum traduce Spiritus S.* dum succedentes Apostolis Sacerdotes, *hereditarios discipulos, Apostolici seminis fructices* appellat.

Habet ab ista prærogativa Sacerdotium duo, quibus Angelicæ custodiæ, longo intervallo præferatur: unum, in quo quodammodo B. Mariæ Virgini coæquatur: sicut enim ista semel Christum produxit, & in mundum effudit; ita quotidie Sacerdotes,

dotes, eundem sacris altaribus sistunt, & ut ait Hier. Epist. 1. ad Heliod. *Christi corpus sacro ore conficiunt.* Æmulatur enim divini Patris personalem dignitatem, in eo positam, ut verbum producat suum, quod quotidie incarnatum, expressione verbi, Sacerdotes producant. Cogitet unusquisque, quàm honorifica sit Sacerdotii dignitas, cui quodammodo Christum compellare, iis verbis licet, quibus eum divinus Pater affatur, *ego hodie genui te*, seu *ego hodie produxi te.*

Ex quo loco, si potuit Paulus, ad Hebr. 1. dignitatem Christi, super omnes Angelos inferre, quia nulli Angelorum tale quid unquam dictum est, quidni & liceat nobis, Sacerdotalia munera ex eodem, supra Angelica officia extollere, quia nullus unquam Angelus hoc Christo dicere potuit; quod sacerdos sacrificans potest dicere, *ego hodie produxi te.* Hanc excellentiam super Angelos spectarunt, & mirati sunt, Chrys. lib. 3. de Sacerd. Hom. 93. in Math. & 60. ad Pop. Antiochen. item Hom. in laud. eorum, qui comparuerunt in Eccl. Et Bern. serm. in cæn. Dom. Quibus etiam addes eund. Chrys. Hom. 51. in Math.

Alterum ad Sacerdotii, supra Angelicam custodiam, præcellentiam demonstrandam, ex eadem prærogativa colligitur, quod divinum Spiritum Sacerdos,

supra populum effundât, Deo nos uniat, Deosque efficiat : effundit autem Spiritum Dei, tanquam instrumentum, Deo quodammodo conjunctum, sanctificationis divinæ : ut quemadmodum per humanitatem Christi hypostaticè unitam, à verbo omnes sanctificamur, *de plenitudine enim ejus, omnes accepimus*, Joan. 1. Ita Sacerdotii virtute, omnes sanctitatem à Christo accipiamus.

Sanctificari quidem humanitatem Christi oportuit, ut esset instrumentum redemptionis, & sanctificationis generis humani, sanctificantur in sua ordinatione Sacerdotes, ut sint instrumenta sanctitatis, & meritum, & satisfactionis ejus, hominibus communicandæ : humanitas Christi, per verbum quidem formaliter, ad hoc opus redemptionis humanæ sanctificatur. Sacerdotes verò Christi, ad idem opus sanctificationis hominum sanctificantur per Spiritum S. in quorum proinde ordinatione dicitur, Joan. 20. *Sicut me misit Pater, & ego mitto vos.* Et paulò post, Christo insufflante, adjungitur, *accipite Spiritum S. quorum remiseritis, &c.*

Sanctitas divini verbi in humanitatem Christi, operante Spiritu S. effluxit, juxta illud Luc. 1. *Spiritus S. superveniet in te, & virtus altissimi obumbrabit tibi, ideòque & quod nascetur ex te Sanctum, Filius Dei vocabitur.:*

cabitur : Similiter & sanctitas humanitatis Christi, ad sanctificationem cæterorum, per Sacerdotum ministerium, operante Spiritu S. defluit ; quod utique significat Christus, Joan. c. 17. dum se in *Apostolis* ait *Clarificatum*, dum sanctitatem à Patre suo acceptam, se in eos refundere, & illos sibi quodammodo in eo similes, nobis representat, iis verbis : *Sicut tu me misisti in mundum, & ego misi eos in mundum, & pro eis ego sanctifico meipsum : ut sint & ipsi sanctificati in veritate.* Et paulò post, *& ego Claritatem, quam dedisti mihi, dedi eis : ut sint unum, sicut & nos unum sumus.*

Ac si diceret, eo fine, quo Pater eum misit in mundum, ut salvaretur mundus per ipsum ; ita & missos Sacerdotes, Apostolicæ potestatis hæredes, ut per eos similiter mundus salvaretur : quâ potestate remittendi peccata, & sanctificandi homines ipse donatus est, eadem potestate à se ipsos quoque donatos ac si testaretur, quòd semetipsum sanctificavit, infinita aggregando meritorum & satisfactionum opera, ut hi sanctificati in veritate, aliis eandem sanctitatem impertirent, in veritate docentes, & veritatem gratiæ per sacramenta exhibentes : eandem tandem quam habet claritatem, & dignitatem, iis se largiri, ut sint unum agens cum Patre, communionem sanctitatis, sicut ipse cum Patre

fuo unum est, ob unitatem virtutis, ratione
cujus ei necessum est, id ipsum operari,
quodcunque Pater operatur, Joan. c. 5.

C A P. III.

*Enucleatur magis, modus sanctificandi
homines, per Sacerdotium.*

ATque ut hanc prærogativam Sacerdotii, in sanctificandis hominibus, oculatiùs & attentius intueamur, duas tantùm reperio rationes, explicandæ virtutis, per quam tam sacramenta, quàm Sacerdotes, gratiam in Christianorum animabus producant. D. Thom. 3. p. q. 62. a. 1. in corp. a. & in Resp. ad 2. saltem secundùm interpretationem plurimorum, ex discipulis ipsius, censere videtur, duplicem esse virtutem in Sacerdote, & sacramentis producentibus gratiam; unam propriam, quæ competit eis secundùm propriam formam, sicuti securi competit scindere, ratione suæ acuitatis; alteram instrumentalem, quæ sit virtus quædam influxa, ab agente principali, habens se per modum motus, quo pacto securis, ut est instrumentum artis, & movetur per artem, non tantùm habet quòd fecet, sed quòd artificiale aliquod opus elaboret.

Alii

Alii verò, priorem virtutem, ut minimè necessariam rejiciunt, dicuntque, instrumentum cum agente principali conjunctum, ad producendum effectum supernaturalem, nullam aliam habere virtutem, quàm agentis principalis; puta Dei, & agere virtute Dei, non sibi insidente, sed sibi assistente, & quodammodo adhærente, ejusque imbecillitatem & impotentiam supplente.

Utramvis opinionem sequamur, nihil refert: ex utràque scilicet patebit, ad quantam sacerdos vi ordinationis suæ, ad quam sacramenta, vi ordinationis suæ dignitatem evehantur: Nam si priorem sententiam sequamur, quantæ dignitatis est, influxam quandam ab ipso Deo virtutem, Sacerdotem suscipere, & impressionem divinæ virtutis, quoties sanctificandis animabus vacet! Si verò posteriorem, quæ in schola communior est, amplectamur, illustrabit istam prædictam Christi Domini sententiam, ostendetque, vi Sacerdotii hominem ad hoc sanctificari, ut sit unum agens cum Christo, eodem aliquali modo, quo Christus ratione divinitatis est unum agens cum Patre.

Etenim Christus est unum agens cum Patre, non solum, quia ad eadem opera, & actiones concurrat, ad quæ concurrat Pater, sed maximè, quia eandem habet vir-

tutem, quam habet Pater; atque Sacerdos similiter ad hominis sanctificationem concurrit, quam non propriâ virtute, sed instrumentali tantum attingit, non solum eandem habet actionem, & terminum eundem producit, quem producit Deus, quod Creaturis omnibus Deo cooperantibus convenit; verum etiam per eandem virtutem agit, per quam Deus agit: Non enim aliam habet vim effectus supernaturalis producendi, quam divinam sibi assistentem virtutem, quæ per Sacerdotium, vis ejus dicitur, & potestas.

Igitur summa in eo prærogativa est Sacerdotis, ratione cujus Sacerdotium, officia Angelicæ custodiæ longè præcellit. Quid enim habet Angelus ratione Angelicæ custodiæ, huic simile vel affine? Quicquid agit officii istius, per propriam virtutem agit, nunquam conjungitur Deo, in ratione unius agentis, ut tota virtus sua, virtus sit vel Dei ipsius, vel influxa à Deo virtus: quod diximus Sacerdoti, quatenus sanctitatem hominis, attingit, competere: atque ita patet, Sacerdotium, aliquid homini tribuere, ratione cujus, ad majorem dignitatem evehatur, quam Angelus, per officium ipsi demandatum, custodiendorum hominum, promoveri dici possit.

Confirmatur, etenim vicarii, & ejus
cujus

cujus locum tenet ac tuetur vicarius, eadem est potestas, ut colligitur ex c. *Rom. de Appellar.* Et Leg. 1. §. 1. ff. *quis, & à quo appelletur* : ideoque ab iis non appellatur ad eos, quorum locum tenent, ut iisdem juribus definitur : Atqui Sacerdotes Dei vicarii sunt, quo nomine ab Ambr. appellantur in c. 11. Prior. ad Cor. *Christi sunt vicarii*, quo eisdem nomine, exornat idem Ambr. in 1. ad Tim. c. 5. *Locum sunt tenentes Iesu Christi*, ut Ign. loquitur, Epist. ad Trall. Nec abnuit Script. S. quin immo expressè docet, dum eos, *Legatione fungentes pro Christo*, nobis describit, 2. Cor. 5. Et ad Ephes. 6. Nec ab eorum sententia appellatur ad Christum, sed ut eadem Script. testatur, Math. 16. & 18. quæcunque solvuntur eorum ministerio in terris, erunt soluta & in cœlis, quæcunque ligata erunt in terris, ligata erunt & in cœlis. Igitur eandem habent illi cum Deo & Christo potestatem : quod innuit Christus, Joan. 20. dum ait, *Sicut misit me Pater, & ego mitto vos.*

Habent ergo Sacerdotes, vi Sacerdotiî, divinam virtutem : nisi enim eam haberent, quomodo peccata dimittere possent ? cum Luc. 5. scriptum sit, *Quis potest dimittere peccata, nisi solus Deus ?* Nihil verò tale sibi vindicare possunt Angeli, ratione officii sibi à Christo commissi, custodien-

stodiendarum animarum : non vicarii Christi sunt , non solvunt animas , non ligant , non auctoritate Christi vel Dei judicant , non divinâ auctoritate utuntur , non ejus locum tuentur ; quod privilegium hominum supra Angelos , fusè explicat Chryf. lib. 3. de Sacerd. c. 5. Ex quo hæc solum excerpimus , *Etenim qui terram incolunt , atque in ea versantur , iis commissum est , ut ea , quæ in cælis sunt , dispensent : iis datum est , ut potestatem habeant , quam Deus optimus , neque Angelis , neque Archangelis , datam esse voluit : neque enim ad illos dictum est , quæcunque alligaveritis in terra , erunt alligata & in cælo , & quæcunque solveritis in terra , erunt soluta & in cælo.* Et paulò post : *Pater omne judicium Filio dedit : cæterum video , ipsum omne judicium à Deo filio , illis traditum , &c.*

Quanto ergo intervallo , potestas judicaria Christi superat , potestatem Hierarchicam Angelorum in homines , tanto intervallo potestas Sacerdotalis , quæ eadem est potestas Christi , quam illis communicari totam , ex Chryf. Christus voluit , Angelorum potestatem Hierarchicam in homines superabit : Eodem itaque titulo , & officium Pastoratus humani , officio Angelicæ custodiæ , iterum Chryf. prætulit , serm. 40. de Laud. S. Paul. Apost. Tom. 5. ejus oper. iis verbis : *Et Angelis quidem sæpe ,*
diver-

De præcellentia ordinum Hierarch. 281
diversarum gentium cura commissæ est, sed nullus illorum, ita populum sibi creditum gubernavit, ut Paulus universum gubernavit orbem.

Scio ipsum quædam subdere, quæ correctionis loco esse dici possunt, sed ea quidem, fateor, correctionis locum habere, si ad amplificandam hominis supra Angelos, non officii Sacerdotalis hominis, supra officium custodiæ Angelicæ, quod nos solum urgenus, excellentiam traherentur. Ne quis ergo inde simpliciter, Angelos homine inferiores esse, ex officio Hierarchico Angeli, inferiori officio Hierarchico hominis, concluderet, rectè subjunxit paulò post Chrys. *Michaëli gens commissæ est Iudæorum: Paulo verò terræ ac maris, atque universi orbis habitatio ipsumque desertum: Et hoc non ad injuriam, quod absit, Angelorum: Sed ostendimus esse possibile, illis hominem copulari, juxtaque illorum merita consistere.*

Lubeat etiam audire Petr. Dam. eandem Pastoratus Ecclesiastici, ac Sacerdotii prærogativam, in Petro explicantem, serm. 16. de S. Petr. Apost. Rationemque proferentem, cur Petrum, *Conventus Angelicus non mediocriter revereatur: unus est enim, inquit, quem prænobilitant singularis primatus insignia, Clavicularius Regni cælorum, lingua fidei, fundamētum. Consummatur honor Et dignatio*

tio gloriosa, hominem in terris positum, cælis impericare, & inter Angelorum choros, iudiciariæ virtutis exercere virtutem. Et paulò post, Et licet assistant Angeli præsentis imperium expectantes, & administratorii Spiritus, assignata sibi ministeria sortiantur: nullus tamen eorum ligandi atque solvendi possidet potestatem. Item, quid est, quod Angelorum & hominum agminibus exclusis, solus Petrus in consortium divinæ Majestatis, & cum Domino residet præsentem?

Rursum serm. seq. de SS. Apost. Petr. & Paul. Cùm intueor Petrum, quem ipsa manus omnipotentis, Regni cælestis clavibus investit, cui Pater revelat Filii Majestatem, super quem fundatur Ecclesia, cui potestas ligandi & solvendi, conceditur, qui cælos claudit & aperit, quod Cherubim & Seraphim habere non legitur, vehementer admiror.

C A P. IV.

Prærogativa Sacerdotii amplius inquiretur, ex conformitate Sacerdotii, cum divino Principatu.

AD prædictas Sacerdotii prærogativas, singulæ quæcunque proferuntur rationes, referri possunt, quia potestas omnis Sacerdotum, vel circa corpus Christi verum,

verum, vel circa myſticum verſatur; circa corpus Chriſti verum, ut illud conficiat; circa myſticum, ut ſanctitatem ejus procuraret. Nihilominus, quia diverſis viis, ad inquisitionem dignitatis Sacerdotii tendi poteſt, aliæ quædam ſunt, quas omittere non poſſumus.

I. Quod Sacerdotium imago ſit, & character Sacerdotii Chriſti: altera, quod ejusdem Sacerdotii, tanquam ſigilli cujuſdam, imago divinitatis imprimatur: ratione cujus prioris prærogativæ, Sacerdos redditur Deiformis, ratione poſterioris, Deificans: quas duas conditiones, nec habet, nec dare poteſt, officium Angelicæ cuſtodix. Prior in duas partes ſcinditur. I. Enim probandum, Sacerdotio nos Deo conformes fieri; tum verò ſpeciatim attendendum, nos Chriſti imaginem & characterem, ſpeciatim per Sacerdotium ſuſcipere, & Chriſti Sacerdotii, humanum, antitypum eſſe. Paſtoratum verò hominis, ſive Sacerdotium Dei imaginem eſſe, ex pluribus comprobari poteſt. I. Quia teſte S. Ign. Epiſt. ad Trall. Epiſcopus typum Dei Patris omnium gerit. Quod clariùs explicat Clem. Rom. lib. 2. Conſt. Apoſt. c. 11. in quo alloquens Epiſcopum, ipſum hortatur, ut locum ſuum, dignitatemque, ſuis actionibus declararet, quod ratione iſtâ perſuadere conatur, *Uipote qui exemplar Dei,*
apud

apud homines, representas, præsidendo omnibus hominibus, Sacerdotibus, Regibus, Magistratibus, Parentibus, Filiis, Magistris. Ideoque ab eod. Clem. lib. 2. c. 26. de Episc. dicitur, *Hic post Deum terrenus Deus, qui honore vestro frui debet, de eo enim & similibus agebat Deus, ego dixi, Dii estis, & filii altissimi omnes; & Diis populi tui non detrahes. Episcopus igitur vobis præsideat, ut dignitate Dei cohonestatus, quâ Clerum sub potestate sua tenet, & toti populo præest Diaconus verò assistat huic, ut Christus Patri, ac ministret ei sanctè in omnibus. Similiter & Dionys. c. i. Eccl. Hier. eam vim, ait, Sacerdotii ὡς Θεοῦ ἑνός, ut Deus fiat Pontifex; & Hierarchiam nostram διευξεν, Deos efficientem vocat.*

Sumetur autem similitudo Sacerdotii, cum Deo, præsertim, ratione præsentia, cui officium Angelicæ custodiæ assimilari non potest: Nam Angeli quidem hominibus adsunt, regunt, gubernant, quod & Regibus & Principibus convenit, eosque illuminant, instruunt, quod & paedagogi & ministri faciunt; sed non eos spiritualiter, aut carnaliter generant, quos custodiunt: Sacerdotes verò spiritualiter generant, quos regunt. Const. Apost. lib. 2. c. 26. cit. Hanc rationem præmittunt, ob quam scilicet sacerdos, Deus quidam terrenus sit, Nam, inquiunt, *hic est secundum Deum*

Deum Pater vester, qui vos per aquam & Spiritum S. in adoptionem regeneravit.

Copiosè verò c. 32. ejusd. lib. enumerant eadem Const. varia beneficia quæ à sacerdotibus nobis proveniunt, quorum nulla, vel dignitate similia, ab Angelis dari possunt: non quòd Angeli, iis minùs digni, hominibus fuerint, quibus ea committeret Deus, sed quod placuerit Deo, hominem paulò minùs ab Angelis minoratum, ad officia longe majora, longe diviniora, sacerdotii Filii sui, immerentes sublimare. Ea verò sunt, quòd per eos acceperimus Spiritum S. in impositione manus baptisantis; quòd sancta dogmata didicerimus; Deum cognoverimus, cogniti à Deo sumus; signati oleo exultationis fuerimus; declarati filii lucis. Post hæc verò omnia enumerata, elegantem subdunt ad singulos Apostrophem, *Per Episcopum tuum, Deus te, homo, adoptat, cognosce Filii dexteram, quæ est mater tua: ama eum, qui secundùm Deum, factus est Pater tuus, & cole hunc.*

Quàm ingens hæc prærogativa, officii sacerdotis, supra Angelicæ custodiæ munus, quantò dignius est, & ad divinæ potestatis, atque auctoritatis similitudinem propius, esse supernaturale largiri, hominem nihil spiritualis vitæ habentem, nulla à natura semina, generationis spiritualis adferentem, manuum suarum impositione,

ver.

verborum, ore suo prolatorum, ministerio, Sacerdotem ad spiritualis vitæ lucem emittere, creare in eo novum spiritum, eumque à tenebris ad lucem educere; novum hominem secundum Deum creatum producere?

Divinitas quædam videtur hæc dignitas, & Angelicæ custodiæ officio, ac illustrationum Angelicarum, quibus inferiores à superioribus illustrantur, beneficio longè dignior, Angelus inferiorem quidem novâ veritatis alicujus luce illustrat, & ab eo tenebras ignorantiae abigit, hominem custodit, regit, & aliquatenus etiâ illuminat: quid tum? hæc omnia cedant oportet regenerationi ad vitam spirituales, ad quam sacerdos, hominibus tribuendam, consecratur: cùm scilicet omninò majus sit facere, vel quòd non erat, existat, & novum esse supernaturale habeat, quam non habebat: ac vitæ novitate instauretur; quàm, ut existens & vivens, quarundam perfectionum & ornamentorum accessione meliùs sese habeat.

C A P. V.

De dignitate Paternitatis Sacerdotalis, quædam.

HAnc igitur dignitatem Sacerdotii admirans, Procop. Gaz. comm. in Exod.

Exod. Sacerdotium à terræ contagio abscindens, Sacerdotes cœlo adscribere, ait; quandoquidem scriptum sit, Math. 23. *Et Patrem nolite vobis vocare, super terram, unus est enim Pater vester, qui in cœlis est.* Unde cùm sacerdotium, faciat sacerdotes, Patres necessariò cœlestes, & Patris divini assimilatione quadam cognomines faciat, necessum est, divinæ Paternitatis, & fecunditatis sine corruptione filios procreantis, imaginem aliquam exhibentes.

Eandem porro Paternitatis, ac fecunditatis sacerdotalis prærogativam, quam nemo Angelis tribuerit, egregiè nobis describit Chryf. lib. 3. de sacerdot. c. 5. 1. autem, sacerdotum principatum nobis extollit, *Sine quo scilicet neque salutis, neque promissorum bonorum compotes fieri possumus; nam si non potest quis, in regnum Cælorum ingredi, nisi per aquam & Spiritum S. regeneratus fuerit, & qui non manducat carnem Domini, & sanguinem ejus non bibit, æternâ vitâ privatur: omnia autem hæc non aliter, quàm per sacrosanctas illas manus perficiuntur, quâ fiet, ut citra illorum opem, aut gehennæ ignem evitare quis posset, aut repositæ in cælo coronæ, præmia assequi?*

Ubi hæc facundo calamo descripsit Chryf. quæ sunt maxima, nec parùm ad sacerdotii dignitatem promovendam valent, hæc addit, ad Paternitatis sacerdotalis

talis prærogativam commendandam, quâ diximus sacerdotes Angelis anteponi, *Hi enim sunt, hi sunt, inquam, quibus tum conceditæ sunt, spirituales parturigines, tum etiam baptismatis partus à Deo est commissus: per hos ipsos, Christum induimus, unâ cum Dei Filio sepelimur: beati illius capitis membra efficiamur: quo nomine, Sacerdotes meritò non modò plus vereri debemus, quàm vel Principes, vel Reges, verùm etiam majori honore, quàm parentes proprio honestare. Hi enim ex sanguinibus, illi verò auctores nobis sunt, nati- vitatis ejus, quam à Deo habemus, beatæ regæ- nationis illius libertatis veræ, atque adeo adoptionis ejus, quâ nos per gratiam Filii Dei sumus.*

Quàm nobilis illa sacerdotum Paternitas, quæ divinum, tum in æternis processionibus, tum in temporali creatione, modum agendi, exprimit? Nam sicut divinus Pater, suâ cognitione, verbum producit, simulque cum verbo, & per verbum Spiritum S. verbo vero, & Spiritu S. omnia extra se creat; juxta illam David. sententiam, Psal. 33. *Verbo Domini cæli firmati sunt, & Spiritu oris ejus, omnis virtus eorum.* Similiter sacerdos, Hierarchicâ cognitione formæ, à Christo institutæ, verbum sacramentale producit, quo verbo accedente ad elementum, Spiritum S. in cordibus suscipientium sacramentum diffundit,

fundit; atque ita & verbi prolatione, & Spiritus S. diffusionem, novum hominem secundum Deum procreat, & sanctificantem gratiam, tanquam è nihili latebris evocat?

Quid in Hierarchicis Angelorum, sive superiorum erga inferiores, sive erga homines quos custodiunt, simile aliquid aut excogitari, aut explicari potest? De hac verò spirituali Sacerdotum paternitate, loquebatur Apost. ad Ephes. 3. dicens, *Hujus rei gratia, flecto genua, ad Patrem Domini nostri Iesu Christi, ex quo, omnis paternitas in cælo & terra nominatur, ut det vobis secundum divitias gloriæ suæ, virtute corroborari, per Spiritum ejus, in interiorem hominem.* Quænam enim, quæso, est illa paternitas, de qua loquitur Apost. nisi illa, cujus fecunditatem, & ampliationem in Ecclesia Dei, & exoptat ardentissimè, & submissè à Deo efflagitat?

Hanc autem, cur non à Divino Patre communicari, à quo omnia communicantur, quæcunque in nobis bona reperiuntur, sed ex Patre Divino *nominari*, dixit Apost. nisi quia parùm esset, paternitatem Sacerdotalem, à Deo Patre nobis dari, nisi paternitatis Divinæ, eam esse expressam similitudinem, insculptam tanquam signaculo Divino Sacerdoti, ac formæ denominationem, ab ipsa Divina paternitate, tanquam

N

quam

quam ab exemplari desumptam, dicere insuper voluisset?

Seu mavis, hæc mens est Apost. ut ex paternitate Divina, denominari Sacerdotem Patrem, credi voluerit, ne videlicet aliò se Sacerdos putet, spiritalem fidelium Patrem, nisi quo Pater divinus secundum spiritum nobis Pater: Nam per gratiam Pater divinus, nos adoptat, & filios suos efficit, per eandem quoque gratiam, Sacerdos pater noster est, per quam scilicet nos Deo adoptat, & filiorum Dei, ac cohærendum Christi dignitatem nobis tribuit: hocque ipsum est, quod Aug. Enarr. in Psal. 77. ad commendationem paternitatis Sacerdotalis esse docuit, dum verba Christi, Math. 23. sup. cit. quibus unum cœlo Patrem esse testatus est, non idè dicta esse interpretatur, ut hoc vocabulum honoris humani, de loquendi consuetudine tolleretur: *Sed ne gratia Dei, quâ in æternam vitam regeneramur, naturæ vel potestati, vel etiam sanctitati cujusdam hominis tribueretur.*

Ex quo colliges, dignitatem paternitatis Sacerdotalis, Angelicis officiis præcellentem, non præjudicare dignitati Angelicæ, quia in Deum refunditur. Nam quodd Sacerdos spiritualiter hominem regenerat, non ipsius est, sed Dei; nec à seipso hoc habet, sed à Deo; nec sibi generat, sed Deo; nec quos generat, in suam familiam ad-

adsciscit, sed in divinam transcribit: quis autem ineffabilem istam generationem concipere poterit? Quis non hanc sublimem generandi potestatem, omnibus officiis Angelicæ custodiæ, & actionibus Hierarchicis præferat? Cùm enim Filium Dei esse, majus quippiam sit, quàm cogitari possit: facere Filium Dei, & Filium Deo generare, major erit sublimitas, quàm ut aliquid, quòd ad Deum minus attineat, eidem æquari possit.

C A P. V I.

*Aliæ rationes, similitudinis, Sacerdotii,
cum Divino Principatu.*

POssem addere plurima Pastoratus, & Paternitatis spiritalis beneficia, quæ sicuti Paternitatem carnalem longè exuperant, ex Chrys. lib. 3. de sacerdot. c. 3. qui ea fusè enumerat, & Paternitati naturali præfert, ita & Angelicæ custodiæ officiis, actibus Hierarchicis præcellunt. Neque enim Angeli aliis Angelis, quibus præsident, aut vitam supernaturalem conservant, aut morbos animi, aut ægritudines depellunt, aut poenas remittunt, aut eas Deo reconciliant: quæ omnia Sacerdotes circa subditos sibi populos exhibent: quorum popu-
N 2 lorum,

lorum; eò vita miserior, quòd iis indigeant à Sacerdote remediis; at certè Sacerdotum, tantò virtus efficacior, quòd hæc etiam præstare possit, quæ nec Angeli aliis Angelis, si iisdem miseriis subjacerent, à quibus, meliori utique sorte, & conditione perfruentes (quæ de re non ambigimus) eximuntur, exhibere possunt.

Quæcunque ergo sit Angelorum conditio, (quam humanæ meliorem esse, non inviti fatemur) eorum tamen Hierarchica potestas, minor esse arguitur, quàm Sacerdotis, quia hæc ad plura, & præstantiora beneficia valet, ad quæ functio Hierarchica unius Angeli circa alium, nec si Angelus ad nostram conditionem excidisset, sufficere videretur. Unde nec hominum vitam, Angeli custodes, interioribus gratiæ donis muniunt; nec peccato emortuam, vitæ reddunt; nec languentem gratiæ dono roborant; nec voluntati, cujus solius sanatio, totius hominis curatio est, medicamenta adhibent; sed inferiori animæ parti, cujus morbus quantumcunque sanetur, ex voluntatis ægritudine, ac debilitate, indies recrudescet.

Malim iis omnibus explicandis, immorari fusiùs, interim dum transeo ad aliam rationem, quâ sacerdotium Dei imaginem referre, demonstretur, beneficentiæ Divinæ imaginem, Sacerdotii virtute expressam,

pressam, hac brevissimâ enumeratione donorum, quæ nobis ex Sacerdotio proveniunt, cum Clem. Rom. lib. 2. Const. Apost. c. 33. concludam, ob quam, ipse Sacerdotes honorandos demonstrat, *Qui vos per aquam Deo regenerarunt, Spiritu S. impleverunt, corpore salutare, & pretioso sanguine vos dignati sunt, vobisque peccata remiserunt, & sanctæ ac sacræ Eucharistiæ participes fecerunt, ac promissionis Dei consortes, ac Christi cohæredes constituerunt.*

Altera verò ratio, ob quam, Sacerdotium, similitudinem Divini Principatus, insigniter referat, præ Angelico principatu, petitur à potestate vitæ & necis, quæ spiritualiter Sacerdotibus convenit, quam nullus Angelus in alium, imò nec in hominem ipsum, similiter obtinet: Cum enim singulare hoc sit privilegium, vitæ & mortis arbitrium apud se habere, quod nobis, 1. Reg. 2. in Cantico Annæ, indicatum est, *Dominus mortificat, & vivificat, deducit ad inferos, & reducit.* Hoc Sacerdoti, quod per essentiam sibi proprium est, per gratiam commune, Deus esse voluit: nam ut de Sacerdotibus, ait S. Clem. loco mox cit. *Hi potestatem vitæ & mortis, à Deo acceperunt, in judicandis iis, qui deliquerunt, & in damnandis ad mortem ignis sempiterni, & iis, qui se ad rectè vivendum convertunt, absolvendis & vivificandis.* Angeli verò nec in homi-

N 3

nes,

nes, quos custodiunt, nec in Angelos, quos illuminant, potestatem talem habent: Sacerdotum itaque humanus principatus longè potior, ac perfectior Angelico, sive in Angelos inferiores, sive in homines.

C A P. VII.

Eadem prærogativa Sacerdotii, ex conformitate, cum Sacerdotio Christi, & cum ipso Christo, colligitur.

QUantum etiam ornamenti, & dignitatis, Sacerdotio accedit, ex imagine Sacerdotii Christi, impressâ Sacerdoti, ex imitatione principatus Christi, & ejus, ut ita dicam, descripta ac delineata in nobis figura, ac similitudine, quis dignè referre, ac cogitare possit? Christus ab Apost. ad Hebr. i. c. dicitur, *Splendor gloria, & figura substantiæ ejus*, id est, hypostaseos ac personæ Patris character, ac figura personæ ipsius: Sacerdotem autem splendorem esse gloriæ Christi, ostendunt cit. verba Christi Dom. Joan. 17. de Apost. loquentis, *Et ego claritatem, quam dedisti mihi, dedi eis*. Eam verò figuram esse, & characterem hypostaseos, ac Sacerdotii Christi, facile est, tum auctoritate PP. tum ratione persuadere.

Tert.

Tert. lib. 4. in Marcion. c. 35. Christum, ideo *authenticum Pontificem Dei Patris* nominat, *disceptatorem & elimatorem humanarum macularum*, ut ostenderet, ipsum nostri Sacerdotii exemplar esse authenticum ac prototypum : Sacerdotium verò nostrum ejusdem apographon : eamque figuram Sacerdotii Christi, in duobus maximè elucere, & quòd peccati maculas, sanguinis Christi applicatione, Sacerdos extergat, quas ejusdem effusione Christus sufficienter abolerit; & quòd diremptorem se Christus, & judicem humanarum culparum, aliquando exhibiturus sit, cujus vice jam sacerdos judicat.

Ejusdem similitudinis mysteria referat, Clem. Alex. lib. 1. pœdag. c. 6. scribens, *Si quidem Pastores sumus, qui Ecclesiis præsumus, ad imaginem boni Pastoris*. Imaginis verò istius expressionem fusè postea collocat, in nutritione spiritali Christianorum : quam cum ejusdem generatione conjunctam, nobis exponit; adeò ut quemadmodum Christianus foetus, Christi sanguine, in utero Ecclesiæ, ejusdem Christi & sacerdotis operâ formatus, & verbo fidei concipitur, ita quoque eductus jam in lucem Christianus foetus, eodem sanguine ad ubera quodammodo impulsus, eoque distendente, & per modum lactis manante, operâ sacerdotis nutriatur.

Nutrit, Christus Christianum; nutrit Ecclesia Christianum; verbo nutrit Christus, verbo nutrit Ecclesia; sanguine suo Christus nutrit, sanguine Christi nos alit, nos reficit Ecclesia: parùm refert, uberibus Christi, Christianum nutriri dicas, an uberibus Ecclesiæ, nam cùm Christus & Ecclesia, unum corpus sint, cujus Christus caput est, cætera verò membra sunt, ideo ubera Ecclesiæ, ubera Christi; & ubera Christi, ubera Ecclesiæ. Vis scire, quænam sint ubera Christi, nonne sacramenta? Ea verò, nonnè & Ecclesiæ sunt? Ecclesiam verò cum dico nutrientem, Pastores intelligo, eos qui sacramenta conferunt, & verbum Dei administrant.

De Christo Christianum nutriente, ita Clem. Alex. *Dominus autem Christus, fructus Virginis, non beata dixit ubera fœminea, nec ea ad nutrimentum delegit: sed cùm amans & benignus Pater verbum implevisset, ipsum jam spiritale alimentum, factus est bonis, & maturatis hominibus.*

De Ecclesiis, & sacerdotibus, Christianum alentibus, paulò post subjungit: *Una autem sola est mater virgo: mihi autem placet eam vocare Ecclesiam, lac non habuit mater hæc sola, quoniam sola non fuit mulier. Virgo est autem simul & mater: quæ suos accersens infantulos, sancto lacte, nempe verbo infantili enutriat. Ideo autem lac non habuit,*
quod

quòd lac esset hic infantulus pulcher & appositus, scilicet corpus Christi; novum cœtum verbo enutriens, quem ipse Dominus carnali labore peperit.

O Divinam Christo, sacerdotis configurationem! eodem alimento nutrientis Christianum, quo Christus nutrit; Christi sanguinem propinantis, quem Christus propinavit; carnem distribuentis, quam Christus distribuit; verbum fidei annuntiantis, quod Christus prædicavit. Obstupescant Angeli, ad hæc mysteria, nec Divinæ isti configurationi Sacerdotis cum Christo, cedere renuant, qui Christi vestigia submissè venerantur & adorant.

Quàm egregiè etiam hanc similitudinem, ad moralem veritatem trahit, Isidor. Pelus. lib. 1. Epist. 136. Herm. Com. iis verbis, *Episcopus enim, qui Christi typum gerit, ipsius munere fungitur, atque ipso etiam habitu, illud omnibus ostendit, se boni illius, & magni Pastoris, imitationem esse, qui gregis infirmitates sibi ferendas proposuit.*

Præclara est hæc pastoralis muneris, cum Christo comparatio, quæ nec Angelis convenit: Christus peccata populi sustulit, factus pro nobis peccatum: annon & pastores atque sacerdotes Ecclesiastici, animam suam populo obstringunt, & populi peccata portant, ut & pro illis satisfacere aliquando obligentur, & populi peccata,

Deus adversum ipsos interdum ulciscatur, sicut adversus Christum, generis humani peccata ultus est: quorum neutrum in Angelo custode, vel superiore respectu inferioris animadvertitur: in quo advertis, & principatum sacerdotalem, Christi principatus figuram magis exprimere, & arctiore etiam cum iis, in quos Hierarchico principatu extollitur, necessitudine, sacerdoti constringi.

C A P. VIII.

*Confirmantur hæc omnia, ex communi
Theologorum doctrina, de chara-
ctere ordinationis.*

PROBAT etiam nostram explicationem, tum Dionys. tum Theologorum doctrina, de charactere ordinationis: ex quo scilicet patet, characterem quemlibet esse, participationem sacerdotii Christi, & configurationem cum Christo; differenter tamen characteri ordinationis, & characteribus Baptismi & Confirmationis, id convenire: nam character ordinationis, nos Christos facit, & sacerdotes, sacerdotii Christi, virtutisque ejus activæ participes: characteres verò alii, faciunt nos Christianos, & effectuum sacerdotii Christi recipiendorum capaces. Character ordinationis

nis duces efficit, loco Christi, ejusque principatus insignibus ornat: Alii, sub Christi signo militantes nos ostendunt, & ab iis, qui in aliis, quàm Ecclesiæ Christianæ castris militant, distinguunt.

Configurant nos Baptismi & Confirmationis characteres Christo, ut membra ipsius dicamur & influxum ejus vel simpliciter, vel convenientius participemus: configurant nos character ordinationis, ut non solum membra ejus dicamur, sed & capitis officio fungamur; recipientes Christi influxus, & in alios, ministerio sacerdotali, derivantes. Hanc doctrinam confirmamus 1. testimonio Dionys. c. 2. Eccl. Hier. p. 3. hæc verba proferentis, *Eum qui ita deducitur, beata Divinitas in communionem sui recipit, eique proprium suum lumen quasi signum tradit, divino eum numine afflans, sortisque ac ordinis eorum, qui divino numine afflantur, participem faciens.*

Ex quibus verbis characteris Baptismi dignitatem maximam, possumus intelligere, ut sit signum quoddam, & participatio Divini splendoris ac claritatis; communicatio Divinitatis; recensio in eorum numerum, qui ex ipso quo fiunt membra Christi, divinis influxibus, à Christo, tanquam à capite provenientiibus, subjiciuntur, quemadmodum membra omnia, capitis influxibus patent, & obnoxia sunt.

Majorem verò Sacerdotalis characteris possumus, servatâ proportionem, nobilitatem colligere, ut nempe & signum, & participatio sit longè augustior, claritatis & splendoris Christi, non solum sacerdotes configurans Christo, ut sint membra ejus, & membra corporis ejus, sed ut loco ipsius, etiam & ipsi, capita corporis Christi, esse possint; nec solum Christo uniantur, sed & sibi, & Christo, alia corporis membra uniant, existentes unitatis Ecclesiasticæ principia, ita ut cætera membra, per adhæSIONem ipsis cum Christo, unionem & locum in corpore Christi, obtineant: Sicut character Ducatus, & Imperatorius sub Rege, efficit, ut ii demum milites Regis, hujus vel illius milites dicantur, qui Imperatori vel Duci, characterem ejus, & notam Imperatoris ac Ducis habenti, adhæserint.

Hunc characterem, Aug. *Sacramentum Domini*, vocat, de bon. conjug. c. 5. distinguitque à characterem Baptismatis, lib. 2. contr. Parmen. c. 13. & lib. 1. de Bapt. contr. Donat. c. 1. quod ille sit Sacramentum dandi Baptismi, quemadmodum explicuimus.

Sed doctrinam prius traditam, omnium apertissimè, tradit S. Thom. 3. p. q. 63. integrâ, sed maximè, 2. 3. tum in argum. *Sed contra*; tum in corp. art. tum in resp. ad 2. nam 1. loco, character à quibusdam, ita
apud

apud eum definiri dicitur, ut sit *distinctio*, à *charactere æterno* (id est, verbo divino) *impressa animæ rationali*, secundum imaginem, consignans, *Trinitatem creatam*, *Trinitati creati*, & *recreanti*, & *distinguenti à non configuratis*, secundum *statum fidei*, id est, *cultus divini*, & *Religionis Christianæ*.

II. Loco concludit, *characterem sacramentalem*, specialiter esse *characterem Christi*, *cujus Sacerdotio configurantur fideles*, secundum *sacramentales characteres*, qui nihil aliud sunt, quàm quædam *participationes Sacerdotii Christi*, ab ipso Christo derivatæ.

III. Tandem, exemplo militum & ducum Regionum, explicat, quomodo illi, qui deputantur ad cultum Christianum, *cujus auctor est Christus*, *characterem accipiunt*, quo Christo *configurantur*. Hæc enim omnia, sacerdotium nostrum, sacerdotii Christi, quandam esse participationem, & configurationem cum Christo, evidenter demonstrant.

Quæ quidem ex eo confirmare possumus, quòd si sacerdotium nostrum, distinctum esset à Christi sacerdotio, & non quædam participatio, non solus Christus dici posset verus, ac summus sacerdos, quem tamen, ἀληθὴς καὶ μόνον θεὸς ἀρχιερεὺς, scribit Euseb. lib. 1. Hist. c. 3. potestque colligi, ex verbis istis Apost. ad Hebr. 7. Et alii quidem plures facti sunt Sacerdotes,

idcirco quòd morte prohiberentur permanere, hic autem, eò quòd maneat in aeternum sempiternum, Græcè, ἀπαράβατον, intransibile habet Sacerdotium: Quibus quidem verbis, unicum Christi & indeficiens sacerdotium, rectè explicatur, hoc sensu, quòd unicum sit archetypum, sacerdotium Christi, cujus expressa tantum exempla gerant, inferiores Christo sacerdotes; unum sit sacerdotii lumen, sed radii multi, in hominibus emicantes; robur unicum potestatis, tenaci radice Divinitatis fundatum, cujus tot rami numerantur, quot sunt, qui ejus sacerdotio, per ordinationem inferuntur; fons unicus in Christo potestatis, sed rivuli multi, exundantis in nos gratiæ largitate profluentes: atque ideo, qui dignitatem sacerdotii diminuit, nihil aliud, quàm ipsum Christi sacerdotium contemnit.

C A P. IX.

Comparatio specialis Sacerdotii, cum officio Angelicæ custodiæ.

Q Uòd si sigillatim prædicta omnia, ad comparisonem sacerdotii, cum officio Angelicæ custodiæ, & Hierarchicis superioris Angeli, erga inferioris functionibus, conferamus, sacerdotium longè dignius, officiis istis, & nobilius esse, colligemus:

mus: neque enim per characterem, sed per solam Dei voluntatem, deputatur Angelus, ad principatus sui, circa inferiores, tum homines, tum Angelos, exercitium; neque ullo signo regali, aut participatione Divini alicujus signi exornatur: illuminationes quidem Divinas recipit, quas communicet, sicut sacerdos instruens aliquem, de mysteriis fidei, illustrationibus divinis imbuitur, quibus alios perfundat.

Et in eo par videtur utriusque esse ratio; nisi fortè majorem illustrationem esse dixeris Angeli, quàm sacerdotis, quod ut plurimum verum est: sed non ex eo, utriusque officii dignitas petenda est, instrumenta sunt illa exercendi officii, quæ non semper majorem officii dignitatem ostendunt: illa porro præsertim petenda est, ex potestate, muneri adjuncta, & consecratione, atque initiatione, ad munus gerendum. Quorum utroque, sacerdotium, Angelicis officiis, tum circa inferiores Angelos, tum circa homines præstat.

Potestatem majorem ostendimus. Augustiorem quoque & sacrationem sacerdotis initiationem esse, quis non videt? Quandoquidem sacerdotem initiandum, oporteat, per characterem Christo configurari, ejusque sacerdotii participem fieri; notâ ejus regali, interiùs consignari; spiritali signaculo Dominico divinitus exornari;

nari; insignia Christi principatus genere; indelebilia, sempiterna: cum è contra, Angelus ad officium, v. g. custodiæ hominis, solâ exteriori deputatione assumatur; temporaneum hoc munus gerat; nullâ investiatur Regiâ notâ; nullo signo indelebili præmineat, aut homini quem custodit, aut Angelo, quem illuminat: cessatura fit aliquando Hierarchicarum functionum operatio, & distinctio in Angelis: nunquam autem distinctio sacerdotis ab aliis, finienda fit.

Possem plurima, ad hujus rationis illustrationem adjungere: sed quia prærogativæ istæ, attentâ potiùs meditatione percipi, quàm fusiori sermone exponi possunt, idèò silendum satius judico, quàm loquendum.

Unum etiam est, quod lectori potiùs cogitandum relinquere, quàm amplificare malumus, stupendum istud, divinæ erga sacerdotes dignationis, mysterium: quòd ut omnis indignandi, *adversus sacerdotii sublimitatem, Angelo tolleretur occasio, Christus etiam seipsum, sacerdote inferiorem, quodammodo efficere voluit: nunquid enim, ut argumentatur Apost. ad Hebr. 3. *Ampliozem honorem habet domus, qui fabricavit illam?* at sacerdos, Christum conficit. Nunquid & arguit idem S. Paul. ejusd. Epist. c. 7. *Sine ulla contradictione, quòd*

quòd minus est, à meliore benedicitur? sed Christus in Missæ sacrificio, à sacerdote benedici voluit. Nunquid & datorem, meliorem suo dono esse, convenit? sed sacerdos nobis dat ipsum Christum; Christus in altari, sacerdotis voci obedit, eique quodammodo subjicitur.

Hæc ubi quis perceperit, desinet Angelos in alteram partem trahere, quasi sacerdotali gloriæ invideant, quam, cum sua aliquali imminutione, super omnem potestatem, & dignitatem efferri, Christus instituit: non indignè ferent, sanctissimi illi spiritus, eorum dignitati cedere, quorum dignitas, ut ex Ambr. retulit, Leo X. in conc. Lateran. sess. 11. Bullâ *dum intra, nullis potest comparationibus adæquari.*

C A P. X.

Prærogativa ultima Sacerdotii, quòd homines Divinos faciat.

U Ltima tandem prærogativa Sacerdotii, ex pluribus, quas explicandas suscepimus, est, quod Deificandi vim habeat, hominemque in Deum transformandi, per gratiam. Hinc Dionys. c. 1. Eccles. Hier. nostram Hierarchiam *Θεοποιητικὴν*, Deos efficiensem vocat; passimque *Θεοποι* tum à Dionys. tum à Maxim. dicti sacerdotes.
Nazianz.

Nazianz. verò Orat. 1. Egregiè hanc sacerdotis prærogativam explicat, dum sacerdotem nobis describit; *Cum Angelis stantem, cum Archangelis glorificantem, ad supernum altare sacrificia transmittentem, Christi Sacerdotio fungentem, figmentum instaurantem, imaginem exhibentem, superno modo opificem agentem, & ut majus dicam, Deum existentem, & Deos efficientem. Quàm multa hîc videntur officia sacerdotis enumerari, quædam communia ipsis cum Angelis, stare coram Deo, & Divinum numen glorificare: quædam verò potiora & sublimiora.*

Quæ rectè ab Elia Cretensi, Schol. in dict. Orat. n. 25. explicantur, quodd cum Christi sacerdos, ad ejus imitationem sacrificet, Nec id tantummodo, verùm etiam hominem Dei figmentum resingat, atque his majora, per sacram & divinam generationem efficere dicatur, quâ fit, ut imago ad exemplar suum recurat, & ii, qui inistantur, cum Divino Spiritu copulentur, atque ad perfectissimam (quantum ipsorum captus fert) exemplaris imitationem reducantur, & in superno mundo, & Angelico vitæ statu reponantur. Pontifex enim Christo per Baptismum indutus, Sanctoque Spiritu delibutus, ac per adoptionem Deus effectus, per spiritali hanc generationem homines procreat, procreat autem non simpliciter, sed superno modo, Angelum ex homine,

homine, atque, ut quod majus est, dicam, Deum reddens, hinc quippe per spirituales hanc regenerationem, divino modo esse incipimus: nam nostra illa, quæ ex semine sit procreatio, tamen ex Deo, invisibili modo procreante est, tamen naturalis, & quodammodo corporea est. Quæ autem ex Baptismo est, cum Divina quædam sit spirituales nostras affectiones in id, quod Divinum est, transmutat, atque ad cælestis statum informat.

Quo etiam sensu intelligi posse, ait Elias, quod Greg. cum Angelis stantem hominem, dixit; quamvis & alio sensu explicari posse, fateatur, quod Angeli præsentis, Divino sacrificio, à sacerdotibus oblato, interfint. Quæ sanè tota Greg. textus expositio, à vetusto Patre, quantum sacerdotium, officiis circa homines, vel alios Angelos, efferatur, ad oculum demonstrat. Idem verò Nazianz. Deificationis munus, proprium esse sacerdoti ostendit, Orat. 23. non longè ab init. ubi se ad hanc mensam mysticam, *μυστικῆς τῆς θείας, sacrum Deificationis munus*, obire dixit.

Deificatio autem illa, duobus modis perficitur. I. Dei imitatione per bonos actus. II. Gratiae sanctificantis receptione, & unione cum Deo, quemadmodum exponit S. Dionys. c. 1. Eccl. Hier. Hæc ultima ratio Deificationis, magis propria est, quia per gratiam Divinum esse accepimus, per

Per quam scilicet primi illius doni sanctificationem († πρῶτον ἀγιασµὸν) recipimus, quam Divini Spiritus insufflatione, primus homo, ad imaginem Dei conditus, acceperat, ut explicat D. Cyrill. advers. Anthropomorph. c. 2. Quem ideo primum hominem, Greg. Nyss. Orat. 3. de resurr. θεοειδῆ, seu, *Divinâ formâ præditum*, asserit. Per eandem gratiam, ut ait, S. Petr. Epist. can. c. 4. *efficimur Divinæ consortes naturæ.*

Angelis quidem, sicut & hominibus, commune est, quod eorum illustrationibus, sicut & sacerdotum exhortationibus, ad Dei imitationem pertrahi possimus: quamvis sacerdos, hoc saltem proprium habeat, quod ab eo, speciatim Deus, nos de mysteriis fidei, & Christianæ vitæ elementis, quibus ad Christi imitationem gradimur instrui velit, non ab Angelis immediatè edoceri; quodque exemplis suis, ad imitationem Dei, præire nobis possit, cum Angelorum exempla, ab hominum oculis, longè remota ac seposita sint: sed hanc partem ego non attingo. Id solùm ad honorem, & commendationem sacerdotii urgeo, quod sacerdos, quasi medius, inter humanam & Divinam naturam, per sacerdotium, in Deum quodammodo transformatus, & Divinam vim suscipiens, homines infusione Divinæ gratiæ, naturæ
com-

De præcellentiâ ordinum Hierarch. 309
communione melioris, & quodammodo
Deos, id est, Divinos efficiat. Rectè Isidor.
Pelus. lib. 3. Epist. 20. Hermog. Episc.
Inter Divinam & humanam naturam, Sacer-
dotium, veluti medium, interjectum est, ut
illam colat, atque observet, hanc autem in
melius commutet, quocirca si quis eò sublimius
sentit, ne mentis quidem & prudentiæ parti-
ceps, esse mihi videtur.

C A P. XI.

Nihil Sacerdotio sublimius, cogitari
posse.

Nihil ergo sublimius sacerdotio, sen-
tire aliquis potest, non officium An-
gelicæ custodiæ, non illuminationem An-
gelicam huic adæquare possumus: non illa
animum ita immutant, ut Divinus illicò
reddatur, & in novam Dei formam trans-
mutetur. Propriam sibi Deus communi-
candæ gratiæ potestatem vendicat, dicen-
te Proph. Reg. Psal. 83. *Gratiam & gloriam*
dabit Dominus: cujus tamen potestatis par-
ticipationem, sacerdotibus dedit, tunc præ-
fertim, cùm ipsis, absolvendi à peccatis, &
in novam per Baptismum vitam, regene-
randi potestatem, tradidit: si quid majus
concipere potes, eâ veritate, quæ, & Chri-
stum Deum producit, & animabus impr-
mit, Divinæ naturæ imaginem & gratiam,
quâ

quâ efficimur Filii Dei, hæredes Dei, cohæredes Christi, animabus infundit, si quid, inquam sublimius, si quid Divinius concipere potes, nobis revela.

Non ego dubito, quin Angeli, nullum tale sibi officium, nullam tantæ dignitatis virtutem collata fuisse, libenter fassuri sint, quia ad Dei Majestatem spectat, ut adoptandi in Filios Dei potestate, nihil majus statuatur, ad ejus munificentiam, & in providendo sublimitatem pertinet, ut quibus vult, sua munera dispertiat, & inferioribus nonnunquam naturæ sublimiora & nobiliora dona largiatur. Angelos beatos, Deo propinquiores, Deoque unitos, magis quam sacerdotes, in hac mortali vita, statuas, per me licet. Sed hoc singulare privilegium habeant sacerdotes, quod Deo, per gratiam sanctificantem, unire strictius hominem possint, quam Angelus, aut hominem, aut alium Angelum: quod dissolutam, per peccatum, hominis cum Deo amicitiam, absolvendo à peccatis, religare, dissolutasque voluntates copulare queant.

Quod ubi agnoveris, non dubito, quin sacerdotium, officio Angelicæ custodiæ, & quibuslibet actionibus Hierarchicis, superioris Angeli, erga inferiores, nobiliter ac præstantius admissurus sis; quin stultum putes esse, Angelorum munus, & dignitatem, supra sacerdotum elevare, qui, ut
ait,

De præcellentiâ ordinum Hierarch. 311
ait; Hier. Epist. I. ad Heliod. Apostolico
gradu succedentes, Christi corpus, sacro ore
conficiunt: per quos & nos Christiani sumus,
qui claves Regni cælorum habentes, quodam-
modo ante iudicii diem judicant, qui Sponsum
Domini sobriâ castitate custodiunt.

C A P. XII.

*Fundamentum, quo adversarii, adversus
ea, quæ pro prærogativa Sacerdotii,
diximus, excipiunt, dissolvitur.*

Sufficiunt ista, ni fallor, quæ nos fusiùs,
ad commendationem Sacerdotii, ex-
plicuimus, ut ex iis pateat, sacerdotium, &
officia Hierarchica Ecclesiæ militantis,
longè præstare, & præcellere, officiis tum
Angelicæ custodiæ; tum Hierarchicis
Angeli superioris erga inferiores, quod
etiam obiter, allatis super. argumentis, te-
tigimus. Vide etiam, quæ per modum
recapitulationis dicemus, subseq. Quæst.

Et fanè, quia ad ea omnia PP. testimo-
nia, quibus expressè PP. asserunt, functio-
nes sacerdotales, superare omnia officia
Angelica; potestatemque sacerdotalem,
nullâ comparatione, adæquari posse; plu-
raque, & nobiliora, à sacerdotibus, quàm
ab Angelis ex officio præstari; quid, in-
quam, ad hæc, & his similia, respon-
dere

dere habeant moderni , equidem non video.

Sed quia non sufficit , adversarium confodere , nisi etiam nos , ab ejus ictibus & insultibus præstemus immunes : solvendæ sunt quædam objectiones , quas adversus traditam hanc doctrinam intentant.

Præcipua objectio, fumitur ex eo, quòd instrumenti dignitas , aut utilitas , universè & absolutè loquendo , ex eo , non spectari debeat , quod agit , sed ex majore , aut minore cum causa primaria , propinquitate : nam digitus , inquiunt , penicillo , nobilius instrumentum est , quia manui conjunctius , & ipsa manus , instrumentum nobilissimum est ; quia moventi animæ , ad quælibet efficienda , promptiùs famulatur .

At fundamentum hoc inutile : nam quantumvis ad ejus veritatem nihil desideremus ; nihilominùs , ad vim argumentorum nostrorum retundendam , nullius esset efficacix ac roboris . Etenim non hîc agimus , sitne Angelus nobilius instrumentum , seu nobilior minister Dei , quàm sacerdos ? jam facti sumus , Angelum sacerdote nobiliorem esse ; nec negamus , quin sicut digitus nobilior est penicillo , ita Angelus nobilior sit homine . Sed quæstio , a nobis discussa , hæc fuit , quodnam esset præstantius officium , an Pastorum , an Angelorum custodum ?

Fun-

Fundamentum itaque hoc, ad quæstionis, de qua agitur, discussionem, nihil facit. Argumentorum autem nostrorum vis omnis, integra & illibata consistit: quandoquidem officii cujuslibet, muneris & gradus dignitas, & utilitas, ex utilitate maximè, & dignitate functionum, ad quas officium istud, & munus destinatur, vel gradus instituitur, colligere ac metiri oporteat; spectandumque, quid per se agat istud, ad quid agendum conferatur, cui usui gradus iste conferatur: atqui docuimus, functiones sacerdotii, longè præstantiores, ac nobiliores esse, functionibus Angelicæ custodiæ: igitur, suppositâ etiam virtute fundamenti contrarii, nostrorum argumentorum vis & firmitas persisteret.

II. Nec in omnibus, fundamentum istud veritati consentit: I. Enim, quod ad utilitatem spectat, absolutè falsum est; plus enim ad utilitatem instrumenti cujusque spectandam, expendere oportet, quid quodque instrumentum agat, & ad quot functiones, & quantum conferat, quàm, ex conjunctione instrumenti, cum causa principali, vel separatione ab ipsa, de utilitate judicare conveniat: capilli v. g. conjunctiores sunt instrumentis artificialibus, quibus tamen, quia ad artis operationes minùs conferunt, nullum ferè in-

strumentum separatum, inutilius dici potest.

Similiter penicillus, conjunctior est agenti principali, substantiâ coloratâ, quæ ad pingendum adhibetur: nam mediante penicillo, tabellæ ista apponi & affingi solet, quæ tamen ad pingendum longè utilior, quia omninò necessaria est: Adeps quoque, & carnea moles manus, instrumentum est conjunctum homini, cujus utilitas, ad opera artis, longè minor, spiritibus vitalibus, ad motum manus omninò requisitis: acumen ensis, minus conjunctum homini pugnanti, manuariâ ejusdem scutulâ, quæ tamen ad ferendum minus confert: Chirothecæ sunt conjunctiores agenti principali, instrumentis, quæ ad varia opera artis adhibentur: quæ tamen, licet quibusdam operibus artis inserviant, minus tamen ad ea utiles sunt, quàm ipsa instrumenta, quibus ad opera artificialia uti solemus.

Deinde, nec verum est, instrumenta conjunctiora, nobiliora semper esse, instrumentis magis separatis, nam v. g. cœli, motu suo producant calorem, calore raritatem, vel aliquam aliam aut qualitatem, aut substantiam, in qua serie actionum, motus longè conjunctior est cœlo, quàm calor, cujus tamen motus, essentia utpote imperfecta, & in continuo fluxu posita, calore,

calore, qualitate perfectâ ac permanenti, dignitate inferior est.

Similiter actio quævis ignobilior termino, quæ tamen agenti conjunctior, quàm sit terminus: semen conjunctius generanti embryone, embryo tamen semine nobilior; & in artificialibus videre est, non semper, instrumenta artificialia, nobiliora ea esse, quæ sunt conjunctiora: in moralibus quoque contingit, Regem v. g. per ministros Palatinos, inferiores dignitate, duces exercituum, & gubernatores provinciarum, monere, eorumque consilia dirigere: ita ut conjunctius instrumentum, ignobilius sit remotiori, minusque conjuncto.

Denique malè ad commendationem conjunctioris instrumenti adfertur, quòd agenti promptius famuletur, quandoquidem certum sit, & ipsam manum, quæ in exemplum adducitur, minus promptè famulari, & ministrare artifice, quàm penicillum, aut aliud quodvis instrumentum artificiale, quorum nullus toties artifice resistit quoties resistit manus quæ scilicet ad quodvis opus, assuetudine flexilis reddi debet, & docilis, antequam pro nutu artificis regatur, quæ torpore, continuoque usu, vel assuetudine, vel morbo artifice dirigenti renititur: quibus modis, cætera instrumenta, nunquam artifice resistunt.

Imbecillum itaque argumentum eorum, quo Angelos, nobiliores Dei ministros, sacerdotibus esse probant, ex istis generalibus axiomatibus, 1. quòd instrumentum conjunctius agenti principali, nobilius semper sit, & utilius. Altero, quòd instrumentum, quo causæ principali conjunctius, eò minus ei moventi renitatur.

C A P. XIII.

Fundamentum hoc, inductivum est erroris; & contrarium ex eo sequitur.

SEd jam argumenti imbecillitatem non moror; parum est, non esse firmum, ad impugnandam veritatem; nisi potentissimum ostendatur, ad statuendum errorem. Hoc enim argum. convincitur, utilius esse ad hominum salutem, officium Angelicæ custodiæ, quàm Sacerdotium: atque adeo Angelorum circa nos operam, utiliorem esse, magisque necessariam, meritis & satisfactionibus Christi, quæ nobis per sacramenta, ministerio Sacerdotum applicantur, quod sine errore & blasphemia dici nequit. Etenim ita ex principiis eorum disputare licet: *Instrumenti dignitas, aut utilitas universè & absolutè loquendo, ex eo spectari non debet, quod agit, sed ex majore, aut minore, cum causa primaria, proquinquitate,*

tate, seu, instrumentum utilius censetur, quo causa primariæ conjunctius est: atqui Angeli custodes, ex eorum principiis, causæ primariæ, putà Deo, propiora sunt instrumenta & conjunctiora, quàm Sacerdotes; ergo Angeli custodes, non tantùm digniores, sed & utiliores sunt hominum salutis, quàm Sacerdotes.

Augebit difficultatem, quòd ex eodem principio, quòd astruunt, contrarium sequatur, ei, cujus ipsi probationem intendunt. Etenim axioma illud, quòd utilitas & dignitas instrumenti, ex conjunctione & propinquitate majori, cum causa primaria repetatur, quo sensu probabilissimum est, de instrumento intelligendum est, in ratione instrumenti considerato, non in ratione entis per se existentis, propinquitas enim cum causa primaria, ad dignitatem instrumenti materialiter sumpti, ut quædam res est, parum utique confert, sed conducit maximè ad dignitatem instrumenti, in ratione instrumenti & formaliter spectati: atqui hoc axioma sic expositum, Angelorum ministerium dignitate cedere sacerdotio, ostendit.

Etenim licèt Angelus, quatenus beatitudine perfruitur, Deo magis uniatur, quàm sacerdos in via positus, qui eo ipso, quo in via est, corporis corruptibilis mole, tanquam macerie interpositâ, à Deo separatus

dici potest: ob quam causam dicebat Apost. *Cupio dissolvi, & esse cum Christo*: nihilominus, si concipiatur, in ratione instrumenti nostræ salutis, Hierarchicè per sacramenta Deo cooperantis, magis utique Deo conjungitur, quàm aut Angelus cultos, aut Angelus Hierarchicè illuminans alium; nam sacerdos, prout instrumentum est Dei, salutis nostræ per sacramenta Deo cooperans, non propriâ ullâ virtute, sed vel eadem, quâ Deus agit, agit & ipse, & ad agendum ab eo elevatur, vel influxâ quadam, & participatâ virtute, à Deo prodeunte, ad agendum movetur, quæ utraque ratio agendi, intimam instrumenti cum causa primaria, in ratione instrumenti, rationem arguit, nec Angelo convenit, qui quascunque actiones Hierarchicas agit, eas virtute suâ motrice, proprio intellectu, ac voluntate, per species & habitus sibi inditos, efficit. Igitur illud principium, quod tanquam sententiæ contrariæ fundamentum statuitur, intentum nostrum probat atque confirmat.

C A P. XIV.

Rationum allegatarum firmitas, adversus modernorum conatus, asseritur.

E Verso hoc fundamento, facile est, inanitatem responsionum, quibus moderni

derni, has nostras probationes, conantur concutere, lectori demonstrare: nec multâ ad id industriâ opus est: Quandoquidem vel solâ collatione argumentorum nostrorum, cum eorum responsionibus, voluisse vim eorum effugere, videbuntur, non solvere.

I. Enim, ajunt, *Viatoribus hæc concessit Deus, merâ voluntate, quæ cum beatâ spiritibus communicata, velle poterat.* Sed hoc effugium est, & extra rem omninò responsio; non enim agitur, potueritnè Deus, Angeli officia æquare, cum hominum ministeriis, & ad eam dignitatem evehere, ad quam homines evexit, sed utrum de facto evexerit, illudque officium custodiendi homines, quo ex divinæ providentiæ lege, de facto funguntur, ei æquiparari debeat ministerio, cui sacerdotes suos, in nova lege, Christus voluit mancipari, & utrum illorum Hierarchica potestas, quam in custodiendis hominibus exercent, dignitate æqualis sit, ei, quam illi, ex Christi institutione acceperunt.

Sicut enim manet inconcussa ista veritas, quam Paul docuit, ad Hebr. I. *Christum tantò meliorem Angelis effectum, quantò differentius præ illis nomen hæreditavit: manet & ejus firma probatio, quam seqq. verbis expressit, Cui enim dixit aliquando angelorum, Filius meus es tu, ego hodie genui te?*

Et rursus, ego ero illi in Patrem, & ipse erit mihi in Filium? Et cum iterum introduxit primogenitum in orbem terræ, dicit, Et adorent eum omnes Angeli Dei: Et ad Angelos quidem dicit, qui facit Angelos suos Spiritus, & ministros suos flammam ignis, &c.

Potuisset tamen, si ita voluisset, Angelica natura, æquè ac humana, uni ex personis Divinis uniri, atque ita potuisset Angelus, & verè dici Filius Dei, & æqualem cum homine Deo conditionem nactus, æqualem quoque sortiri honorem, parem venerationem & cultum: nec differens nomen hæreditare, ab eo, quo Deus homo nuncupatus est. Sed non spectatur, quid fieri potuerit, sed quid reverà factum sit, atque adeo, quia (sicut notavit idem Apost. c. 2. ejusd. Epist.) *Nusquam Deus Angelos apprehendi, sed semen Abrahamæ apprehendi*, ideo absolutè necessum est dicere, majus beneficium Dei fuisse, erga humanam naturam, quàm Angelicam, majoremque hominis in eo dignitatem, quàm Angeli, *non enim Angelis subjecit Deus Orbem, sub Christi pedibus omnia subjecit.*

Similiter quantumcunque potuerit Deus, Angelicæ custodiæ officium, iisdem vel majoribus ditare privilegiis, quibus humanum in nova lege privilegium exornavit; quandoquidem constat, reverà non exornasse, non est spectandum, quale, & cujus excel-

excellentiæ de facto existat. Unde cùm reverà non eas habeat eximias dotes, non insignes ac divinas facultates, nec ullas alias ejusdem dignitatis notas, cum iis, quas Sacerdotium complectitur, haud benè ad Divinam potestatem recurritur, de qua non disputatur, dum duo ista diversa, & Angeli custodis, & hominis Sacerdotis officia, qualia à Christo instituta sunt, inter se conferuntur.

Subdunt aliam responsionem : *Neque ipsam (Angelorum) operam & ministerium vacua esse, permisisse Deum : ut non incommode dici possit ea immediatè hominem facere, Angelum quodammodo mediatè.* Perperam autem ista subjungunt : tum quòd aliqua sint opera Sacerdotis, ut mox dicemus, quæ neque mediatè, neque immediatè ab Angelo fiunt ; tum quòd id ipsum, quantumvis daremus, non tamen officium Angelicæ custodiæ, Sacerdotii dignitatem æquaret : quia mediatè tantùm ad opera gratiæ concurrere, officii longe ignobilioris est, quàm immediatè ad illa cooperari : Conferunt siquidem mediatè, & potentiæ & actiones naturales, & inanimata quædam atque insensibilia, nullâ supernâ virtute elevata, ad opera gratiæ, v. g. objecta, phantasmata, cæteraque id genus, quorum tamen in ratione motivorum, aut causarum, ad gratiam operantium, longè dete-


rior est conditio, sacramentorum conditio-
ne, & aliorum, per quæ immediatè gratia
animabus infunditur.

Neque hîc sistunt, sed insuper addunt;
Deinde, si quid privatim homini Deus dedit,
quo jure, inde deducis, inferiorem homine An-
gelum? idemnè etiam de Mariâ Virgine
profiteris? A scopo penitus aberrant: ne-
que enim inter nos agitur, utrum homine
Angelus dignitate inferior sit: neque hoc
deducere unquam conatus sum: quin
imò, Angelos, expressè dicimus, *Homi-*
nibus naturâ superiores esse, ac conditione
beatiores.

Quid ergò deducere, aut colligere ten-
tavi? illud utique, quod supra in tit. habe-
tur, quodque sæpius inculcavi, officium
Angelicæ custodiæ, officio pastoralis infe-
rius esse: illud autem omninò diversum
est, ab eo, *inferiorem homine esse Angelum*:
quemadmodum aliud est, humanam Chri-
sti naturam inferiorem esse Angelicâ, aliud
officium mediatoris seu redemptoris,
Christo homini conveniens, inferius esse
officio ministeriôque Angelorum: prius
enim fatetur Apost. postè diffitetur, ad
Hebr. 2. citans enim David. verba, Psal. 8.
eaque Christo. applicans, *Minuisti eum*
paulò minus ab Angelis, gloriâ & honore coro-
nasti eum, & constituisti eum super opera
manuum tuarum, omnia subiecisti sub pedi-
buss.

*bus ejus. Hæc ad explicationem istius
versus subnectit, In eo enim, quod omnia sub-
jecit, nihil dimisit non subiectum ei. Nunc
autem necdum videmus omnia subiecta ei:
Eum autem qui modicò quàm Angeli minora-
tus est, videmus Iesum propter passionem mor-
tis, gloriâ & hanc coronatum.*

Similiter ergo verum est, quod conclusi,
officium Angelicæ custodiæ, ignobilioris
esse conditionis, officio pastorali: Illud
verò falsum, quod nunquam conclude-
re, cogitavi, homine inferiorem esse An-
gelum.

Exemplum autem B. Mariæ Virginis,
huic loco non consentit: non enim B. Vir-
ginem, in natura, cum Sacerdotibus con-
ferre licet, quia & Sacerdotum, & B. Vir-
ginis, eadem natura est, sed dispar condi-
tio; hæc , seu Deipara, illi corpo-
ris Dei consecratores ac sacrificatores, quæ-
dæ conditiones habent se per modum ex-
cedentis & excessi, nec à nobis usquam in-
ter se collatæ sunt, nec una alteri præposi-
ta, vel æquata.

C A P. XV.

Utrum Episcopi omnia obeant munia Angelicæ custodiæ, illuminentur immediatè à Deo, & Angelos aliquando illuminaverint.

INferunt præterea moderni, nos Angelos deprimere, ed quodd, *Omnia custodum Angelorum munia, juxta nos, Episcopi & Sacerdotes videantur obire, ipsam etiam illuminationem: nam & in hac, inferiores esse Angelos hominibus, ex eo patere, ajunt, putà Apostolos à Christo; Angelos autem infimæ Hierarchiæ, non à Deo immediatè, sed à superioribus mentibus illuminari: quæ, inquiunt, si vera sunt, cui bono custodes Angeli? cur singulis hominibus, non beatum genium sed Sacerdotem custodem, non adjungit Deus? Duas hæc argumentationes conjungunt, quas, Deo adjuvante, duobus seqq. cap. dissolvemus.*

I. Enim dicimus, Angelorum custodum, omnia ministeria, Sacerdotes & Episcopos obire, nullum scilicet genus esse functionis Angelicæ custodiæ, quod non Sacerdotes obeant. longâ enumeratione id probare, haud difficilè, vide cap. 4. quæst. seq. cujus & nullam partem negant recentiores, sed solum, non tantundem posse,

posse, sacerdotis, quantum Angeli custodis, in eo genere, operationem; quod an verum sit, mox discutiemus. Sed etsi verum esset, non obstaret, quin verâ esset ista propositio, nullum esse genus actionis, Angelicæ custodiæ, quod non suo modo, esto imperfectiori, sacerdos defungatur.

Atque adeo Sacerdotii prærogativam maximam esse, quòd non omnes actiones Sacerdotales possint in Angelum custodem cadere: non enim potest ordinariè baptizare, non sacrificare, non à peccatis absolvere: quæ tamen actiones nobilissimæ sunt, & præstantissimæ, quæcunque autem potest Angelus custos; ea possit sive perfectius, sive imperfectius sacerdos, sed & perfectius aliquas saltem earum posse, mox docebimus.

Exinde verò colligi nequit, Angelo custode non opus esse: sicut nec ex eo, quòd Episcopi, omnia Presbyterorum & Diaconorum munia obire possunt, non sequitur, Presbyteros & Diaconos inutiles esse, maximè verò cùm non eodem modo, sed diversis, quod efficit sacerdos, efficiat Angelus, & unius opera, alterius operam juvet: nam v. g. per aquam benedictam, & alia sacramentalia, sacerdos pericula ab homine avertit, in quæ Deus aliàs hominem permisisset incidere, nec ab Angelo custode præpediri voluisset: immo & quòd Ange-

lus custos ea avertat, & divinæ permissio-
nis, & Ecclesiasticæ benedictionis, per
sacerdotem factæ, nonnunquam effectus
est, ut Catholica credit Ecclesia.

II. Excitat Angelus hominem ad bo-
num, commotione humorum, & specie-
rum in phantasia delitescentium: id Sa-
cerdos & sæpius & efficacius facit, à quo
nempe, benè agendi rationem, enuclea-
tius, & distinctius edocemur, cujus objur-
gatio, & increpatio, magis sensum ferit,
pudorem majorem incutit, majori cum
imperio fit, putà vice Christi, cujus loco
sacerdos præsidet, cui proinde Christus
gratiam suam sæpius adnexuit.

III. Et Dæmones coërcent Sacerdotes,
atque exorcismis abigunt, eo mirabilius,
quòd non virtute naturali, non qualitate
aliqua impressa, sed sola Christi invocatio-
ne, & verbo, id præstent, eoque potentiùs,
quòd sæpius executores suæ jussionis ha-
beant bonos Angelos, aliquando etiam
Deum ipsum.

IV. Orationes deferunt Sacerdotes, &
orant, quæ duo, in iis, Chrysolog. distin-
guit, sicut & in Angelis, Serm. 26. iis ver-
bis, *Versatur inter altaria semper, peccato-
rum causas, & dolores populi suscipit, fert, of-
fert, ingerit preces, accipit, refert, restituit
impetrata, ex homine, totus in Angelum, sub-
stitutus.* Quæ etiam duo distinguere videtur.

Aug.

Aug. Epist. 120. ad Honorat. 121. ad Prob. & lib. de Dilig. Deo, ut scilicet offerre Deo orationes, sit Deum super nostris precibus consulere, & quod super hoc faciendum sit, vel evidenter, vel latenter reportare: orare verò sit petere.

Orationes verò nostras Sacerdotes offerunt, suasque non petitiones, ut Angeli, sed Christi satisfactiones, & merita, quorum dispensatores constituti imò & Christum ipsum, qui exauditur à patre, pro sua reverentia, offerunt, atque adeo longè exaudibiliores nostras preces faciunt, & à Deo potentiùs, quæ volunt, exorant, quàm Angeli; quia non suâ vi, sed Christi meritis sibi ad applicandum commissis, ad impetrandum in sacrificio, & sacramentis, nituntur.

VI. Nec dubium est, quin poena spiritualis, quæ animam ipsam attingit, major sit & præstantior, corporali quacunque punitione, ut ostendit Chrys. lib. 3. de Sacerd. c. 5. Hom. 5. in Isaiam, & Hom. 8. in Act. Angeli tamen corporaliter tantum puniendi vim habent; vinculum autem Sacerdotale, etiam animam constringit. Ideoque & puniendi officio, Sacerdotes perfruuntur, & nobiliùs quidem quàm Angeli ipsi, nostri custodes, eodem potiuntur.

Episcopos, dico, immediatè à Deo, non-

nun-

nunquam illuminari , quemadmodum Apostolos à Christo , quibus nempe Episcopis , Apostolicum istud proferre licet , *visum est Spiritui S.* Audet id quis negare , qui se Catholicum dicit ? quòd negare non potest , nisi Conciliorum Ecclesiæ , cum novatoribus nostris , auctoritatem infirmet , quam PP. quam Theologi DD. admittunt : audet id negare , quod non solum , allatus Scripturæ S. textus , Act. 15. in quo Conciliorum forma , & auctoritas elucet , probat , verum & alia Scripturæ S. testimonia confirmant ? Quæ scilicet de illuminatione Episcoporum , in conciliis , ab ipso Christo , & Spiritu S. PP. interpretati sunt , cujusmodi sunt ista ; *Ecce ego vobiscum sum , omnibus diebus , usque ad consummationem seculi , Math. 28. Paracletus autem Spiritus S. quem mittet Pater in nomine meo , ille vos decebit omnia , quæcunque dixerò vobis , Joan. 14. Cum venerit paracletus quem ego mittam vobis à Patre , Spiritum veritatis , qui à Patre procedit , ille testimonium perhibebit de me , Joan. 15. Cum autem venerit , Spiritus ille veritatis , docebit vos omnem veritatem , cap. seq.*

Quæ omnia promissa , Ecclesia Catholica , non solum ad Apostolos , verum etiam ad successores eorum , pertinere censuit. Tu autem neoterice , ad successores pertinere negas , contra Ecclesiæ sensum , quæ
immo-

immediatè Spiritum S. conciliorum Patri-
bus adesse, & divino lumine, ipsis prælu-
cere, ne errorem definiant, credidit, & ex
iis locis eruit. Tu verò, spretâ istâ Episco-
porum, in conciliis prærogativâ, sine quâ,
conciliorum etiam generalium, & summi
Pontificis veracitas, periclitatur, quâ subla-
tâ, Moyse, & 70. senioribus, quibus de spi-
ritu Moyſis, Deus per seipsum communi-
casse legitur, longè inferiores nostros anti-
stites statuis, eamque prærogativam ordi-
nariam, ac promissione certam, indubita-
tam, transfers ad extraordinarium quod-
dam beneficium, quo *hominum electi* qui-
dam, id est, si mentem tuam capio, mona-
chi, *prout Deo visum*, immediatè à Deo
sunt illuminati.

In quo à Calv. & Luth. in eo solùm di-
sentis, quod singulos illos fideles, & præ-
destinatos, *ἐκλεκτοὺς*, putent, Tu electos
quosdam, & Hierarchiæ fictitiæ Charisma-
tum primores: in eo verò consentis, quòd
Spiritum à Deo, sacerdotibus promissum,
ad Ecclesiæ ædificationem, & perennita-
tem, contra Divina oracula adimis: Tu
iniquior, qui, quod Sacerdotibus universis,
ex singulari Sacerdotii prærogativa, pro-
missum est, ut ad quosdam monachos
transferas, quos contemplatione, cæteris
præcellere asseris, beneficium paucorum,
verè gratuitum facis, quod in favorem
Eccle-

Ecclesiæ promissum est. Quo errore, nullus Ecclesiæ capitalior esse potest, utpote qui totius Ecclesiasticæ gubernationis formam, & definitionis certitudinem convellat.

Ita ergo cæcutit quis, ut non videat, se, ita sentientem, hæresim docere, & in transfugarum, ab Ecclesia Catholica, castris militare? Obstrepit tamen, & quæ, cum Catholicis dico, si vera sunt, non esse opus Angelica custodia, fremit. Itane, unum fidei dogma, ab alio destrui, putas? Quid leves istas consecutiones, adversum consentientem Ecclesiæ doctrinam, contextis? redi ad Ecclesiam Catholicam, quæ istorum dogmatum consensum docebit.

C A P. XVI.

*Angeli illuminantur, à Pastoribus
Ecclesiæ.*

Reprehenditur etiam sed immeritò, quòd ordinariè docetur, Angelos custodes, utpote ex infima Angelica Hierarchia, selectos, non immediatè à Deo edoceri, sed Angelorum superiorum ministerio. Ita Dionys. c. 3. cæl. Hier. Athan. lib. de comm. Ess. Damasc. lib. 2. de fid. c. 3. Bern. de confid. lib. 3. c. 4. & alii. Affertur & exemplum ex Scripturis, Angelorum

rum Perfarum & Judæorum, quos inter se altercantes, Michaëlis superioris Angeli ministerio, de Dei voluntate certiores factos, ex c. 11. Dan. discimus.

Nec dubium etiam est, quin sano sensu dici quoque potest, Angelos, *quoad aliqua*, à Pastoribus Ecclesiæ illuminari: tum quòd secundum plurimos PP. & interpretes, fundamentum hoc habeat, in S. Paulo, Epist. ad Ephes. c. 3. *Sibi datum esse, scribenti, in gentibus Euangelizare investigabiles divitias Christi, & illuminare omnes, quæ sit dispensatio sacramenti absconditi, à sæculis, in Deo, qui omnia creavit, ut innotescat Principatibus, & Potestatibus cælestibus, per Ecclesiam, multiformis sapientia Dei.* Tum quòd id ipsum asseratur, ab Orig. Hom. 23. in Luc. Chrys. Præf. Hom. in Joan. & Hom. 4. contra Anom. Hier. in c. 3. ad Ephes. Theod. in Dial. qui inscribitur immut. Sedul. in Collect. hujus loc. Haim. in eund. loc. Mag. sent. lib. 2. d. 11. & aliis.

Unicum proferam S. Chrys. qui prædicto in Euang. Joan. Prol. de Joan. loquens, cujus sapientiam supernæ virtutes admirantur, hæc habet, *Nihil enim nobis humanum, sed à Spiritus S. profundis, & abditis thesauris, omnia proloquitur, quæ neque Angeli priusquam hic diceret, noverunt: namque & ipsi nobiscum, per Ioannis vocem, & per nos didicerunt, quæ cognovimus; quod beatus etiam*

etiam Paulus, iis verbis significavit, ut innotescat nunc Principatibus Cælestibus per Ecclesiam, multiformis sapientia Dei, si igitur Principatus, & Potestates, Cherubimque, ac Seraphim, hæc per Ecclesiam didicerunt, planè constat, ipsos Angelos, summâ cum attentione, ejus sese auditores exhibuisse. Quippe idcirco non parùm honoris consequimur, quòd nobiscum Angeli didicerint, quæ nesciebant. Quòd autem per nos, longè magis honoramur: sed per quos, vel quales nostrum nondum diximus.

Idem quoque Orat. 4. contra Anom. seu de incompreh. Dei nat. non longè ab init. fusè hoc probandum suscipit, eodemque Apost. testimonio, comprobatur.

Scio, varios alios sensus loci Apostol. tradi posse, Greg. Nyss. Hom. 8. in Cant. OEcum. in eum loc. sed clariùs D. Thom. & alii recentiores in eund. non per Ecclesiam, tanquam docentem, instructos Angelos, sed in ea, tanquam in objecto, nova vidisse Angelos, multiformis sapientiæ Dei effecta, quæ prævidere non poterant. In quem etiam sensum Hier. & Sedul. trahi possunt.

Primas. verò, cujus etiam explicationem probat Sedul. per *Principatus & Potestates*, eos intelligit, qui rebus Cælestibus, donisque, per Ecclesiam principantur. Ambrosiaster secutus etiam Orig. lib. 1. Periarch.

c. 6. & alii de malis Angelis, id ipsum exponunt; sed erroneè hoc adungere visi, Orig. & Ambros. quòd Ecclesiæ prædicationibus, quidam ex dæmonibus convertantur, quod additamentum Ecclesia reprobatur.

Aug. lib. 5. de Gen. ad litt. c. 19. cujus testimonium colligit Beda comment. in dictum loc. ad Ephes. subtiliùs, & mysterium incarnationis absconditum, à sæculis, in Deo, exponit, *quia omnis creatura, non ante sæcula, sed à sæculis, ea per Ecclesiam innotuisse, affirmat, quia ibi primitùs Ecclesia, quo post resurrectionem, & ista Ecclesia congreganda est, ut simus æquales Angelis Dei.*

Hæc ergo veritatis studio profero, non simpliciter assero, Angelos illuminari ab Ecclesiæ Pastoribus, sed tanquam opinionem probabilem, id assero iis verbis, *Angelos quoad aliqua, à Pastoribus Ecclesiæ illuminari*: quòd proinde, nec universim, nec simpliciter, nec certò affirmamus, sed cum restrictione & dubitatione; nec tam ad astruendam prærogativam Pastorum, quàm ad prærogativam Angelorum, ex opinione probabili, infirmendam.

Concludit iterum recentiorum nonnemo, dicens, *Atque ut hîc desinant, quòd jam iterum, materiâ cogente, retractò, mihi persuadere non possum, in tantam confidentiam venisse*

venisse Sacerdotem, aut Episcopum ullum quantum isti efficere volunt, ut se Angelum absolute præferant, sibi operam Angelorum, necessariam esse, denegent, à se Angelos, non ab Angelis illuminari prædicent, Sacerdotes se, quàm Angelos esse, malint.

Conclusio ista scopum non tangit; neque enim Sacerdotem absolute Angelo prætulimus, sed Sacerdotium, custodiæ Angelicæ officiis; nemo nostrum, operam Angelorum sibi necessariam non esse, persuadere conatur; sed opera sacerdotis, quâ Christi merita, & satisfactiones, nobis applicantur, magis necessaria cuique, quàm sit Angelica custodia; nemo non se ab Angelis illuminari, fatetur, sed & potentius, & frequentius, & distinctius, & utilius, à Sacerdote, homines illuminari solere, sine quo scilicet nemo credere potest, ad Rom. 10. quàm ab Angelo custode.

Denique Sacerdotium non desinet esse nobilius, Angelicæ custodiæ officiis, quamvis ob statum beatitudinis, quo fruitur Angelus, de quo obtinendo securus non est sacerdos, rari sint, qui non se Angelos esse malint, quàm sacerdotes.

Egregium tamen est, quod huic voto contrarium, edocere videtur, vetus auctor, de visitat. infirmor. inter opera Aug. Tom. 9. c. 2. iis verbis: *Plus debet mihi Christus quàm alicui Cælestium. Quod tu es fieri digna-*

tus, est Deus, non factus est, quod Angelus, etsi sit magni consilii Angelus; te exaltavit super Angelos, tu enim judicabis Angelos. Nolle habere locum Angeli, si possem habere locum debitum homini. Ad curiam Dei sui, Dei tui præcessit, Deus tuus, homo tuus, &c. Non jam ab Angelis minoratus, imò gloriâ & honore coronatus, & super opera manuum Dei constitutus. Quem igitur habes intercessorem, habeas mediatorem: constitue tibi proprium adiutorem, & si Deus pro te, quis contra te?

Addo etiam, votum istud, quo aliquis hominum, malit esse Angelus, quàm Sacerdos, imprudentis votum esse; id siquidem prudenter duntaxat cupere debemus, quòd esse possumus, at Angeli esse non possumus, sed similes Angelis Dei; contendere itaque oportet, ut iis similes simus, quibus utique maximè similes evadimus, si Sacerdotio ritè fungamur; sacerdos enim bonus, *Angelus Domini exercituum est*, Mal. 2. Angeli officium habet: imò plusquam Angeli officium, in quo, quia animas potentius Deo lucrari potest, quàm Angelus, quis dubitet, quin sancti isti viri, qui Deum magis, quàm seipsum amant, malint ad majorem gloriam Dei, magis promovendam, Sacerdotio ritè fungi, quàm Angelicâ gloriâ ampliori, illicò donari? Nunc aliqui errores perlustrandi.

C A P. XVII.

1. *Error, quem ad probandam prærogativam Angelorum, supra Sacerdotes, invehunt, putà, ex nullo capite, Hierarchicis actionibus, hominem Angelo æquiparari posse.*

QUoniam igitur non potest veritati, nisi falsitas, esse contraria, nec falsitas, nisi falsitate defendi, nec veritas errori, unquam patrocinio esse potuit: ideo, eos, qui auctores, officia Angelicæ custodiæ, Sacerdotii functionibus, postponentes, reprehendunt, in aliquos necessariò errores, impingere oportuit.

Ubi imprimis, non est dubitandum, quin Sacerdotium, simpliciter, Angelicæ custodiæ officiis, præponendum, secundum quid tamen, Angelica custodia, inferius esse, dici posse. Nulla enim ferè res est, simpliciter aliâ, longè nobilior, quin secundum quid, eadem ignobilior videri possit. Unde & Angelum, non simpliciter, sed secundum quid, actionibus Hierarchicis, hominem antecellere, non est negandum; nihil etiam nos aliud intendimus, quàm actiones Hierarchicas Angeli, Sacerdotalibus simpliciter esse ignobiliores, sed secundum quid nobiliores, in quantum

quantum, officia ea nobis exhibet Angelus, quibus nulla tantæ necessitatis, ipsi rependimus: in quantum etiam, ab Angelo, superiori in ordine constituto, & in ordinationi longè Republicâ, meliori & beatorum; quàm nostra sit, collocato, functiones istæ proficiscuntur.

Sed longè aliter loqui videntur recentiores: quamobrem simpliciter ita concludunt, *Quare actionibus Hierarchicis, hominem Angelus antecellit.* Et paulò post, *Quapropter nullo ex capite, meo quidem iudicio, non superat Ecclesiasticam Hierarchiam Cælestis seu Angelica.* Sibi tamen contradicunt, dum manifestè, sacrificium excipiunt, quo sacerdos superior sit Angelo; ac proinde aliquo capite superiorem fatentur, quem ex nullo superiorem dixerant. Et his similia, libros eorum examinanti, facilè occurrunt.

Refellitur autem hic error, tum ex prædictis supra copiosè; tum ex ista eorum concessione, quòd sacrificium semper excipiant, dum de prærogativa Angeli & sacerdotis agitur; nam hujus exceptionis nullus alius sensus esse potest, quàm sacrificium, præstantiorem esse functionem, quàm sit ulla Hierarchica functio Angeli: ex qua proinde propositione concessa, sic argumentor: simpliciter eorum actio Hierarchica præcellit, quorum præstantissima

P

tissima functio Hierarchica, aliorum præstantissimæ functioni præponenda est: nam in comparatione duorum, quod præstantissimum sit in unoquoque genere, cum præstantissimo, in alio conferri solet; atqui præstantissima functio Sacerdotii, puta sacrificium, nobilior est, qualibet præstantissimâ functione Hierarchicâ Angeli, & adversarii fatentur, & PP. super. cit. docuerunt, igitur simpliciter sacerdos, Hierarchicis functionibus, Angelum antecellit.

II. Sicut æquè ad sacrificium Sacerdotis concurrit Angelus, atque ad sacramenta, quæ à sacerdote conficiuntur, perinde quoque extinctio culpæ, ac reconciliatio hominis cum Deo, in Baptismo, & in sacramento Poenitentiae, collatio plenitudinis Spiritus S. in sacramento Confirmationis, infusio gratiæ, in omnibus sacramentis, præcellunt quibuslibet actionibus Hierarchicis Angeli, ac sacrificium ipsum præcellat, ut super. prolaturum est; ac proinde, nulla est ratio, cur potius excipiat ab adversariis, sacrificium, quàm sacramentorum administratio.

Confirmatur hæc probatio, quia nimirum functio Angeli Hierarchica, non potest ulla fingi, nisi aliorum respectu, non sui ipsius, neque enim seipsum Angelus beatus, aut purgat, aut illuminat, aut perficit,

cit, sed alios duntaxat inferiores, à quibus nescientiam tollit, divinitus sibi revelata communicans : atqui eæ tantum sunt actiones Hierarchicæ, purgatio, illuminatio, & perfectio, ex Dionys. Maxim. & aliis, ideoque nonnisi in ordine ad alios, functiones Hierarchicæ admittendæ sunt. Quæ causa est, ut iidem ipsi recentiores, post iudicii diem, fateantur, *Hierarchias Angelicas non fore, quoad officia illa, & actiones, quæ in prioribus statibus habentur.*

Hoc verò supposito, certè sine errore dici nequit, quòd ignobiliores sint, actio consecratoria corporis, & sanguinis Christi, actio, quâ perfunditur animâ, gratiâ sanctificante, itemque fide, spe, & charitate, quæ necessariò cum gratia sanctificante infunditur, quâ anima donatur charactere Sacerdotali, aliisque ornamentis perficitur, actione quavis, quâ superior Angelus inferiorem, de rebus ad suam salutem, & beatitudinem, minimè pertinentibus, instruit. Neque enim, siue dignitatem objectorum spectes, siue necessitatem actionis, siue effectuum dignitatem, actio superioris Angelis, in inferiores, prædictis æquiparari ullo modo potest ; multoque mallet Angelus inferior, si charitatis vacuus esset & gratiæ, charitatem recipere, aut gratiam, quàm recipit homo, ministerio sacerdotis, quàm ignotas sibi providentiæ divinæ, circa

homines revelationes, quas solum ministerio superiorum Angelorum edocetur, suscipere.

Nec sine blasphemia, & contemptu divinissimæ unionis, cum Christi corpore, & sanguine, in Eucharistia, sine despicientia mysteriorum, necessariorum ad salutem, quæ objecta aliquando futura sunt nostræ salutis, quorum cognitione imbuimur à Sacerdote, & fidem recipimus, per sacramenta, sacerdotis ministerio collata; sine spei felicitatis æternæ contemptu, cujus habitum infundit sacerdos; sine neglectu sacerdotalis potestatis, quam ministerio Episcoporum recipimus; ac tandem sine contemptione Divinæ gratiæ, quæ nos Divinæ naturæ participes facit, præferri potest revelatio quorundam, quæ circa homines contingunt, iis omnibus, quæ à nobis enumerata, sacerdotum ministerio obveniunt. Ac proinde propositio ista, quòd *actionibus Hierarchicis, Angelus hominem simpliciter antecellat*, cum errore, & contemptu rerum divinissimarum conjungitur.

C A P. XVIII.

Prosecutio præced. Cap.

NEc nos movet, quòd Hierarchia Angelica sit superior, & archetypus nostræ;

nostræ ; quòd Angelica sit in termino, nostra in via, à qua sæpe aberrat ; nam hoc magis Dei, erga Ecclesiam suam, bonitatem commendat, quòd in inferiori Hierarchia hominum, ex qua, non ex cælesti, nasci voluit, similiter aliquos voluerit, potestate Hierarchicarum actionum nobilissimarum præditos esse.

Item Hierarchia quidem Angelica, ratione scientiæ perfectissimæ, constantiæ in bono indeficientis, ordinationis perfectissimæ, symphoniciæ, ac consensionis inter omnes ordines, & ordinum inter Angelos mirabilis, nostræ archetypus constituta est, & ita summa gloria hominum fuerit, si eas dotes, pro modulo suo, exprimere conentur, utpote qui in inferiori statu, conditione longè mutabiliore, & inordinatâ magis societate versentur : nihilominus hoc non impedit, quo minùs in hac turbata Ecclesiastica societate, & imperfecta, perfectiores esse voluerit, Hierarchicas actiones, quæ non imitentur, Angelicæ operationis modum, sed Christi solius, Pontificis, & Hierarchæ à Deo Patre, constituti, quales esse Sacerdotes functiones, superiùs docuimus.

Denique, quòd Hierarchia Angelica in termino sit, jamque beata, actionum sacerdotis Hierarchicarum nobilitati, non derogat, quin potius hinc factum est, ut

actiones, quas unus Angelus circa alium exercet, minùs ad æternæ vitæ felicitatem conferant, quàm conferant illæ, quæ in Hierarchia inferiori, exercentur à Sacerdotibus. Hinc fit, ut quia Christus caput nostrum, frater noster, quoad humanitatem, morte suâ redemit genus humanum, ideo ex eodem genere, quosdam esse voluerit, veluti servatores cæterorum, qui pretium redemptionis nostræ, ab ipso persolutæ, expendere, & aliis applicarent: quales inter Angelos nulli.

Atque ita contingit, ut quia actiones istæ, quæ semen æternæ vitæ conferunt, & pretium nostræ salutis applicant, longè superiores sunt, iis functionibus, quibus ii, qui beati sunt, demum exornari possunt; actiones Hierarchicæ hominum, circa alios, actionibus Hierarchicis Angelorum, circa socios suos, dignitate inferiores existant.

C A P. XIX.

Alter error, in depressionem virtutis Sacramentalium; ipsorumque Exorcistarum; itemque prædicationis verbi Dei, factæ hominibus; & precum à Sacerdotibus fusarum.

EX eodem contemptu, & ignorantia Divinorum mysteriorum, adversarii,
&

& ista effutiunt, Potius autem, ut credas, aquam à Sacerdote benedictam, tantundem posse, ad averruncanda mala, quàm Angelum? Sacerdotum adhortatione, virtutis studium, & amorem, æquè in nobis excitari, ut Angelicâ illuminatione, vel phantasiâ pervadente? non potentiùs dæmonum vim, & importunitatem, à nobis abigi, Angelicâ virtute, quàm Exorcistarum ministerio; efficaciores esse apud Deum, Sacerdotis preces pro populo, quàm Angeli pro cliente?

Porro eadem periculosius scribunt, ut non solum, opera ista humana, minùs efficacia, sed nullatenus efficacia esse, docere videantur; ita enim loquuntur, Quis enim credat docenti, nos à periculis liberari, per sacramentalia, per Sacerdotes confecta; ad bonum excitari, & revocari à malo, per Sacerdotum exhortationes; dæmones coërceri, per Exorcistarum ministerium, æquè perfectè, ut per Angelorum custodiam?

Non cogitas bone vir, aquæ benedictæ vim, à Christo tribui, juxta quod, ex ritualibus Græcorum libris, in Hagiasmo, seu ritu aquæ benedictæ scribitur, *Gratia spiritus, fideliter haurientibus, invisibiliter conceditur à Christo Deo, & Salvatore animarum nostrarum.*

Eam ergo vim Angelicam, cum Sacerdotali, conferre te putas? Christum cum Angelis componis: idem facis, dum Exorcistarum

cistarum vim elevas, ut Angeli potestatem præferas: parum enim esset, si Exorcistarum ministerium, solitariè à Christo deprimeres, sed quoniam illud ministerium, nisi in nomine Christi, non exhibetur, *cujus vim nominis, daemones perhorrescunt*, ut ait Justin. Dial. contra Tryphon. quod confirmat, q. 40. ad Gent. quoniam vim huic ministerio; præstat solus Christus, eamque potestatem, hominibus concessam, *Imperabilem, & summi Dei potestatem, quæ interdum sanctis conceditur, ut imperent infirmis potestatibus*, vocat Aug. lib. 83. qq. q. 79. qui etiam ibidem, Exorcismos, *signa publicæ justitiæ*, appellat, *quæ efficaciam habeant, propter honorem, excellentissimi Imperatoris*, quantumvis à malis, vel scismaticis assumantur.

Ideo qui Exorcistarum virtutem deprimit, Christi deprimit. Tu verò, vir docte, vim istam Christi Dei, virtuti Angelorum, tanquam ignobiliorem, eo solùm titulo subjicis, quòd per homines transfundatur: quasi verò, indignitas instrumenti, Dei dona, virtutemque, vitiare, aut viliorē facere possit.

In comparatione verò exhortationum, Sacerdotis & Angeli, ac generatim doctrinæ ab utròque traditæ, non cogitas, legi in Scripturis SS. de hominibus, *quomodo credent sine prædicante homine?* non legi, quo-

quomodo credent, sine illuminante Angelo: non cogitas parum ad fidem, & morum conversionem valere, aut exhortationem Sacerdotis docentis, aut illuminationem Angeli, phantasiâ pervadentis? solam Christi gratiam, ad assensum fidei operari, tollere à nobis *cor lapideum*, & dare *cor carneum*: Providentiæ tamen Divinæ conformiùs esse, ut homines, per homines, Christi vicarios salvet, quàm per Angelos: tum, ut Christi vis, & auctoritas, magis in nostra conversione eluceat; tum ut humilitatis, & obedientiæ discipulis, charitatis verò exercendæ docentibus, fovendæque strictiùs humanæ societatis, occasiones utrisque præbeantur. Ideoque legimus, Act. 10. ad Cornelium, Angelum missum, non qui eum docerèt, sed qui S. Petrum, à quo doceretur, accersendum moneret.

Angelos, non dubium est, in nostra conversione concurrere, sed cùm nihil in intellectum cadat, secundùm ordinem naturæ, quòd non priùs in sensum incurrerit, ordinariè verò Angeli, exterioribus signis, nos nequaquam moveant; visiones enim Angelorum, & auditio vocis, ab iis productæ, inter extraordinaria Divinæ providentiæ miracula numerantur; hinc fit, ut ut Angeli, speciebus ab hominibus immixtis, solummodo uti soleant; ac proinde

minor, in hominibus instruendis, & illuminandis, eorum fit opera, quàm hominum: Deo ita res omnes, secundùm ordinem naturæ convenientiorem, disponente.

Addit alias rationes, Chryf. ferm. 40. de Laud. S. Paul. prope fin. Tom. 5. iis verbis, *Cujus autem rei gratiâ, non Angelis potiùs, hæc prædicationis cura commissâ est? ut nulum scilicet excusationis colorem, de se inveniret anima negligens, ac metu ad diversitatem naturæ confugeret, dormiendo. Deinde ut tanto etiam major, operum admiratio nasceretur, quando de natura inferiore procederent. Quomodo enim non admirabile hoc atque improvisum videretur, cum ex terrena lingua, sermo proficiens mortem fugat, peccata dissolvit, tenebras cæcitatatis illuminat, & mutatione mirificâ, terram convertit in cælum.*

Denique parum attendis, Sacerdotum, pro populo sibi commisso, preces, non esse à sacrificio Christi, non ab ejus satisfactionibus, & meritis, removendas; Christum esse, qui, ut ait Claudian. Mamert. lib. 1. de stat. anim. c. 2. *Principaliter apud Divinitatem summæ Trinitatis, humani generis oblata sanctificat, peccata expiat, vota commendat.* Eoque proinde potentiores esse sacerdotis preces, quæ & Christi intercessionem habent adjunctam, merita Christi offerunt, satisfactiones applicant; quo scilicet potentiora

tiora sunt, minúsque repelli possunt, Christi merita, preces & satisfactiones; merita quæ offeruntur; preces, quibus nostræ, ex institutione sua, innituntur; satisfactiones, quæ per Ecclesiæ auctoritatem applicantur.

Quòd ergo Angelorum preces, pro cliente, absolutè precibus Sacerdotum præponis, non in Angelorum honorem, sed in Christi contemptum cedit, hic enim per Sacerdotem, suum corpus & sanguinem offert Deo Patri, hic Ecclesiæ publicis precibus, dignitatem & valorem, suis precibus & meritis, adjunxit, sacerdotemque suarum satisfactionum & meritorum dispensatorem fecit, non Angelos custodes: atque ita, dum custodis Angeli officia, tibi videris extollere, Christi deprimis.

C A P. XX.

Alii errores, injuriam gratiæ Christi, prædicationi verbi Dei, & ministerio legis Evangelicæ inferentes.

ORiuntur ex iisdem fontibus illæ propositiones, quas gratis, & absque fundamento proferunt. Primam, quidem his verbis, *Et facit quantumcunque aurem feriat Apostolicis concinator, nisi sensus interiores*
P 6. *disponat*

disponat Angelus, non plus proderit, quàm æs sonans, & cymbalum tinniens.

Alteram, Deinde per eos (Angelos) à Sacerdotibus nostris, Hierarchicas actiones fieri (sic enim lubet Pachimer, interpretari) quasi illis præsideant, & omnia rectè, perfectèque confici, procurent; nam Sacerdos, v. g. ut baptizet infantem, non tantùm externo motu, aquam debet aspergere, & mystica quædam verba loqui: sed etiam ad hanc actionem, ejus phantasia debet concurrere, ut prudens loquatur, ut id intendat facere, quod Catholica facit Ecclesia, hominis autem phantasiam, ut propriam quandam Provinciam, ab Angelo gubernari, jam ante dixim. Quod si hac decoratum à Deo prærogativâ, magnum Eliam sibi persuaferunt, Hebræi DD. ut nullus, eo absente, circumcidatur infans, eamque ob rem, in ejus sacramenti apparatu, duas ornent sedes, alteram circumcisionem peracturo; alteram, Eliæ sub aspectum non cadenti. Quanto potiori jure, id in sacramentis nostris, Angelicæ custodiæ, & Hierarchico officio, debitum esse, putabimus.

Cui propositioni omninò affinis est, & alia: Addo denique, quòd maximè in hac causa, Majestati favet Angelorum, & non ipsos, absque illorum opera, & pænè dixi labore, his præsidiiis uti non posse, ita disponente Deo, ut comministri sint nostri, operum duces, & perpetui, in sanctissimis illis mysteriis, adjutores, ut seq. libro videbimus.

Qua-

Quarum propositionum scopus est, ostendere, nec posse concionatorem, quemquam ad Deum adducere, nisi Angelicâ operâ, auditores, ad assentiendum concionatori, moveantur; nec posse quemquam, aut Baptizare, aut sacramentum quodvis conficere, nisi phantasia ejus, ab Angelo ad proferenda verba, & applicandam, juxta ritum Ecclesiæ, materiam, moveatur. Ne utrum autem in Scripturis, aut in PP. fundamentum habet, in quibus tamen veritas tanti momenti, fundari deberet.

Et sanè miror, viros, qui tam acriter, tam audacter defenditis, necessariam Dei gratiam non esse, ut bonum opus morale, omni ex parte perfectum, ab homine efficiatur, jam operam Angeli necessariam esse, ad sacramentalia verba proferenda, juxta intentionem Ecclesiæ, etiam absque fide, ac bono proposito (nam ministrum sacramentorum, aut fide, aut bonâ voluntate præditum esse, ad validam sacramenti collationem, & suscipienti fructuosam, necessum non est, secundum Ecclesiæ Catholicæ, adversus Donatistas, definitionem) tam audacter, tam temerè pronuntiat.

Nec advertitis, dum dicitis, *Quantumcunque aurem feriat Apostolicus concionator, nisi sensus interiores disponat Angelus, non plus*

profectorum, quàm æs sonans, aut cymbalum tinniens. Et iterum clariùs, Cùm sine Angelica opera, Sacerdos hominem non iustificet; imò sæpe Angeli soli, obices omnes, qui difficultatem creant, tollere soleant. Hos effectus, gratiæ proprios, vos Angelis tribuere. At verò è contrario, S. Aug. Tract. 3. & 4. in Epist. 1. Joan. & alibi passim infinitis ferè locis, effectum proprium Divinæ, ac medicinalis Christi gratiæ, (adversus cuius necessitatem, & efficaciam, non leviter excanduistis, & etiamnum excandescitis) esse docet, disponere sensus hominis, & omnes difficultates tollere, & obices, qui receptionem Euangelii præpediunt.

Inter illos autem obices, locum potissimum tenet cupiditas; dolorque carnalis, & voluptas terrena; hæc omnia, scilicet impedimenta, secundum vos, tollit Angelus, sensus interiores distinquendo, & ad justificationem præparando: cui ergo bono amplius Divina gratia? si difficultates omnes, obices omnes, qui justificationem impediunt, Angelicâ tolluntur operâ? si sensus interiores disponit Angelus? si ea suavitate eos repleat? ut quod de gratia, dixit Aug. lib. de Spir. & litt. c. 28. *Faciat plus delectare, quod præcipit, quàm delectare, quod impedit, hoc est, quodcunque bonum temporale, cuius delectatione peccamus.*

Pelagianus hic error est, in quem incauti inciditis.

inciditis. Catholica verò Ecclesia, in contrarium docet, frustra aut Angelum, aut hominem, exterius credenda, vel facienda, Christianæ legis opera proponere, nisi Deus interiùs suadeat; carnis adversarios insultus reprimat; obices, quos cupiditas nectit, justitiæ delectatione removeat: ubi verò propositum à Concionatore, fidei objectum fuerit, quantumvis ad credibilitatis, ut vocant, motiva proponenda, cooperari soleat Angelus, ab eo tamen actu, quamvis cessaverit, internam Spiritus S. motionem, & lumen sufficere, ut tenebræ omnes animi fugentur, & convictus, propositarum rerum veritate, animus, concionatori exterius prædicanti, assentiat, Deo interiùs perficiente assensum, & illuminante animum: atque adeo, si necessarius sit, Angeli, sensus interiores disponentis, concursus, (ut somniant) ad hoc, ut Apostolicus concionator, aliquid proficiat, non hominis exinde operæ detrahi, sed Divinæ gratiæ virtuti derogari.

Neque nos, Angelicæ illuminationi detrahimus, quam & libenter agnoscimus, & summoperè commendamus; sed eam adeo necessariam esse, ut positâ prædicatione verbi Dei, nequeat gratia Divina incredulitatis obicem, & difficultates, acceptandæ fidei repugantes, perrumpere; sed præparandus omninò sit animus noster,
Ange-

Angelico ministerio, quo difficultates istæ, & impedimenta credendi superentur: hoc est, quod negamus; & quod, nulla Patris cujusquam auctoritate comprobatur.

C A P. XXI.

*Afferuntur nonnullæ auctoritates;
sed gratis.*

Proferunt quidem quasdam auctoritates, quibus Angelos, hominum doctores esse, probare contendunt; sed eæ, nequidem trahi possunt, ad eam, de quâ jam disputamus, propositionem probandam; præter Aug. fortasse, in Psal. 8. & D. Thom. q. 111. a. 1. ad 1. sententias, quas tamen à sensu Auctorum detorquere oportet, si propositionem istam, quam docent adversarii, ex iis eruere, aliquis contendat. Uterque, fateor quandam prærogativam, Angelorum illuminantium, supra homines agnovit: Sed non illicò necessum est, ut existimationem modernorum fallacem, amplexi sint.

Placet maximè opinio, Franc. Suaris, qui Tract. de Ang. lib. 6. c. 16. n. 24. secutus alios, quos laudat, prærogativam istam, illuminationis hominis ab Angelo, vel alio homine, in eo statuit, quòd *Angelus superiori virtute, & majori acumine mentis,*
possit

possit docere, quàm homo; majorem efficaciam habeat, circa ordinationem, & applicationem phantasmatum, quàm homo. Ipsaque phantasmata, ab Angelo excitata, & subtiliora reddat, & iis melius ordinatis, vim intellectus nostri adjuvet & confortet. In eoque, tam ex mente S. Aug. quàm D. Thom. præferri, dico, illuminationem hominis, ab Angelo, illuminationi hominis, ab homine, quod hæc exterior tantum fit, meraque objecti propositio, nullam vim conferat audienti: illa verò interior, & quæ vim intellectus promoveat, qui utique intelligit ea, quæ defucatis magis, meliusque dispositis phantasmatis repræsentantur.

Non negant tamen, isti SS. DD. quin exterior ista propositio, simpliciter necessaria magis sit ad credendum, sed potius id expressè, ex Apost. docet S. Thom. nec ajunt, interiorē istam illuminationem, quæ fit interdum ab Angelo, simpliciter ad credendum necessariam esse, aut simpliciter exteriori, quæ fit ab homine, nobiliores: quinimò ita de humana loquuntur, ut & utilitate, & dignitate, præferri videatur Angelicæ, quæ circa homines ordinariè exercetur: tum quod illa, rerum nondum auditarum, aut sensu ullo perceptarum, notitiam omnium primam ingenerare possit; Hæc, rerum tantum,

tantum, quarum species in phantasia as-
servantur, notitiam refricare queat; ac
proinde prior, posteriori magis necessa-
ria, atque universalior videatur; tum
quod signis magis obscuris, & æquivo-
cis (cujusmodi in visionibus contingunt)
Angelus hominibus, Divinam voluntatem
patefacere soleat; homo verò, verbis usi-
tatis & notioribus, quibustitulis, nos su-
pra, illuminationem ab homine factam, al-
teri prætulimus.

Gratis quoque, & leviori fundamento
nixi, adeo imbecillam humanæ mentis
virtutem faciunt, ut nec verba sacramen-
talia, Sacerdos proferre, nec aqua infan-
tem abluere possit, absque ministerio
Angelico, quo phantasmata moveantur,
& excitentur; quasi verò, ad actus pec-
cati, in quibus plus doli, & ingenii re-
peritur, Angelos semper phantasiam
movere oporteat: quas actiones, si pro-
pria virtute exercere possumus, quidni
& prolationem verborum sacramenta-
lium, & ablutionem infantis, aquâ ele-
mentari? Quos actus materialiter nihil
habere supernaturale, contendunt ii-
dem auctores: quos etiam actus, ali-
quando malos esse, & ministri mali-
tiâ infici, remanente sacramenti va-
lore, & efficacia, Catholici omnes ad-
mittunt.

Ad

Ad hos actus, tam faciles, & naturæ captum, non excedentes, non necessariò, bonitate morali donatos, Angeli ministerium necessariò requirere, quis, si ratione polleat, audebit asserere? Quis rem adeo gravem, adeo momentosam, & ad hominum salutem spectantem, nullâ aliâ, quam ductâ, ex Rabinicis fabulis, inani conjecturâ, statuere præsumet?

Ejusdem vanitatis est ista, Angeli custodis prærogativa, supra Sacerdotem, quam unus è modernis, ita explicat, *Scio, illum Sacerdotem legatione ad Deum fungi, pro populo, sed in hoc officio (sacrificium semper excipio) Angelo seipsum inferiorem profiteatur; cum in venerando Missæ canone orat, sacrificia illibata perferri, per manus S. Angeli, in conspectu Divinæ Majestatis.*

In quibus verbis, præterquam, quòd contradictio inesse videtur, cum illud ipsum, in quo, inferiorem se Angelis, Sacerdotem profiteri, asserat, pars sit sacrificii; ac proinde, vel auctor sacrificium minimè excipere, vel in eo, de quo agitur, Sacerdotem inferiorem dicere, non debebat: quâ tamen donatâ, & remissâ libenter repugnantia, temerè, in oblatione sacrificii Missæ, Sacerdotem Angelo postponit, conjecturam ex iis verbis ducens, quæ non de Angelis, sed de

356 *Quæst. VII. Cap. 21. De præcell. Sc.*
de Christo, magni consilii Angelo, interpretantur, Alger. lib. 1. de sacram. corp. & sang. Dom. c. 14. Stephan. Eduens. de sacram. Alt. c. 17. & alii: quæque etsi de Angelis, sive custodibus, sive aliis, intelligantur, dignitatem Sacerdotis nihilo inferiore ostendunt.

Nam quòd Angelorum preces, nostris adjungi petimus, quas scimus nostris puriores, & sanctiores esse; quòd memoriam passionis, corporis & sanguinis Christi, ac meritorum ejus, ab Angelis, sanctiùs recoli, & Patri Divino, exhiberi petimus; non illud ostendit, in offerendo ipso corpore, & sanguine Domini, in sacrificium, & hostiam, Patri, cujus oblationis dignitas, omnes preces superat, non esse Sacerdotis, potiores partes, quàm Angeli, ut & alii auctores, videntur admittere.

QUÆ.

QUÆSTIO VIII.

Errores quorundam, Pastorum
& Sacerdotum, tribuentium
Angelis ; itemque Ecclesiam
invisibilem, sine Sacerdotibus,
& Pastoribus visibilibus, fin-
gentium, refelluntur.

C A P U T I.

*Angelos, non esse veros Pastores,
ostenditur.*

Non contenti nonnulli, Sacerdotii
functiones elevarē, easque Hie-
rarchicis functionibus Angelicis,
& custodiā Angelorum, longē
inferiores, docuisse, Hierarchiam Eccle-
siasticam, unico, quod ei contulit Christus,
privilegio, spoliare conantur statuentes
quædam, quæ ab hæresi, vix ullus, excu-
sare potest: nam i. verba ista S. Petri,
Pascite, qui in vobis est; gregem Angelis cu-
stodibus, æquē dicta esse, autumantes, sicut
Episcopis, & Angelos, earum animarum
Pastores

Pastores esse, quarum sunt custodes: probanti enim, Episcopos Angelis, quoad functiones, præferendos, ex eo, *Cui Angelorum dictum est, pascite, qui in vobis est, gregem Dei, sicut Episcopis dictum est?* Illi quæstioni, inquirunt, statim satisfacere potest quis, ex verbo Dei, *Illis Angelis, de quibus Psalmista ait, Psal. 90. Angelis suis mandavit de te, ut custodiant te, in omnibus viis tuis; nam quid est aliud, Angelos habere curam, custodiendarum ovium Dei, quàm Pastores earum esse?*

Unde Duas hæc propositiones, statuunt, *Officium, quo funguntur Angeli, in custodiendis animabus, idem esse, cum officio Pastoralis Episcoporum.* Alteram, *Officium custodiendarum animarum, quod Angelis convenit, præstantius esse, officio Episcopali:* quarum tamen priorem, ut Hæreticam; alteram, ut falsam, ac temerariam, & fortè erroneam, damnavit, facultas Theologica Parisiens. Et ne gratis hoc dixisse videar, solidè, utramque nostræ assert. partem confirmemus.

Primum ergo, Hæreticam esse, hanc propositionem, quod Angelis custodibus, pastorale Episcoporum munus, attribuerit, patet ex Scripturis; 1. Enim, in Scripturis SS. nonnisi hominibus dictum legimus, *Quorum remiseritis peccata, &c. Joan. 20. Hoc facite in meam commemorationem,*
Luc.

Luc. 22. &c. *Ite, baptizate, & docete, baptizantes eos, in nomine Patris, &c.*
Math. 28. De hominibus quoque dixit Apost. Jac. 5. *Infirmatur quis in vobis, adducat Presbyteros, &c.* Quibus tamen omnibus, Pastorale Episcoporum, & Presbyterorum officium, maximè continetur.

II. Paul. ad Ephes. 4. scribens, dicit, *Deum dedisse dona hominibus, mox ipse subdit, & ipse dedit, quosdam quidem Apostolos, quosdam autem Prophetas, alios verò Euangelistas, alios autem Pastores & DD. ad consummationem sanctorum, in ædificationem corporis Christi, quod est Ecclesia.* Quibus verbis, manifestè innuit, Pastores Ecclesiæ, homines esse debere, non alios:

III. Idem Paul. Epist. ad Hebr. 5. soli homini, Episcopatum attribuit, seu Pastoratum, qualis Episcopis convenit. *Omnis Pontifex, inquit, assumptus, in iis constituitur, quæ sunt ad Deum, ut offerat hostias, & sacrificia, pro peccatis.* Quibus verbis, conditionem ad Pontificatum exigit, ut Pontifex ex hominibus assumatur; cujus conditionis rationem reddit, ut ejusmodi Pontifex, *Condolere possit iis, qui ignorant & errant, quoniam & ipse circumdatus est infirmitate, quæ ratio Angelis congruere, ac convenire non potest.*

IV. Deinde conciliorum quoque testimoniis, eadem propositio, hæreseos convincitur:

vincitur : nam Conc. Flor. decr. Eug. dum, meminit, ministrorum cujuslibet sacramenti, Sacerdotum atque Episcoporum meminit, quorum postea ordinationem describit, quæ Angelis convenire nequit. Itaque cum pascendi officium præcipuum, sit, administratio sacramentorum; (pascunt enim Pastores, *verbo & sacramentis*, sed maximè sacramentis;) manifestè innuit Conc. Flor. nullos se agnoscere Pastores, præter homines, ritu in Ecclesia recepto, ordinatos, atque consecratos.

Idem fermè ex Trid. argumentum deduci potest, hujus Catholicæ veritatis statuendæ: quibus omnibus, si PP. testimonia, quæ certè sunt plurima; si Theologorum; si Christiani orbis consensum adjungas; non dubium est, quin ista propositio, sit articulus fidei, quòd verum Pastoris officium (quod nimirum, in *Verbi Divini prædicatione, & sacramentorum præsertim administratione*, consistit) solis hominibus conveniat; contrariâque propositio, quæ illud Angelis tribuit, sit hæretica.

C A P. II.

Officium custodiæ Angelicæ, officio Pastoralis, inferius esse.

QUamvis, quæst. præc. hac de re, copiosè egimus, non abs re tamen visum,

visum, quædam, memoriæ juvandæ gratiâ, & quia materia digna est, paulò compendiosius recolligere. Eadem igitur facilitate, ut credo, falsitatis, ac temeritatis, & fortè erroris, redarguetur ista propositio, quæ munus custodiendarum animarum, quo funguntur Angeli, Episcopali, aut Sacerdotali muneri, vel æquiparat, vel anteposit.

1. Enim certum est, muneris Episcoporum, ac Sacerdotum esse, remittere peccata, solvere per absolutionem, ligare per censuras, juxta illa Christi Domini verba, quæ legimus in Scripturis, *Quorum remiseritis peccata, remittuntur eis; & quorum retinueritis peccata, retenta sunt.* Item, *quæcunque ligaveritis super terram, erunt ligata & in Cælis; & quæcunque solveritis super terram, erunt soluta & in cælis;* eorumque muneris sit, per Baptismum, extremam Unctionem, aliâque sacramenta, gratiam infundere: imò etiam per Ordinationem, si de Episcopis sermo sit, juxta illud Pauli, *resuscita gratiam, quæ data est tibi, per impositionem manuum Presbyterii.*

At hoc officium quocunq; Angelicæ custodiæ officio, præstantius est: nam docent Theologi, (nec certè alia, Angelorum custodum officia, sine errore fingi possunt,) Angelicæ custodiæ, eos effectus esse, putà, *externa pericula avertere, animam vel ad*
Q *bonum*

bonum excitare, vel à malo avertere, dæmones coërcere, orationes hominum ad Deum deferre, pro nobis orare, delinquentes corrigere; atque hæc omnia, longè sunt inferiora potestate, quam habent homines, justificandi animas, infundendi gratiam, peccata remittendi, ligandi per censuras.

Confirmatur, 1. Tum, quia illi omnes, Angelicæ custodiæ effectus, sunt naturalis ordinis, quoad substantiam; nam pericula avertunt, naturalibus causis: animam ad bonum excitant, & à malo avertunt, vel excitando humores, ac spiritus animales, & objecta visibilia exhibendo, quod omninò naturale est; vel species aliquas sensibiles, in phantasia producendo, qui modus producendi, licet sit supèr naturalis, ex communiori sententia Theologorum, species tamen ipsæ productæ, omninò sunt naturales, ex omnium consensu. Dæmones verò coërcent, naturali omninò immixtâ qualitate; vel voluntate Divinâ, cui contradicere nequeunt, propositâ; vel certè Deo ita volente, ac disponente, incusso dæmonibus timore: orationes autem hominum ad Deum deferunt, & pro ipsis precantur, viâ omninò naturali: delinquentes tandem puniunt, eâ, quâ pollent, in hæc inferiora corpora, virtute motrice naturali, ut satis patet.

At verò effectus, quos, Ecclesiæ Pastores,

res, ratione sui muneris producant, sunt verè & propriè supernaturales, putà *gratia habitualis*, cæteræque virtutes supernaturales, quæ in sacramentis infunduntur, ut ex fide constat; ideoque dicebat S. Aug. Tract. 72. in Joan. *Difficilius esse, hominem justificare* (quod efficit Sacerdos) *quàm cælum & terram creare*, quod nequit facere Angelus: proindeque, quantò supernaturales effectus, naturalibus præstant, tantò pastorale Episcoporum & Presbyterorum officium, Angelorum, homines custodientium, officio anteponendum est.

Confirmatur 11. Tum, quia Angelicæ custodiæ, omnia officia, circa nos, corpus tantum nostrum, vel certè facultatem corpoream, phantasiâ scilicet humanam attingunt; Sacerdotes verò atque Episcopi, in animas ipsas habent potestatem; has ligant, has solvunt, easdem justificant, intellectum fidei dono, voluntatem spei, & charitatis, animam ipsam gratiæ ornamentis illustrant. Sicut ergo, Greg. Naz. Orat. ad civ. Naz. Anbr. de dign. Sacerd. c. 2. Chryf. in verb. Isai. Hom. 4. & 5. alique PP. colligunt, principatum Sacerdotalem, Regio, tantò, superiorem esse, quantò, anima corpori præferenda est, quòd hujus, ad corpora, illius, ad animas, virtus extendatur: ita quòque eodem titulo concludemus, custodiæ Angelicæ munia,

officio Pastoralis, longè esse inferiora.

Confirmatur hæc ratio ex D. Chrys. 3. de Sacerd. Sacerdotes hoc titulo, Angelis præferente, & nullam, potestate Sacerdotali, ratione istorum effectuum, majorem esse, pronuntiante: *Etenim, inquit, qui terram incolunt, atque in ea versantur, iis commissum est, ut ea, quæ in cœlis sunt, dispensent; iis datum est, ut potestatem habeant, quam Deus Opt. Max. neque Angelis, neque Archangelis, datam esse voluit; neque enim ad illos dictum est, quæcunque alligaveritis in terra, erunt alligata & in cœlo, & quæcunque solveritis in terra, erunt soluta & in cœlo; Math. 16. & 18. Habent quidem & terrestres principes, vinculi potestatem; verùm corporum solum: id autem dico, Sacerdotum vinculum, ipsam etiam animam contingit, usque ad cœlos pervadit; usque adeo, ut quæcunque infernè Sacerdotes confecerint, illa eadem, Deus supernè rata habeat, ac servorum sententiam, Dominus confirmet: quidnam hoc aliud esse dicas, nisi omnem rerum cælestium potestatem, illis à Deo concessam? quorumcunque enim peccata remiseritis, remittuntur eis, & quorumcunque retinueritis, retenta sunt: Quenam, obsecro, potestas, hac unâ, major esse queat? Pater omne iudicium dedit Filio, cæterum video, ipsum omne iudicium, à Deo Filio, illis traditum.*

C A P. I I I.

Aliæ rationes ob quas, officium Angelicæ custodiæ, officio Pastorali, inferius est.

II. **I**gitur, quemadmodum ex Apost. Epist. ad Hebr. c. i. Christus tantò melior Angelis effectus est, quantò præ illis, differentius nomen hæreditavit, ita tantò nobiliores, ratione sui officii, Sacerdotes esse, conijcimus, quantò præ illis, excellentius nomen sortiti sunt: Angelos quidem, custodes nostros, *administratorios Spiritus*, dicimus: Sacerdotes verò, *Salvatores, Christos, legatione pro Christo fungentes, ministros Christi, dispensatores mysteriorum Dei, vivifici corporis Christi, ac sanguinis, consecratores, terrenos Deos dictos, novimus; qui tituli, quæ elogia, longè, omnes, Angelorum custodum, titulos, exuperant.*

III. Eadem dignitas, officii Episcopalis, supra officium Angelorum custodum, ex potestate, quam habent Sacerdotes, & Episcopi, ad consecrandum corpus Christi, ac sanguinem, & utrumq; fidelibus tribuendi, quam non habent Angeli, abundè colligitur. Quæ enim potestas, huic comparari possit? Quod officium, huic muneri, poterit adæquari? Quæcunque enim Angeli operantur, ostendunt tantum, inferiora.

hæc corpora, ipsis esse subdita, & quoad motum, localem præsertim, subjecta: at non ostendunt, eos, integram aliquam substantiam, posse producere, sicut Sacerdotes aliquando producant, aut Filium Dei, universæ creaturæ Dominum, ipsis esse subjectum, sicut Christus Dominus consecrandus, Sacerdotibus veluti subditur, ad quorum verba se sistit.

Adstant quidem, dum Christi corpus consecratur, beati illi spiritus, & ut loquitur Chrys. in Laud. eor. qui compar. in Eccl. & Hom. 93. in Math. & 60. ad Pop. Antioch. *Angeli huic stupendæ adstant mensæ, & cum reverentiâ hanc circumvallant.* Sed quod Angeli videntes horrescunt, neque liberè audent intueri, propter emicantem inde splendorem, hoc Episcopi, & Presbyteri, conficiunt, hoc liberè tractant, manibus tangunt, fidelibus pro suo arbitratu, distribuunt, ab eo, indignos, auctoritate remonent, hoc pascuntur, huic uniuntur, & fiunt unum Christi corpus, & una caro, aliosque corpori Christi compaginant, carne Christi reficiunt, sanguine potant. Itaque hoc titulo, longè eminentius est, officium Pastorale, Angelorum custodum officii.

Confirmatur hæc ratio, 1. ex Chrys. 3. de Sacerd. *His Presbyteris, inquit, data est potestas, quam Deus, nec Archangelis concessam*

sam esse voluit: operantibus enim illis, tum sacra hæc, quæ dico, perficiuntur (nempe consecrationis mysteria) & peccata etiam hominibus remittuntur; tum ex Bern. ferm. in Coen. Dom. aut alio ejusdem temporis Doct. ubi Sacerdotis, corpus Chritti consecrantis, excellentiam, his verbis extollit: Quicquid de ascensu Sacerdotis, in illâ horâ, seu profectu, cogitari potest, vel dici, longè infra dignitatem veritatis est: & clariùs ibid. ubi potestatis, consecrandi corpus ac sanguinem Christi, dignitatem, his verbis magnificat, ô præclara & reverenda, potestas vestra! certè non est potestas, post Deum, sicut potestas vestra, forsitan audire vultis, & audire delectat apertius, quænam sit ista tanta potestas, cui nihil in cælo, vel in terra, valeat comparari. Ad quod ego, consecrare videlicet corpus, & sanguinem Domini, super potestate vestra, super tam insigni spectaculo, super tam solemni, dignitatis vestræ privilegio, stupeat cælum, miratur terra, contremiscit homo, reveretur plurimum, Angelica celsitudo. Et paulò post, Nulli Angelorum, nullis spiritibus supernis, sed tantum hominibus, nec tamen omnibus, sed ordini vestro tantum, mandatam esse, tanti sacramenti celebrationem in altari. Tum denique ex B. Laur. Justin. ferm. de Christ. corp. qui in ejus potestatis commendationem, eadem scripsit.

C A P. IV.

IV. & V. *Ratio. Dignitatis, officii
Pastoralis.*

I Psa dignitas officii Sacerdotalis, ex eo, ostenditur, quòd Angelorum custodum omnia ministeria, Sacerdotes ac Episcopi obeant, insuperque iis, quæ supra retulimus, auctiores sint : obire autem ipsos, omnia, Angelorum custodum munia, eorum omnium enumeratione patebit ;
 I. Enim pericula plurima à nobis avertunt ; nam in aquæ benedictæ usu, aliorumque sacramentalium, quæ à Sacerdotibus, & Episcopis conficiuntur, credimus, à multis nos periculis quotidie liberari : nec Sacerdotis dignitatem imminuit, quòd liberationem istam, Angelorum custodia, sæpe perficiat ; quin imò, Sacerdotum in eo prævalebit auctoritas, quòd eorum voci, Angeli quodammodo obsequi, & quod ipsi voluerunt, studioso famulatu perficere, atque exequi videantur.

II. Sicut Angeli, animam ad bonum excitant, & à malo avertunt, ita & Sacerdotes, *arguendo, obsecrando, increpando, in omni patientia & doctrina*, ad bonum inducunt, & à vitiis, commissos sibi populos revocant. III. Dæmones quoque coercent, & exorcismis abigunt, juxta Christi

De Pastoratu Ang. & invisib. Eccl. 369
sti Domini verbum, quo Apostolis virtus
ejiciendorum dæmoniorum, promittitur :
nec Sacerdotes tantum, sed & inferiores
ministri, Exorcistæ nimirum, id præ-
stant.

IV. Orationes hominum ad Deum de-
ferunt, ideoque Dei, & hominum, media-
tores, passim à PP. dicuntur, lib. 2. const.
Apost. c. 30. Chrys. lib. 3. de Sacerd. Hier.
Epist. ad Fabiol. Greg. 2. Past. c. 11. Isidor.
Pelus. lib. 1. Epist. 149. & aliis, officium-
que istud Angelicum, perfectissimè exhi-
bent. Quæ causa fuit, ut hæc de Sacerdote
diceret Chrys. serm. 26. *Versatur inter Al-
taria semper, peccatorum causas, & dolores
populi suscipit, fert, offert, ingerit preces,
accipit, refert, restituit impetrata, ex homine
totus in Angelum, substitutus.*

V. Pro populo sibi commisso Deum
orant, & eò potentiùs exorant, quò effica-
cius, pro ipsis exhibent sacrificium; juxta
illud Pauli de Pontifice, quem constitu-
tum dicit, *Ut offerat Hostias, & sacrificia
pro peccatis.*

VI. Tandem delinquentes etiam sæpe
puniunt, non tantum ut ministri, quòd
Angelo custodi competit, sed ut judices;
nec spirituali tantum poenâ, quam non in-
fligit Angelus, verum etiam corporali non-
nonquam, sicut Apost. Paulus, incestuo-
sum Corinthium, *tradidit in interitum car-*

nis, ut spiritus ejus salvus fieret: & olim, qui communione Ecclesiasticâ submovebantur, solebant etiam à Dæmonibus agitari.

v. Si quæ ratio esset, ob quam, Angeli, Ecclesiæ Pastoribus præferendi essent, ea vel sola, vel potissima esset, quòd ipsi Pastores Ecclesiæ, ab Angelis, utpote superioris ordinis, illuminentur: at vice versa, dicere possumus, Angelos, quoad aliqua, à Pastoribus Ecclesiæ illuminari; quippe cum doceat nos, Paul. ad Ephes. 3. scribens, sibi ut Apostolo, ut Pastori, datum esse, *In gentibus Evangelizare, investigabiles divitias Christi, & illuminare omnes, quæ sit dispensatio sacramenti absconditi, à sæculis, in Deo, qui omnia creavit, ut innotescat principatibus, & Potestatibus Cælestibus, per Ecclesiam, multiformis sapientia Dei.* Itaque nec isto titulo, quo Angeli custodes officio superiores viderentur, superiores tamen Pastoribus, dici possint.

Adde, Pastores aliquo modo, etiam quod ad istam illuminationem spectat, Angelis custodibus, sunt superiores: Etenim communis est opinio Theologorum, post Dionys. 4. 9. & 13. Cæl. Hier. Athan. lib. de comm. Essent. & alios PP. Angelos custodes, non esse, ex quatuor primis ordinibus, sed ex reliquis inferioribus; superiores autem Angelorum ordines, à Deo illu-

illuminari, & Dei voluntatem, aliis notam facere: inferiores autem, non ab ipso Deo, sed à superioribus, divinam voluntatem edoceri: ut ex prædictis, Dion. & Athan. nec non Damasc. lib. 2. c. 3. Bern. 5. de conf. c. 4. & aliis PP. constat, Et ex Scriptura S. colligere est, in qua videmus, Angelos custodes Persarum, & Judæorum, inter se altercantes, de Dei voluntate, alterius superioris Angeli ministerio, certiores factos: at verò, Episcopi, à Deo immediatè illuminati sunt, putà Apostoli à Christo, possuntque dicere cum Apostolis, *visum est Spiritui S. & nobis*, ipsi verò, Dei voluntatem, alios docent, ideoque eo etiam titulo, videri possunt, Angelis custodibus superiores. Vide quæ dixim. super. quæst. c. 16.

C A P. V.

Idem Confirmatur, testimoniis PP.

Ultimò, non obscurè, eandem sententiam, PP. Confirmant; tum ii, qui sacerdotalem potestatem, tanquam *divinam, mirabilem, & omnium maximam*, prædicant, angelisque ipsis *venerabilem*; officiumque Pastorale, vel ipsis *Angelis formidabile*, asseverant: tum ii, qui Episcopos & presbyteros, *Deo Patri*, vel *Christo*; Diaconos verò, *Angelis* comparant: tum denique.

que ii, qui distinctis verbis, dignitatem Pastoralis officii, supra Angelorum officia extollunt, vel certè eam, ut ipsis non imparerem, commendant. Multa, ad quodlibet eorum ostendendum, PP. testimonia, præc. quæst. adduximus, nobis in præsentia, aliqua sufficiet, in medium protulisse.

S. Ephrem, Diac. Edeff. de dign. Sacerd. vocat Sacerdotium, seu Pastorale officium, *stupendum miraculum, & inexplicabilem potestatem*. Idem, orat. de sacerd. ait, *donum altitudinis, dignitatis Sacerdotalis, intellectum, & rationem omnem, cogitationemque excedere*. S. Chrys. 3. de sacerd. docet in D. Paulo, sacerdotio attribui, *ὑπερβαλλουσάν δόξαν*, incomparabilem gloriam. Et si Ambr. de dign. sacerd. c. 2. creditur, *Honor & dignitas Episcopalis, nullis poterit comparationibus adequari*; quidni ergo, si cum Angelorum custodum officio comparatur, ipsum, dignitate exuperare censetur?

Isid. Pelus. lib. 1. Epist. 71. non Angelicum sacerdotium, sed *θεῖον χρέμα*, divinum quiddam appellat; Christianosque asserit, Pastoris officium, debere, *ἐκθειάζειν*, id est, inter res divinas referre; ideo Sacerdotes & Pastores passim, non tantum *Angeli*, sed *Dii*, vocantur, & à Davide, ad Deum, proximo gradu accedere dicuntur; de Divina

vina enim erga nos dignatione, in sacerdotibus novæ legis mittendis, vaticinans, hæc habet: *Secundum altitudinem tuam, multiplicasti filios hominum*; in quo versu, loco verbi *multiplicasti*, habetur in Græco, *ἐπὶ τοῦ ὕψους*, quod interpretatur Chrys. in Psal. 137. *ὑψώσας, ἐπῆρας*, elevasti, extulisti, quibus proinde verbis, sacerdotes novæ legis, proximo ad Deum gradu accessuros, prædicit. S. Greg. Naz. orat. 3. sacerdotis, seu Pastoris dignitatem, appellat, *omnium ornamentorum maximum, & præstantissimum.*

Honorificè omninò, & magnificentissimè, de Episcopi dignitate atque officio Constit. Apost. lib. 2. c. 26. loquuntur: *hic, inquit, post Deum, terrenus Deus, qui honore vestro frui debet. De eo enim, & similibus, agebat Deus, ego dixi, & Dei estis, & filii altissimi omnes, & Deus populi cui non detrahes*: Episcopus igitur vobis præsideat, ut dignitate Dei cobonestatus, Diaconus verò, assistat huic, ut Christus Patri. Eædem Constit. lib. 2. c. 12. Episcopum, tanquam Deum, potestate fretum, judicare præcipiunt; ad Laicos quoque, hæc, de Episcopis, summo perè honorandis, verba dirigunt; *Si Moyses, à Domino appellatus est Deus, Episcopum, ut Deum, in honore habete, & Diaconum ut Prophetam ejus. Eos verò acriter reprehendunt, qui ludicrum & jocularè putant*

tant honorem Pontificalem, qui imitationem habet, magni Pontificis, Jesu Christi, Regis nostri.

Consentit & Ignat. de ministris Ecclesiae Trallianos commonens: *reveremini illos, ut Christum ipsum, cujus Vicarii sunt, & Episcopus, typum Dei Patris gerit.* Et post aliqua: *Quidenim est aliud Episcopus, quàm is, qui omni principatu, & potestate superior est, & quoad homini licet, pro viribus imitator Dei factus? &c.* Quid verò Diaconi, quàm imitatores Angelicarum virtutum, quæ pro um & inculpatum ministerium, illi exhibent? En quomodo Episcoporum officium, Divinae gubernationi comparetur, Diaconorum verò ministerium, Angelicae custodiae. Idem, Episcopum, dicit, *praesidentem, eis τῶν θεῶν, Dei loco*, Epist. ad Magnesian. passimque eum, Deo, Christoque comparat. August. in Psal. 103. Verbi Dei Praedicatores, pastoresque, non inferiores (quales ex praedictis, sunt Angeli custodes), sed ratione sui officii, *sublimes Angelos Dei*, appellat, *adhuc in carne mortali.*

Syn. Trid. Sess. 7. c. 1. de reform. post Bern. pastorum, *onus Angelorum humeris formidandum*, appellavit. An verò idem, de custodiae animarum officio, dici potest? neutiquam sanè; nam pastorum longè inferius est. Idem. verò Pelus. lib. 1. Ep. 129. Pastoralia officia, sacraque omnia ministeria,

ria, Angelis esse *παικόθητε*, seu amabilia, & vehementer ab ipsis expeti, docet. Theoph. verò Nycen. Epist. 3. eadem ipsis, *ἐπιθυμητὰ καὶ φοβητὰ*, desiderabilia, & formidanda, affirmat. Clem. Alex. lib. 7. Strom. sacerdotem, ratione sui muneris, *æqualem Angelis*, prædicat, *precatur*, inquit, *cum Angelis*, ut qui jam sit *æqualis Angelis*: quantæ dignitatis, putas, debere esse officium, quod homines, naturâ longè dispares, conditione pares facit? cum è contra, Angelorum custodum munus, non tam Angelos extollat, quàm ad humanam societatem dejiciat.

Clariùs verò Naz. c. 17. dum & sacerdotium, Angelis venerabile & ipsorum conditioni non impar, asseverat: *Sacerdotium*, inquit, *ipsi quoque Angeli puri, purissimi Dei eultores, tanquam ipsorum cultui, minimè impar veneratione dignantur*: quomodo istud? nisi Angelicæ custodiæ officium, non exæquet tantùm, sed superet.

Apertissimè autem Bern. Serm. ad Past. in Syn. congreg. qui incipit, RR. Fratr. *Quantam*, inquit, *dignitatem, contulit vobis Deus? quanta est prærogativa ordinis vestri?* Prætulit vos Deus, Regibus & Imperatoribus, prætulit ordinem vestrum, omnibus ordinibus; imò (ut altiùs loquar) prætulit vos Angelis & Archangelis, Thronis & Dominationibus: Sicut enim non Angelos, sed semen Abrahamæ apprehendit, ad faciendam redemptionem: Sic
non

non Angelis, sed hominibus, solisque Sacerdotibus, Dominici Corporis & Sanguinis, commisit consecrationem: omnes enim, sicut ait Apost. ad Hebr. I. sunt administratorii Spiritus, in ministerium missi, propter eos, sed longè excellentius est officium vestrum, quod admirabile est, & non solum in oculis vestris, sed etiam Angelorum.

His procul dubio verbis, nihil clariùs, nihil apertius, nihil ad quemvis etiam pertinacem convincendum efficacius: nam & Angelis, ratione Pastoralis officii, homines præfert, & officium sacerdotale, seu pastorale, Angelorum, officio anteposit.

Iis omnibus, nihil est, quod addi debeat, nisi fortè placet, etiam D. Francisci sanctissimi viri auctoritatem, coronidis loco, adjungere; qui, teste ipsius vitæ scriptore fidelissimo, S. Bonav. sæpe dicere solebat, si sibi occurrerent simul, Angelus & sacerdos, se prius Sacerdotem salutaturum, quàm Angelum; tantæ nimirum dignitatis sacerdotem esse, judicabat, ut cùm sciret, Angelos, hominibus, naturâ superiores, esse, ac conditione beatiores; nullius tamen ponderis, Angelicæ naturæ excellentiam, conditionis eminentiam, duceret, præ officii sacerdotalis dignitate, quâ solâ, homines, naturam, officia, conditiones Angelorum, superarent.

C A P. VI.

Non docet S. Ambros. contrarium.

Quid iis omnibus opponat, neoterico-
rum quis, miserum est dicere. Ambr.
auctoritatem opponit, cujus verba infeli-
citer detorquet, ut id videatur dicere, quod
nunquam sapienti viro, videbitur cogitasse:
Non solum, inquit Ambr. lib. 2. in Luc.
Episcopos ad tuendum gregem, Dominus ordi-
navit, sed etiam Angelos destinavit. Ergo,
infert ille, arbitratus est Ambr. munus
Angelici Pastoratus (si tamen Pastoratus
dicendus, qui improprius tantum est, &
& valdè imperfectus) esse nobilius, vel sal-
tem majoris in Ecclesiam beneficii.

Quasi verò, sacramentorum beneficia,
quæ nobis à Pastoribus conferuntur, &
prædicationem verbi divini, quæ ad fidem
necessaria est, ex D. Paulo, dicente, *fidem*
esse ex auditu, auditum autem per verbum
Dei, Ambr. Angelicæ custodiæ postpone-
ret? absit.

Quid ergo, inquires, Ambr.? Hoc dun-
taxat, putà, non solos Ecclesiæ prælatos,
sed & Angelos, à Pastoribus illis, mysticè
designari, qui nascente Domino, *Vigilan-*
tes, describuntur, & *custodientes vigiliis no-*
ctis, super gregem suum, Luc. 2. Hæc enim
sunt ipsius verba, *Grege igitur populus, nox*
saeculum,

ſæculum, Paſtores ſunt Sacerdotes. Aut fortaſſe etiam ille ſit Paſtor, cui dicitur: Eſto vigilans & confirma. Quia non Epiſcopos, ad tuendum gregem, Dominus ordinavit, ſed etiam Angelos deſtinavit. Quibus verbis, nulla omninò comparatio, inter ipſos Angelos cuſtodes, & Eccleſiæ prælatos continetur, ut ex ea, præcellentia cuſtodix Angelorum, ſupra dignitatem Paſtorales, argui poſſit.

*Sed demus, hiſce verbis, ineſſe aliquam comparationem, quid demum ex iis deduci poterit, niſi Angelos nobiliores eſſe, naturâ & conditione, hominibus, divi-
namque providentiam ordinaviſſe, ut non tantum homines, qui aliis hominibus, quibus naturâ, & conditione, æquales erant, verum etiam Angeli, naturâ & conditione ſuperiores, iſdem cuſtodiendis deſtinentur?*

Quid inde inferſ, mi bone vir, quid Ambr. auctoritatem venditas? deſine PP. ſcripta, adeo infeliciter, ad alienum ſenſum detorquere, & Paſtoralis officii dignitatem, jam tandem monitus, ediſce. Nunc alias conjecturas ſuas, quibus nituntur adverſæ partis auctores, errores ſuos tueri, expendamus.

CAP. VII.

Conjecturæ, quibus Pastoris officium, Angelis tribuere, conantur. Confirmatur nostra assertio.

Non est hîc, de lanâ caprinâ, in alicujus cerebro natâ, quæstio mota, nam si rei de quâ agitur momentum spectes, fidei articulus est, quem impugnant: facultas enim Theologica, ut ante dixim. damnavit tanquam propositionem hæreticam, quòd *Angeli sint animarum Pastores*. Nec de nomine tantùm *Pastorum*, controversatur, sed de officio, eoque non diverso, ab eo, quod Episcopis, ab omnibus, tribuitur: absurdum enim omninò est, hæreticum esse, *Pastorum nomen, Angelis assignare*, cùm fides, non circa nomina, sed circa res versetur: qui erraverit tantùm in nomine, si rem ipsam teneat, malè dicetur hæreticus; nec abusio nominum, retentâ rei ipsius verâ doctrinâ, dicetur hæresis, sed Catachresis. Pastorum ergo nomine, quisquis abuti voluerit, salvâ fide poterit, dummodo rem ipsam, nomine significatam, teneat.

Rem igitur ipsam tangunt adversarii, & Pastorum officium, Angelis conantur tribuere, puerilibus satis conjecturis, nixi: Qua-

Quarum, I. Est, quia Pastoribus Christum euangelizaverunt, *Pastoribus*, inquam, *Sacerdotum* & *DD. figuris*, si *Ambr. Greg. Eucher. fides.* II. Quia Angeli, in veteri lege Pastores fuerunt, P. Aurel. consentiente, ajunt, quidni ergo, & in nova lege, Pastores existent?

III. Quia officium Pastoris est, oves ab hædis discernere, Math. 25. *Sicut Pastor segregat, oves quidem à dextris, hædos autem à sinistris.* Atqui Angelis, ad hoc ministris, Christus utetur, Marc. 14. *Mittet enim Filius hominis Angelos, & colligent de Regno ejus, omnia scandala.* IV. Quia Ecclesia nunquam esse potest, sine Pastoribus; futura autem esset sine Pastoribus, nisi Angeli Pastores esse, admittantur, de quo argum. infra dicemus. V. Quia in lib. *Herim. Pastor.* vir quidam, habitu Pastoris, ei apparuisse dicitur, quem *Margarin. de la Digne, Paris. Theologus*, custodem interpretatus est.

Hæc argumenta, non nomen tantum, sed rem ipsam tangunt, eoque collimant, ut non nudum nomen, sed ministerium & officium Angelis vendicent. Præsertim illud, quodd in visibilibus Pastorum defectum, Angelos invisibiles substituit: nam cum Ecclesia, sine veris Pastoribus, esse non possit: si Angelos solos Ecclesiæ Pastores, superfuturos aliquando, adversarii cre-

credant, necessum est, & eosdem credant veros esse Pastores.

Verum hæc argumenta, nihil adversus id, quod asserimus, probant: si quid enim probarent, hoc solum, aliquo sensu, Angelos esse Pastores, sed non eo sensu, quo Episcopos. At illud nunquam negatur, sicut nec facultas Paris. unquam damnavit, sed tantum hoc damnavit, posse nempe Angelos, eo sensu, Pastores dici. quo sensu, Pastores dicuntur, Episcopi: quam propositionem, ex sola verborum explicatione, hæreticam esse, facile, prudentibus & Catholicis persuaderi, est.

I. Quia Pastores dicuntur Episcopi, quia sacramenta administrant, quibus generantur, nutriuntur, sanantur, reguntur, foveantur. Atqui eo modo, Angelos, constat non esse Pastores, quandoquidem ex Conc. Flor. & Trid. pateat, ministros ordinarios sacramentorum, esse solos homines, ritu sensibili, ab Ecclesia Catholica, ordinatos.

II. Quia & alia sunt, eo sensu, Pastoris officia, quæ passim nobis, Ecclesiasticis canonibus præscribuntur, quæ ab Angelis aliena sunt.

Hæc solum, ex Trid. proferam, tum sess. 13. c. 1. de reform. *Illud primum eos (Episcopos scilicet) admonendos censet, ut se Pastores, non percussores esse, meminerint: atque ita præesse sibi subditis oportere, ut non in*
eis

en dominantur, sed illos, tanquam filios & fratres, diligant: elaborentque, ut hortando, & monendo, ab illicitis deterreant, ne ubi deliquerint, debitis eos pœnis coërcere cogantur: quos tamen, si quid per humanam fragilitatem peccare contigerit, illa Apost. 2. ad Tit. 4. est ab eis servanda præceptio, ut illos arguant, obsecrent, increpent in omni bonitate, & patientia. Et paulò post, Cùm sit diligentis, & pii simul Pastoris officium, morbis ovium, levia primùm adhibere fomenta, post, ubi morbi gravitas ita postulet, ad acriora & graviora remedia descendere: sin autem, ne ea quidem proficiant, illis submovendis, cæteras saltem oves, à contagionis periculo liberare.

Quo cap. potestas ferendarum censurarum, Pastoribus inesse demonstratur, & & quis sit modus salutaris, censurarum ferendarum, ostenditur, quæ omnia in Angelos non cadunt.

Sed plura c. 1. dereform. sess. 23 officia Pastoris, ab Angelis aliena referuntur, his verbis: Cùm præcepto Divino, mandatum sit omnibus, quibus animarum cura commissa, oves suas agnoscere, pro his sacrificium offerre, verbique Divini prædicatione, sacramentorum administratione, ac bonorum omnium exemplo, pascere, pauperum, aliarum miserabilium personarum, curam paternam gerere, & incætera munia Pastoralia incumbere.

III. Et Pastores, eo sensu, Episcopos, dicunt

dicunt Scripturæ, quo Angelis convenire nequit: nam Pontificem, *ex hominibus assumptum*, prædicat Apost. ad Hebr. 5. *In iis constitui, quæ sunt ad Deum, ut offerat hostias, & sacrificia, pro peccatis.*

Nota, *Ex hominibus assumptum*, non ex Angelis: & ad Pastoratum, ac Sacerdotium, electione sensibili, atque ordinatione, assumendum, tanquam Aäronem, vult eod. c. Apost. dum ait, *Nec quisquam sumit sibi honorem, sed qui vocatur à Deo, tanquam Aaron*: eundem nobiscum infirmum describit, *Qui condolere possit iis, qui ignorant & errant, quoniam & ipse circumdatus est infirmitate*: & B. Petr. Pastoris officium præcipuum statuit, exemplo præesse seniores seu Presbyteros admonens, Epist. 1. Canon. c. 5. *Pascite, qui in vobis est, gregem Dei, providentes non coactè, sed spontaneè secundum Deum, neque turpis lucri gratiâ, sed voluntariè, neque dominantes in Cleris, sed formati acti gregis, ex animo*: quæ exhortatio, in Angelos cadere non potest. Denique Apost. ad Ephes. 4. Pastoratus munus Ecclesiæ, Deum dedisse, affirmans, ait, *Deum, dedisse dona hominibus, hominibus, inquam, non Angelis*: ut disceremus, Pastores Ecclesiæ, à Deo datos, non Angelos esse, sed homines.

C A P. VIII.

Angeli non dicuntur simpliciter Pastores, eo quòd, unam alteramve Pastoris functionem obeant.

PRæcedentia igitur argum. ferè omnia, & superiùs protulimus, quibustamen respondent adversarii, fatendo, ea officia Pastoralia, Angelos non obire, sed alia esse, quibus defungantur. Hoc verò urgemus; non igitur illos, Episcoporum munus Pastorale, obire: quod unum probandum suscepèramus. Jam verò addimus, nec Angelos, simpliciter Pastores esse dicendos, quòd unam, aut alteram Pastoris functionem obeant; imò nec ullâ, communi ipsis, & Pastoribus, functione, Pastores dici posse, cùm nullam eo modo obeant, quo ipsi Pastores.

Nam Pastoris nomen, metaphoricum est, à Pastoribus ovium deductum, nec in docendo, aut illuminando, Pastoris propriè officium, munusque consistit, nisi in quantum, & doctrina ista, & veritas, quâ mens illuminatur, eadem quoque pabulum est, quo pascitur, quo reficitur: per modum autem pabuli, ab Angelis, doctrina non ministratur, sed ab hominibus, qui eam, Pastorum more, audientibus proponunt, aùre tanquam ore sumendam, tum
sen-

sensuum inferiorum actione , tanquam stomachi calore , coquendam , ut nutrire tandem animum possit.

Atque adeo Angeli , etsi DD. nostri , & animorum illuminatores , dici queant , Pastores tamen propriè nominari non possunt ; tum quod Pastorum varia officia , minimè habeant ; tum quòd ea ipsa officia , doctrinæ & illuminationis , ratione quorum Pastores , à recentioribus dicuntur , & quæ ab ipsis exercentur , impropriè tantum pabuli rationem habeant prout ab ipsis ministrantur ; ac proinde nonnisi ab iis impropriè , Angeli Pastores denominari possunt.

Atque eæ rationes sunt , propter quas PP. Pastores & Sacerdotes , Angelos esse , negant. Innumeros referre molestum foret : unico contentus ero Chryl. qui licet de sacerdotio , loqui videatur , quatenus cum Pastoratu confunditur , tota tamen sententia manifestè , Pastorum , non Angelo , sed homini à Deo communicatum , ostendit ; hujusque rei rationem aperit , Hom. 69. in SS. Petr. & Eliam , tom. i. ejus oper. Edit. Paris.

Propterea enim , non Angelo , neque Archangelo , sacerdotio fungi , commissum est , (liberi enim sunt à peccandi libidine) ne videlicet , ob severitatem , eos , qui ex populo peccarent , confestum fulguribus transfigerent : sed homini , à

R

Deo

Deo cathedra hæc commissæ est, qui peccatis colligatus est, ut si quem peccantem invenerit, suorum peccatorum, conscius, in eum, qui peccat, benignus efficiatur. Nam si Angelus sacerdos fuisset, & aliquem stuprum inferentem invenisset, statim eum de medio sustulisset, cum ipse huic libidini subiectus non esset. Si Angelus, potestatem sacerdotii functiones obeundi accepisset, peccantes homines non doceret, sed in iram mortiferam concitatus, repente illos perderet, propterea quod talis non esset. Itaque ob id homini, commissæ est Ecclesia, quod sciat se delinquere, & peccata expertus, iis, qui peccant, veniam dare possit, ne irascente illo, Ecclesia inanis fieret.

C A P. I X.

Responsio ad conjecturas, Cap. VII.

NUgæ videntur conjecturæ istæ, quibus nititur contraria opinio. I. enim, ex eo, quod Pastoribus, qui figuram gerebant, Pastorum Ecclesiæ, Angeli Christi nativitatem extraordinariè nuntiarint, Pastoratus ordinarium officium, Angelis tribuendum esse, nemo Theologus, nemo Dialecticus probare aggreditur: si enim ad syllogismum, argumentatio ista reducatur, illius majorem propositionem, nulla probabilitate muniri, statim omnes advertent: ita

ita enim oportebit argumentari: ii, veri sunt, & ordinarii Pastores, qui pastoribus ovium, suâ vigiliantia, Pastores Ecclesiæ referentibus, Christi nativitatem annuntiarunt: atqui Angeli, Pastoribus hujusmodi, Christi nativitatem annuntiarunt; igitur sunt illi veri, & ordinarii Pastores. Majorem ubi negavero, hæere adversarium in ejus probatione, oportebit.

Altera conjectura, quæ tota, Pet. Aurel. Doct. Sorb. verè eximii, auctoritate, nititur, ejusdem verbis disponitur: non enim, Aurel. ait, Angelos, in veteri lege, fuisse veros Pastores, sed aliquod ministerium, & curam pastorem, videri habuisse: quæ longè utique differunt: nam veros Pastores, ad omnia Pastorum officia, potestatem habere, necessum est, non enim denominatio Pastoris simplex, & absoluta, nisi adæquatâ potestate Pastoris circumscribitur; bonum enim ex integra causa nascitur, nec à partiali quodam officio Regis, Doctoris, Episcopi, Presbyteri, Rex, Doctor, Episcopus, presbyter denominantur, nam parziale aliquod officium, pluribus aliquando dignitatibus, gradibus, muneribus, convenit.

Vera ergo, Aurel. propositio, aliquod munus Pastorale, gessisse Angelos, in nova lege, & ut ipsius verbis loquar, pag. 165. fuisse aliquod eorum ministerium, curamque Pastorem, in lege veteri, quod non modo præsidere, & cu-

stodes Synagoga, sed etiam primi legislatores, prædicatores, promulgatores fuerint legis, apud universam congregatam multitudinem filiorum Israël. Non tamen sequitur, eos veros, & ordinarios Pastores simpliciter fuisse, quia nec sacramentorum, nec sacrificiorum administratio, ordinarium eorum munuserat, nec judicandi populum, & exterius regendæ, docendique munere fungebantur: quæ tamen ad Pastoris ordinarii rationem, necessaria sunt.

Pastoratus tamen munia plura, eos, in veteri lege, quàm in nova, attigisse, ibid. eruditè docet Aurel. resque per se clara est, cum scilicet eo statu, legem populo Moysaico, tradiderint, ex S. Paulo Act. 7. & ad Gal. 3. sub visibili columna ignis, per noctem, *nubis*, per diem, eundem duxerint, Exod. 13. 2 Esdr. 9. Psal. 98. pane, suâ operâ confecto, nutrierint, Psal. 77. de eventibus futuris, in tabernaculo consulti, respondere solerent, passimque variis aliis sensibilibus signis, se eis adjuutores præberent; quorum nullum, in nova lege præstatur, ut frustra quæeratur, *quæ potior sit unius legis causa, quàm alterius? Quâ suâ causâ, tam gloriosum titulum, intelligentes substantiæ, amiserint?*

Eadem scilicet, ac si quæreret, quâ suâ culpâ post iudicii diem, Angelorum custodum titulum amitterent? Quæ interrogatio
inepta

inepta est; non enim ex aliqua culpa Angelis deperit, quod ex ordinatione providentiæ, mutari circa illos, in ordine ad homines debuit: natura porro status Evangelici postulat, ut cum antea, *multifariam, multisque modis*, etiam per Angelos Deus, loqueretur Patribus, in Prophetis, novissimè loqueretur nobis in filio: nec per alios, quàm per se ipsum aut vicarios à se constitutos homines, Christus fidelibus loqueretur, Ecclesiamque à se fundatam regeret, gubernaret, eamque per suæ potestatis vicarios, & ejusdem secum naturæ consortes, administraret.

Lege Aurel. pag. 165. & 166. quem, si quis, non contentionis libidine, sed addiscendi cupiditate legerit, poterit hæc myteria, ediscere, quæ videbatur antea omninò ignorare.

III. Moderni, extra chorum saltant: non enim probant, toto hoc tempore viæ, quo custodes nostri sunt Angeli, actus Pastorum ab iis exerceri; multò minùs, eos Pastores esse: sed de die judicii verba faciunt, in quem diem, officium custodiæ Angelicæ minimè est protrahendum; nam de custodia Angelica, & Angelo custode, sermo institutus est, utrum scilicet, *custodia nostra ab Angelo, Pastoratus sit*, utrum, enim esse custodem, idem sit, ac esse Pastorem: quare aliud eis probandum, quàm quod probare contendunt.

Deinde, probatio eorum, multis modis inanis est: tum quòd, quantumcumque totum, quod intendunt, concederemus, sequeretur tantum, aliquod munus pastoris, idem etiam esse Angeli custodis; ex quo non sequitur, esse idem, Angelum hominem custodire, ac pascere, qua de re disputatio inita erat: tum quod nec in eo munere, quod proferunt, Pastoris ullum officium appareat.

Sed tantum elucet, Christum, Pastorem animarum nostrarum, judicem & rectorem, pro dignitate ista, quam sustinet, bonos à malis, tanquam oves ab hædis separaturum; Angelosque, non tanquam Pastores, sed tanquam apparitores Pastoris magni, Christo in eo officio ministraturos. Quod non est, Pastorem esse aut Pastoris officio fungi, sicut nec apparitores Episcopi, & in segregandis bonis à malis, ministrantes, Pastorum officio fungi dicuntur, quia purum, sicut & Angeli, ministerium exhibent, non causæ cognitionem habent.

IV. Non moramur, quam modò, hæresim continere, docebimus.

Ultima tandem conjectura, vix meretur responsionem, omninò enim puerilis est: nam si ex eo, quod *Pastoris* habitu, Angelus apparuerit, sequeretur, verum, eum, pastorem esse, cum magis, sub forma *stellæ*, apparuerit, ex communi plurium PP. Sententia;

tentia ; cùm Ezechieli, sub simulacris quatuor animalium ; Judæis, in columna nubis & ignis ; Joanni, sub persona hominis, pedes habentis, aurichalco similes, mammæ habentis, zonam, &c. Denique cùm modò, sub hominis figura, modò sub alia, apparuisse Angeli, referantur, sequeretur, inquam, ea omnia esse Angelos, quorum formam induerent : quod omninò absurdum est.

C A P. X.

Alius error, Ecclesiam invisibilem, Pastores tantùm invisibiles habentem, refellitur.

U Num est Catholicorum principium, quo adversus quamlibet hæresim præscribitur, *dedisse Deum*, ut ait Apost. ad Eph. 4. *in Ecclesia Pastores & DD. ad consummationem SS. in opus ministerii, in ædificationem Corporis Christi, donec occurramus omnes, in unitatem fidei, & agnitionis Filii Dei, in virum perfectum, in mensuram ætatis plenitudinis Christi, ut jam non simus parvuli fluctuantes, & circumferamur omni vento doctrinæ, in nequitia hominum, in astutia, ad circumventionem erroris.*

Dedisse, inquam Pastores visibiles, ad ædificationem corporis Christi, quod est Ecclesia, ministerio doctrinæ attendentes, qui & erroribus resistent, & veritatem doceant, & ab hæreticorum astutia cavendum

dum moneant, & in simplicitate veritatis ambulent, qui arguant, obsecrent in omni patientia & doctrina, ad quos, secundum præceptum Christi, *Dic Ecclesiæ*, Math. 18. errores referantur, & contumaces, pro Ethnicis & Publicanis habendi, declarentur.

Hos itaque visibiles Pastores, nunquam defecturos, Ecclesia semper credidit, nec promissionem Divinam, novæ legi factam, unquam cessaturam, *dabo vobis Pastores, juxta cor meum, & pascant vos scientiâ & doctrinâ*, Jerem. 3. nec Christi prædictioni, Luc. 24. *Oportere prædicari, in nomine ejus, pœnitentiam, & remissionem peccatorum, in omnes gentes, incipientibus ab Hierosolyma, eventum defuturum*. Hoc argum. Tert. lib. integro de præscr. Vinc. Lirin. toto suo *Commonit. advers. hæres. communiterque PP. omnes, hæresibus omnibus obstiterunt, & exortas oppresserunt*, Ecclesiæ visibilis indeficientem fidem, & gubernationem, pro indubitato principio supponentes, quod Aug. advers. Donat. lib. præsertim *de unit. Eccles.* toties iuculcavit, *doctrinam omnem* (ut loquitur Tert. c. 21. lib. cit.) *de mendacio præjudicans, quæ sapiat contra veritatis Ecclesiam*.

Hoc principium in dubium revocant nonnulli, dum posse Ecclesiam, sine visibilibus Pastoribus, nullos habentem pastores visibiles, sed solos Angelos, invisibiliter
Eccle-

Ecclesiam latentem, abstrusam, in deserto fugientem Regentes, affirmant. Nihil eis affingo, nihil de eis mendaciter, ad odium vel invidiam dico, aperta sunt hujus sententiæ verba, *Addo ex Apocalypsi aliud, etsi non ejus roboris, non contemnendum tamen testimonium. Mulier enixa fugit in solitudinem, ut ubi pascant eam, diebus 1260. Apoc. 12. si mulier illa, Ecclesia est, metu persecutionum, in desertum abrepta; qui sunt Pastores ejus futuri? An homines? at illi ipsi sunt, qui fugiunt, qui latent, qui pascuntur. Angeli ergo, qui mulieris partum, rapiunt in cælum, iidem matrem pascunt: ita unus, è recentiorum choro scriptis celebris.*

Tu ergò, vir præcipue, Ecclesiam Dei invisibilem adstruis, in deserto latentem, nullos habentem pastores, præter Angelos, invisibiliter eam regentes: eoque testimonio id confirmas, quo novatores nostri, hoc sæculo, similiter abusi sunt suam quamvis, ut notat Staplet. Controv. lib. 4. c. 10. nec Donatistæ, nec Luth. Melanth. aut Calvin. eo testimonio, *Apoc. 12.* Usi sunt, pro Ecclesia latenti statuenda, tamen ipse suo tempore, protestantes eo usos, refert, quos ibi studiosè refellit; cujus responsum excepit, Guilielm. Fulco, hæreticus Anglus, eodem arg. latentem Ecclesiam confirmare adnissus, cujus item conatus, lib. 13. ex professo edito retundit. Molinæus quoque in

Resp. ad Card. Perron. lib. 1. c. 9. jam alibi à se jactatam, adversus Ecclesiam visibilem, mulieris in desertum fugientis cantilenam, recantavit. Plessæus & alii, eandem, adversus Ecclesiam, objectionem proponunt, quam incautus hic vir, tanquam probabilem audet, pro errore suo adstruendo, proferre.

Certè magna animi humani imbecillitas est, ut se ab indubitato Catholico dogmate, vanæ cujusdam propositionis probandæ desiderio, & ambitione vincendi, abduci sinat. Redi ad mentem tuam, resipisce, pie vir, & qui communionem Catholicam nondum deseruisti, nec majorum fidem desere.

Agnosce, Catholicam Ecclesiam, minime in deserto quærendam esse, cum monuerit Christus, Matth. 24. *Si ergo dixerint vobis, ecce in deserto est, nolite exire: ecce in penetralibus, nolite credere: in quem loc.* Aug. lib. 13. contr. Faust. c. 13. *nec illi audiantur, qui sub nomine, quasi secreta, & apocryphæ veritatis, & hominum paucitatis, dicunt, ecce in cubiculis, ecce in deserto: quia non potest abscondi civitas, supra montem constituta, quia sedes gloriæ exaltata, est sanctificatio nostra.*

Agnosce, Ecclesiam sub finem sæculi, regnante Anti-Christo, ad has angustias, constrictam iri, ut in deserto esse videatur, visibilem tamen futuram. neque enim in invisibilem sæviretur: habituramque Pastores

res visibiles, sicut & Diocletiani, & Decii temporibus habebat, quos fideles noscent, infideles ad necem inquirent: ac proinde, nec solos Angelos, Pastores futuros invisibiles: & licet publicus Religionis usus, ob perturbationem maximam cessaturus sit, non tamen clam & privatim cessaturum.

Stabit etiam tunc temporis Capitolii immobile Saxum, fundamentum, & Petra fidei, Romana Ecclesia, nec ulla persecutio tanta erit, quæ sacramenta omnia, quæ sine sacerdotibus administrari non possunt, è medio tollat.

Agnosce denique, si pascendi munus, Angelis tribui possit, & Angeli pascendis fidelibus sufficiant, & Pastores illi dici possint, qui Ecclesiæ nunquam defuturi promittuntur, nobis subtrahi invictissimum argumentum, quo hæreticos constringimus, dum ab iis, Pastorum suorum nomina, Episcoporum tabulas, Ecclesiarum annales inquirimus: quandoquidem secundum doctrinam tuam respondere possent, aliquo tempore, sibi Angelos pro Episcopis, pro pastoribus existisse, Ecclesiam suam in deserto, in abscondito fuisse, Pastores Ecclesiæ, Deum quidem nunquam ab Ecclesia substracturum; sed sufficere, quod Angeli pascant, quod Pastores soli aliquo tempore superstites, existant, eos quoque veros esse Pastores, quorum sollicitudo & cura Ecclesiæ,

non defuerit , quamvis probari non possit.

C A P. XI.

Tertius error , Angelos Sacerdotes esse.

IIs omnibus consentit etiam error eorum, qui probare conantur, Angelos sacerdotes esse, utentes ad hoc Dion. auctoritate: cui imprimis respondendum, ne tanti viri nomine, error ab ipsis defensus, illustretur.

Nego itaque unquam à Dion. Angelos *Sacerdotes* Dictos: cap. quidem 9. 10. & 13. Cæl. Hier. *ἱερεῖς* nomen, Angelo attributum lego: sed nego, Hierarcham apud Dion. iis locis, idem esse, quod Pontificem, Episcopum, & Sacerdotem: quis enim nesciat, *ἱερεῖς*, eum esse, qui cujuslibet Hierarchiæ princeps sit? quare cum duæ sint Hierarchiæ, Cælestis & Ecclesiastica, diversæ & differentes, diversa quoque utriusque sunt capita, diversi principes, Hierarchæ diversi, Ecclesiasticæ Episcopus, Cælestis summus Angelus: Quin etiam, in unaquaque Hierarchia Angelica, in unoquoque ordine, qui supremus est, Hierarcha quoque aliquis admitti potest.

Quòd si apud quosdam interpretes Dion. sacerdos dicitur, & sacerdotio fungi, qui supremam in Angelos habet potestatem, voluerunt interpretes, similitudine quadam nominum, similitudinem officiorum, utrius-

utriusque Hierarchiæ principum, significare, non autem Angelos propriè Sacerdotes esse, unquam aut putarunt, aut persuadere se crediderunt.

Nec plus movet, quod ex c. 15. Dionys. Angelus, Pontificiam vestem indutus, pingi dicatur, eò quòd, ad Divina abstrusaque spectacula perducatur: Nam ex picturis, argumenta imbecilla ducuntur, & pictura, non quid sit Angelus, sed quo signo visibili, magis referri possit, indicat: atque adeo non Sacerdotem, sed Sacerdotibus similem, Angelum demonstrat.

Quod urgent, in Scripturis, Pontificiâ veste, Angelum indutum, legi, non probat, in Scripturis, Angelum Pontificem, aut Sacerdotem nominari. Sicut nec, quòd eod. Dion. teste, eod. c. & 10. apud Ezech. *Alati, capite, manibus, aliis membris præditi*, beati isti Spiritus, legantur, probat eos, aut pennatos, aut aliis membris præditos esse. Male autem ex S. Maxim. Daniëlem & Jeremiam, hoc loco notari, dicunt, à Dion. nam Maxim. ad Ezech. & Daniël. vestis Sacerdotalis descriptionem, revocat, nullâ factâ mentione Jeremiæ.

Graviori argument. insistit unus eorum; dum officii Sacerdotalis potestatem, cum Angelo partitur maximamque partem huius muneris, Angelo assignat, quod superius refellitur.

Concludit verò, sententiamque suam aperit, iis verbis, *Confirmatâ Angelis, Episcoporum & Sacerdotum nuncupatione, quid apertiùs postulas, ut rem ipsam, & pro modo, munus & officium asseram?* Quæ verba, non nomine tenus Sacerdotes, sed reipsa & officiis, Angelos ab iis dictos, ostendunt, quod refellerem uberiùs, nisi tum superiùs id satis refutasssem, tum etiam hunc errorem revocasset is idem, *Ubi, inquit, Angelos appello Episcopos, & Sacerdotes, non sumo Episcoporum, aut Sacerdotum nomen, strictè ac propriè, sed tantùm latè, & impropriè: quod eo loco, satis expressum putavi, his verbis, confirmata Angelis Episcoporum, &c.* Cui declarationi nihil habeo, quod addam.

Levis autem est excusatio, in iis verbis, *pro suo modo*: nam cum res diversi generis, eandem formam participant, quia excellentioris generis subiectum, eam excellentiùs obtinet: ideo *pro suo modo*, tum nobilius, tum ignobilius subiectum, eam formam participare dicuntur, licèt propriè omnibus commune dici possit, v. g. quia & Angelus, & homo, scientiæ capaces sunt, sed Angelus nobiliùs res novit, quàm homo, ideo *pro suo modo* uterque scire dicitur, quamvis scientia seu cognitio propriè utrique attribuatur.

Ideoque non ea vis est istorum verborum, *pro suo modo*, ut Angelum impropriè, homi-

hominem propriè Sacerdotem denominet: quin imò potiùs, ex iis vocibus, Angelus propriè, homo impropriè Sacerdos diceretur: quia homini & Angelo Sacerdotium, sed Angelo nobiliùs, homini ignobiliùs attributum, tota hæc moderna propositio significabit, ut si analogicè tantùm, utrique tribuatur, Angelum, utpote nobiliorem, præcipuum analogatum esse, ex iis verbis, intelligere oporteat.

Notus igitur hujus novitii error, quem declaratione sua eluit, quam jure optimo extorserunt ab eo DD. Sorbonici, tum ut hæresi hoc sæculo invalescenti occurrerent, quæ, ex Sacerdotii significatione similiter detortâ, oritur, dum Sacerdotes, omnes laicos dicunt, novatores nostri, acceptâ *Sacerdotis* voce, non pro eo, qui ad sacrificium propriè dictum, ordinatus est, sed qui Deo laudes, gratiarum actiones, orationes offert: nam juxta hanc significationem, recentior ille, Angelos Sacerdotes constituit, juxta quam similiter, Calvinii & Lutheri sectatores, populum quemlibet Christianum, Sacerdotio propriè dicto fungentem, & solâ Ecclesiæ ordinatione, Clerum à populo distinctum, statuunt.

Quem errorem, Syn. Trid. sess. 23. c. 4. damnavit: haud dubiè damnaturus, si pariter Angelos, propriè dictos Sacerdotes, dixissent. Atque hæc de his satis.

QUÆ

QUÆSTIO IX.

De præemenentia ordinis Hierarchici, supra Monachatum, & populum. Auctoritas & reverentia, ordini Hierarchico debita.

Expeditis iis, quæ de eminentia ordinis Sacerdotii, supra officia Angelorum dixim. Restant etiam quædam dicenda, de præexcellencia, ejusdem ordinis Hierarchici, supra statum Monachorum & ipsum populum; deque auctoritate, reverentiâ, ac honore, ordini Hierarchico debitis: unâque errores quorundam, in hac materia Hallucinantium, recensendi, ac breviter refellendi, ut depressa, iis erroribus, Ecclesiasticæ Hierarchiæ gloria, pristino splendori reddatur.

C A P U T I.

Error est, nullam auctoritatem, vel præeinentiam supra populum, Hierarchiam ordinis continere : de auctoritate, quæ convenit vi ordinis, tam Hierarchici, quàm non Hierarchici.

O Missis pluribus erroribus extraneis, hunc proprium sibi, nonnulli Regulares volunt, quòd malè habeant, totum Clericalem ordinem, & ordinis Hierarchiam, ut ei, quà talis est, nullam auctoritatem attribuant. Ita enim, è præcipuis eorum, unus, tres istas Hierarchias, Charismatum, Ordinis, & Jurisdictionis distinguit; *Prima*, inquit, *dat auctoritatem excellentiæ*; *altera simpliciter potestatem, aut, ut Div. Thom. officium*; *ultima jurisdictionem*. Ita plerique alii !

At, pace eorum, meritò hic error refellitur. Negare certè non potes, Doctor novitie, quin majorem monacho, charitatis professori, vel doctori canonico, aut Theologo, auctoritatem in eos, quos purgant, quos illuminant, quos perficiunt, concedas, quàm Presbytero, vel Diacono baptizanti, in eos, quos baptizant, vel Pres-

functiones recipiendas populos, exercent? si nequidem auctoritatem excellentiæ habere tibi videntur, quos regali Christi caractere, & notâ, insigniri oportet, ut Sacerdotii Christi vim, & operationem in cæteros, cum fructu derivent? nonne Rex dici posse videtur, qui ad regnandum unctus est, quamvis casu aliquo regno exciderit? Quot Regum infelices obitus defleamus, qui prius regno privati, quam vitâ fuerant? Eos tamen Reges dicimus, in quibus nihil regium, siue in corpore, siue in animo fuerit, præter relationem, ad præcedentem consecrationem, ad augmentam Regiæ dignitatis maiestatem adinventam.

Tu sublimem Sacerdotii unctionem, quæ animam magis, quam corpus consignat, & indelebili notâ afficit, adeo parvi facis, ut irrisoriè Presbyteros, Jurisdictionis expertes, unctos tamen, & consecratos, ad spiritalem principatum, *Imperatores* voces. Et cum S. Greg. lib. 4. c. 5. in 1. Reg. c. 10. scribat, *Qui in culmine ponitur, sacramentum suscipit unctionis*: tu depositâ ordinis Hierarchici, & Sacerdotalis reverentiâ, in nomen Imperatoris jocus, & Sacerdotale divinißimum officium, audes dicere; *Et ille Vester, qui Missæ suæ operam locat audituris, quam magnus Imperator est? quia non Hierarchizat actu, mysticum Eccle-*
sie

secratione , radicem accepit Jurisdictionis , ut supra probatum est , & ad Jurisdictionem etiam consecratur , esto fortè consecratus, Jurisdictione nondum donetur.

Disce tandem, Sacerdotem , qui per unctionem, & consecrationem suam Ecclesiæ Rex princepsque constituitur , sed cujus virtus, sine subditis , & Jurisdictione , imperfecta est ; ex eo, quòd Jurisdictionis, nomine alterius , exercendæ potestatem obtineat, ad Vice-Regis, non Regis officium sublimari : eumque Ecclesiastici principis dignitatem, sine populis, & Jurisdictione, habitu, non actu, consequi ; officium verò, atque principatus perfectionem actu nancisci , cum subditos proprios habuerit , cum Jurisdictionem sortitus fuerit, & proprii Episcopi, vel Parochi officiis alligatus, sui ordinis ac muneris, non solum receperit potestatem , verum etiam obligationem contraxerit.

Disce denique, ob eminentiam, & sublimitatem, gradus Clericalis, ob destinationem ad Clericatum, nomine populi factam, pro quo scilicet, instar Leviticæ tribus, Deo consecratur ; ob Regiam notam, per sacramentum ordinationis . Sacerdotalis ordinis viris impressam ; ob assimilationem eorum cum Deo , & approximationem ad ipsum majorem ; ob potestatem, circa corpus Christi, quam ordines Hierarchici ,

chici, propiorem, non Hierarchici, remotiorem habent, in qua potestas circa populum, radicaliter, ex prædictis, ob Jurisdictionem voluntariam, quæ in omni functione sacra, Episcopi, Presbyteri & Diaconi, reperitur; ob inaugurationem, & consecrationem, quæ majestatem dignam imperio confert, & sacrum aliquem principatum, in ordinationibus Hierarchicis infert, dispositionem verò ad eundem, in non Hierarchicis inducit, ob has, inquam, omnes rationes, non solum Episcopos, Presbyteros & Diaconos, verum etiam inferiorum ordinum, & graduum Clericos, *πρεσβυτερων*, seu superioris dignitatem, honorem, auctoritatem quandam, & præsentiam, ac præfecturam supra populos, etiam exclusâ Jurisdictione, habere, dici posse.

C A P. I I.

Veneratio, & Auctoritas, Clericis debita, à PP. asseritur.

HOC doctrinæ Hierarchicæ principium, à me doceri, si renuis, at PP. doctores hujus veritatis, non respuis. Orig. Hom. 7. in Hierem. *Nos, inquit, qui putamur aliquid esse, qui in Clericatus vobis ordine præsidemus. In tantum, ut quidam de minori gradu, ad hunc locum cupiant pervenire, nosse debetis,*

De præeinentia Hier. supra Monach. 405
debetis, non statim in eo nos esse salvandos,
quia Clerici sumus. Multi enim & Presbyteri
pereunt, & laici beatissimi reperiuntur: Sed
si ordinem Clericatus, & mereamur pariter, &
habeamus. Quia igitur sunt quidam Clerici,
non ita viventes, ut & ipsi ex ordine, capiant
fructum, & ornamento suæ sint dignitati.

Expende singula, & Clericatum, gra-
dum superiorem Laicali ordine, agnosces,
ac dignitatem, & honorem, non solum
potestatem: eamque demum dignitatem,
in qua, qui constitutus est, ratione sui or-
dinis, toti populo præsidere videatur.

Idem sive Orig. sive Cypr. lib. de singu-
lar. Cleric. Clericos omnes alloquens,
Contemplamini, inquit, quid sit populo sancto
præesse, & considerate, quale sit, divinis sa-
cramentis insistere. Alteris placere debent, qui
alteris vivunt, & talis convenit cura sincer-
tatis sacratis, qualis sunt sacrata ipsa, quibus
exhibent obsequia servitutis, ne circa dominum
offendant ipsi, quod tractant, aut circa popu-
lum, incipiant impedire, quod prædicant.

Legis, Clericos populo sancto præesse,
divinis sacramentis insistere, aliis vivere,
aliorum instructioni vacare, sacra admini-
strare: quibus proinde, non offendiculo,
sed exemplo, & gratiæ esse debeant; ser-
vitutem ergo Clericalem, summam esse
dignitatem, quam qui habet, præesse dici
possit, ex iis verbis facile conjicies.

Sed

Sed audi, quomodo ipsi duces, ex suo statu, principesque vocentur: *Non est, ait, quod vobis in hac persuasione deceptoriam blandiamini, ut quia spirituales estis, velitis inter flagitiosorum armenta versari, nec vos inhabiles pro Clericatus dignitate; quia majores majoribus consueverunt afflictiones occurrere. Acrius divitibus, quàm pauperibus invidetur, & non inopes, sed locupletes infestat, infestatio sœva latronum. Pius duces & principes, quàm milites, ab hostibus appetuntur in pugna. Et paulò post, etiam Ecclesiæ Senatores eos vocat; Sic igitur ambulate, sic agite, ut semper in Clericis, Ecclesiæ Senatus candidus constet. Ecclesiæ Senatum, Presbyteros esse, supra, ex Ignat. demonstravi; liceat etiam mihi, aliud agenti, utrique adjungere, Hier. in c. 3. Isai. dicentem: *Et nos habemus in Ecclesia, Senatum Presbyterorum.**

Atque ex eo collige, Presbyteros istos, quos tu, tanquam missæ suæ operam locantes, irrides, & imperatores magnos scurriliter appellas, Christi imperatoris magni, vicarios esse; Ecclesiæ Senatores, Consiliarios Episcopi, ex suo statu, ad hoc scilicet ordinatos, ad hoc inauguratos fuisse, quantumcunque nec populum fortassis habeant, nec actuali Jurisdictione donentur, nec eorum consilio, Ecclesia indigeat, nec exposcat.

Denique addit idem Author, adhortans Cleri-

Clericos, *severitas*, inquit, in vobis, circa *feminas vigeat*, *auctoritas polleat*, *vigor teneatur*, *gravitas veneretur*. In Clericis scilicet omnibus, sicut in convictu, *severitatem*, ita in conditione *vigorem*, *auctoritatem*, *venerationem* admittit, quæ tu omnia excludis, solam eis, ab ordine potestatem, solum officium ipsis concedi propugnans, *auctoritatem* verò ab eis, non solum *iurisdictionis*, verum etiam *excellentiæ* *ablegans*.

Liceat tantillum ad hujus consecutionis explicationem excurrere, videndumque quid *auctoritatis excellentiæ* nomine, quam Hierarchiæ charismatum tribuit, Ordini denegat, hic bonus vir intelligere voluerit, ut ea explicatione, *venerationem* toti ordini Clericali, ipsum ademisse intelligas, *Auctoritas*, inquit, *duplex*, *altera cum imperio*, & *Iurisdictione conjuncta*, ut in principe civitatis, qui *jus publicum facit*, & *leges scribit*, in quo *suprema in omnes auctoritas* *residet*. Alterâ, non ex *iurisdictione*, sed ex *quâdam excellentia profecta*, quales *virorum gravium*, & *sapientium*, quorum *responsa pro oraculis*, facta pro exemplis sic habemus, ut ea *tamen nullam parendi necessitatem inducant*.

Alibi, Regularium ordinem, cum Seraphinis comparans, hæc pronuntiat, ipsum etiam *auctoritate* ad Deum adducere: non illa, quæ *conjunctam* habet *iurisdictionem*, sed

S

quæ

Sed audi, quomodo ipsi duces, ex suo statu, principesque vocentur: *Non est, ait, quod vobis in hac persuasione deceptoriam blandiamini, ut quia spirituales estis, velitis inter flagitiosorum armenta versari, nec vos inhabiles pro Clericali dignitate; quia majores majoribus consueverunt conflictiones occurrere. Acrius divitibus, quam pauperibus invidetur, & non inopes, sed locupletes infestat, infestatio sava latronum. Pius duces & principes, quam milites, ab hostibus appetuntur in pugna. Et paulò post, etiam Ecclesiae Senatores eos vocat; Sic igitur ambulate, sic agite, ut semper in Clericis, Ecclesiae Senatus candidus constet. Ecclesiae Senatum, Presbyteros esse, supra, ex Ignat. demonstravi; liceat etiam mihi, aliud agenti, utrique adjungere, Hier. in c. 3. Isai. dicentem: Et nos habemus in Ecclesia, Senatum Presbyterorum.*

Atque ex eo collige, Presbyteros istos, quostu, tanquam missae suae operam locantes, irrides, & imperatores magnos scurriliter appellas, Christi imperatoris magni, vicarios esse; Ecclesiae Senatores, Consiliarios Episcopi, ex suo statu, ad hoc scilicet ordinatos, ad hoc inauguratos fuisse, quantumcunque nec populum fortassis habeant, nec actuali Jurisdictione donentur, nec eorum consilio, Ecclesia indigeat, nec exposcat.

Denique addit idem Author, adhortans Cleri-

Clericos, *severitas*, inquit, in vobis, circa *feminas* *vigeat*, *auctoritas* *polleat*, *vigor* *teneatur*, *gravitas* *veneretur*. In Clericis scilicet omnibus, sicut in convictu, *severitatem*, ita in conditione *vigorem*, *auctoritatem*, *venerationem* admittit, quæ tu omnia excludis, solam eis, ab ordine potestatem, solum officium ipsis concedi propugnans, *auctoritatem* verò ab eis, non solum *jurisdictionis*, verum etiam *excellentiæ* *ablegans*.

Liceat tantillum ad hujus consecutionis explicationem excurrere, videndumque quid *auctoritatis excellentiæ* nomine, quam Hierarchiæ charismatum tribuit, Ordini denegat, hic bonus vir intelligere voluerit, ut ea explicatione, *venerationem* toti ordini Clericali, ipsum ademisse intelligas, *Auctoritas*, inquit, *auplex*, altera cum imperio, & *Jurisdictione conjuncta*, ut in principe civitatis, qui *jus publicum* facit, & *leges* scribit, in quo *suprema* in omnes *auctoritas* *residet*. Alterâ, non ex *jurisdictione*, sed ex *quadam excellentia profecta*, quales *virorum gravium*, & *sapientium*, quorum *responsa* pro *oraculis*, facta pro *exemplis* sic habemus, ut ea tamen nullam *parendi necessitatem* inducant.

Alibi, Regularium ordinem, cum Seraphinis comparans, hæc pronuntiat, ipsum etiam *auctoritate* ad Deum adducere: non illa, quæ *conjunctam* habet *jurisdictionem*, sed
S quæ

quæ sublimi quadam majestate eminet, quæ à virtute orta, veneratione potiùs, quàm imperio, socios dignitate pares, pietate inferiores coërcet, & invitat, quam sapientibus deberi diximus, & non sine probabilitate, Seraphinû, supra Angelos alios, possumus assignare.

Agedum, vir zelose, Monachorum ordinem, Clericis præfer, sit ille tibi, sapientiâ, sanctitate, prudentiâ venerabilis, iis omnibus destitutus, Clericalis ordo despicabilis videatur; vilis ille tibi, nulliusque apud populum auctoritatis sit; plûs apud te Laicorum, vel Monachorum, sacris minimè initiatorum, responsa possint, quàm totius Clericalis ordinis, & ordinatorum Sacerdotum, quos *legis divinæ custodes*, Aggæus & Malach. c. 2. Prophetiarum suarum, esse, affeверant. Prudentia, sapientia, scientia, quæ ad conciliandam fidem plurimum possunt (nam de sanctitate vobiscum Sacerdotes contendere, piaculum ducis) Monachorum ordini magis, quàm Clericorum, agnatæ sint naturæ dotes; illius potiùs, quàm hujus ordines tibi videantur.

Quæ omnia, quamvis execrandum totius Cleri contemptum, ac factum præsumptiosi monachi immodicum præferant, nec sine horrore dici, vel audiri possint, ea tamen omnia tibi condono, quæ in homines peccas: At non erubescis, in Deum hæc convitia jaceře, & in Christum ejus,
ut

ut nempe Clericalem, seu Sacerdotalem ordinem, exclusâ jurisdictione, non eminere sublimi auctoritate, putes, quæ à sanctitate ordinis orta, à gradus excellentiâ, à configuratione cum Christo, ejusque Characterè, à participatione ejus virtutis, ac præcellentiissimæ potestatis, à consecrationis & benedictionis ineffabili dignitate, non admirationem solum excitat, non fidem, sed obsequium, reverentiam, & subjectionem quandam exposcit.

An nescis, solere etiam in Republica, ad obsequium, reverentiam, submissionem, homines magis, personæ alicujus status, & conditionis dignitate, quàm pietate & sanctitate alterius inflecti? Exempli causâ, æquam esse eam, quæ apud homines vigere solet, principis reverentiam, ut apud populum, auctoritatem aliquam habeant, qui in comitatu ejus sunt, qui ex ejus domo, qui insignia aliqua, & ornamenta ab ipso acceperunt; qui ejusdem cum ipso sunt equestris, seu militaris ordinis, qui dignitate aliqua militari, vel juridica præcellunt, quamvis in eos, ex populo, quibus venerationi sunt, nihil vi, nihil coërcitione possint.

An ignoras, eum semper ordinem, in quavis benè constituta Republica, constitutum esse, ut inferiores statu & conditione; iis assurgant, loco cedant, obsequium

deferant: Doctioribus autem, sapientioribus, melioribus similiter assurgere, vel honoris ac reverentiæ eadem officia exhibere, minimè teneantur. Atque ideo Clericalis ordinis viris potius, quàm monachis obsequi monentibus, inservire rogantibus, non irasci objurgantibus, populi debent, potius quàm monachis, quantumlibet piis, juxta illud Hier. Epist. ad Heliod. *Mibi ante Presbyterum sedere non licet*: & innumeras PP. sententias, quæ Sacerdotibus obtemperandum, & Clericis asserunt.

C A P. III.

Auctoritas & veneratio Clericis debita, vel ipso ordinationis, & Clericatus titulo.

HÆc igitur causa est, ob quam passim, non solum Episcopi & Presbyteri, verum etiam reliqui Clerici, *reverendi, reverendissimi, & venerabiles*, dicantur. Sic enim Novel. 5. de Monach. in Præf. Monachi sine elogio nominantur, Episcopi *sanctissimi*, Clerici *reverendissimi* dicuntur: in Epil. Novel. 8. *Deo amabiles Metropolitæ, reverendissimi Episcopi, & Clerici* nuncupantur. Tit. Novel. 126. est, *de sanctissimis Episcopis, & Deo amabilibus, & reverendissimis Clericis & Monachis*. cap. verò 1. ejusd. Novel. *Sanctissimi Episcopi, & Presbyteri, Diaconi,*

Diaconi, Sub-diaconi, Lectores, & omnes alii *venerandi Collegii*, dicuntur, qui scilicet in Clerum allekti, quoquomodo fuerint. c. 18. *Reverendissimi*, Clerici dicuntur; 20 *Reverendissimi* item Presbyteri, & Diaconi: passim tum ead. Novel. tum alibi, Clerici hoc elogio exornantur, monachi nunquam.

In actis Ephesini, & Chalced. Conc. Clerici passim eodem honorifico nomine insigniuntur. Chrys. non solum Episcopos, quod semper ferè facit, sed & Presbyteros; imò & Diaconos, hoc vel simili Epitheto afficit, nam v. g. Epist. 26. ὁ πμωτάτος, *reverendissimum*, seu *venerabilem*, Presbyterum appellat: 62. πμωτάτος, & ἱεραρότατος, *reverendissimum* & *religiosissimum*: 67. Theodotum Diac. iis verbis, affatur, quæ honorificentissima sunt. κύριε μὲ πμωτάτε & ἱεραρότατε, *reverendissime ac religiosissime mi Domine*.

Sidonius Apollin. Epist. 2. lib. 3. Constantium Presbyterum *religione venerabilem*: Epist. 5. lib. 6. *venerabilem Dominum*, nominat, eamque denominationem, ex clericali ordine provenire, egregiè confirmat, lib. 4. Epist. 4. de Faustino loquens, *Sed provectū ætatis, ex militia Clericali, cūm esset amabilis prius, cæpit modò esse venerabilis*; & reverentiam, maximè propriam, Ordini Clericali, demonstrat lib. 5. Epist. 7.

Hi sunt, qui invident, tunicatis otia, stipendia Paludatis, & reverentiam Clericis, originem nobilibus, confessum prioribus. Corippus similem loquendi rationem secutus est, lib. 3.

Hinc Levitarum venerabilis Ordo Canentum.

Cætera infinita propè, hujus rei testimonia, prætermitto, quæ miror viro erudito, vel ignota esse, vel si hæc novit, adeo immemorem ipsorum fuisse, ut auctoritatem ex veneratione profectam, Clericis detraheret, & Monachis, seu charitatis professoribus, juris Canonici, Theologiæ DD. attribueret. Nolo uberiores istam disputandi segetem hîc attingere, de honore & reverentia, sacris hominibus debita: quam ex incogitantia, ni fallor, præcipiti, contentionis studio abreptus, Clericis, quo titulo ordinati sunt, adversarius abrogavit. Notior est observantia, Clericis debita, quàm ut probari debeat. Vide & quæ dicuntur quæst. XII. & seqq.

C A P. IV.

Venerationis & auctoritatis Clericorum, aliqua rationes proferuntur.

OPortunus tamen hîc admonendi locus Clericos ideò passim, tum legibus civilibus, tum PP. sententiis, *reverendissimos*

mos dici, ut discamus, eorum, etiam exclusâ jurisdictione, tantam ex ordinatione debere esse reverentiam, ut quemadmodum lege 18. & 19. cod. de Sacrosf. Eccl. lege 33. 37. cod. de Episc. & Cleric. & alibi passim, venerabiles domus dicuntur, quæ Deo dicatæ sunt, & ad divinum cultum distinctæ: ita Clerici venerabiles & reverendi dicantur, quod & Deo dicati sint, (quod Monachis competit) & ad publicum Dei cultum, seu Divinum ministeriû (quod Monachis non competit) consecrati, Deique vice nobis loquantur: quod nec Monachis, eo præcisè titulo, quo Monachi sunt, tribui non potest.

Has reverentiæ Clericis debitæ causas, agnovit Constantin. Imp. apud Euseb. nam lib. 1. de ejus vit. c. 35. *οἱς θεῷ λατρεύουσιν*, omnes Dei ministros, cultus observantiâ complexus dicitur, & non tanquam vulgares homines, sed *τοῖς αὐτῷ θεῷ κειραίνουσιν*, Deo suo consecratos, & lib. 3. c. 22 *εἰς τὸ πατέρας ἢ καὶ μᾶλλον προσεῖναι θεῷ*, ut Patres quippe, imò & Dei prophetas, omninò honorificè reveritus fuisse. Ut Patres quidem, quia per Divini verbi prædicationem, & sacramenta, quæ sunt vitæ spiritualis semina, spiritalem in lucem parturigines edunt: ut Prophetas verò, quia Dei oracula nobis & voluntates revelant.

Sufficerent itaque istæ rationes, ut Clerici venerabiles & reverendi dicerentur,

dici tamen *reverendos*, addo, quòd eis cæteri, ex Laicali ordine, maximè obstricti sunt, à quibus scilicet divinissima beneficia recipiunt: quemadmodum enim, patribus præsertim & patronis, jure civili, ob recepta ab eis beneficia, reverentia debetur, lege apud Cels. §. *adversus*, ff. *de doli except.* Ita propter eandem rationem, quâ Laici, toti Clericali ordini, maximè sunt obligati, à quo maxima ad salutem media recipiunt, veneratione maximâ Clericos prosequi debent, & jure illi, *reverendissimorum* elogio, insigniuntur, habentque in Laicos auctoritatem, non tantum excellentiæ, verum etiam beneficentiæ.

Frustra verò à Sacerdotibus, cæterisque Clericis, maximè in ordinibus Hierarchicis constitutis, jurisdictionem præscindit, & auctoritatem coercitivam, quæ cum in corpore toto Hierarchico resideat, in toto clero, in omnes ex eodem ordine, etiam jurisdictionis expertes, diffunditur. *Episcopatus*, siquidem Cypr. lib. de unit. Eccl. *unus* est, Sacerdotium unum est, Clericorum collegium unum.

Nec extra unitatem cæterorum Episcoporum, nec extra unitatem & concordiam Sacerdotum, nec extra Hierarchiæ integrum corpus, Episcopus ullus, Presbyter, Diaconus, aut alius minister, suo legitime fungitur officio, quamvis unus sit, qui ma-
num

num imponat, Episcopus, à toto tamen Episcoporum collegio, quodammodo probari, opus est, cujus unitati cohæret, is, cui manus ad ordinationem imponitur, in cujus rei signum, & Presbyteri cum Episcopo, Presbyterum ordinante, manus simul imponunt, & Episcopi cum Episcopo, antistitem consecrante. Unus est Presbyter, qui consecrat, sed idem sacrificium offerunt, dispersi toto orbe Presbyteri, atque in sacra liturgia sacerdos dicit, *Memento, Domine, famulorum tuorum, pro quibus tibi offerimus, vel qui tibi offerunt, in typo unitatis*, inquit Aug. l. 3. de Bapt. & c. 17. *Petro dominus dedit potestatem. ut id solveretur in terris, quod ille solvisset.*

Addit, & illam unitatem, unam columbam dici, & qui per accipitrem baptizatur, validè tamen baptizari, quòd per ipsius columbæ ministerium baptizetur: & cap. seq. *Pax*, inquit, *Ecclesiæ, dimittit peccata, & ab Ecclesiæ pace alienatio, tenet peccata.* Item, *Petra enim tenet, Petra dimittit: Columba tenet, columba dimittit: unitas tenet, unitas dimittit.*

Mysteria ista non capis, familiari itaque exemplo compellabo: quid enim, si alicui Patrifamilias, operam suam famulus locat, nunquid & fratres, & cognatos, & consanguineos ejusdem reveretur, ipsisq; tanquam aliquam auctoritatem habentibus, in quibusdam saltem levioribus, parere æquum ac religiosum putat. Tu verò, qui sub aucto-

ritate Episcoporum, Presbyterorum, & Diaconorum aliquorum es, non cæteros ejusdem ordinis fratres, ac veluti collegas, venerationi habendos putabis? non aliqua eorum apud te erit auctoritas, quæ te, solâ reverentiâ tantorum nominum, eaque agnatione spiritali commoveat? irreligiosus es, si non te iis moveri, ac flecti finis.

C A P. V.

*Expressiora pro præsentî veritate,
PP. testimonia.*

SEd nimium diu in quæst. adeò facili, ac perspicua, hæremus. Alia PP. commemorabo dicta, in quibus vi ordinationis solius, auctoritatem quandam magisterii, ac dignitatem, quæ non multum, ab auctoritate jurisdictionis recedat, Clericis, præsertim in Hierarchicis ordinibus constitutis, attribuunt.

Greg. Nyss. Orat. in Bapt. Christi, disertè id tradit, & eleganter explicat, iis verbis, *Eadem item verbi vis, etiam Sacerdotem augustum & honorandum facit, novitate benedictionis, à communitate vulgi segregatum, cum heri, ac tempore superiori, unus è multitudine ac plebe, esset repente redditur præceptor, præses, Doctor pietatis, mysteriorum latentium præsul.* Bas. in c. 3. Isai. in hæc verba, & *seniorem*, Presbyterum ordinatum dicit, qui *præsidentiâ cathedræ, dignus censetur, jamque adscri-*

adscriptus est ordini Presbyteratus, qui talis est Presbyter, aut circumfert Characterem Presbyterii. Quibus diversis verbis, ordinationem describit, eamque significat, per quam proinde Cathedræ præfidentiam obtineri, non obscurè insinuat.

Ambros. seu quisquis Ambr. nomine pervetustus, eique *ὁ πρεσβύτερος*, in Epist. S. Paul. commentaria scripsit erudita, in c. 4. prior. ad Timoth. ordinationem videtur credisse, nisi ad docendum potestatem (saltem incompletam non daret) eaque duo, potestatem in Christi corpus verum, & mysticum, tanquam individuo nexu connexa, proponit; *ad hoc enim, inquit, creatur dux populo, ut hujus salutis sollicitudinem gerat, admonendo, docendo, ut fructum habeat ordinatio, quem ad hoc Deus utique constituit, ut proficiat saluti plebis suæ, &c.* Paulò post, *Prophetia est, quâ eligitur, quasi Doctor futurus idoneus: manus verò impositiones, verba sunt mystica, quibus confirmatur, ad hoc opus electus, accipiens auctoritatem, teste conscientia suâ, ut audeat vice Domini, sacrificium Deo offerre.*

Auctor oper. Imp. in Math. quod vulgò nomine Chryf. laudatur, Hom. 40. Quis est prior filius & populus: prior enim populus creatus: deinde Sacerdotes, qui regunt populum. Et paulò post, Sacerdotes autem magis videntur obedientiam promittere Deo; præcipuè per

hoc ipsum, quod specialiter in Dei ministerio constituuntur. Nam qui Doctor populi constituitur, &c. Item, Sic Sacerdos, & omnis Clericus, etsi specialiter non promittat, tamen per hoc ipsum, quod Doctor constituitur aliorum, &c. Ex mente itaque auctoris istius & Sacerdos ordinatur propter populum, & eo ipso, quod in ministerio constituitur, radicaliter saltem Doctor populi constituitur. Quæ ipsius creatio eum obstringit, ut forma populi fiat ex animo, cui & exemplis & Doctrinâ præluceat, obligatio verò populo imponitur, ut eidem & auscultet attentius, & acquiescat gratius, & obsequatur sollicitius, & honoris reverentiam religiosius exhibeat.

Quàm sæpè, quàm candidè, in eam sententiam, locutus est Hier. ad quàm scilicet, plura ipsius loca à nobis sup. cit. non oblique alludunt, sed rectà collimant: ad eam ista quoq; tendunt, i. ex Epist. 9. ad Salvian. Pro officio Sacerdotii, omnes Christianos, filiorum, loco diligimus, & profectus eorum, nostra est gloria. Hæc suo nomine Hier. scripsit & ad ignotam scripsit Presbyter Hier. sed sine jurisdictione, qui nec se Ecclesiæ adscribi passus est, quam regeret, nec propter humilitatem, ut testatus est Epiph. Epist. 60. inter Hieronymianos, Debita nomini suo exercere sacrificia, ausus est, & laborare in ea parte ministerii, quæ Christianorum præcipua salus est.

Ille

Ille ipse tamen Hier. quia sacerdotii in ordinatione dignitatem obtinuerat, *Patrem se fidelis populi*, audet dicere : auctoritatem sibi in admonendis Christianis vindicat : *Officium hoc esse sacerdotii* jactat : hanc Sacerdotis curam, omnes Christianos complecti, asseverat : nec ab ea se Monachi immunes jactent : nam idem Hier. Epist. seq. ad Fir. ea verba, non sine bile effundit, quæ adversariis rectè congruunt, qui auctoritatem excellentiæ Monachatui tribuunt, quam sacerdotali ordini adimunt, qui sacerdotium, in jurisdictionis expertibus, ab omni auctoritate & principatu eximunt, solam potestatem eis relinquentes, dignitatis suæ, & auctoritatis vacuam : *quasi verò*, ut ait Hier. *& ipsi aliud sint, quàm Monachi, & non quicquid in monachos dicetur, redundet in Clericos, qui Patres sunt monachorum : detrimentum pecoris, pastoris ignominia est : sicut è regione, illius monachi vita laudanda est, qui venerationi habet, sacerdotes Christi, & non detrahit gradui, per quem factus est Christianus.*

Corollaria eorum verborum, potes facile colligere, si velis. I. Monastici status prærogativas, Clericis meliori jure convenire. Alterum, Clericos monachorum Patres esse. III. Nec ad hanc paternam auctoritatem, Clericorum in monachos requiri jurisdictionem : huic auctoritati lo-

cum esse, statim atque quis gradum affecutus est. iv. Istum gradum, etiam jurisdictionis experti, venerationem & auctoritatem conciliare, propter officia & munia, quæ cum jurisdictione, conjunctus idem gradus exequitur: quia & per accidens est, quod jurisdictionem non habet, & idem gradus est in jurisdictionis compote, & experte, quâ unitas sacerdotii facit, ut quod unius functio est, unitatis officium appelletur. Quod toties docuit adversus Donat. Aug. dum *unitati*, *claves dari*, asserit, dum *unitati*, *purgandi vim*, attribuit.

C A P. V I.

Clerici non tantum Patres, sed & præceptores & magistri populi.

PATRIS auctoritatem Clericis attributam, audisti, Præceptoris & Magistri, iisdem, etiam inferioris gradus, Clericis attributam, jam si lubet audire, ab eodem Hier. poteris lib. 2. comm. in c. 2. ad Tit. *Nemo eorum, qui in Ecclesiis sunt, te segniter agente, sic vivat, ut se putet esse meliorem: qualis enim ædificatio erit Discipuli, si se intelligat, magistro esse majorem? Unde non solum Episcopi, Presbyteri & Diaconi, debent magnoperè prævidere, ut cunctum populum, cui præsent, &c. verum & inferior gra-*

gradus, Exorcistæ, Lectores, adiutii, & omnes omnino, qui domui Dei inserviunt: quia vehementer Ecclesiam Dei destruit, meliores Laicos esse, quàm Clericos.

Appositè sanè ad nostra principia Hier. licèt solos Episcopi, Presbyteri. Diaconi gradus Hierarchicos; populis cum jurisdictione præsidentes, statuatur, universos tamen cujusslibet inferioris gradus, atque ordinis Clericos, magistrorum auctoritatem habere in populos, asserit, quia & populis ad benè agendum exemplo præire, & ad instruendos formari ac disponi debent.

Quin etiam idem Hier. lib. 2. comm. in c. 2. Mich. Episcopis, Presbyteris, & Diaconis, tanquam ducibus ac Patribus; plebem Dei, eo ipso titulo, quo solùm ad eos gradus ordinati sunt debere esse subiectam, ostendit iis verbis: *Duces populi, & ipse Dominus per Prophetam, duces populi mei nescierunt: stulti filii sunt, non intelligentes sapientes sunt, ut faciant mala, sed quia nescierunt me, & opere vocabulum destruxerunt: propterea filii stulti sunt, & non intelligentes, prudentiam ob hoc tantùm habent, ut subjiciant sibi simplicem gregem, & proterant pedibus suis, benè autem facere, & regere populum nescierunt. Nolite credere in ducibus, non in Episcopo, non in Presbytero, non in Diacono, non in qualibet hominum dignitate. Non hoc dico, quod istiusmodi gradibus in Ecclesia Dei,*

Dei, non debeat esse subiecti, quicumque enim maledixerit patri, aut matri, morte morietur. Et Apost. docet, præpositis in Ecclesia obediendum, sed quod aliud, sit, honorare duces, aliud spem habere in ducibus, honoremus Episcopum, presbytero deferamus, assurgamus Diacono, & tamen non speremus in eis, quia aliàs hominis in homine vana, & certa spes est in Domino.

Denique lib. 4. comm. in c. 22. Hier. Quicquid, inquit, Regiæ domui dictum est, intelligant Episcopi, sociique eorum presbyteri, atque Diaconi, & omnis ordo, Ecclesiasticus, quod si fecerint, quæ præcepta sunt, & inter cætera, innocentem sanguinem non fuderint, scandalizantes minimos quosque, & percutiendi conscientias singulorum, obtineant traditam sibi à Domino dignitatem. Sin autem facere noluerint, atque contempserint, ipsi redigunt Ecclesiam Dei in solitudinem, ingrediamur autem de genere David, per portas Ierusalem, & sedeant super thronum ejus, qui interpretatur fortis manu, & ascendunt currus & equos, quando refrænant; & suas & populi perturbationes, & composito in Ecclesiam ingrediuntur gradu.

In quo ultimo testimonio, tria hæc observare convenit: 1. Quoslibet Ecclesiastici ordinis viros, etiam infra Diaconos, quibus certum est, nullam nec olim, nec jam, ordinariam coercitivæ jurisdictionis potestatem
at-

attributam esse, Regiæ tamen dignitatis participes depingi, ratione scilicet suæ ordinationis, & modo à nobis supra explicato.

II. Percutiendi conscientiam singulorum, habere dici potestatem, quia ipsis quoque jus convenit, privatim saltem admonendi, & adhortandi legitima potestas, ex eo, quod sint Clerici, quibus etiam, exemplo prælucendi Laicis, obligatio incumbit.

III. Iisdem, & suas, & populorum perturbationes refrænandi, auctoritatem quandam convenire, ob eandem rationem.

Aug. c. 33. lib. 1. de Mor. Eccl. asserit, non solum Episcopos, Presbyteros, & Diaconos, verum etiam alios, inferioris gradus ministros, sanandis magis, quam sanatis hominibus præesse.

Paulin. Nolan. quamvis se in sacerdotium, sine certa sede, sine Ecclesia, cui addiceretur, consecratum testatur, Epist. 6. ad Sever. idque se refugisse, studio vitæ privatæ, ostendat, ac proinde jurisdictionis expertem, & officii Pastoralis, significet, tamen eo ipso, quoquo sacerdos creatus esset, Pastoribus se ad censitum, testatur, Epist. 23. ad Amand. quâ nempe nuntiat, se invitum sacerdotem creatum, & opem ejus, ac Delphini Burdegal. sibi ratione unitatis Ecclesiasticæ debitam exposcit, quo in statu se ipse putaret, iis verbis describit: *igitur quia facti sumus de hostibus*
cives;

cives, de longinquis proximi, de omnibus pastores, & positi sumus in fundamento Apostolorum & Prophetarum, &c.

Concil. Arvernense, can. 13. ad quam dignitatem & excellentiam, sublimentur Clerici, per ordinationem suam, ostendit, dum ait: *Cum Presbyteri atque Diaconi, sublimi dignitatis apice prorogantur, actibus omnino renuntient sæculi, & quisquis ille est Presbyter atque Diaconus, Divino munere, benedictione percepta, &c.*

Denique ne innumera alia proferamus, Clericos omnes, etiam præesse quodammodo populis, auctoritate Tol. 8. Conc. & Isid. Hisp. quem sequuntur ferè cæteri, rituum Ecclesiasticorum scriptores, conficio: conc. quidem Tol. 8. c. 8. de omnibus ordinatis loquens, absurdum siquidem est, eos, qui cæteris simpliciores & Laicos habent, docere, ad alicujus ordinis promoveri statum. Isid. verò Hisp. Epist. ad Ludifr. Clericos in singulis officiis præesse, sed Episcopum præordinatorem iis præferri, docet iis verbis, & dum præsit unusquisque in singulis, ipse tamen est præordinator incunctis. Idem quoque lib. 2. de off. c. 4. Clericos per tonsuram, ad Regnum & sacerdotium destinari, testatur, quòd verò, inquit, de tonsa capite, superius circuli corona relinquitur, sacerdotium regnumque Ecclesiæ, in eis existimo figurari. Tiara enim apud veteres constituebatur in capite.

De præeminentia Hier. supra Monach. 425
pite sacerdotum, hæc ex bysso confecta, rotunda
erat, quasi sphaera media, & hoc significabatur
in parte capitis tonsa, coronæ autem latitudo,
aurei est circuli, qui Regum capita cingit. U-
trumque itaque signum exprimitur, in capite
Clericorum, ut impleatur etiam quadam cor-
poris similitudine, quod scriptum est, Petro de-
cente, vos estis genus electum, regale sa-
cerdotium.

C A P. VII.

*Ex ritu consecrationis Clerici, & mona-
chi, huic auctoritas deesse, illi conve-
nire, demonstratur.*

NOn itaque, quod ex Isid. Hisp. pro-
tulimus, solius Isid. testimonium, ne-
que eorum tantum, qui Isid. exscripserunt
sententiam, cujusmodi sunt Conc. Aquis-
Gran. PP. sub Ludovico Pio, c. 1. Raban. lib.
1. de instit. c. 3. Hug. à S. Viët. lib. 1. de Sacram.
p. 3. c. 1. sed totius Ecclesiæ, quæ, ut Cle-
ricorum omnium auctoritati, in populos
suffragetur, eo ritu præcellentiam Clerico-
rum, ac prærogativam superioris cujusdam
erga inferiores indicari voluit, quo in Cle-
ricorum album, ac Catalogum, aliqui trans-
feruntur.

Unde hoc interest, inter monachorum,
& Clericorum capillitium, quodd monachi
ex

ex toto olim tonderentur, prout indicant S. German. Episc. Constant. in Theor. ubi hæc de monachis, *tonderi verò caput ex toto.* Salvian. Massil lib. 8. de vero judic. & provid. Dei, in fine, *non sine causa, itaque istud fuit, quod intra Africæ civitates, & maxime intra Carthaginis muros, palliatum & pallidum, & recisis comarum fluentium tubis, ad cutem tonsum videre,* Paulin. Epist. 7. *nec improbâ attonsi capitis fronte crinisti, sed castâ infirmitate, capilium ad cutem cæsi.* Socrat. similiter lib. 3. c. 1. de Julian. Apost. *ad cutem abrasus, monachorum simulavit vitam.* De aliis taceo.

Clerici verò, ut jam diximus atque ex Euseb. lib. 10. Hist. c. 4. ex S. Germ. in eod. Theor. Greg. Turon. in vit. PP. c. 57. aliisque confirmari potest, in coronæ formam attondentur. Hoc discrimen adhuc servatur in fratribus Laïcis, qui ad cutem raduntur; non in Clericis, qui Clerici simul & monachi fuerunt, illi enim nobilioris status, putà Clericalis tonsuram retinent.

Illud autem in tonsura Clericali, Ecclesia consultò servavit, ex eoque diverso ritu, diversam utriusque benedictionem ac consecrationem esse, contendit. Clerici enim in modum coronæ attondentur, ut ad Regnum, ac Sacerdotium, consecrari videantur. Monachi verò toto capite raduntur,

tur, quod luctus & poenitentiae signum est, tam in S. Scriptura, Job. c. 2. Isa. 22. Mich. 1. quàm apud prophanos auctores, Herodot. lib. 1. Hist. Lucian. de Dea Syr. & alios passim. Atque aded significatur, monachos ad lugendum, non ad docendum, aut regendum, institutos esse, juxta illam Hier. sent. contr. Vigil. *monachus non Doctoris, sed plangentis habet officium.*

Eaque de causa statuit III. Syn. Tol. c. 22. ut publicè poenitentibus, imprimis Episcopus vel presbyter caput tonderent, ut sic in cinere & cilicio poenitentiam agerent. Cum ergo monachorum ordo, aliquid affine habeat cum Clericis, aliquid cum poenitentibus, ut jure dubitavit olim Sydon. Apoll. lib. 4. circa personam Maximi, *Quod genus vitae, de tribus arripuisset ordinibus, monachum ageret, an Clericum, poenitentemve.* Ided & Clericos, & monachos, & poenitentes, tonderi Ecclesia jussit; sed diverso Clericos ritu à monachis & poenitentibus: Clerici enim, rectorum plebis ordini inferuntur, per tonsuram clericalem, in modum Coronæ: poenitentes verò, & monachi, quia poenitentiam profitentur, voluntariam aut coactam, abrasâ cute tonderi jubentur.

Turbare hæc omnia videtur, auctor nomine Hier. cit. à Gratian. 12. q. 1. c. *duo sunt.* Cujus testimonio triumphat adversarius,

farius, quasi monachos cum Clericis confuderit, sic enim ipse, *duo sunt genera Christianorum, est autem unum genus, quod mancipatum divinis officiis, & contemplationi & orationi, ab omni strepitu temporalium, cessare convenit, ut sunt Clerici, & Deo devoti, videlicet conversi, &c. Hi namque sunt Reges, id est, se, & alios in virtutibus regentes, & ita in Deo regnum habent. Et hoc designat corona in capite: Hanc coronam habent ab institutione Rom. Ecclesiæ, in signum Regni, quod in Christo expectatur: rasio verò capitis, est temporalium omnium depositio.*

Nihil hic de Clericatu monachorum, quem ex eo tam acriter propugnat adversarius, quem duntaxat moneo, ne dum de monachis hîc præsertim agi contendat, eorum tonsuram cum Clericali confundat, & utrique Regnum assignet, quod solis Clericis assignat, non item monachis.

Quid ergo eo loci pseudo-Hieronimus? certè si dixerò, duas extremas vivendi rationes hîc solum depingi, laïcorum scilicet & Clericorum, nec monachalem ordinem commemorari, nisi ut particeps est utriusque continentię scilicet, & aliarum virtutum, supra vulgi captum, cum Clericis, & subjectionis & passivæ tantum purgationis, seu illuminationis, vel perfectionis cum Laïcis, facile solvetur hic nodus adversario insolubilis, qui scilicet affirmare non potest,

potest, monachos in formam coronæ antiquitus fuisse attonfos, cùm tam solidè contrarium probaverimus.

Quòd si etiam dixero, eorum, qui divino officio, & contemplationi mancipantur, duogenera statui: unum Clericorum, cui competit corona, sui que & aliorum regendorum potestas; alterum converforum seu monachorum, cui solùm convenit ratio capitis, & regendi sui ipsius, ac cupiditatis propriæ domandæ sollicitudo, adversarii pariter argumentum eludam & elidam; nec à sensu istius auctoris, quicumque ille sit, abcludere videbor. Ac proinde non unâ duntaxat viâ, ab adversarii, quos in hoc testimonio struxit, laqueis, expeditus evadam.

C A P. VIII.

Testimonium S. Francisci profertur.

QUòd si antiquorum PP. testimonia, minùs aliquem movent, hunc moveat S. Francisci, egregium in suo testamento testimonium; hic Spiritu Dei totus afflatus, dominorum auctoritatem, in sacerdotibus etiam facinorosis agnoscit, eo ipso titulo, quòd Sacramentum Christi, suo ore conficiant, aliisque distribuunt, sic enim

enim loquitur : *Et ipsos* (sacerdotes Parochianos) *& omnes alios volo timere, amare & honorare, sicut meos dominos, & nolo in ipsis considerare peccatum, quia Filium Dei discerno in ipsis, & Domini mei sunt; hæc propter hoc facio, quia nihil video corporaliter in hoc sæculo, de ipso altissimo Filio Dei, nisi sanctissimum corpus, & sanguinem suum, quod ipsi recipiunt, & ipsi soli aliis ministrant.*

Hic SS. virorum, & fidelium, fuit sensus, qui in sacerdotibus, divinam potestatem, oculo fidei intuebantur. Tu verò, religiose vir, qui nihil, nisi quod ad factum, & exteriorem quandam gloriam faciat, intueris, non sacerdotibus, Christi vicariis, Christi majestatem, auctoritatem ipsis conciliantem, conspicias, sed charismata, quæ exteriùs prodeant, admiraris, iis etiam naturales scientias, & linguarum peritiam adnumerat, quibus in tua Hierarchia charismatum, auctoritatem excellentiæ vendicas; vide, utrum hoc sit habere scientiam SS. utrum ad mensuram sanctuarii, de divinis rebus, judicium sit.

Fusè autem hunc errorem refellimus, quia ex ejus refutatione, dignitas Hierarchiæ ordinis, omniumque tam majorum, quàm minorum ordinum splendor, ac majestas elucet. Nunc alius investigandus,

De præeminentia Hier. supra Monach. 431
gandus, non minori alacritate, num scilicet loco pœnæ, ad sacerdotium, sicut ad monasterium detrudi aliquis, æquo jure possit.

QUÆSTIO X.

An loco pœnæ, ad Sacerdotium, sicut ad Monachatum detrudi aliquis, æquo jure possit.

CAPUT I.

Criminosos ad Monachatum promoveri posse, non Sacerdotium.

EX eodem Cleri contemptu, provenit etiam hic error, lapsos & facinorosos, prioribus sæculis, non minùs ad Sacerdotium, pœnæ loco, quàm ad monasterium adactos: Hac igitur ex parte, nullam Sacerdotis supra Monachatum, conciliari prærogativam.

Ex hoc errore, hæc corollaria consequuntur, quæ cleri dignitatem omninò conspurcant. I. Æquè ad Clericatum facinorosos recipi posse, ac ad Monachatum. II. Dignitatem maximam, quam vix præ sublimitate appetere alicui licet,
T pœnæ

poenæ loco, infligi jure posse. III. Eam dignitatem, quæ poenitentibus ab Ecclesia denegata est, poenitiæ agendæ idoneam esse.

Quis autem nesciat, nulli facinoroso Clericatum patere: obstare Apostolum, quo minùs scelere aliquo constricti, (& idem de aliis, proportionem servatâ, dicendum) ad Episcopatum (sub quo continetur Presbyteratus) & Diaconatum reciperentur: obstare infinitas prope Ecclesiasticas leges, v. g. Apost. can. 12. 13. 14. & aliis. Clem. I. Epist. 2. Steph. Epist. I. ante fin. & aliorum veteris ævi Rom. Pontif. quorum scripta dubia sunt, sed quæ ab Ecclesia, medio ævo, recepta & probata, auctoritatem habuerunt, Nic. I. c. 9. Carth. IV. c. 67. & 55. Taurin. c. 7. Araus. I. c. 24. Andeg. c. 5. Gerund. c. 8. Syric. Epist. I. ad Himer. c. 9. & ad Orthod. Epist. 3. Innoc. I. Epist. 4. c. 4. Epist. 23. ad Syn. Tol. c. 5. & 6. Leon. I. Epist. 89. ad Afric. Gelas. Epist. 9. c. 3. ad Episc. per Lucan. Hormisd. ad Episc. Hisp. c. 1. Mart. Epist. Unic. ante med. Greg. lib. 3. Epist. 26. Januar. Calarit. atque innumera alia passim summorum Pontif. & Concil. decreta, quæ ante actæ vitæ innocentiam requiri volunt, ut nullius criminis conscientia teneatur, aut infamia laboret, qui ad Clericatum adspirat.

E con-

E contra verò, ad Monachalem vitam, eos, quos criminum conscientia pungit, se conferre, & Ecclesiæ semper votum fuit, & monastica institutio eos recipere, semper permisit. Gelas. Epist. 1. aliis, 9. ad Episc. per Brutios & Lucaniam constitutos, c. 3. & 4. discrimen istud inter Monachatum & Clericatum ostendit, decernens, *Ut si quis etiam, de religioso proposito, & disciplinis monasterialibus eruditus, ad Clericale munus accedat, imprimis ejus vita, præteritis acta temporibus inquiratur, si nullo gravi facinore probatur, &c.* supponit enim, aliquos monasterialibus disciplinis institutos, & religioso proposito ornatos, quorum vita ante acta impurior, & gravibus criminibus infecta exstiterat, quos utique hac lege, à sacra ordinatione repellit.

Illud quoque discrimen apertè ostendit Taras. Episc. Constant. Epist. Joanni Presb. & Hegum. seu Monacho, aut mundanarum rerum contemptori, quæ exstat in fine VII. Syn. Tom. 3. Conc. Bin. p. 1. sect. 1. iis verbis, *novi & meretrices, & publicanos, per pœnitentiam: verùm nullum ex his, in Sacerdotii dignitatem numeratum, nisi fortè id, ante Baptisma commiserit. Novi & Monachos aliquot, cùm in mundo essent, omni libidine conspurcatos: cùm autem solitariè viverent, tanquam faces in orbe resplenduisse: nullum*

tamen ex his Sacerdotem ordinatum. Quod si autem id semel, atque iterum factum est, non tamen confestim legem in Ecclesia præscribit. Scimus sanctam Mariam prius meretricem fuisse, postea factam continentem, non tamen inter Diaconas relatum.

Imò etiam Climac. criminosos potius, quàm alios, ad monasteria, utpote magis hac exercitatione indigentes, provocat, de inanis vitæ fuga, grad. I. dum ait, nemo pondus multitudinemque peccatorum attendens, indignum se monasticâ professione dicat, ne se ita decipiat, ut seipsum humilem existimet, si aut fruatur voluptatibus, arduam virtutis semitam ingredi detrectat, prætendens excusationes in peccatis. Nam ubi putredinis plurimum est, ibi maximâ medicorum arte opus est, ut ea putredo omnis depuretur. Qui enim sani sunt, medicorum tabernas non adeunt. Si vocante nos terreno, & mortali rege, & in suum obsequium coram se militare nos jubente nihil moraremur, neque occasiones quæreremus, sed omnibus dimissis illi summâ cum alacritate pareremus.

Criminosos recipit ad probationem monasticam, S. Fructuosus in Reg. 19. Qui gravioribus culpis se deliquisse cognoscunt, primùm eos optamus regule colla submittere: sub probatissimo abbate, in monasterio desudare, & cuncta retroacta peccata, tanquam

quam ægrotos medico spirituali seniori manifestare, & sicut publicè peccaverunt, publicè pœnitere, & pœnitenda ultrò non committere.

Rationem mox assignat, cur æquum sit, illos recipere, nihil prodest, inquit, si quis hodie subtrahitur, à Regni potentia exclusus, seriò constrictus, hodie carceri est mancipatus: ita nihil obstat, si hodie à carcere quis rapitur, & in regali honore constituitur; nullus ei sordes carceris imputat, sed hoc solùm laudat, quod in eo miratur. Sed & paulò post addit: Plerique sunt in monasteria ingressi, qui ob immanitatem scelernm excesserunt numerum, quos sancti canones foras Ecclesiæ agere pœnitentiam censuerunt, & nisi in fine vitæ, communionem percipere negaverunt.

Neque verò eos tantùm recipi, approbat Bas. resp. ad interr. 10. in Reg. fusiùs disputatis; verùm etiam ex Christi Dom. verbis probat, Math. 11. *Venite ad me omnes qui laboratis & onerati estis, & ego reficiam vos.*

Cautelam tamen adhibet, ut facinorosi districtiùs prohibeantur, tententurque accuratè, quatenùs dignoscatur, num eos ex animo pœniteat, num constans habeat pœnitentiæ agendæ propositum: ne videlicet, si absque examine reciperentur, cæteris detrimento forent, & institutum Monasticum, falsis probris, & nequissimis

maledictis magnoperè infamarent: nulla, ex vetustis monasticis regulis, criminoforum receptionem, in ordinem Monachorum, improbat: exempla passim plurima in vitis SS. PP. habemus, eorum, qui è terribili vita, ad Monachatum suscepti, Christi bonus odor fuerunt, & prioris vitæ maculas, splendore vitæ superarunt.

C A P. II.

Non requirit status Monachalis, peccata præcedentia, necessariò.

NEque idè tamen Monasticum statum, peccata præcedentia requirere, dicimus: imò nec facinorosos, magis idoneos monastico statui, quàm innocuos, sed magis ejus indigos, censemus. Nam cum Dion. c. 6. Eccl. Hier. convenientissimum esse credimus, ut quis *actionum suarum sanctimoniâ expiatus sit*, & priùs expurgatus sit, quàm Pontificis ordinis statum exprimere conetur, priùs de Hierarchicis traditionibus edoctus, quàm ad sacros ritus, propiùs intuentes, admittatur.

Et id visum etiam consentaneum Bas. loc. mox cit. dum ait, *verùm neque illud tamen permitti debet, ut quisvis illotis pedibus, in sanctimoniam Domini mandatorum ingrediatur. Sed quemadmodum Dominus noster*
Iesus

Iesus Christus, adolescentem illum, qui ad ipsum accesserat, de superiore ejus vita percontatus est, cùmque rectè actam fuisse illam comperisset, quod ad perfectionem amplius præterea desiderabatur, ad illum jussit adjungere, quod ubi fecisset, num demum sequendi se, ipsi potestatem fecisset.

Criminosi igitur non magis idonei sunt monasticæ exercitationi, imò minùs idonei, iis, qui in sæculari habitu, innocenter, & laudabiliter egisse, visi sunt, magis tamen remedio indigent, per monasticam vitam comparando, qui majori morbo, putà gravioribus criminibus detinentur: eò enim duriorẽ illis vitam agere, necessum est, quo antea delicatiorẽ, & voluptatum inquinamenti fætidiorem egerint.

Adverte igitur Monasticæ, & Clericalis vitæ differentiam. Hæc ad divinum cultum & ministerium institutos, nonnisi castos, puros & integros admittit; vetus siquidem illa formula, etiam à paganis recepta, teste Cicer. 2. de leg. *ad Deos castè ad-eunt*, sacros ministros puros esse debere, probat: quod convenientius ad veram religionem transtulit Isa. c. 52. dum ait, *Mundamini, qui fertis vasa Domini*: transtulit David, Ps. 23. dum sibi interroganti, *Quis ascendet in montem domini; aut quis stabit in loco sancto ejus?* Resp. *innocens manibus,*

Ἐκ mundo corde, &c. transtulit Ecclesia, dum in sacris clamare solebat Diaconis
αγία τοῖς ἀγίοις, sancta sanctis.

Illa verò alia vita putà monastica, in squallore pœnitentiæ; in carnis maceratione, in austeritate exercitationis consistens, nec innocentes abigit, nec nocentes repellit, quibus prostremis, aptissimum est satisfaciendi, pro commissis peccatis, remedium.

Cùm itaque ab unoquoque Monachalis, pro pœnitentia agenda, eligi possit, id eo monasticam vitam, pœnitentiæ statum esse, concludit Syn. Trull. c. 43. *licet omni Christiano vitam asceticam eligere, Ἐ rerum ad vitam pertinentium deposita tempestate, Monasterium ingredi atque instar monachi tonderi, in quacunque prolapsione deprehensus fuerit: servator enim noster Deus, inquit, eum, qui ad me venit, non ejiciam foras. Tanquam ergo Monachalis vitæ instituto, agendam in pœnitentia nobis vitam, describente, ei, qui ad illud germanè ac sincerè accedit, acquiescimus, ac favemus, nec ulli ei mores impedimentum afferent, quò minùs proprium scopum adimpleat.*

C A P. III.

Quo sensu, Monachi pœnitentes dicuntur.

PRæstò est etiam alia ratio, ob quam monasticæ vitæ status, dicatur *pœnitentia*, quia nempe humilitatis status est ac subjectionis, cui summa gloria, in gloria calcanda, summus honor in honoribus, & dignitatibus fugiendis acquirenda proponuntur: quæ cum ex scopo suo *vitam uniformem* sectetur, multiplici Clericalis functionis diversitate, occupari non potest, absque aliqua sui imminutione, ut postea dicemus, quam tamen imminutionem, charitate excitante patitur, ut animas Deo lucretur, atque ideo ad *pœnitentiæ* statum, humilitatis & subjectionis, licèt longè supra vulgarem vitam magis accedit: quia quibus in pœnam peccati, pœnitens privatur, iis, ut Deo perfectiùs adhæreat, ipsa renuntiat: quæ quidem Clericalis status, utpote perfectior, licèt diversa, & si in animos vulgares incidunt, vix cum pietate consentientia, majori perfectione conjungit.

Hanc rationem tradit Syn. Constant. sub Phot. in Templo SS. Apost. congregata, prima secunda à Græcis dicta, eo can. quem citant Grat. septima, q. 1. c. *Hoc*

nequaquam, & Ivo p. 7. c. 144. editio verò Rom. correctâ, fusiolem refert, quàm apud Balsam. habeatur, pauca hæc ex ipsa, prout habentur apud Gratian. referemus, Præcipit S. Synodus, ut quicunque de Pontificali dignitate, ad pœnitentiæ descenderit locum, nequaquam jam ad Pontificatum resurgat. Monachorum enim vita, subjectionis habet verbum, & discipulatus, non docendi vel præsidendi, vel pascendi alios. Porro in eo can. Monachicum pœnitentiæ statum dictum fuisse, apparet, eò quod humilitatis & subjectionis status esset.

Denique propter habitum, pœnitentibus & Monachis similem, propter austeritates easdem in monasteriis devorandas, quæ in pœnitentiâ agentibus, imponebantur, quis dubitet, hoc vitæ genus, ob similitudinem, pœnitentiæ statum, & Monachos pœnitentes dici potuisse.

Non ego hujus vocis auctor, sed sanctissimi PP. quos reprehendat quis, necessum est, si me, inter pœnitentes, annumeratos fuisse Monachos, asserentem, redarguere voluerit: hos ego inter pœnitentes, à PP. relatos dico, sed non eo sensu, quo interpretari aliquis possit, quasi scilicet eos, ad pœnitentium publicorum classem, redigere voluerim, quos ab ipsis expressimè discerno, & super omnes populos fideles,
 supe-

superiori gradu, statuo. Itaque non pœnites publicè, à me dicuntur Monachi, sed eo sensu, quo Hier. Epist. 77. ad Marc. Presb. Celedens. *In sacco, inquit, & cinere volutatus, de Episcopis sententiam ferimus, quid facit sub tunica pœnitentis, Regius animus? catenæ, sordes, & comæ, non sint diadematis signa, sed fletus.*

Etenim non hæc propria Hieronymo loquendi ratio, sed aliis passim PP. communis. Salvian. lib. 5. de Prov. Monachos carpens, qui vestem exuerint, non mentem, satis ostendit, pœnitentiæ nomen sibi venditasse, qui religiosam vitam profiterentur. Tum præcipue illi religiosi, novorum honorum ambitores, & post acceptum pœnitentiæ nomen, amplissimæ, ac prius non habitæ potestatis emptores, &c. Quomodo igitur tales isti, pœnitentiam se egisse, non pœnitent? S. Bern. apertè se, utpote professione Monachum, pœnitentibus inserit, Epist. 99. ad Oger. *Quamquam non solum temporis, sed nec meæ professionis est, huic rei operam dare, quam postulas, nec possibilitatis adimplere, quod optas. Siquidem vel Monachi, (quod videor) vel peccatoris (quod sum) officium non est docere, sed lugere. Indoctus quippe, quod & verè me fateor esse, si præsumat docere, quod nescit, nihil agit. Docere itaque nec indocto est in promptu, nec Mona-*

cho in usu, nec pœnitenti in affectu.

In eandem sententiam Petr. Vener. lib. 4. Epist. 17. ad Bern. Monacho utpote pœnitenti, nigras vestes convenientiores esse, iis verbis asserit, *Nam, ut quod sentio, fatear, visum est, ut mihi videtur, magnis PP. illis, nigrum hunc, de quo agitur, colorem, magis humilitati, magis pœnitentiæ, magis luctui convenire.* Imò & in ordine monastico, Canonorum Regularium, (quod tamen non adeo strictè ipsis convenire, existimo) pœnitentiæ statum, agnovit Stephan. Tornac. Epist. 77. in quam se, Augustini regulæ sectatorem, *habitu pœnitentiæ*, in Ecclesia S. Evurtii, Aureliæ suscepisse, affirmat. Clariùs autem & apertiùs, Zonar. in Can. 2. Syn. Constant. primæ secundæ cit. ait, siquidem Monachorum vita, pœnitentiæ quædam professio est.

C A P. IV.

Quàm sit diversa ratio pœnitentiæ, in Clericis, & Monachis.

QUomodo igitur in pœnitentiæ statu, Clericalis, cum Monastica vita coæquatur? Monastica certè vita, pœnitentiæ agendæ convenientissima, quia & abjectionis, & luctus professio suscipitur. De
abjectione,

abjectione, atque humilitate, jam dixim. de luctu & planctu, jam breviter dicemus: nam Hier. Epist. 62. ad Joan. Antioch. *Ob id enim & ego Antiochiam, & ille (Vincen- tius) Constantinopolim, urbes celeberrimas de- seruimus, non ut te in populis prædicantem lau- daremus, sed ut in agris, & solitudine, adoles- centiæ peccata descentes, Christi in nos miseri- cordiam deflecteremus.* Chrys. Hom. 14. in 1. ad Tim verè domus luctus sunt mona- steria, ubi cinis atque cilicium, Ubi solitu- do, ubi visus nullus, nullus negotiorum sæcula- rium strepitus, ubi jejunia, ubi humacuba- tiones.

Bachiarius Epist. ad Januar. Est Bosor citra Iordanem in solitudine, quæ interpretatur an- gustia, id cellula monasterii parva vel modica est, & Ramoth de sorte Galaad, quæ interpre- tatur excelsa mors, vel visio mortis; verè enim excelsa mors, pœnitentia esse, dicenda est, cum mortificatis membris deducatur homo ad ex- celsa Cælorum. Arnob. in Psal. 106. Quare hoc inquiunt mundi homines, quid sibi volunt isti religiosi, plorare, sedere, in vinculis, in tene- bris. Bern. Epist. 99. cit. ad Oger. & Epist. ad Henr. Mogunt. 3. 3. Monachus non ha- bet docentis, sed plangentis officium quippe cui oppidum, carcer esse debet, & solitudo paradisi- sus. Et serm. 64. in Cant. Et scimus, Mo- nachii officium esse, non docere, sed lugere.

Opponuntur porro, apud Bern. lugendi

& docendi status, Clericorum scilicet & Monachorum. Unde & argumentum desumo: quantum Monasticum statum, pœnitentia decet exterior, tantum Clericatum, cui docendi munus incumbit, dedecere: nam pœnitentia exterior, in solitudine præsertim exercenda; Clericalis functio in multitudine: hæc magisterii gradum habet, & sublimitatem professionis, ac claritudinem, illa depressionis, subjectionis, & humiliationis, & status est, & occasiones quærit: hæc pietatem, ad omnia utilem, illa corporalem exercitationem amplectitur: Hujus tota pulchritudo, tanquam *Filiæ Regis ab incens*, illius in exterioris pœnitentiæ *fimbris aureis*, species afulget.

Quare Monachalis status sanctitati, pœnitentia exterior, nunquam repugnare, existimata est; sed lapsi Monachi, ad publicam admissi sunt pœnitentiam, ipsisque manus ad pœnitentiam, publicè imposita fuit: nam & Bas. resp. ad interr. 8. reg. breviorum, Monachos pœnitentes recipi debere, statuit. Et S. Benedicti reg. c. 44. ac Conc. Duziac. 2. c. 7 modum pœnitentiæ publicæ, pro gravioribus criminibus infligendæ, præscribunt, & in cæteris monasticis regulis, plurima circa eandem pœnitentiam, statuuntur: passimque in vitis PP. innumera ejusdem pœnitentiæ, Monachis

nachis impositæ exempla, occurrunt.

E contra verò, nec Clericis, pœnitentia publica imponi debet, nec qui pœnitentiam publicam subierunt, ad Clericatum, & Ecclesiasticos ordines, promoveri possunt. Primum siquidem vetant, aut vetitum ostendunt, & Diaconis, qui pœnitentiæ subjiciendos negant, Syric. Epist. 1. 14. Leo Epist. 92. ad Rustic. Narbon. c. 2. Conc. Carthag. 5. c. 11. Hibern. sub Leon. 3. Raban. c. 1. de pœn. Pœnitentiale Rom. & alii passim auctores.

Alterum autem, innumeris prope Canonibus prohibitum fuit, putà Conc. Nyc. 1. c. 10. Carthag. 4. c. 68. & 64. Agath. c. 43. Aurel. 3. c. 6. Epaun. c. 4. Arelat. 2. c. 25. Tolet. 4. c. 18 & 53. Tolet. 13. c. 10. Ancyr. c. 1. 2. & 3. Syric. Epist. 1. c. 15. Innoc. 1. Epist. 6. Agap. Maced. & Mauria. Episcopis Apul. Zozim. Epist. 1. c. 3. Hilar. Epist. 1. c. 4. Gelas. Epist. quibusdam 1. aliis 9. ad Episc. Lucan. c. 5. Horm. Epist. 4. c. 1. Greg. lib. 2. Registr. Epist. 25. Greg. 2. Epist. 3. ad Cler. & Pleb. Turing. Zachar. Epist. 4. ante med. vetustissimarum quoque Synodorum, in variis partibus habitarum decreto, cujus meminit Athan. in Epist. ad Rufinian. post princip. aliisque passim Ecclesiasticis legibus.

C A P. V.

Sacerdotium, vel Clericatum, pœnæ loco, imponi non potuisse, sicut Monachatum.

QUamobrem & Ecclesiasticos canones violant, & Ecclesiæ continuam praxim, imò & naturam, atque institutionem Clericatus pervertunt, qui pœnitentiæ loco, impositum cuiquam Clericatum (qua de re debet esse quæstio) æquè ac Monachatum, affirmant. Quomodo enim Clericatus, pœnitentiæ publicæ loco, imponi posset, si nec pœnitentia publica, cum Clericatu stare possit, nec Clericatus, pœnæ loco, haberi queat? pœna infligitur propter delictum, quod pœnam accersit, provocat, ac pœna dignum est; ideóque pœna definitur *noxæ vindicta*, seu *commensuratio fraudis*, lege sancimus, cod. de pœn. & *æstimatio de iecti*, leg. *sancitio*, ff. eod. atque nunquam dici potest, conferri aut præcipi cuiquam, vel suaderi Clericatus, propter peccatum.

Quomodo enim Clericatus, propter peccatum præcedens conferretur, vel iuberetur, quod propter peccatum prohibetur & denegatur? quomodo vindicta peccati diceretur, ea vitæ conditio, quæ & remunere-

muneratio virtutis esse debet, & plùs habet honoris, quàm oneris; plùs dignitatis, quàm molestiæ? Quomodo commensurari deberet Clericatus, vel ordinum sacrorum susceptio, delicto, sicut pœna peccato, cùm pœna major, majori delicto, minor minori debeat? è contra verò, quò quis flagitiosior est, eò magis indignus majori ordine, quò peccatum levius est, eò magis dignus est. Igitur nullâ ratione dici potest, pœnæ loco, Sacerdotium alicui jure impositum.

Illustratur tota hæc disputatio exemplo; nam quemadmodum Gratianus, Valentinian. Theodos. Imp. in infamiam decurionatus cedere putarunt, quòd quis pœnæ loco, curiæ dederetur; sic in infamiam Clericalis ordinis cedere, colligimus, si cui unquam, pœnæ loco, Clericatus datus censetur: quod ergo in causa pari censuerunt Imp. hoc nos meliori titulo, asserere possumus: Hæc siquidem decernunt illi, leg. *ne quis*, cod. Justin. de Decur. & Theodos. leg. 108. eod. *Omnes itaque omninò judices, tuæ censure subditos admonebis, ne quis eorum existimet, curiæ, loco supplicii, deputandum, cùm utique unumquemque criminofum, non dignitas, sed pœna debeat comitari.* Nos verò simili argum. concludimus, ne quis Theologorum, pœnæ loco, Sacerdotio dedi quemquam existimet, cùm pœnæ ea condi-

conditio sit, ut deteriorem faciat conditionem ejus, qui punitur, non meliorem: hominis autem, qui in Clericum promovetur, ex illa promotione, meliorem fieri, & ex Clericatu, non minimam unicuique accrescere dignitatem, nemo inficiari possit.

Nec dicas, parem esse conditionem Monachatus; nam Monachatus per se dignitas non est, nec is, qui invitè suscipitur, & in poenam imponitur, eam habet commendationem, quam habere solet; cum non ad eluenda crimina, sed ad præcavenda suscipitur: atque aded, poenæ loco, imponi saltem ex consilio potest, nec diffitebitur adversarius, quominus ipse saltem, ob præcedentia crimina, consuli possit, quorum tamen intuitu, unusquisque à Clericatu, & ordinatione removeretur: quin item possit, Monachalis vita, utpote austerior, peccati dici vindicta; quin pro mensura criminis, ea suaderi Monachalis conditio possit, quæ districtiorem habet, & severiorem observantiam. Quare absque errore summo, & contemptu Clericalis ordinis, nequit Sacerdotii, ea in re, supra Monachatum, quævis prærogativa negari.

C A P. VI.

Respondetur exemplis, quibus ad Sacerdotium, aliquos adductos liquet.

EXempla verò, quæ Regulares proferrunt, à proposito aliena, omninò esse videntur: nam tyrannica quædam facta, eaque duo vel tria proponunt, non Ecclesiasticam consuetudinem, non legem. Quid ergò, si per vim, & tyrannidem, coacti sunt aliqui, inire Sacerdotium hoc in Sacerdotii injuriam cedit? Hoc pari jure, ad Sacerdotium, & ad Monasterium invitos aliquos detrudi posse, monstrabit? Quam verum est, iniquæ causæ patronum, unde quaque argumenta accerere: nec posse falsitatem, nisi iniquitate defendi.

Simili certè argumentandi ratione, quia à Donatistis leguntur, apud Opt. Milev. lib. 2. Eucharistia canibus objecta; ab Arianis, calix benedictionis effusus, apud Athan. Apol. 2. ab hæreticis nostri sæculi, prophanis manibus, sacra ista attrectata, & in derisum exposita, nulla erit Eucharistiæ prærogativa, supra cibos communes; quin ipsa, sicut cæteri cibi, & canibus, absque sacrilegio tradi, & manibus prophanis attrectari, atque exponi queat.

Reprobas, ut opinor Doctor regul. hanc impiam & erroneam consecutionem, quam

quam tamen præsentī disputatione imitari: nam quia Meroveum Chilpericus, Leo I V. Imp. fratres jam Cæsares; Constantinus Gallum & Julianum, in clerum attonderi, malo utique exemplo, jusserunt, tu, nullam esse prærogativam Sacerdotii, contendis, quin pari jure, poenæ loco, infligi possit ac monasterii ingressus: imò ed temeritatis tua prorupit audacia, ut ex Conc. Tol. VIII. c. 7. probare coneris, etiam aliquam fuisse Monastici status prærogativam, supra Sacerdotium, inferi enim *possunt igitur homines, ex illorum opinione, nonnunquam ad Sacerdotium cogi: ad Monasticam professionem non possunt: non est ergo, ex illa parte, defæcaciior Sacerdotii, quàm status Monastici sanctitas.*

Ais, homines facinorosos & sceleratos, ad Sacerdotium cogi, licitè posse; si hoc affirmas, apertè repugnas Tolet. can. quem citas; si negas, nihil efficis: nam ex eo, quòd nefario & sacrilego ausu, contra Sacerdotii dignitatem, attentatum fuerit, non concluditur, minor Sacerdotii dignitas, sicut nec sacramentorum sanctitatem inferiore reddunt, quæcunque adversus eam, ab impiis & sceleratis attentantur.

Ais, forsan posse viros bonos & dignos Sacerdotio, cogi ad Sacerdotium, non item ad Monachatum. Neque, hoc, si verum sit, ad Sacerdotii diminutionem, sed
potius

potiùs ad ejus commendationem facit: nam ad Reipubl. munera, & dignitatem Reipb. necessariam, cogi bonos & industrios, dignitati & muneri publico probrosum non est, sed potiùs honorificum: nec pœnæ locum habere potest, ad quam subeundam, boni viri cogantur; non enim pœna bonis, sed malis infligitur.

Ais, creditum à PP. Tolet. consensum, ne quidem extortum, requiri, ad sacramenti valorem: neque hoc in eodem can. apertè video: neque si eod. can. apertè haberetur, idèd verum credendum esset, cujus jam contrarium, ab Innoc. III. definitum, ac Theologorum communi consensu firmatum est. Infers, ex eo can. Monachatus, ex mente Hispanor. PP. supra Sacerdotium prærogativam, idque ineptè: nam Hispanorum pro Monachatu, etiam renitentibus impacto, plura sunt testimonia, quàm pro Clericatu.

Breviter hæc omnia tibi ostendo, quod ut præstem, primùm opus est, ut tibi Conc. Tol. VIII. can. 7. de quo nobis præsertim disputatio est, ex Garf. Layft. editione, non multum ab editione vulgata differente, exhibeam: ita enim loquuntur PP. *Septimæ assertionis accessu, adit cætum nostrum, tam inverecunda progressio, quàm ignobilis ac detestanda præsumptio, quosdam enim, aut necessitatum, aut metu periculorum, adeptos*

adeptos fuisse novimus, Ecclesiasticarum officia dignitatum, & quoniam cum illis hæc impone-
rentur, id sibi fieri noluisse, testantur. Idcirco hæc spernere, atque ad pristina pertentant conjugia, moresque redire, tam nequiter Cæle-
stia jura solvantes, quàm promptè secularibus exstant illecebris inbiantes.

Mox verò duplici argum. hoc reprobant.
1. quod collatam ab Episcopo potestatem, nemo, ob ejus præminentiam, & dignita-
tem, rejicere possit: quod ubi in laudem Episcopalis dignitatis, quædam protule-
runt, ita inferunt; Quomodo ergo, quod in se recipit, à se rejicere poterit, cum hæc à nullo altero conferri, quàm solis Pontificibus novit, à quibus nec ligata solvi, nec soluta poterunt ab aliquo religari: Sic enim ad Petrum veri-
tas ait, quodcunque ligaveris super terram, erit ligatum & in cælo: & quodcunque solve-
ris super terram, erit solutum & in cælo. Nequaquam ergò aliquando poterit prophanari, quod Divinâ jussione, simulque Apostolicæ traditionis auctoritate, sacrum noscitur ex-
stitisse.

Alio argum. utuntur, ex perpetuitate, atque indelebilitate consecrationis, semel collatæ, ejusque adhærentiâ & firmitate, quolibet modo perfecta fuerit, adjungentes ista.

Verùm sicut sanctum Chrisma collatum, & altaris honor evelli non queunt, ita quoque
sancto

sanctorum decus bonorum, quod his compar habetur & socium, qualibet fuerit occasione perceptum, manebit modis omnibus inconvulsum. Ad exstirpandum verò radicitiùs hujus callidæ machinationis inutile argumentum, id sibi rationabiliter dari noverint in objectum, quod sacrosancti Baptismatis inappretiabile donum est semper: & sæpe non solum nolentibus, verum etiam quod majus est, nescientibus impertitur: sed hoc à nullo penitus profanari permittitur: quod si & hîc opponitur, necdum rationis capaces existere, qui hoc probantur accipere, hîc omnimodo conticescunt, quia si majores impunè non deserunt, quod parvuli, vel nesciendo, vel nolendo percipiunt, quantum magis non convenit violare, quod pro mortis, aut pœnarum evadendâ perniciæ, occultâ Dei dispensatione, dignoscitur obvenisse.

Ex quibus hanc conclusionem eliciunt, Recedant ergo talium desideriorum impudorati fautores, & licet inviti perceptorint, quod non merebantur habere, libenter tamen ob cæleste retineant præmium, quod nolendo, per terrenæ consecuti sunt necessitatis eventum: ut tamen inviti appetant bona diligere, quæ spontè videntur desides impugnare.

C A P. VII.

Enucleatur magis VII. can. Conc.

Tolet. VIII.

I. An-

1. **A** Utem non approbatur hoc can. violentè impactum cuique Sacerdotium, aut renitenti sacer-~~orde~~ collatus, proindèque ex hoc can. inferri non potest, approbatum ab Ecclesia unquam fuisse, quòd invitus aliquis ad Sacerdotium vel Clericatum trahatur: multò minùs ex isto can. inferri potest, ab Ecclesia unquam aut probatum aut factitatum, ut quis poenæ loco, ad Sacerdotium, vel Clericatum invitùs cogeretur.

II. Nec isto can. probabile est, agi de iis, qui poenæ loco, ad Sacerdotium detruderentur à principibus temporalibus, vel Magistratibus civilibus: quia enim non solet lex de iis fieri, quæ rarissimè contingunt, ideo nec de iis debet exponi, *l. ea quæ raro, 65. ff. de regul. jur. & l. antiqui, & ibi Gloss. verbo medietat. ff. si pars hered. c. statut. & ibi Gloss. de rescript. in 6.* atqui raro admodum accidit, ut cogerentur, & rariùs quidem, quòd quemquam poenæ loco, ad id compellerent; illudque si toto orbe rarum fuit, in Hisp. rarissimum, ex qua vix duo, aut tria exempla, quæ id utcunque probent, proferri possunt, cum tamen eorum exempla, si quæ forent, notissima extare deberent: quia vis istiusmodi nunquam, nisi in criminibus læsæ Majestatis, exhibita: quæ crimina ab historicis non tacentur.

Magnam

Magnam partem exemplorum, ex diversis provinciis, & sæculis, istius violentiæ perpetratae, profert lumen illud fulgentissimum eruditorum, Francisc. Hallier. Doct. Sorbon. lib. de SS. Elect. p. 1. Sect. 5. c. 1. §. 6. pag. 198. & 199.

Ex iis autem exemplis, constat, quosdam, qui timerent sibi à principe, ad Sacerdotium spontè confugisse; vel tanquam asylum, ne amplius timerent supplicium, quod sibi ab iratis principibus, vel invidis, vel suspiciosus, inferri metuebant, vel tanquam ad quietiorem statum, qui suspicionem affectati imperii, vel turbarum ciendarum tolleretur, quatenus scilicet ab iis minùs deinceps timeretur: alios verò, eosque paucissimos, à Principibus temporalibus, præter fas omne, violenter adaçtos, ad Ecclesiasticum gradum, non ut pœnam luerent alicujus criminis, sed ut quietiùs agerent, & movendi adversus ipsos, minùs oportunam occasionem haberent; non irrogatam itaque illis pœnam, in Sacerdotii susceptione, sed adempta turbandi media, impositam conditionem, ab omni tumultu magis abhorrentem, & innovandis Rebus publicis minùs commodam.

De iis itaque tam rarò contingentibus casibus, legem Tol. Conc. VIII. quæ in delinquentes, numero plures, ex verbis ipsius Conc. lata videtur, intelligendam, nemo

probabiliter suspicari potest, nec ab exemplis istis, præter communem morem, usumque quotidianum, argumentum ducere licet.

III. Probabilius est, intelligi sanctiōnem Tol. Conc. de iis, qui vel ob penuriam Sacerdotalium virorum, & Ecclesiæ indigentiam, quam Conc. *Eventum necessitatum, & terrene necessitatis eventum* appellat, vel desiderium populi vehemens, habendi aliquem in Clericum seu Sacerdotem, ex quâ populi impressione periculum ordinatus incurrerit, inviti, ordinati fuissent, quod frequentissimè sæculis istis accidisse, constare potest, ex c. cit. lib. de SS Elect. Hal. §. 4. de cuius rei æquitate, & iniquitate, disputatur eod. c. §. 7. sed quòd inviti aliqui, ad Sacerdotium, vel Clericatum ita assumerentur, non est ad propositum: nec ex eo magis probare potest, quòd poenæ loco, Sacerdotium alicui imponi possit, quàm quòd sanguis contineatur arteriis.

IV. Quòd etiam simpliciter invito, Sacerdotium, aut Clericatus collata, valida ac rata probentur; Tol. 8. apertè non dicit: neque verba ista, in quibus vim faciunt: quòd scilicet Hispani, sic ordinati, *Cùm hæc (officia Ecclesiastica) illis imponerentur, id sibi fieri noluisse, testati*, eoque prætextu, *ad pristina conjugia, moreque redire, per-*
tentasse

tentasse dicantur, intentum eorum evidenter probant: Nam dici posset, Hispanos istos, in ipsa ordinatione testatos, se antea noluisse, seque nonnisi vi ad consentiendum adaëtos, eamque coactam voluntatem, quæ tamen voluntas esset, ad ordinationem sufficientem esse, definiri: quo sensu, ordinari solitos invitos, explicat Aug. Epist. 204. Donato, dum ait, *Multi, ut Episcopatum suscipiant, tenentur invitati, includuntur, custodiuntur, patiuntur quæ nolunt, donec eis adsit voluntas suscipiendi boni operis.*

Vel certè dici posset reluctatos istos Hispanos, non ordinationis substantiæ, sed officiis, & obligationibus, eam consequentibus; atque adedò quod olim, in Ancyr. c. 9. Diaconis, in ordinatione reclamantibus, indultum est, ut nuptiis renuntiare minimè cogerentur, id sibi pariter indulgendum contendisse. Conc. autem Tol. v i i i. tanquam injustam eorum petitionem refutasse, ob allatas rationes, quæ si probant, obligationem Clericatus adnexam, invito ab Ecclesia imponi posse, probant, & renitenti Monachatum posse imponi.

v. Quamvis Tolet. v i i i. ratam simpliciter renitentis ordinationem esse, censuisset, nobis tamen id hodierno tempore sentire non licet: obscuram hanc olim quæ-

stionem fuisse, ex eo conjicio, quòd quidam omninò nolentes, olim ordinati fuisse videantur. Nam refert Theodoret. in Philoth. c. 13. Macedonio nescio, impactam à Flaviano Antioch. ordinationem, adeo utcùm ille rescisset, convitiis omnes & maledictis incesset, & baculo quo nitabatur, Pontificem persequeretur: & de Salamano, altero sanctissimo Monacho, refert, Pontificem civitatis, cujus erat vicus, in quo ipse morabatur, cùm viri virtutem intellexisset, voluisse illi dare, donum Sacerdotii, domunculæque, in qua habitabat, parte perfolsâ, manum ipsi imposuisse, & peregissee solemnem precationem, gratiamque, quæ ei advenerat, significavisse, ab eo tamen nullam unquam vocem elicere potuisse.

Quòd si hæc opinio, cujus contrarium docuit Aug. lib. 4. de Bapt. c. 24. Epist. 14. ad Bonif. & alibi, PP. Toletanis visa est probabilis, jam iis vera videri non potest, quandoquidem ab Innoc. III. c. *Major. de Bapt.* communique Theologorum & Canonistarum consensu, explosa est; ac proinde nec ex eo, in favorem Monachatus, arguere aliquid possunt, quam veram existimare non debent.

VI. Sive vera, sive falsa sit, parum ad institutam disputationem juvat: tum, quòd ex ea, non sequatur, quod probandum est, poenæ

pœnæ loco, Sacerdotium alicui vel Clericatum imponi; nec firmitas consecrationis Sacerdotalis, etiam nolenti adhærentis, ad ejus sanctitatem elevandam proferri queat. Quin imò, si id sentiant PP. Tol. scilicet, ut simpliciter invitus ordinetur, & ordinationi adnexam castitatis ordinationem, etiam nolens, suscipiat, id ad sanctitatem gradus istius pertinere putant, quem nolunt, nuptiarum commixtione, & reditu ad sæcularem vitam prophanari.

Tum denique, quòd si id senserint Hispani de Clericatu, multò magis de Monachatu, non ipsi solùm, sed & aliarum provinciarum Episcopi, clarioribus verbis id sensisse dicerentur. Lege Conc. Tol. iv. c. 48. & 54. Tol. x c. 6. Greg. Epist. 6. ad Aug. apud Gratian. 20. q. 1. c. *addidist.* Greg. i i i. Epist. 4. ad Bonif. Aurel. v. Syn. c. 18. Mogunt. sub Car. c. 23. Wormat. c. 22. & 23. Tribur. apud Gratian. 20. q. 1. c. *quem progenitor.* Isidor. apud eund. ibid. c. *quicumque.* Smaragd. in Expos. reg. S. Bened. c. 59. leges etiam canones, quos mox proferemus, 3. 5. & 7. ejusd. Conc. Tol. viii. quibus ad poenitentiam peragendam Clerici, in Monasteria detrudi, præcipiuntur.

Nunquam ergo Sacerdotium cuiquam simpliciter impactum, rarissimè & quidem à principibus quibusdam, humana, non

Divina sapientibus, renitentibus secundum quid, illumque statum potius, quam vel mortem, vel exilium intentatum eligentibus, loco poenæ, procuratum est, quorum sacrilegum Sacerdotii contemptum, Ecclesia nunquam probavit.

C A P. VIII.

Ecclesiam in Monasterium aliquos invitos detruxisse.

EAdem verò Ecclesia, lapsos, saltem secundum quid renitentes, in Monasterium, suis legibus detrudendos, probavit, quorum aliquos ad tempus, alios in perpetuum, sub Monastica regula, distringi voluit: alios in Monasterio, tanquam in carcere & custodia, non Monachos retineri, alios verò tanquam Monachos haberi, statuit: quæ etiam legibus civilibus confirmata sunt.

Primò quidem, quosdam non inficior, in Monasterio solùm, tanquam in carcere, & custodia detentos, non sub habitu & regula Monastica, neque Monasticam vitam professos, quis enim putet, hæreticos, ad Monasticam professionem, unquam ab Ecclesia receptos: ac Syric. & Innoc. I. Cataphrygas & Manichæos, ut refert Anast. in utriusque vit. toto tempore, monasterii

nafterii exilio damnasse, referunt; sed & quibusdam, damnatis ad mortem, quibus damnatio remitteretur, ad poenitentiam, Monasterium datum fuisse, probat Anast. Sinaita, q. 131. Illos autem sub habitu potius, Monasterium pro carcere habuisse, quàm sub habitu Monastico, tanquam religiosam vitam professum meruisse, nonne probabilius est?

Neque pariter Monasticam vitam professi, dici possunt, qui ad tempus solum, poenitentiae causâ, Monasterio traderentur, licet ad Monasticam, vivendi rationem servandam cogerentur, etsi fortè sub veste Monachi, utpote sub habitu poenitentiae, laterent; cum enim professio Monastica, perpetua esse debeat ac stabilis, ea saltem, quæ voto alligata est, qualis à tempore S. Benedicti, in Ecclesia Dei præsertim viguit, ideo ad eam admissi dici nequeunt; qui ad tempus tantum in Monasterium detrudebantur.

Plurimos autem solum ad tempus, poenitentiae causâ, in Monasterium fuisse detrusos, probant Conc. Lug. 1. sub Sigism. Rege Burgund. c. 3. *Quod si se Rex præcellentissimus, ab Ecclesia, vel Sacerdotum communionem, ultrò suspenderet, locum ei dantes, ad Sanctæ Matris gremium veniendi, SS. Antistites* (quos fortè poenitebat, quod Stephano, incesti crimine polluto, communicassent)

castent) in *Monasteria* se, absque ulla dilatione, prout cuique fuerit opportunum, recipiant, donec pacem integram, ad charitatis plenitudinem conservandam, sanctorum flexus precibus, pro sua potentia & pietate dignetur. Hisp. 11. c. 3. Desertorem autem Clericum, cingulo honoris, atque ordinis sui exutum, aliquo tempore, *Monasterio* religari convenit, sicque postea in *Monasterio* Ecclesiastici ordinis revocari. Nam non poterit in talibus, pervagationis aboleri licentia, nisi fuerit in eis, propter correctionem disciplinæ, subsecuta censura. —

Tolet. VII. c. 3. Presbyteri autem sive Clerici, quibus majoris honoris locus, apud eandem Ecclesiam fuerit, cujus Sacerdos obierit, si omni sollicitudine, pro exequiis, aut jam mortui, aut continuo antistitis morituri, ad com-
monendum Episcopum, tardi inveniuntur, aut per quamcunque molestiam animi, id negligere comprobentur, totius anni spatio, ad pœnitentiam in *Monasteriis* deputentur. S. Greg. lib. 11. indict. 6. Epist. 52. Joan. defens. Hi verò, qui eum, contra Dei timorem, & Canonum statuta condemnauerunt, excommunicati in *Monasterium*, ad agendum pœnitentiam, sex mensibus mittendi sunt: Et paulò post, Episcopi verò, qui eum ordinare præsumpserunt, vel perversæ ipsius ordinationi, præbuere consensum, iidem communione privati, sex mensibus, ad agendam pœnitentiam, in *Monasterio* deputentur.

Narbon.

Narbon. 11. c. 5. Clericum suum senio-
rem increpantem, vel injuriâ afficientem
ita punit, ut uno anno, in Monasterio, sciat
abjicere superbiam, unde inflatur. Justinian.
Nov. 123. c. 10. Interdicimus sanctissimis
Episcopis, Presbyteris, & Diaconis, Sub-dia-
conis, Lectoribus, & omnibus aliis, cujuslibet
venerandi collegii, aut schematis constitutis,
aut ad tabulas ludere, aut aliis ludentibus par-
ticipes esse, aut inspectores fieri, aut ad quod-
libet spectaculum, spectandi gratiâ venire: si
quis autem ex his, in hoc deliquerit, jubemus
hunc, tribus annis, à venerabili ministerio
prohiberi, & in Monasterium redigi.

De eadem temporanea pœnitentia, in
Monasterio subeunda, loqui similiter vi-
detur, Conc. Tol. 1v. can. 23. quo statui-
tur, ut pupilli & parvuli, in uno omnes
conclavi, sub probato seniore deputati,
qui traditis præceptis resultaverint, mona-
steriis deputentur, ut vagantes animi, &
superbi, severiori regulâ distringantur.
Exponendus etiam videtur, Conc. Nar-
bon. can. 6. & alii.

C A P. IX.

*Etiam in perpetuum, ad Monasteria,
detrussi nonnulli.*

IN perpetuum quoque, ad Monasteria,
plurimi, ob atrociam quædam crimina,
V. 5 præ-

præsertim ex Clericis passim relegari jubentur, sub Monastica regula continendi. Id statuunt Conc. Agathense, c. 50. Si Episcopus, Presbyter, aut Diaconus, capitale crimen commiserit, aut chartam falsaverit, aut testimonium falsum dixerit, ab officii honore depositus, in Monasterium retrudatur, & ibi tantummodò, quamdiu vixerit, Laicam communionem accipiat. Epaunense, c. 22. Si Presbyter aut Diaconus, crimen capitale commiserit, ab officii honore depositus, in Monasterium retrudatur, ibi tantummodò, quamdiu vixerit, communione sumendâ. Aurel. c. 7. De adulteriis autem honoratorum Clericorum, id observandum est, ut si quis adulterium, aut confessus fuerit, vel convictus, depositus ab officio, communione concessâ, in Monasterio, toto vitæ suæ tempore, retrudatur. Matiscon. II. c. 16. Uxor Sub-diaconi, Exorcistæ, vel Acolybi, mortuo illo, secundo se non audiat sociare matrimonio. Quod si fecerit, separetur, & in cænobiis puellarum Dei tradatur, & ibidem usque ad exitum vitæ suæ permaneat.

Tolet. IV. c. 44. Clerici, qui in quacunque seditione, arma volentes sumpserint, amisso ordinis sui gradu, in Monasterium, pænitiæ causâ, contradantur. Tolet. VIII. c. 3. Quòd si aliquis exstiterit, qui accuset, ille, qui hunc ordinem, munerum fuit acceptione lucratus, & suscepti honoris gradu privetur, & in Monasterio, sub perenni pænitentia religetur.

Et

Et v. Illi verò (Sacerdotes & ministri incontinentes) si omninò coërceri nequiverint, usque ad exitum vitæ suæ, Monasteriis deputati, disciplinis Monasticis maneant omninò subiecti. Item c. 7. qui est de Sub-diac. Quòd si hoc vulnere fuerint deinceps sauciati, mox erunt sub pænitentiae oneribus, usque ad extremum vitæ, Monasteriis religandi. Pelag. Constant. defens. c. Roman. d. 82. Romanus Ecclesie Theævensis Clericus, pro crimine adulterii, quod commisisse perhibetur, à Clericatus ordine depositus, in urbe Romana, ad agendam pænitentiam, in Monasterio, toto vitæ suæ tempore detrudatur.

Greg. Magn. lib. 1. indict. 2. Epist. 42. Petr. Sub-diac. De lapsis Sacerdotibus, vel quolibet ex Clero, observare te volumus, ut in rebus eorum, nullâ contaminatione miscearis, sed pauperrima regularia Monasteria require, quæ secundum Deum vivere sciuntur, & in eisdem Monasteriis, ad pænitentiam, lapsos trade, ut res lapsorum, in eodem loco proficiant, in quo agere pænitentiam traduntur, quatenus ipsi, ex rebus illorum subsidium habeant, qui de corruptione ipsorum, sollicitudinem gerunt. Item lib. 2. indict. 11. Epist. 27. Marinian. Abb. de Bonif. viro clarissimo, qui se injustè damnatum querebatur, decernit, Si in vestra cognitione, cujusquam eum facinorosi criminis reum esse putaverit, non solum Dominici corporis, & sanguinis ex-

V 6 commu-

communicatione privatus sit, verum etiam in Monasterium, ubi pœnitentiam agere debeat, retrudatur, ut criminis sui maculas, convenienti valeat, apud æternum judicem, lamentatione purgare. 94. Theod. Episc. Lilibæt. Paulum præterea, quemadmodum Episcopum, in Monasterio, in quo est, in pœnitentia volumus permanere.

Tolet. xi. Conc. c. 7. ejusdem poenæ meminisse videtur, dum pro gravioribus criminibus duo genera poenarum statuit, exilium scilicet, & retrusionem, supple, in Monasterium. Zachar. Papa, Epist. 11. ad Bonif. ejusdem quoque meminit, haud dubiè, his verbis, *Hos itaque ministros Satanae, & non Christi, ubicunque repereris, charissime nobis, aggregato provinciali, & Sacerdotali collegio, omninò devota, & Sacerdotali honore privatos, sub regula Monachica, & pœnitentia submissos, vitam finire ordinabis.* Steph. 11. in resp. datis à Caris. villa, Britanniaco Monast. c. 10. *Pro quo omninò abjiciendus est, & in Monasterium mittendus, ut illic, sub digna pœnitentia, suam lugendo finiat vitam.* Et paulò post, *Mulier verò illa, quam in uxorem, sacrilegus, ille Presbyter accepit, si cognovit, quia officio Presbyteri fungebatur, & ita cum eo juncta est, & illa in Monasterio submittatur.* Et c. 13. *Hic primum omnium dignitatem, quâ illicitè uti præsumpsit, emittens, sub districta pœnitentia, & in Monasterium.*

rium mittatur, & omnibus diebus vitæ suæ plangens, quod incongruè egit, degat vitâ Monasticâ. Cabil. 11. c. 4. Dictum nobis est Presbyteros, propter suam negligentiam canonicè degradatos, sæculariter, gradu omisso, vivere, & pœnitentiæ agenda bonum negligere. Unde statuimus, ut gradu amisso, agenda pœnitentiæ gratiâ, in Monasterio, aut Canonico, aut regulari, mittantur.

Cætera innumera proferri possunt, ex quibus in mentem veniunt concilia, Aquifgran. c. 175. Trellejan. c. 14. Rom. sub Eug. 2. & Leon. 4. c. 6. Lateran. æcumen. sub Alex. 3. c. 11. Lateran. aliud gen. sub Innoc. 3. c. 21. Alexand. 3. c. Cleric. de excessu prælat. Innoc. 3. c. inter, de purgat. canon. & c. ut famæ, de sent. excomm. Greg. 9. c. gaudem. de convers. conjugat. Carol. Magn. capitul. lib. 6. c. 9. & 90. & alibi.

C A P. X.

Quosdam ex iis, qui in Monasterium, pœnitentiæ causâ detrudebantur, ad Monachatus professionem, fuisse compulso.

DUbiū autem est, utrum ii omnes, qui in Monasterium, ad pœnitentiā agendam, in perpetuum detrudebantur, habitum Monachalem susciperent, ac Monachi censerentur.

Parùm interest , ad præsentem quæst. nam certum est , prædictis canonibus , eos ad regulam Monasticam servandam coactos ; ideóque latum intercedere discrimen , inter Monasticam & Clericalem vitam , seu regulam : nam vitâ Clericali indignus censetur , & à ministeriis , ac functionibus Sacerdotii , à regula ordinéque Sacerdotali , à Catalogo omni Cleri arceatur , qui peccatum commiserit , poenitentia dignum : E contra verò , ad regulam observandam , vitamque Monasticam agendam detruditur , qui tale peccatum admiserit , ut pro poena sit , Monastica vita , atque exercitatio , sive hæc ex voto suscepta sit , sive ex Ecclesiæ lege : remunerationis autem , ac præmii duntaxat loco , Clericalis vita atque professio , data sit , nunquam in poenam , Ecclesiæ judicio , dari posse existimata.

Nec auctor supra , c. 1. loquitur de Monachatu , sed de Monasterio , atque , non minùs poenæ loco , lapsos & facinorosos , ad Sacerdotium , quàm *ad Monasterium* adactos : atque adeò parùm refert : an qui poenæ loco , ad Monasterium adigebatur , Monachus exstiterit , an minimè exstiterit , quandoquidem comparatio inter Monasterium & Sacerdotium : & utrumque eodem jure , poenæ loco , hoc ad ministrandum , illud ad habitandum , imponi potuisse ,

tuisse, contra Ecclesiæ sensum existimat.

Quo etiam Clericatus contemptu, & Monastici status temerariâ præsumptione, satiùs etiam ducit, (Ecclesiastici, scilicet, honoris & decoris amantissimus) ut expulso regularium Sacerdotum, à Monasteriis, infamiâ, Ecclesia laboret, quàm si vel minimum dispendium Monasteria patiantur: cùm è contra, Monasteria, Clericorum facinorosorum receptacula, forent, ut intra privatos ipsorum parietes, Ecclesiæ dedecora concluderentur, nec, ut ejus verbis utar, *impietas & Apostasia, in lustris triumpharet & ganeis*. Sed de hac re alibi, si expedire visum.

Hic solum adjungo, probabile etiam esse, plures ex iis, qui in Monasteria ad perpetuam poenitentiam retrudebantur, præsertim si Clerici forent, Monachos factos fuisse, eosque Ecclesiam Monachos fieri voluisse, non autem, ut idem auct. loquitur, *Sine veste Monastica, sine regula, sine votis fuisse, ad Monasteria, tanquam ad triremes & metalla damnatos*.

I. Enim Tol. VIII. c. 5. cit. eos, *Monasticis disciplinis subjectos esse*, decernit, c. 3. & 7. *Monasteriis religantur*, id est, addicuntur & adstringuntur, hoc autem de Monachis dicitur. Tol. XI. sub *Regula Monasticos submissos, ad finem vitæ permanere*.

manere debere, statuit, & hoc ipsum Monacho convenit. A Steph. 2. dicitur, *dege-
re vitâ Monasticâ*, c. sup. cit. quod de eo, qui
solum in custodiam Monachis daretur,
non adeo consentaneè dici possit. can. quo-
que seq. ostendit idem Papa, eosdem habi-
tum Monasticum induisse, ait enim, *Hic
qui ordinationem suam ignorat, omninò abji-
ciendus est, & sub archa pœnitentia, in Mona-
sterio mittendus, ut omnibus diebus vitæ suæ,
in luctu & fletu, sub Monastico habitu con-
versetur.*

At, qui habitum Monasticum induerat
& gesserat, hic Monachicam vitam profes-
sus habetur, passim variis Eccles. decretis,
Tol. 6. c. 6. Tribur. apud Grat. 20. q. 1. c.
quem progenit. Nic. Epist. ad Episc. Regni
Ludov. apud eund. 20. q. 3. c. *præsens*; &
aliis plurimis. Igitur & Clerici isti detrusi
in Monasterium, cùm habitu Monastico
induti, sub regula Monastica viverent,
pro Monachis habebantur.

Id ipsum quoque deducitur, ex Constit.
Urb. 11. c. *Mandam.* 19. q. 3. approbata
ab Innoc. 3. c. *intellexim. de ætat. & qualit.
ordin.* quâ nempe interdicitur, *Ne quîs Ca-
nonicus Regularis professus, nisi (quod absit)
publicè lapsus fuerit, Monachus efficiatur*; se-
quitur enim, eum, si lapsus fuerit, & in
Monasterium, ad agendam pœnitentiam
detrudatur, Monachum fieri solitum fuisse.
Col-

Colligitur etiam ex testim. P. Damian. Opusc. 13. c. 6. Nonnulli namque rectores fratrum, plus tribuentes Monasticæ regulæ, quàm expediat, quibuscumque è sæculo venientibus, si, etiamsi graviter lapsi sint, aliam pœnitentiam non imponant, nisi tantum communem monasterii ordinem servare, præcipiunt, &c. Supponit enim P. Dam. facinorosos lapsos, ad monasterium venientes, Monachos fieri solitos: cui Monasticæ professioni nimium tribuerent aliqui rectores Monasteriorum, dum eos per purgatos, atque expiatis professione credentes, nec amplius severioris pœnitentiæ indigos, ad arctiorem vivendi rationem, Monachos factos, excitare negligerent, in eos ita declamat P. Dam. Monachus sanctitate & doctrinâ, suo tempore celebris.

Hi nimirum auditores suos, in Hebalitarum ignobilitate constituunt, dum pœnitentiæ fervorem tollunt, dum non, post solum debitum, amore perfectionis, ad alta conscendere, sed pœnarum, semper terrore constrictos, & cautione fœderis obligatos docent, sub degeneris ignaviæ torpore languere, ut non cum his, qui juxta Garizim sunt, secure Dominum benedicant, sed circa Hebal potiùs, cum ancillarum filiis, maledictionum jacula pertimescant. Qui hæc enim agit, quid distet inter decem millia talenta, & centum dena-

denarios, non attendit: nam si jus discretionis inspiciatur, unusquisque quo magis gravatur offensis, eo majori gravandus est pondere satisfactionis.

Hæc, & alia fusè pius, iste Monachus, quæ leget alius, dum ei vacabit, attendetque, num ea convenient, quæ ipse, Pharisaico fastu, de Monacho, pronuntiat, dum ait, *Christi figuram, Monachus exprimens, graphicè nobis apparet, sanctus, innocens, impollutus, segregatus à peccatoribus, ut Christianæ legis Phariseus, qui non habet necessitatem, quotidie prius pro suis delictis, hostias offerre, & Deo hominibusque supplicare; hoc enim fecit semel, se ipsum offerendo, & in Dei familiam, inter therapeutas tradendo.* Iis item, quæ non minori fastu, alibi scribit; dum inter alia, quæ profert Monasticæ poenitentiae, ab Ecclesiastica, discrimina, quartum iis verbis exprimitur in margine, *Religiosi pro aliorum culpis Deo satisfaciunt, quod in textu ita exponit, ipso fine discriminantur, (scilicet poenitentia Ecclesiastica, & Monastica) siquidem poenitens ab Ecclesia pœnæ addicitur, ut suis propriis peccatis veniam mereatur: at religiosus non suis tantùm, sed maximè alienis, satisfactionem impendit suam, & quia non ipsi sufficit asserere, Monasticam hanc poenitentiam, in Jobo delineatum fuisse, parum erat, inquit, nisi & eam in Archetypo innocentiae, Christo*

Christo Domino consecraret, qui semel oblatus est, ad multorum exhaurienda peccata. Non deest etiam ipsi ratio, cur tanto studio, pœnitentiæ nomen, à Monachis amoveat, quia, inquit, pœnitentes, vasa contumeliæ, in Ecclesia, possunt appellari.

Nec ea, secundum Petr. Dam. loc. cit. mentem de publica pœnitentia, intelligi possunt, quasi certum sit, susceptione monachalis status, omnia delicta ista expiari, ut nihil pœnæ temporalis, satisfactionibus continuis, Monacho semel Deo oblato, persolvendum sit. Novi Monachatus professionem, Baptismo comparari, ab eod. S. Doct. ibid. neque id diffiteor, quod à S. Bern. doceri scio, lib. de præc. & dispens. c. 23. nec unquam Monasticæ vitæ utilitatem deprimere cogitavi, cui, testimonium reddente mihi conscientia, impensè me semper favisse, existimo.

Quia tamen non debemus consuere pulvillos, cubitis peccantiû; nec exemplo Pseudoprophetarum, annuntiare pacem quando non est pax, sed in timore & tremore salutem operari, & ut omnes operentur, consulere: ideo plena vanæ & inanis confidentiæ, ista dixim. quæ Monachus iste effundit, quæ piissimi, & religiosissimi ad SS. P. Dam. & Bern. interpretationem emendabunt: hic enim, è multorum actualium delictorum tenebris, non omnium, in lumen virtutum evadere,

dere, nos docuit, per professionem Monasticam: ille varias conditiones adhibuit, sine quibus Monachalis status, perfectam expiationem, nequaquam efficiat.

Uterque sæpius PP. præcedentium exempla secutus, Monachum ad pœnitendum, & satisfaciendum pro suis peccatis, studiosè inducit, nec vanam istam elationem persuadet, quasi non pro suis lugere ac satisfacere, sed pro alienis tantùm, ipsi amplius necessarium sit: quod iste alius persuadere conatur. Inter quem proinde, humanæ superbiæ typho Scribentem, & SS. PP. Divinæ gratiæ Spiritu illustratos, hoc interest, quòd hi sancto timore, animos legentium concutientes, negligentiam excutiant & torporem; ille superbiam, vanam confidentiam, ac Luciferianam præsumptionem, lectoribus suis immittat.

C A P. XI.

Duobus aliis Argumentis Confirmatur, doctrina, præc. capit. is.

SEd ut redeamus, ad institutam Disputationem, dicimus, duobus adhuc argum. probari posse, eos, qui ad Monasterium, pro agenda pœnitentia detruderentur, Monachismum solitos profiteri.

I. Ex responso Steph. S. Hastulpho, qui uxorem suam interfecerat, relato à Grat.

33: q. 2. c. admonere, hunc enim Papa, ita alloquitur: *Relinque quapropter, te rogamus, hoc malum sæculum, quod te traxit, ad tam immanissimum peccati facinus; ingredi Monasterium; humiliare sub manu Abbatis, & multorum fratrum precibus adjutus, observa cuncta simplici animo, quæ tibi fuerint imperata: Si fortè ignoscat infinita Dei bonitas, peccatis tuis, ut refrigeret animam tuam, priusquam crucieris perpetuis flammis. Hoc levius & melius tibi certissime, scias. Sin autem tuam publicam pœnitentiam permanens in domo tua, vel in hoc mundo, vis agere (quod pejus tibi, & durius, & gravius esse, non dubites) ita ut agere debes exhortamur.*

Ex duobus alterutrum, hoc can. præcipit summus Pontifex, putà vel Monachi professionem, vel duriorē, & observatu difficiliorē, in sæculo, pœnitentiæ executionem: ac proinde conditionatam obligationem imponit, ad professionem Monachatus, quo modo se erga laicos, qui nullâ speciali ratione, in Ecclesiæ potestate forent, Ecclesiam gessisse, probabile est; cùm è contrario, erga Clericos & alios, qui in Ecclesiæ potestate speciali, constituti essent, se gessisse, ex prædictis Can. Colligamus: quos nempe in Monasterium detrudebat, nullâ opinione eis relicta: His ergò Monachatum, pro pœnitentia imponebat, & ita consulebat, ut si eum suscipere

pere nollent, severiorem pœnitentiam, ejus loco, conjungeret.

Ex eo certè responso, patet eos, qui pœnitentiæ ergò, Monasterium peterent & sæculum relinquere, & Monasterium ingredi, & sub manu Abbatis humiliari, & reliquos Monasterii religiosos, pro fratribus habere, & eorum precibus adjutos, imperata exequi, uno verbo, verè Monachos esse.

Alterum petitur, ex D. Bern. sent. de præc. & Disp. c. 22. *Quod denique, inquit, quæritis, de quibusdam Episcopis, quos S. item Papa Greg. ad tempus in Monasteriis, pro eorum excessibus, legitur reclusisse: Utrumnam in suo, an in Monastico interim habitu, habitarent cum Monachis, ego nescio: nisi quod Credibilis videtur, nequaquam illos, insignem religionis habitum suscepisse, quem non erant habituri, sed tantum quæsisse quietem in secretis Monasteriorum, & oportunitatem pœnitentiæ.*

Nam dubitat S. Bern. num ii, qui ad tempus in Monasterium, pœnitentiæ causâ, recludebantur, habitum Monasticum habuerint eâque solùm ratione inducitur, ut probabilius credat eos habitum nequaquam induisse, quòd illum non essent perpetuò habituri: eâ ratione satis apertè significans, si ad manendum perpetuò in Monasteriis sistis, alligati fuissent, habitum
haud

haud dubiè Monasticum eos recepturos, & pro Monachis sese gesturos esse.

Leves in contrarium conjecturæ sunt istius novitii, supra, quibus tamen adeo temerè extollitur, ut *Catholicam assertionem* pronuntiet, nimirum ad Monasticum statum suscipiendum, & vovendum neminem unquam ab Ecclesia potuisse constringi: potissima ducitur à conditione religionis, quæ simpliciter debeat esse voluntaria, cum è contra, poenitentiam à facinorosis & lapsis susceptam, dicat fuisse involuntariam simpliciter, voluntariam autem secundum quid.

Sed hæc ratio, quam tanti æstimat, ad Catholicum, dogma non sufficit; imò ne sufficit quidem, ad efficiendum id, quod persuadere conatur, probabile: nam plurimi Catholici D D. putarunt, *pueros seu infantes oblatos à parentibus, adstringi perpetuò Monachatus, nec posse hunc statum repudiare, sive ante pubertatis annos, sive post, atque hanc antiquam fuisse Ecclesiæ praxim, & Monasteriorum.*

Quod fusè probat, Doctiss. Comment. concord. reg. F. Hugo Mainard. qui facultatis Theologiæ Paris. Baccalaureus aliquando admissus, non sine honore, postea congreg. S. Maur. & eruditione & pietate illustravit, in c. 66. in ista verba, *per quam deceptus perire possit: probat, inquam, pluribus*

pluribus non exiguæ auctoritatis testimoniis, atque Ecclesiæ decretis. Ex quibus decantatum illud est, quod habetur in Tol. iv. c. 48. *Monachum aut paterna devotio, aut propria devotio facit: quicquid horum fuerit aliquatum, tenebit, proinde his ad mundum revertendi intercludimus aditum, & omnes ad sæculum interdicimus regressus.*

Hanc quæstionem prosequi, ego fusiùs nolo: imò nec planè probari istam, de potestate parentum in liberos, sententiam, significant communiter auctores, favorabiliorem libertati humanæ opinionem amplexati: fatentur tamen, vi argumentorum convicti, quòd si quis parentes magis reveritus, passus fuisset, absque ulla renitentia, sese Monasticâ veste indui, & in Monachum attonderi, Ecclesiam, in pœnam similationis, & profanationis S. Monasticæ professionis, medio ævo saltem statuissè, ut quocunque modo oblatus à parentibus, qui professionem fecisset invitatus, maneret Monasticæ regulæ adstrictus.

Id enim saltem colligitur ex Tol. iv. c. 48. cit. Tol. x. c. 6. Tribur. apud Grat. c. quem progenitor. 20. q. 1. Mogunt. c. 23. Nic. 2. Epist. ad Episc. in Regn. Ludov. apud dict. Grat. c. præsens, q. cit. & Greg. 111. Resp. ad Bonif. apud Ernd. ibid. ex Monasticis reg. S. Bened. c. 59. S. Isid. rel.

Rel. 20. q. 1. c. *quicumque*, & praxi Monasteriorum, cujus indicia sunt, formula petitionis apud Smaragd. in expos. c. cit. Reg. S. Bened. formula altera Wilidon. tempore Caroli Mag. cujus mentio fit in Chron. Novaleg. formula item alia, apud Ruthard. in c. istud reg. ex quibus omnibus, suam sententiam adstruere conatur Hugo Mainard.

Hoc autem ad præsentem quæst. abundè sufficit: si enim in pœnam criminis, quod non videtur ingens fuisse, Ecclesia iis temporibus, ab initio irritum, confirmare jubet votum: quidni ergò in pœnam criminis, Ecclesia ad Monasticum statum obligare aliquem possit? Ruit ergò *Catholicum* istud *dogma*, quod jactat iste alter, nihilque minùs, quàm Catholicum reperitur, quod D D. passim Catholicorum sententiis, & quod majoris est authoritatis, Ecclesiæ legibus, exemplis, & usu reprobat.

C A P. XII.

Nonnullæ Objectiones in contrarium referuntur, ac refelluntur.

Sed contra Doctrinam traditam, audet non nemo è Regularibus, sic obijcere: *sanè si Ter. & Cyp. lapsos & pœnuentes, volumus recordari, reperiemus, susceptam ab illis pœnitentiam, fuisse, ut loquuntur, involuntariam*
X
sim-

simpliciter, voluntariam autem secundum quid, quatenus alia ratio nulla supererat persolvendæ pænæ, & salutis assequendæ.

Errasti 1. bone vir, in eo, quod poenitentiam lapforum, tempore Tert. & Cypr. dixisti simpliciter involuntariam fuisse, & secundum quid tantum voluntariam. Nam Theologi post D. Thom. 1. 2. q. 6. a. 6. in Corp. sentiunt, quod per metum fit, simpliciter voluntarium esse, secundum quid autem involuntarium.

Rationem à D. Thom. subtilissimæ & exquisitæ disquisitionis capies: à me verò faciliorem & planiorem: nam voluntas cum vult ex metu, nollet quidem sibi adesse volendi necessitatem, sed tamen simpliciter vult, efficaciter vult, & actio ex ista voluntate imperata & à principio interno, putà ab electione, & consultatione procedit: quod autem ab interno principio est, quod ex electione & deliberatione fit, illud absolutè voluntarium est, & secundum quid tantum involuntarium, quia extrinseca duntaxat causa, ejus executioni occasionem dedit. Atque ita censet Nyss. seu Nemes. l. 5. c. 1. ita Can & civiles leges loquuntur; coactam scilicet voluntatem simpliciter, sine addito voluntatem esse, secundum quid, ut ita loquar, noluntatem esse, quia quamvis his vel illis positis circumstantiis, ipsis sublati nollent, tamen absolutè vult.

Hoc

Hoc te docebunt Can. *Merito*, 15. q. 1. c. *Auctorit.* Ead. q. 6. c. *Diffic.* 23. q. 4. c. *Consul.* 74. d. Hoc inferunt ex Can. *Glossa* in c. *Merito*, & in c. *Auctor.* cit. *Gloss.* *inuit.* in c. *cum inter*, de elect. *Gloss.* 11. in c. *Sup. his*, de renunt. *Gloss.* 1. in c. 2. de *his quæ vi*, *Gloss.* *Conditionalit.* in c. *Major.* §. final. de *Bapt.* Hoc docent lex *Mulier.* ff. de eo, quod metu gestum erit, § 5. si metu coactus, adii hereditatem, quia quamvis si liberum esset, noluissem tamen, coactus volui. Et lex si *Pater.* ff. de ritu nupt. & aliæ plurimæ. Nec aliter nobis sentiendum est, qui voluntarii, & involuntarii actus, habemus rationem, prout peccato excusando, vel committendo sufficit: certum est autem, etiam mala, quæ metu fiunt, mala esse, ac vitiosa, nec tolli metu, actus malitiam, sed duntaxat aliquatenus excusari.

Hæc quia vel nescis, vel non attendis, maluisti à communi Theologorum, Philosophorum Christianorum, juris utriusque DD. loquendi ratione desectere, ut Aristoteli forsitan, lib. 3. *Ethic.* congruentius loqui videreris. Sed nec Arist. mentem cepisti, nam distinguit Arist. actionem ab objecto actionis, actionem, quamvis exterioriorem, & objectum actionis interioris esse contingit; actiones ex metu mixtas, asserit, sed tamen ei, quæ spontè fit, similiores, unde & absque addito postea, illas
X 2 actiones,

actiones, *spontaneas* vocat, & spontè agi ista dicit, quæ metu fiunt, probatque spontaneis similiore.

I. Quia in iis actionibus finis, qui inter optata bona, eminentissimum locum tenet, simpliciter est volitus, renitentia voluntatantum est circa media quæ licèt sine ordine ad finem displiceant, ut tamen habent ordinem ad ipsum, eligibilia censentur, ac proindè absolutè volita sunt. II. Ratione principii, quia eæ actiones absolutè ab interiori principio proficiscuntur. III. Ratione instrumentorum, quæ expedita sunt, nec alligata, sed ab imperio voluntatis moventur.

Objecta verò, quæ ex metu tantum volita sunt, ait, non esse simpliciter volita, sed potius simpliciter displicentia, & conditionatè tantum, seu in ordine ad finem volita & placentia. *Nemo enim, inquit, quidquam tale ipsum, propter se, optaverit.* Nomina autem voluntarii aut involuntarii, dici solent, de actionibus, ut actiones sunt, non de objectis, seu de actionibus, ut objecta sunt. Itaque malè dixisti, poenitentiam, tempore Tert. & Cypr. simpliciter fuisse voluntariam, secundum quid involuntariam.

C A P. XIII.

Alius error perniciosior refertur.

Hic primus error circa loquendi modum: nam circa res, graviolem errorem in iisdem verbis animadverto, & qui vergat in contemptum pœnitentiæ publicæ, prioribus istis temporibus usitata; in criminationem Ecclesiæ, tam accuratè, hanc publicam disciplinam præscribentis; in accusationem pœnitentium, tantâ devotione, humilitate, & obedientiâ, Ecclesiæ se censuræ subjicientium, & Sacerdotis sententiæ obsequentium: eos siquidem ita depingit, ut pœnitentiæ & satisfactionis olores; à pœnitentia, secundum animi sui propensionem aversos; solo metu ad eam adactos; ejus, si liberum esset, negligentes, ac desertores.

Scilicet, hic tibi videtur vir docte, primis istis Ecclesiæ sæculis, fidelium fervor, ut si eos labi contingeret, nonnisi metu Ecclesiasticæ censuræ, vel divinorum iudiciorum, pœnitentiam peterent, pœnitentiam reciperent, pœnitentiam acceptam observarent: simpliciter eam nollent; adeò ut si eludere Ecclesiæ disciplinam, si absque peccato effugere potuissent coërcitionem, à satisfactionibus, impositæ sibi per sacerdotem pœnitentiæ, abstinuissent. At quàm longè, ab eo animo aberant, bo-

ni isti Christiani, qui licet infirmitate humanâ aliquando laberentur, divinâ tamen gratiâ, utiliùs resurgebant, & ob peccata præterita, humiliores, & de remedio sollicitiores, & de futuris cavendis culpis cautiores.

Non ergò duntaxat involuntaria, & ex solo metu agenda poenitentia, fidelibus tempore Tert. proponebatur, cujus, ad poenitentiam, parænetica vox, aliud suadeat, lib. de poen. c. 4. *pœniteat errorum, reperta veritate, pœniteat amasse, quæ Deus non amat: quando ne nos quidem servulis nostris, ea, quibus offendimur, non odisse permittimus; obsequii enim ratio, in similitudine animorum constituta est. & c. 5. seq. neque enim, quia bonum est (poenitentiam agere) idcirco auscultare debemus, sed quia Deus præcepit, ad exhibitionem obsequii, prior est Majestas Divinæ potestatis; prior est auctoritas imperantis, quam utilitas servientis: bonum est pœnitere, annon? quid revolvitis? Deus præcipit.*

Hoc Tert. sæculi ingenium fuit, hic genius, ad quam formam comparatos poenitentes, cave, ne involuntariam simpliciter, & secundum quid tantum voluntariam egisse, dicas; & ita affectos fuisse, ut in poenitentia observanda, non præcepto Dei parere, sed utilitati suæ servire, & poenase etiam humanas, à se duntaxat avertere cogitarent: qui tam malè sentit de laudatis-

fimo sæculø , quid diceret de corrupto ? Putasne , Ecclesiam istius temporis , lapsis & facinorosis pœnitentiam imponentem , hoc solùm cogitasse , ut pœna homines cogeret ad pœnitentiam , quam spontè putaret non amplexuros. Quàm longè ab eo consilio aberant , qui , à spe communionis & pacis , pœnitentiam in exitu vitæ deprecantes , arcebant , quia , ut ait Cypr. Epist. 52. *Rogare illos , non delicti pœnitentia , sed mortis urgentis admonitio , compellebat ?* Quo exemplo , satis docebat , non placere sibi pœnitentiam quæ solo pœnarum , etiam æternarum metu , non pleno pietatis affectu susciperetur.

Vide quàm injurius sis , in pœnitentiam priorum temporũ , quam ubi involuntariam simpliciter , & voluntariã tantùm secundùm quid prædicasti , mox interjectis octo duntaxat lineis , actionem quæ non simpliciter , & omni ex parte voluntaria sit , adeo dejicis ac deprimis ; ut bonam esse neges , adductis istis , ex Nic. Papa verbis , *nullum quippe bonum , nisi voluntarium* : quo Arg. religiosarum actionum ex voto susceptarum , meritum omne , non solùm imprudens evertis , sed & pœnitentiæ , apud antiquos , nullum bonum fuisse , quod voluntaria ipsa , omni ex parte non esset , imò ne quidem simpliciter voluntaria , sed tantùm secundùm quid , inferendum cuique re-

linquis: addo improvidus es, qui omnem famam, ac religiosam observantiam impetere, nihili ducis, modò Monachatus honori, ac dignitati, tibi aliquid consentaneum dixisse, videaris. Nos, melioribus, imbuti Theologiæ Christianæ præceptis, poenitentiam apud antiquos sancitam ita fuisse dicimus, ut tamen poena, animi torporem excuteret, non agendi animum & constantiam præberet: occasionem suscipiendæ poenitentiae pararet, non, voluntatem duceret; multominus, perseverandi facultatem ita tribueret; timor non tam ab Ecclesia incussus est, ad sanationem malæ voluntatis, quàm ad coërcitionem pravæ cupiditatis, quod in simili materia, sensisse videtur, Aug. lib. contra litt. Petil. c. 83. & alibi pluries.

Pœna, Ecclesiæ iudicio, lapsis infligenda visa est, quæ peccati morbo detentos, & fœcordiâ gravatos excitaret, ut cùm ab Ecclesiæ communione, extorres se vidissent, meminissent, & se à cælesti beatitudine excludendos: eaque cogitatione excitati, tanquam de somno letargico emergerent, & ad salutem animæ suæ, non jam timore solum, sed & amore evigilarent. Timorem enim salubriter incuti, ut aliud efficiat, & ad aliud disponat, colliges ex Aug. Epist. 48. ad vincent. & 50. ad Maced. & aliis.

C A P. XIV.

Aliæ subtilitates, contra prædicta.

SEd iis prætermiſſis diſpungamus cæteras, ejuſdem Regularis, irregulares ſubtilitates. *Antiquo, inquit, Eccleſiaſtica diſciplinæ jure, nuſquam videas, Clericos in Monasteria detrufos, ad pœnitentiam, ſed tantùm ad Laicam communionem damnatos.*

Regero ergò, coævam ferè Monasteriorum in occidente ordinationi, hanc legem: cum enim, ex communi. ore regulis Cæſarii, & Aureliani, Arelatenſium Episcoporum, Ferreoli, ut probabilius creditur, Vecienſis, Iſid. Hiſpal. Fructuoſi Brachar. Antiftitum; ac S. Bened. ordinis celeberrimi inſtitutoris, antiquiores in occidente non legantur, nec aliæ à Bened. Anianæ Abbate, in ſua concord. regularum, vetuſtiores referantur, ideo, ante hæc tempora, Clerici in Monasterium detrufi non leguntur.

Statim verò, compoſitâ Monasteriorum diſciplinâ, reguliſque præſcriptis, moſ iſte, legibus Eccleſiaſticis invectus eſt, Agath. cit. cui Cæſar. Arelat. præfuit, & cæterorum Concil. Galliæ; moxque etiam ut in Hiſp. à S. Iſid. & Fructuoſo, ſeptimo

læculo, Monasteria componi cæperunt, ac salutaribus legibus informari, Tolet. quibusdam Conciliis, mos iste firmatus est, qui etiam à Pelag. & Greg. Mag. Romanis PP. in Italia observatus, non multo tempore, postquam in eadem provincia, sub S. Benedicti regula, Monasticus ordo florescèpisset. Itaque tunc, præsertim, cùm in Occidente vigere cæpisset, Monasteriorum disciplina, Clericos quoque lapsos, ad Monasteria detrudi cæpisse (quod tu, vir laute, à Monastico statu & regula, abhorere defendis) notabis, si quid in lectione proficias, vide quid hic doceat, fidus illud illustre, Sorbonicæ societ. Fr. Hall. lib. 3. art. 1 v. §. vult. de ordin. Hier. cujus sensum ut plurimum exprimimus: & alios.

Subdis, *eadem antiquo jure, seu in Ecclesia vetere Aurel. nunquam legas, apostatas, excommunicatos, Monasterio addictos: erant enim tum Monasteria sanctitatis adyta, non scelerum ergastula.*

At scopum non feris: nam de Apostatis excommunicatis non agimus, sed de Clericis, qui excommunicari minimè solebant, neque extra Ecclesiam statui, sed de gradu dejici: quod enim ordinariè erat Laicos excommunicatio, hoc Clericis depositio, ut cuiusvis disciplinæ Ecclesiasticæ perito, manifestum est. A veritate autem aberras, quandoquidem ex vitis SS. PP. fures meretri-

meretrices, homicidas, in Monasteria receptos legamus: quod ubi vacabit, legere poteris.

Neque ideo Monasteria, minùs dicenda erunt adyta sanctitatis, sicut Ecclesia, quamvis sceleratos excipiat, non desinit dici sancta, quia & sanctitatem docet, & ad sanctitatem informat. Tu veriùs Monasteria facis, scelerum ergastula, cùm ad ea, non tanquam ad locum pœnitentiæ, qui venerationi semper fuit, sed tanquam ad triremes & carceres damnatos, iisdem temporibus pronuntias.

Pergit: *Antiquo item jure, Presbytero, gradu moto, licebat sæculariter vivere, id est, more Christianorum Laicorum, neque ulli exigebatur ulterior pœnitentia, quam tamen Cabilon. à suis facinorosis postulat.*

Falleris, & antiquæ disciplinæ ignarus es, in qua pro peccatis omnibus publicis, gravioribus, pœnitentia imponebatur; nec tam adempta laicis quævis communio, Clericis Ecclesiastica, seu Clerica, pro pœnitentia erat, quàm pro pœna, extra propositum vagarer, si id probarem.

Cabil. Conc. & cætera, quæcitavimus, satis te redarguunt: quæ nempe evidenter demonstrant, Clerico deposito, ulteriorem pœnitentiam injungi solitam fuisse; nec ipsi sæculariter, more Christianorum

norum cæterorum, vivere licuisse. Imò id tibi in mentem venisse, demiror, cùm certum sit, Clericum de gradu suo dejectum & continenter vivere in cælibatu debuisse, & alias Clericalis vitæ obligationes retinuisse, quod nec te velle negare, crediderim.

Instas, in Ecclesia vetere, uni peccato, putà adulterio, una publica imponebatur pœnitentia, relabentibus nulla, in Tolet. 8. pœna reperitur, quando post cæteras coërcitiones, Monasterium irrogatur.

Non distinguis, inter pœnitentiam clericis impositam & Laicis, una ab alia plurimùm differt; nam Laici pœnitentiam explebant, antequam communioni Ecclesiæ redderentur, Clerici ademptâ tantùm communionem Clerici, ne ex duobus gradibus simul exciderent, pœnitentiam impleturi, ad communionem Laicam redigebantur, è qua, quia ad inferiorem gradum prolabi poterant, idè si postea in grave facinus laberentur, residuâ interdum communionem privabantur.

Cùm è contra, si Laicus, extra communionem Ecclesiæ positus, ad inferiorem gradum dejici non posset, quia nulla spes erat emendationis, idè ubi ad eum gradum devolutus, non profecisset, nulla de cætero publica pœnitentia, ei, cui semel imposita fuerat, imponebatur, nec ipsa,
ex

ex antiqua Ecclesiæ praxi repeti unquam solebat: sed non emendato, tempora protracta fuisse, & incorrigibiles interdum, excommunicatione publicâ punitos fuisse, res notior est, quàm ut probari debeat.

Denique, inquis, in Ecclesia vetere, inter Clericos acta non est pœnitentia: in Cabilon. ad canonicum Monasterium reus amandabatur.

Iterum hallucinaris, quòd pœnitentiam Laïcis propriam, quæ absolutè pœnitentia dici solet, ab ea, quæ Clericis imponebatur, & solemnis pœnitentia non erat, non distinguis: nam certum est, pœnitentiâ illâ publicâ anxîâ, lugubri, & dedecorosa; Clericos publicè non fuisse defunctos, ex Conc. Carthag. v. c. 11. Leon. Magn. Epist. 92. ad Rustic. Narbon. c. 2. & aliis supr. cit. pœnitentias tamen, & *ἐπιτίμια*, ut Græci loquuntur, pœnasque sceleribus pares, privatim, vel in domibus canonicis, vel in Monasteriis, ab iis Ecclesiam expectiisse, non minùs certum est: quod ex ipso S. Leon. Epist. cit. colliges; qui de iisdem Clericis, quos à probrosa pœnitentia exemit, subjungit, *Unde hujusmodi lapsis, ad promerendam misericordiam Dei, privata est expetenda secessio, ubi illis satisfactio digna, sit etiam fructuosa.* Pœnarum etiam, quas in pœnitentia positi subirent, exempla, leges, in Conc. Ilerd. c. 1. VIII. Syn. gen.

act. 2. Hibern. sub Leon. III. & aliis. Quæ sequuntur ex dictis facile concidunt.

C A P. XV.

Quædam ex Canonibus adducta, examinantur.

Superfunt quædam ex canonibus, in proprium suum caput, ab ipso auctore adducta, & à nobis breviter examinanda. 1. inquit, *Monastici verò statum professionem, etiam ab reis illis, non nisi liberè initam, ostendit, & Astulphi uxoricidæ causa, super. adducta.*

Id nego, eâ causâ ostendi, nam ut ex cit. can. *admonere*, 33. q. 2. monstravimus, non simpliciter Astulpho prædicto consulit, Monasticum statum, Nicol. Papa: sed eligendum potius ei suadet, quàm gravio-rem, & durio-rem, in sæculo poenitentiam, quæ Monasticum statum non amplectenti, subeunda ipsi esset: is autem non omnino liberè iniri dicitur, quòd eâ conditione proponitur, ut vel amplectendum sit, vel durior poena subeunda.

Deinde non par ratio Clericorum & Laicorum, nam Clericis, in potestate Episcoporum, à quibus & verberibus, & carcere, & aliis poenis, tanquam liberi à potenti- bus puniebantur, optio non semper relin-
que-

quebatur, vel eligendi Monasterii, vel alterius pœnitentiæ: Laïcis verò, qui à potestate ista Patria magis soluti erant (excipe eos, qui se Ecclesiæ dedissent, cujusmodi erant Diaconæ matriculariæ, uxores Presbyterorum & Diaconorum, atque aliæ ejusmodi utriusque sexus personæ) optio, vel Monastici status amplexandi, vel pœnitentiæ alterius subeundæ, minimè relinquebatur; ad quam nimirum, anathematis solùm intentata pœna, licèt fortè non vi, nec injectione manuum, ab Ecclesiastico præfule, compelli solebant.

Subdit, *Innoc. III. Orat. in Constantinop. explicatione*, id demonstrare, cap. *post transl. de renunt.* sed contrarium ostendit. *Innoc. III. oratio.* Vim facit in iis *Innoc.* verbis: *Quodd (Concilium) in eo loquitur casu, cùm propter aliquod crimen, Episcopatum quis deserens, ad vitam Monasticam, pœnitentiæ causâ, descendit. Nam, inquit, non devolvitur, non impellitur, sed spontè descendit.*

Observatio hæc ridicula est, nam & aliquis invitus, & superioris auctoritate coactus, descendere dici potest; idque videtur *Innoc.* intellexisse: non enim novam interpretationem subdit, sed traditam explicat, dum subdit: *Unde quidam in eo casu loqui dixerunt capitulum supra dictum, cùm quis pro crimine, de quo convictus fuerat, vel confessus, ab Episcopali dignitate depositus, in*
Mo-

Monasterio existit, ad pœnitentiam agendam inclusus, vel cum aliquis propter grave crimen, pro quo, Episcopatum retinens, pœnitentiam dignè agere non valebat, cedendi obtentâ licentiâ, vitam Monachalem elegit.

Qui duo sunt modi, quibus quis pœnitentiæ causâ, ad Monachalem statum descendit, putâ, si vel eum propriâ voluntate eligat, vel ad eum, iudicis sententiâ compellatur. Quo utrôque modo, inhabilem fieri aliquem, ad Episcopatum iterum capessendum, propter recordationem criminis, & pœnitentiæ perpetuæ horrorem, declarat Innoc. III. quod assertionem nostram confirmat, si non semper, saltem aliquando, etiam invitis, Monasticum statum, Clericis impactum fuisse.

Pergit: Sequitur in Gratiano, quidam cedendi licentiam, cum instantia postulantes, eâ obtentâ, cedere prætermittunt. Eos ad cedendum decernimus compellendos. Et hoc intentum nostrum probat, posse aliquos, ad Monasticum statum invitos, & in poenam criminis compelli: quales sunt isti, ut ejus utar verbis, Quia interim tempus extrahunt, neque hîc, neque illic pœnitentes, ad Monasterium adigendi, quod postularunt, ne inutili tergiversatione, animi sui levitatem, publicè demonstrant.

Sed & ignoranter ea, ex Grat. citas, tanquam eadem serie, cap. de renunt. citi-
cohæ-

cohæreant, cùm caput istud *quidam*, ex Conc. gen. Later. sub Innoc. III. c. 28. collectum habeatur, simul cum c. præc. Innoc. III. lib. I. decret. Greg. tit. 9. Tu verò, apud Gratian. haberi putas, qui obiit ante Innoc. III. adeoque in canonica disciplina versatus es, ut collectionem Decretal. eandem putes, cum collectione Grat. qui error, nec in eo, qui per duos dies, Canonice disciplinæ operam dederit, tolerandus esset: Unde non jam miror, quòd toties, Grat. lectionem objicias, scilicet,

Oderunt tristes bilarem, indoctique peritum.

Præcedentibus tuis verbis, vide num hæc cohæreant, quæ sequuntur; *Eâ voluntatis libertate usus est Imp. Ludovicus Pius, cùm factione exauctoratus, jussus est ire in Monasterium, & ibi esse omnibus diebus vitæ suæ, quod ille renuens, non consentit voluntati eorum, maluitque publicam subire pœnitentiam, & quidem iteratò, ne quid in ea rebellione deesset, ad injuriam.*

Porro arg. ab isto exemplo ducti, nulla vis est, quinimò patet, eo tempore, Ecclesiæ morem fuisse, ut etiam Laici cogeren-
tur, unum ex iis duobus eligere, aut pœnitentiam publicam, aut Monasticum statum, adeò ut electionem Monastici status, non omni ex parte liberam esse oportere, crederent, sed aliquâ onerosâ conditione,
ejus

ejus refutationem gravari potuisse : quod tu modò negabas.

Quòd autem , non ad Monasticum statum , detrusus fuerit Imp. Ludov. sed id ei persuadere , per submissos quosdam Monachos , Lothar. conatus sit , testis est Nitard. lib. 1. Hist. *Quòd ipse Ludov. impius , Monachus fieri renuerit* , ait Tegan. de Gest. Lud. Pii : *Impium* Lodovicum nominans , quia nempe reverti iterum ad imperium cogitabat , cùm rescindi Monasticam professionem , vel metu susceptam , ex istorum temporum usu , non posse , resciret. Ostendunt igitur ista , adhibitis etiam minis , & terroribus , Monasticam vitam semel susceptam , dimitti minimè posse , quod negas : Et Laicos quoslibet , non æquè , ac Clericos , in Monasteria , poenitentiae causâ , mitti solitos , quod fassus sum.

Cætera , quæ in eodem cap. addis , soluta ac refutata sunt : tu ex hoc specimine discas , quàm multa in singulis capitibus refutanda essent , si particulatim omnia discutere liberet , quod in hoc cap. efficere , rei , ad Ecclesiasticam disciplinam spectantis , non injucunda , nec incuriosa discussio , coëgit. Alios igitur errores , in contemptu Hierarchiæ , ordinationis Ecclesiasticæ , Ecclesiæ ipsius , cùm brevitati studeamus , omittimus : & præcipuè cùm nostri non est instituti , aliorum refutare errores , nisi in quantum

quantum materiæ, quam tractamus, adven-
sentur directius. Sit ergo ultimum hujus
quæst.

C A P. XVI.

*An Regulares, donatum cœlitus Conciliis
Spiritus, purius nobiliusque
custodiant.*

ITa præcipuus Antagonista: *Regulares, as-
sero, vitâ, moribus, institutis ad Ecclesiam non
habentem maculam neque rugam, & sanctis-
simos ejus Canones, proprius, quàm sæculares
Clericos accedere: in Religiosorum claustris,
disciplinâ, institutionibus, ajo, veteris Ecclesiæ
sanctitatem, Canonum observantiam, Conciliis
donatum cœlitus spiritum, purius nobiliusque,
quàm apud reliquos in sæculo Clericos, meus
hic campus est, expecto, si quid contra audes.*

Thranosica, sunt ista, & gloriosi militis
verba, optime vir, in contemptum Eccle-
siasticæ ordinationis prolata, & virtutem
sacramenti ordinationis mirè deprimentia,
ac Divinæ providentiæ ordinem turbantia.
Regularium totius nationis offensam, nul-
latenùs quæro; imò nec ullum Regularium
ordinem impetere volo, nec eum, cui ipse
adscriptus es, quam profundius veneror:
scio quos feriam, tu ex eorù numero unus,
& præcipuus es. Canonum & disciplinæ
Ecclesiasticæ, observantiam, vobis tribui-
tis;

tis; fortasse haud difficile foret, cui plus spiritus, & acuminis inest, contrarium ostendere: adi eruditissimos illos libros, P. Aur. & Fr. Hall. societ. Sorb. aliter te docebunt, si aure audias, & corde intelligas. Veteris Ecclesiæ sanctitatem vobis tribuitis; à qua vos, à qua nos progh dolor! multum absumus, quod non convitiandi cuiquam animo dico, sed & veritatis studio & doloris sensu. Sed hæc missa facio.

At verò, quis ferre poterit, quòd *Conciliis donatum cœlitus Spiritum*, purius, nobiliusque, quàm cæteri è Clero, id est, quàm Parochi, quàm Episcopi, quàm Archi-Episcopi, Primates, Patriarchæ, quàm ipsi summi Pontifices, custodiæ vos jactetis? ô imprudentem vocem! ô plenam, temeritatis, & erroris audaciam! scilicet habetis vos, non solum cœlitus missum Dei Spiritum, quo canones observentur, verum etiam quo condantur. Et quidem purius, nec purius tantum, sed nobilius, quàm quivis è Clero proceres, in Conc. adunati, quàm summus ipse Pontifex, Conc. præfident: tutius verò, securius, certius, Ecclesiæ regulas præscribetis, sed donante vobis Spiritu S. Cœlitus misso, quàm Conc. PP. nisi Regulares sint, præscribere possint.

Vide in quos errores, te, disputandi calor, & Monachalis status, impensius fovendi cupiditas, impulerit. Quem putas circa canones,

nones, circa disciplinam, donatum Conciliis coelitus spiritum? nisi eum, qui datus est 70. senioribus, quos Moyses in adjutorium adsciverat, Num. 11. *Ut sustentent onus populi*; qui sedentibus in Cathedra Moysis, datus est ad docendum potius, quàm faciendum, juxta illud Math. *Super Cathedram Moysi sederunt scribæ & Pharisei, omnia ergo quaecunque dixerunt vobis, servate & facite.* Qui super Apostolos effusus, ut doceret eos omnia, & suggereret omnia, quaecunque dixerat Christus, Joan. 14. ii, de omnis spiritus donatione securi, quæ à se decernerentur, ea Spiritus S. auctoritate firma, & providâ sapientiâ constituta, non dubitantes, de Conc. Hierosolym. sententiâ, scribere ausi sunt, Act. 15. *Visum est Spiritui S. & nobis.*

Hunc, vos Regulares, spiritum, coelitus Conciliis datum, habetis, purius nobiliusque, quàm Cleri proceres, regularibus vestris minimè initiati ceremoniis; plûsquè valebit, ad sapientiam gubernationis obtinendam, regularis professio, quàm sacra ordinatio, quàm gradus sublimis; quàm Divinæ providentiæ ordo, gratiam singulis statibus, pro sua cuique functione distribuens? Ubi quæso, & quando, hic vobis Spiritus coelitus Conciliis datus, vobis promissus, vobis attributus: inauditum hætenus istud, novum novitii commentum

500 *Quæstio X. Cap. 16. An Sacerd. &c.*
tum est: procul prodigiosa ista dogmata,
ne dicam hæretica, & totius ordinis Eccle-
siastici destructiva.

Ejusdem furfuris, alterum, ex eodem
Cleri contemptu, in totius ordinis pro-
brum, continetur his verbis: *Ut non inju-
ria quis possit dicere, scriptas olim Clericis leges,
à religiosis accuratè servari, quoniam illi de re-
ligiosis facti sunt sæculares. Hi suis constricti
regulis permanserunt.*

Nihil ego in depressionem regularis di-
cam sanctitatis; at quàm horrendum, quod
regularibus solis, Ecclesiæ canonum obser-
vatio tribuitur! vigent, & quotidie reflo-
rescunt, apud plurimos de Clero, quem,
in contemptum, *sæcularem* vocas, Ecclesiæ
leges, nec si marcuerint aliquamdiu, non
aliis tribuendum est, quàm iis, qui con-
suunt pulvillos cubitis peccantium, & Ec-
clesiasticarum legum obligationem, distin-
ctionibus frivolis, excusationibus imperitis
eludunt. Atque hæc de his. Nunc

QUÆ.

QUÆSTIO XI.

De nunquam nimia multitudine
Sacerdotum, examinatur.

CAPUT I.

*Ridicula est sententia, de nunquam nimia
multitudine Sacerdotum.*

Periculosum in praxi, & satis irregularè effatum, continetur, his verbis: *Si omnes quotquam usquam sunt homines, si mulieres ipsæ, si bruta animantes, si corpora, vita & sensu carentia, in Sacerdotes mutari, & augustissimam Eucharistiam facere possent, dicere si, Divino illo colendi modo, infinitos illos ministros, esse superfluos?*

Bella fanè gradatio: Si sensus aliquis ei, vel ratio ineffect: at quid ineptius fingi potest, quàm ista, brutarum animantium, & corporum tam sensu, quàm vitâ carentium, metamorphosis, in Sacerdotes & sacrificatores? Tu vir Dei, Sacerdotes Dei, & sacrificatores corporis Christi, ex brutis animantibus, ac corporibus, tam sensu, quàm ratione carentibus, emergere fingis, celerius multò, quàm fungos, aut tubera;
in

in iis enim conflandis, natura saltem non-
ctem moratur, Sacerdotes verò ex brutis
animantibus, & corporibus inanimatis
conficere, tibi ludus est. Profanæ istæ
sunt, & ineptæ mentis observationes.

Ex iis verò stolidis existimationibus per-
niciosam, & in praxi periculofam consecu-
tionem elicis. Nullo digno Sacerdotium
unquam denegandum; nunquam nimiam
Sacerdotum copiam esse posse; non esse
eorum definiendum numerum; non ex
definito numero, quantum Ecclesiæ sat
est, digniores seligendos, tibi etiam absur-
dum videtur; dignitatis ad Sacerdotium
indicium, rem moralem esse, non in indi-
visibili consistentem, sed in latitudine po-
sitam; pro penuria Clericorum, vel copia,
aliquos dignos, vel indignos judicari.

Nonnunquam & irregularibus, & infra
ætatem, à canonibus præscriptam, consti-
tutis, ob Sacerdotalium virorum paucita-
tem, Sacerdotium indulgeri, tanquam di-
gnis, quibus abundante Sacerdotalium vi-
rorum multitudine, aditus ad Clericatum
intercluderetur, tanquam indignis. Disci-
plinæ Ecclesiasticæ ignarus es, si hæc non
capis.

C A P. II.

*Æquum esse, ut Clericorum determi-
natus sit numerus.*

Quod

QUOD de Episcopis toties, ex Conc. Sardic. can. 6. Leon. Epist. 87. ad Episcopos African. & aliis canonibus, inculcant DD. communiter, non eos passim esse constituendos, ne vilescat eorum auctoritas: id etiam de Presbyteris, & Diaconis, & cæteris Ecclesiastici ordinis viris, proportionem servatâ, sentiendum est, non debere eos nimium multiplicari, ne numero vilescant: verum enim est illud Hier. Epist. 85. (cujus suo tempore proferendi, longè minor occasio erat) *Presbyteros turba, contemptibiles facit.* Verum est, quod usitatâ fertur paræmiâ, *pretiosa esse, quæ rara sunt*; nihilque tam egregium esse, quod non multitudine vilescat.

Consentaneè huic proposito, Bern. de convers. ad Cleric. c. 29. *Dilatata videtur Ecclesia: ipse etiam Clerus sacratissimus ordo, fratrum numerus, super numerum multiplicatus est: verum etsi multiplicasti gentem, Domine, non magnificasti lætitiâ, dum nihil minùs apparet decessisse meriti, quàm numeri accessisse.* Paucorum certè perfectio est: Si non omnes, inquit Christus, capiunt verbum istud, Math. 19. *Quàm angusta porta, & arcta via est, quæ ducit ad vitam, & pauci sunt, qui inveniunt eam.*

Nec inter multos, inquit Arist. lib. 9. Ethic. c. 10. amicitia est, ideò vix contingere potest, Sacerdotes multos esse, & bo-

Y

nos:

nos: ut Roma olim suis viribus ruit, ut corpora naturalia, justam magnitudinem transgressa, debilitantur, sic Clericorum ordo, suâ numerositate languescit. Rectè Justinian. Præf. Novell. 3. ad ostendendam necessitatem determinandi; Clericorum Ecclesiæ Constantinop. numeri, sententiam istam protulit, ὁδὸν ἐν ἀμείνῃ καλὴν, *nihil immensum bonum*.

Urget idem Imp. ejusdem legis necessitatem, ne expensis Ecclesiæ graventur; adde etiam, ne superfluis nutriendis populus oneretur; nevè charitatis subsidia, miserabilibus personis necessaria, ad superfluos Clericos deriventur; ne multitudo æmulationem, æmulatio discordias pariat; ne ex multitudine disciplina concidat; ne in magno numero, animorum consensio minor sit; ne vel otiosi, multi remaneant, in vitiorum prædam; vel dum operæ navandæ materiam quærunt, aliorum incertam feliciter operam disturbent.

Infinita propè alia sunt, quæ sicut occasionem, Concilio Lateran. sub Innoc. III. c. 13. prohibendi novarum Religionum institutionem dederunt: Conciliis Arelat. VI. c. 8. Mogunt. c. 19. Rem. II. c. 27. Turon. III. c. 32. & aliis, Canonorum, Monachorum, Monialium numerum, pro rexitibus Monasteriorum, restringendi, causam præbuerunt; ita Ecclesiam induxerunt,

xerunt, ut & paucitate Clericorum delectata fuerit, & de eorum numero restringendo, leges tulerit.

C A P. III.

Pauci in Ecclesia primitiva Clerici, sed gnavi, & in officio assidui.

MIra sanè Clericorum, in veteri Ecclesia, paucitas, à quibus tamen sollicitè Ecclesiæ regebantur, ut divinos viros dicere debeam, qui tot officia tam pauci explerent. Epiph. hæ. 56. alias 75. n. 5. unicum Episcopum, unius vel plurium Diaconorum officio adjutum, absque Presbyteris adjutoribus, in primitiva Ecclesia aliquando exstitisse, testatur. Multis in locis, si credimus Ambrosiast. in c. 3. prior. ad Tim. *Bini per Ecclesias Presbyteri erant.*

Sed & posthumianus in Conc. Carthag. 3. c. 45. ostendit, Presbyterum unum aliquando, in aliqua Ecclesia, cum Episcopo fuisse, ait enim, *Si (Episcopus) unum tantum Presbyterum habuerit, nunquid debet ei, unus iste auferri?* Atque adeò Cornel. in Epist. ad Fab. Antioch. apud Euseb. lib. 1. hist. c. 6. Ecclesiam Romanam summopere commendat, quòd sub uno Episcopo, quadraginta sex, essent Presbyteri, ac determinato numero alii Clerici.

Neocæsar. Conc. c. ult. septem tantum

Y 2

Diacono-

Diaconos, in qualibet civitate ordinandos, statuit. Ambros. in c. 3. ad Tit. numerum Diaconorum & Presbyterorum definitum in Ecclesia esse, ostendit: *Nunc autem, inquit, septem Diaconos esse oportet, & aliquantos Presbyteros, ut bini sint in Ecclesiis, & unus in civitate Episcopus.* Sardic. c. 6. in vico, vel parva urbe, unum Presbyterum sufficere, putavit. Tolet. habitum ann. 12. Recar. Reg. c. 2. vel Presbyterum, vel Diaconum in Ecclesia quavis vicana institui, jubet: Si minor est census, Ostiarium à Sacerdote eligi, qui nitorem ejus procuret.

C A P. IV.

Statutum ab Ecclesia, ut determinatus esset numerus Clericorum.

IN Remensi verò, can. 9. apud Yvon. p. 3. c. 49. plures in eadem Ecclesia vicana, prohiberi videntur Presbyteri: varia Concilia, quæ nempe legem istam Ecclesiæ, tot canonibus constitutam, supponunt, neminem, nisi alicui Ecclesiæ adscriptum, ordinari debere; in unaquaque Ecclesia, nonnisi certum numerum instituendum esse, præscribunt. Syn. Rom. sub Eug. II. & Leon. IV. c. 9. statuit, *Ut in congregandis Clericis, modus discretionis teneatur; videlicet ne plures admittantur, quàm*

quàm facultas rerum, eis canonicè attributa, sufficere possit. Deus enim noster omnipotens tribus in rebus, universa constituit, pondere, videlicet, numero, & mensura, cujus nos saluberrimum perficere, & conservare præceptum, semper oportet.

Audis, Dei præceptum esse, ut sicut omnia in pondere, numero & mensura, creata sunt: ita & Clericorum numerus, certus ac definitus esset. Nos huic Divinæ institutioni parere, hanc Divinam regulam tenere, oportere. Quid ergò ilios reprehendis, qui Clericorum numerum certum tenendum putant, certamque & definitam Sacerdotum multitudinem esse, contendunt?

Quamvis enim à Sacerdotio nobis, Divina beneficia proveniant, quibus nulla majora; quia tamen ipsa Deus ordinata esse voluit, idè & certo numero conclusit, & qui Divinæ providentiæ atque institutionis fines excedit, hic superfluous dici potest. Non autem Sacerdotes Deus, propter solam sacrificandi functionem, esse voluit, sed propter reliquas etiam Sacerdotii functiones: quarum distribuendarum potestatem, pro populi necessitate, & ordinatâ officiorum Ecclesiæ dispensatione, Ecclesiæ reliquit.

Acephalos verò, & sine titulo Ecclesiastico Clericos, Ecclesia semper summopere

detestata est. Veteres canones, Clericos non adscriptos alicui Ecclesiæ, rejiciunt: nupera Trid. Syn. sess. 23. c. 16. de reform. statuit, *Ut nullus in posterum ordinetur, qui illi Ecclesiæ, aut loco, pro cujus necessitate, aut utilitate assumitur, non adscribatur, ubi sunt fungatur muneribus, nec incertis vagetur sedibus.* Hæc constitutio si servetur, quam fervari oportet, patebit, superfluos etiam sacrificio Divino offerendo ministros, ordinari non posse, qui Ecclesiæ, cui adscribentur officiis, congruè & consentaneè implendis non necessarij, non utiles fuerint.

Tu, vir Regularis, cui disciplina Ecclesiæ videtur tamen fabula, cui Divinæ providentiæ fines ignoti, cui Conciliorum statuta vilescunt, vides hæc omnia. Et quia magnum à Sacerdotio nobis bonum contingit, Sacerdotum immensum numerum exis: eodem scilicet consilio, quo, quia à potu, cibo, medicina, nobis accedit utilitas, horum omnium nullum modum esse vellet: quasi verò non illud omne, quod immodicum est, eo ipso malum sit: nec possit dici etiam boni nimia esse communicatio, ubi fastidium & contemptum nimia diffusionem parit, quasi non fructus Divini sacrificij lædatur, vel irreverentiâ mysteriorum, vel contemptu ministrorum.

Prosequamur cætera. Conc. Aquisgran. sub Ludov. pio, lib. 1. c. 118.

Caven-

Cavendum, inquit, summoperè præpositis Ecclesiarum est, ut in Ecclesiis sibi commissis, non plures admittant Clericos, quàm ratio sin-
nit, & facultas Ecclesiæ suppetit: ne si indis-
cretè & extraordinariè plures aggregaverint,
nec ipsos gubernare, nec cæteris Ecclesiæ ne-
cessitatibus, ut oportet, valeant adminicu-
lari. Sunt namque nonnulli vanam gloriam ab
hominibus captantes, qui numerosam Cleri
congregationem volunt habere, qui nec animæ,
nec corporis curant solatia exhibere. Hi nam-
que taliter aggregati, dum à prælatis stipen-
diâ necessaria non accipiunt, neque Canoni-
cum servant ordinem, nec Divinis officiis in-
sistunt, claustra, societatemque cæterorum
relinquentes, efficiuntur vagi & lascivi, gulæ
& ebrietati, & cæteris suis voluptatibus dedi-
ti, quicquid sibi libitum est, licitum faciunt;
proinde præpositis solerter providendum est, ut
in hoc negotio modum, discretionis teneant,
scilicet, ut nec plusquam oportet, & possibili-
tas Ecclesiæ suppetit, in congregationem admit-
tant: nec eos, quos rationabiliter gubernare
possint, causâ avaritiæ abjiciant.

C A P. V.

*Monachorum, in Presbyteros & Cleri-
cos promovendorum, ab Ecclesia potest
numerus determinari.*

NEc tamen hæc dicta putare quis debet, quasi vellem, ubi aliæ desinunt esse causæ, Religiosos omnes à Prælatiis repellere, prætextu multitudinis: *Cui enim usus modo possunt esse Regulares, qui necessarias olim operas suppleverunt?* absit hoc à me, absit, omnes Regulares ab ordine excludi, aut velim aut cogitarim, sed eorum operas spirituales, pro multitudine populi necessarias, prudenter existimari posse, judico, ad plurium vel paucorum ordinationem procurandam. Nolo plures in Ecclesiastica militia duces, aut præcones, aut buccinatores creari, quàm milites.

Quod ab antiquo in Ecclesia, omnibus sæculis servatum, ut in locum unius Clerici, alter succederet, nec ordinaretur ullus, qui non populi utilitatibus ac necessitatibus deserviret, siue in offerendo sacrificio, siue in aliis officiis, ad quæ destinabatur, nunquam ferè tamen, soli sacrificio offerendo; quidni hoc ipsum hocce tempore observeatur?

Num votum istud reprehendendum est, quod majorum nostrorum fuit, quod ad veteris Ecclesiasticæ disciplinæ, quantum sine turbatione unitatis fieri potest, restorationem adspirat? Num Regularibus infensus videbor (quibus à teneris annis, & etiam nunc addictum, ac me obligatum sentio) si quod circa sæculares fieri exopto,

exopto, id etiam circa Regulares observari expectam. Servetur nempe Trid. constitutio cit. quæ præcipit, ut juxta Chalced. can. Clericorum, qui vel Ecclesiæ civitatis, aut pagi, vel Monasterio, vel Martyrio adscribuntur, numerum, ad utilitatem, vel necessitatem populi metiamur.

Certum est, ex veteris Ecclesiæ disciplina, in Monasteriis paucissimos Sacerdotes fuisse: constatque ex Epiph. Epist. ad Joan. Hieros. inter Epist. Hier. Pallad. c. 8. Laus. Hist. Ruff. de vit. PP. lib. 3. n. 188. auctore alio Græco Anonymo, lib. 5. de vit. PP. quem Latinè vertit Pelag. Rom. Ecclesiæ Diac. libel. 5. n. 27. Alio item auct. incerto, lib. 7. ejusd. Oper. quem in Latinam linguam transtulit Paschas. c. 33. Cassian. collat. 4. c. 1. multos ex iis Sacerdotibus, qui in Monasteriis, absque cura animarum ordinati fuissent, à sacrificii Divini celebratione abstinuisse.

Constat etiam ex reg. S. Bened. c. 69. §. 1. regulâ S. Aurel. c. 45. §. 2. in Monasteriis, unum Presbyterum & Diaconum fuisse. Constat ex Greg. Magn. Epistolis 44. lib. 5. indict. 14. & 12. lib. 1. summi beneficii loco concessum, Monasteriorum abbatibus fuisse, ut ordinarentur. Liquet etiam ex Justinian. Novel. 123. c. 36. in Monasteriis feminarum eligi

confueviffe, *Sive Presbyterum, sive Diaconum, ut pro ipsis respondeat, aut sanctam communionem eis deportet.* Imò & aliquando nonnisi Clericum iis, ab Episcopo dari, non quidem ad communionem eis impertiendam, sed *ad responsorum Monasterii munus.*

Ex novella verò 133. c. 2. quædam fuisse Monasteria virorum, absque Ecclesiis, quorum Monachi cum reliquis, ad communem Ecclesiam convenirent; quædam verò quæ haberent Ecclesias, in quibus numerus ordinatorum determinatus esset, de quibus scilicet hæc, ex more in Ecclesia recepto, constituit. Porro si in sacrosancta Ecclesia, quæ in Monasterio consistit, quatuor aut quinque ex eadem mansione senes sint, quibus omnis jam difficultas in sacrosancta illa vitæ, ac fidei institutione superata est, & qui ordinationem in Clero meruerunt, Presbyterorum fortè vel Diaconorum, vel aliorum deinceps gradum tenentes.

Quorum munus describit, nempe, ut adeuntibus sui copiam faciant, & de Scripturis SS. exquisitiùs sermocinentur, efficiantque, ut alii omnes tales reputentur, simul sacram odservantes ædem; simul juventutem insolescentem, & terminos suos egredi volentem, in tolerantia retinentes.

Innumera alia proferre possem, quæ in Mo-

Monasteriis, determinatum Presbyterorum numerum olim fuisse, doceant: imò licèt aliquando, ob eximiam sanctitatem quorundam, inducti fuerint Episcopi, ad Monachos ordinandos, sine ulla animarum cura, nullo alio sacro ministerio imposito quàm orationis & precum: id tamen rarum fuisse, nullàque Ecclesiasticà lege firmatum, observari potest.

C A P. VI.

Inferuntur duo corollaria, ex dictis.

EX quibus omnibus, jam dictis, duo hæc inferuntur corollaria. I. Licèt contemplationis cælestis, precum, sacrificii Divini, infinitum sit pretium, tamen Ecclesiam, quæ novit Clericatum ac Sacerdotium, ad aliorum purgationem, etiam exteriori ministerio procurandam destinari: noluisse olim, ad solum precum aut sacrificii usum, quenquam ordinari; imò & qui ab eo exteriori ministerio cessarent, quamvis sacrificii istius, quantus esset fructus, mente caperent, nihilominus ne unum ab alio disjungerent, etiam ab isto Divino opere interdum cessasse, eamque etiam quorundam Monasteriorum legem fuisse, ut ex Pallad. cit. supra colligere possumus.

II. Ex istius ministerii exterioris necessitate,

fitate, vel utilitate, numerum Sacerdotum, in Monasteriis determinatum fuisse, nec tot ordinatos, quot Deo colendo, per sacrificium & preces, utiles viderentur: sed quot regendis Monasterii fratribus, iisque instruendis, in officio continendis, Divinisque sacramentis reficiendis, sufficere viderentur.

Licet autem eorum ordinum, qui in salutem spiritalem proximorum impenduntur, dispar esse possit ratio, ut multò plures expediat, ex iis ad Sacerdotium promoveri, quia major & diffusior est eorum opera, & labor spiritualis, in concionibus habendis ad populum, confessionibus excipiendis, aliisque spiritualibus ministeriis exercendis: nihilominus in eo parem & antiquiorem eorum esse rationem, quòd sicut in Monasteriis Sacerdotes olim creabantur, plures vel pauciores pro exigentia Sacerdotalium functionum, in iisdem Monasteriis necessariò exercendarum, & numerus quidam eorum determinabatur; sic jam habitâ quoque ratione ejusdem exigentiæ, numerus Sacerdotum Monachorum determinari oporteat, ita ut in amplioribus civitatibus major ut plurimum eorum debeat ordinari numerus, quàm in minùs populosis: & ubi plures sunt ordinarii Sacerdotes, in subsidium pauciores sunt advocandi.

Hanc

Hanc Ecclesiæ mentem esse, colligitur ex Clement. *dudum de sepultur. §. numer.* in qua Constitutione, Clem. V. in Conc. gen. Vienn. hæc statuit, *numerus autem personarum assumendarum, ad hujusmodi officium (audiendarum Confessionum) exercendum, esse debet, prout universitas Cleri & populi, ac multitudo vel paucitas exigat eorundem.*

Colligitur ex extrav. Bonif. VIII. *super Cathed.* inter extravagant. communes, tit. *de sepultur.* In quo de religiosis, ad Confessiones assumendis, statuitur, similiter, *ut numerus personarum assumendarum ad hujusmodi officium, esse debeat, prout universitas Cleri & populi, ac multitudo vel paucitas, exigat eorundem.*

Colligitur etiam, ex prudentia, quam erga Societatem Jesu jam coalescentem, Apostolica sedes ostendit. Nisi enim & Clericorum & Sacerdotum, numerum aliquem definitum esse, sibi persuasisset Paul. III. perperam in Bulla, quâ illius Societatis institutum, primùm approbavit, Professorum ejus numerum ad sexaginta duntaxat personas, Apostolico diplomate præscripsisset, cujus initium est, *Regimini militantis*, tom. I. Bullar. Cherub. cujus quidem constitutionis, meminit Orlandin. lib. 4. hist. Societ. n. 2.

Quantumvis enim, quos sedes Apostolica, huic ordini circumdederat cancellos,

dictus Pontifex, postulante Ignatio, revulserit, teste eod. Orland. bullâ quæ incipit, *licet debitum*, §. 40. & coadjutorum numerum ad alios, quos idoneos præpositus generalis judicavit, extendi posse voluerit: quod nimirum, aperiende se ubique messe, messorum copia major desideraretur, nec jam paucis locis Societas concludi posset, sed ad plurima diffundenda esset, non tamen in unaquaque civitate, aut Diœcesi, amplio rem, aut Sacerdotum hujus Societatis, aut alterius copiam, summus unquam pontifex esse voluit, quàm ad Ecclesiæ ministeria obeunda, & populorum necessitatibus subveniendum sufficeret.

Gravissima & idonea huic rei confirmandæ, auctoritas S. Thom. 2. 2. q. 188. a. 4. ad. 3. Objicienti enim, *inconveniens videri, quod auctoritas prædicandi, & confessiones audiendi, infinitis hominibus committatur*, Respondet, quod à prælatis non conceditur talibus Religiosis, ut quilibet indifferenter prædicare, vel confessiones audire possit, sed secundum moderationem eorum, qui hujusmodi Religionibus præficiuntur, vel secundum taxationem ipsorum prælatorum.

Ex iis autem quæ circa numerum confessoriorum definiendum, & prædicatorum statuta, definita, asserta sunt, licet etiam argumento à simili ostendere, Sacerdotum, ad divinum officium offerendum, numerum,

rum, determinatum esse debere : maximè cum ad solas preces , & sacrificium Divinum , Ecclesia non probarit , ordinari ut plurimum Sacerdotes, qui in cæteris inutiles existant ; nec ulli certo officio, Ecclesiæ necessario, addicantur.

Utroque igitur argumento, inferre licet, numerum Sacerdotum innumerabilem esse non debere, nec in immensum crescere , nec omnes homines ad Sacerdotium provehi expedire ; multò minùs brutos animantes, & corpora omnia, sensus & vitæ expertia, in homines mutari, ea dignitate exornatos. Atque hæc de hisce thraſonicis, ex aggerationibus sufficiunt: non abs re tamen erit, quædam hîc subjungere, de sacro & Ecclesiastico principatu ; de ejusdem distinctione à profano & politico ; de eorundem principatuum diversis muniis, &c. quibus natura Ecclesiasticæ Hierarchiæ, quam hoc tractatu , ex SS. P P. elucidare conamur, percipietur, ac ejus adversarii, & perturbatores confundentur amplius. Sit ergo

QUÆ-

QUÆSTIO XII.

De sacro , & Ecclesiastico principatu ; ejusque discrimine , à profano & politico.

CAPUT. I.

*Unicus inter Angelos , sacer principatus ;
duplex inter homines , sacer &
profanus.*

Observandum hîc imprimis , inter Angelos , hominesque beatos , & viatores , hanc esse differentiam quòd tam beati spiritus , quàm homines , qui felicitatis statum consecuti sunt nullo alio ordine , quàm sacro contineantur , nulli regimini , præterquam spiritali obnoxii sunt , quia nec poenis corporalibus ampliùs subjacent , nec ad pacem temporalem quæ politicæ societatis finis est , dirigendi sunt , qui perpetuâ & stabili tranquillitate potiuntur , & ab omnibus , quæ nos jam terrent , vexantque corporis molestiis , & omnibus adversæ fortunæ vicissitudinibus , penitùs liberi sunt atque immunes : quæcunque proinde inter eos guber-

gubernatio admittitur, Hierarchica est, nullusque alius principatus, quàm facer & spiritalis: nullus profanus politicus, seu civilis, & corporalis.

Sacrum autem principatum, quemadmodum inter Angelos, ita & inter homines beatos, admittunt Theologi omnes, post Dion. lib. de Cæl. Hier. inferuntque ex ipsis beatorum ordinum seu Angelorum nominibus, quibus S. Scriptura utitur, quorum plura sacrum significant principatum.

Utrum duraturus sit post iudicii diem, principatus iste, controvertitur. Chrys. Hom. 39. in c. 15. 1. ad Cor. videtur affirmantem sequi sententiam, explicans verba ista Apost. *deinde finis, cum tradiderit regnum Deo & patri, cum evacuaverit omnem principatum, & potestatem, & virtutem.* I. quidem, quia ex c. 7. Dñ. profert ista verba, quæ Regni Christi; seu Hierarchiæ perennitatem significant *Regnum ejus, Regnum æternum, quod non præteribit.* Deinde, quia hæc verba subiungit, quibus ex professo quæstionem proponere, & pro affirmante sententia concludere videtur, *quemnam autem hic dicit evacuari, & aboleri principatum, Angelorumne? absit: at fidelium? ne hoc quidem. Sed quemnam? dæmonum, de quo dicit, non est nobis colluctatio, adversus carnem & sanguinem, sed adversus principatus, adversus potestates, adversus mundi Rectores hujus sæculi.* Verùm

Verùm Chryf. ibi non loqui de iis, quæ accident post diem universalis judicii, sed potiùs quæ contingent ante illum diem, ab eo scilicet tempore, à quo Euangelii promulgatio facta fuerit; à quo tempore docet, Paulum significare hoc cap. initium habiturum exterminium principatus, & amplificationem Regni Dei, quorum continuatio ad diem usque judicii protrahetur, ad quem usque diem semper præliando & vincendo Christus regnabit, donec mors post omnia destruat, Deo mortuos omnes ad vitam suscitante; huncque Germanum esse sensum Pauli (ut reverà videtur esse genuinus) præter Chryf. tradunt Theodor. œcum. Theophyl. & alii græci: Sedul. item Primas. & alii, ex latinis.

Quamvis & possint ipsa intelligi, de humanis principatibus & potestatibus, quæ in die judicii cessabunt; imò etiam, si ita lubet, de principatibus, & potestatibus Cælestis Hierarchiæ, secundum interpretationem S. Thom. q. 108. a. 7. quæ quidem quoad actualia ministeria, & novas revelationes, quibus ultra opus non erit, cum suos Deus collegerit, & à malis separaverit, & in statu felicitatis immutabili colloca-verit, post diem judicii pariter desinent: sed de hac re, ni fallor, supra diximus.

Interim autem habetur in Cœlis, inter ipsos beatos spiritus, & sanctos homines,
in

in Coelis degentes, Hierarchia seu sacer principatus, ratione novarum revelationum, quæ inferioribus, superiorum operâ, immittuntur, & ministeriorum, quæ Angelis bonis demandantur, propter electos. Sed omnis principatus politici, ab eis imperfectio, procul abest, qui superiorem societate civili conditionem nacti, nec temporalibus bonis indigent, nec temporalibus poenis coerceri possunt.

C A P. II.

Varia discrimina inter sacrum, & politicum principatum.

INter homines autem, quamdiu in hac mortali vita peregrinantur, duplex principatus necessarius est; unus politicus, qui habet potestatem in corpora, alter sacer & Ecclesiasticus, qui animam ipsam ligat: prior qui negotia profana procurat, posterior, qui res sacras administrat: prior qui pro fine habet, pacem temporalem, alter qui æternam felicitatem: prior qui homini, & ut sibi vivit, & ut in collectione aliorum versatur, consulit, ac providet, quatenus æternam beatitudinem consequi possit, & prædestinatorum cætui aggregetur, posterior, qui ex suo præcipuo fine hominis, quatenus sibi solitariè vivit, minus sollicitus, ejusdem, quatenus in societate civili

civili versatur; curam gerit, ne debita totius corporis harmonia concentusque solvatur..

Quas differentias ostendunt passim SS. PP. ac primò Clem. Rom. lib. 2. constit. c. 34. comparans enim Regem cum Episcopo, hæc scribit, *Imò si quid amplius dicendum est, pius hic accipiat, quàm ille olim accipiebat: siquidem ille militaria tantum administrabat, bello & pace, ad custodiam corporis susceptis, hic verò Sacerdotium, ad Dei honorem administrat, ut pericula ab anima & corpore propulset. Quantò ergo anima corpore præstantior, tantò est Sacerdotium regno excellentius, ligat enim aut solvit, supplicio vel remissione dignos. Quocirca Episcopum oportet, ut patrem diligere; ut Regem metuere.*

Orig. lib. 8. contra Cels. in fin. *Quin & ad magistratus in patria gerendos, hortatur nos Celsus, si hoc in columitas legum ac pietatis tuenda postulet. Nos verò cùm sciamus oppidatim alias civitates per verbum Dei conditas, eos, qui vitâ & doctrinâ sacrâ, ut præfint, sunt idonei, hortamur ad præfecturas Ecclesiarum, non ambitiosos probando, sed modestos, & non temerè se in functiones arduas ingerentes: cogimus ad curas publicas: & Magistratus nostri benè rem administrantes, sub præfecti sunt magni Regis illius, quem filium esse Dei credimus: qui dum benè præfunt divinitus constitutis patriis, hoc est, Ecclesiis, à quibus ele-*
ti

Eti sunt, regunt eas, juxta præscripta Dei, salvis etiam legibus publicis. Nec hoc faciunt Christiani, quòd ista publica vitæ munia refugiant, sed quòd se servant diviniorebus & magis necessariis muniis Ecclesiæ, ad salutem hominum: quoniam & hoc justum existimant & necessarium; omnium rationem habentes, suorum quidem, ut indies proficiant, extraneorum verò ut eos ad pietatis ac religionis doctrinam, simul & opera pertrahant; & quantum possunt plurimos adjungunt suæ Reipublicæ, ut per divinas leges unum fiant, cum Deo, universorum Domino, idque uniente ipsius filio, Dei verbo.

Quasdam, iis verbis, Politici, & Ecclesiastici Magistratus, seu Hierarchici, differentias adnotabis, sed eas præcipuè, quòd diviniora sint, & magis necessaria hujus, quàm illius munia; quòd hi secundum divinas leges, salvis legibus publicis, quatenus cum divinis consentiunt, Ecclesias regere, illi legibus publicis, salvâ divinâ lege, Rempublicam administrare debeant: quòd hi præcellentiorum finem spectent, putà hominum salutem & unionem cum Deo: in quo consentiunt Orig. Dion. c. I. Eccl. Hier. qui cum definivisset, scopum & finem Hierarchiæ esse θεωκρατία, id est, Deum fieri, quid sit ista θεωκρατία, iis verbis explicat, Dei porro effectio, est Dei, quoad ejus potest, imitatio, & cum eodem conjunctio, atque ut ita dicam

*dicam, unio. Et Antioch. Hom. 122. sacri-
gitur principatus istius scopus hic est, Deo,
quantum humanæ sinunt vires, ut se assimilet,
atque uniat, Deum habens sacre totius scien-
tiæ, & operatorie virtutis præceptorem.*

Sed redeamus ad alios PP. qui sacrum principatum, à politico & Regio discrimi-
nant. Osius Cordub. Episc. hæc scripsisse
ad Constantium Imp. refertur, quæ utrâm-
que potestatem, sacram & civilem deter-
minant, referente Athan. Epist. ad solit.
vit. agent. *Ne te misceas Ecclesiasticis, neque
nobis in hoc genere præcipe. Tibi Deus impe-
rium commisit, nobis quæ sunt Ecclesiæ, con-
credidit: & quemadmodum qui tuum imperium
multis conatibus invadit, contradicit ordina-
tioni divinæ; ita & tu cave, ne quæ sunt Ec-
clesiæ, ad te trahens, magno crimini obnoxius
fias. Date, scriptum est, quæ sunt Cæsaris Cæ-
sari, & quæ sunt Dei Deo. Neque igitur fas
est nobis, in terris imperium tenere, neque tu
ethymiamatum, & sacrorum potestatem habes,
Imperator.*

Hilar. similiter libell. ad Constant. Au-
gust. qui incipit, *benignif. nat. tua*, non lon-
gè ab init. duas istas potestates discriminat,
quodd civilis circa publica & temporalia ne-
gotia, sacra seu Sacerdotalis, circa religio-
sam observantiam, versetur, provideat, in-
quit, & decernat clementia tua, & omnes u-
bique iudices, quibus provinciarum administra-
tiones

tionones creditæ sunt, ad quos sola cura, & sollicitudo publicorum negotiorum pertinere debet, à religiosa se observantia abstineant, neque post-hac præsumant atque usurpent, & putent se causas cognoscere Clericorum.

Nazianz. differentiam inter illas potestates statuit, quòd prior exerceatur in corpus, posterior in animam; prior circa res terrestres, posterior circa cœlestes; prior legibus humanis intendat, posterior legem divinam habeat pro regula, & ad Deum ducat. Hinc enim orat. 1. n. 9. docet, sacros magistros, respectu cæterorum Christianorum, habere se velut animam ad corpus, aut mentem ad animam: ait enim Christum instituisse, *alios esse, ad Ecclesiæ perfectionem, Pastores ac magistros, nimirum qui virtute, conjunctioneque ac familiaritate apud Deum, vulgo sublimiores sunt, rationem animæ ad corpus, aut mentis ad animam obtinentes.* Hinc ead. orat. n. 21. Hierarchiam, seu τὴν ἀρχὴν ἱερὰν, sacram gubernationem, in lege divina sitam, & ad Deum deducentem appellat. Hinc orat. 17. n. 15. magnificè de sacro principatu, ita loquitur, *vos quoque imperio meo ac throno, lex Christi subjicit: imperium nos quoque gerimus: addo etiam præstantius ac perfectius, nisi verò æquum est, spiritum carni salces submittere, & Cœlestia terrenis cedere.* Hunc orat. 19. in fun. patr. n. 41. Episcopatum, vocavit,
grave

grave & insidiosum animarum forum. Hinc denique Epist. 46. Afric. paucis verbis, duos istos principatus discriminat, dum imperium quod ipse, alii que Antistites gererent, incruentum principatum vocat: illud verò, quod præsidēs provinciarum haberent, quod gladios & lorum juncta habet.

Utrumque Valentinian. senior principatum ita distinxit, ut animarum sacro, corporum civili curam commissam crederet: refertur enim à Theodor. lib. 4. hist. c. 6. cùm Ambrosium, quem præfectum urbi Mediolanensi constituerat, in Episcopum electum, rescivisset, dixisse, *gratia tibi sit Domine omnipotens, & servator noster, quòd cùm ipse corpora huic viro commississimè, tu etiam animas ei commendasti.* Chrys. pluribus passim in locis, utrumque principatum discriminat. Præclare quidem lib. 3. de Sacerd. c. 5. *Habent quidem principes terrestres vinculi potestatem, verùm corporum solùm: id autem quod dico Sacerdotum vinculum, ipsam etiam animam contingit, atque ad Cælos, usque pervadit, adeo ut quæcunque infernè Sacerdotes confecerint, illa eadem Deus supernè rata habeat, ac servorum sententiam Dominus confirmet.*

Fusiùs serm. 10. de util. lect. script. & Ap. dig. magistratus civiles & sacros comparat, in vincendi & solvendi potestate, in jure habendi carceris, in potestate vitæ & necis, in facultate

facultate remittendi debita, auctoritate tradendi carnificibus, aliisque ejusmodi: hisque, spiritualia assignat vincula, & carceres, quibus animas ligent, illis terrestria, quibus corpora; his debitorum spiritualium relaxationem, illis temporalium; his suscitationem à mortuis, & damnationem ad mortem æternam, illis adjudicandi morti temporali duntaxat facultatem; his dæmones ipsos carnifices parere, quibus contumaces & facinorosos tradant, illis homines solum obsequi. Denique probare adnuitur, hos τοῖς ἀγγέλους πνευματικοῖς, spirituales Magistratus esse, illos, τοῖς βιωτικοῖς, sæculares; atque adeò tantò præstantius priorum officium esse, quàm posteriorum, quantò digniores sunt ii, qui Magistratus gerunt, pueris, qui Magistratus ludunt.

Denique (plurima siquidem ejusdem generis prætermitto) eleganter idem S. Doct. utrumque principatum comparat, hom. 15. in poster. ad Cor. iis verbis, *at verò hæc aliud quoque imperii genus est, ac civili quidem imperio sublimius. Quodnam igitur hoc est? illud nimirum quod in Ecclesia viget, cujus etiam ipsius Paulus mentionem facit, cum ait obedite præpositis vestris, & subjacete eis, ipsi enim pervigilant, quasi rationem pro animabus vestris reddituri: hoc enim imperium, tantò civili excellentius est, quantò Cælum terrâ: imò etiam multiò præstantius. Pri-*

Z

mum

mum namque non hoc præcipuo studio spectat, ut perpetrata scelera vindicet, sed ut ne omnino quidem perpetrentur : deinde si perpetrata sunt, non ut ægotantem de medio tollat, sed ut ipsa deleantur. Ad hæc, rerum quidem hujus vitæ parvam omnino rationem habet, verum pro Cælestibus omnia agit ac decernit. Quocirca non modò majorem, quàm provinciarum præfecti, sed etiam, quàm illi ipsi, qui Diadematè cincti sunt, honorem acceperunt, qui hoc imperium gerunt, ut qui in majoribus rebus, & ad majora commoda homines fingant.

Epiphan. quoque in opere, quod Panarium inscripsit, hæc. 20. quæ est Nazaræorum, n. 3. & 4. fusè thronum Davidis, Ecclesiam esse contendit, cui, nempe Christus, Rex simul & Sacerdos, contulerit, dignitatem Regiam simul ac Pontificiam, sed Regiam superioris ordinis, ac cœlestis, quia ipse Rex secundum superiorem, ac cœlestem ordinem; quippe, qui Joan. 18. fassus fuerit, regnum suum non esse de hoc mundo. Unde colliges, verum principatum ac quasi Regium, Ecclesiasticum esse, qui tamen negotiorum mundanorum minimè curam gerat, sed Cælestia meditetur.

C A P. III.

*Alii antiqui PP. pro discrimine, inter
sacrum, & politicum prin-
cipatum.*

SYNEF. Episc. Ptolemaid. Epist. 57. ad-
versus Andronic. Deus ambo vitæ genera
separavit; unumque eorum sacrum, alterum
ad regimen, atque imperium constitutum est:
alios enim ad infirmarum rerum sæcem conver-
tit, alios sibi sociavit. Illi in negotiis, nos in
oratione collocati. Ab utrisque verò, quod ho-
nestum & consentaneum est, requirit Deus.
Patrono opus habes: vade ad eum, qui Reip.
præest; Deo quapiam in te indiges, vade ad
urbis antistitem, &c.

Hic SYNEF. distinguit duos prædictos
principatus, quod Ecclesiasticus sit circa
sacra, civilis circa negotia profana; civilis
circa subditos solum versetur, Ecclesiasti-
cus circa Deum primò occupetur, à quo &
scientiam Hierarchicam, & regendi pru-
dentiam, & constantiam, & piam volunta-
tem haurit, gratiarumque divinarum distri-
buendarum, singularem potestatem, cujus
cultum procurat, & sacrificiis, & sacra-
mentorum celebratione, quæ potestas in
homine Hierarchico potissima est, & al-
terius circa populum fons & origo. De-

nique quodd Ecclesiasticus, adversus pertinaces, non tam vim adhibeat, quàm orationem apud Deum, & exhortationes erga peccantes: Politicus vim potius inferat; unde absolutè vocatur *imperium & dominatio* quam dominationem ab Ecclesiasticis principibus, arcet S. Petrus dum ait, *non dominantes in Cleris, sed forma gregis facti ex animo.*

Eleganter etiam Isidor. Pelus. lib. 3. Epist. 249. Isid. Diac. cujus initio hæc scribit, *ex sacerdotio & regno, rerum administratio conflata est. Quamvis permagna utriusque differentia sit (illud enim veluti anima est, hæc veluti corpus) ad unum tamen & eundem finem tendunt, hoc est, ad hominum salutem: quapropter cum Iudaica res initium sumebant, sacerdotium ut magis necessarium institutum est, ac per diu duravit. Postquam autem carni addictiores atque crassiores erant, Regnum poposcerunt: illud ipsis concessum fuit, quippe quod utilissimum esset, atque eorum qui sacerdotio minimè parebant, peccata coerceret ac restringeret.*

Sanè illud, circa ista verba, notandum est, non dici ab Isid. circa corpus, politicum principatum versari, vel circa animam, Ecclesiasticum, quod sup. cit. PP. docuerunt, & alii inferiùs citandi docent: neque in eo distingui, Ecclesiasticum principatum à civili, quòd hic ad pacem temporalem tendat,

tendat, ille ad salutem subditorum referatur, quod à præceptore suo Chryf. ac Naz. cit. addiscere potuerat, qui ad Cœlestia tendere sacrum principatum, atque adedò ob majora commoda, putà sempiterna, hominem formare; & ad Deum deducere, qui solus est vera hominum salus; politicum verò terrestria spectare, ac minoris momenti commoda procurare, & ad Deum per se minimè perducere, non obscurè ostendunt.

Neque tamen his repugnat cit. Isid. Illi siquidem principatum utrumque, secundum se cogitant, prout inter proprias metas, propriosque terminos concluditur, quo sensu, non ulteriùs tendit, quàm ad commodi temporalis acquisitionem, & publicæ tranquillitatis felicitatem. Isidor. verò considerat, prout ab ipso Deo intentum est; vel prout à creatura rationali, sese dirigente in ultimum finem, refertur: quo sensu ad hominis salutem tendit, sicut & sacerdotium: nam Deus utrumque istum principatum, tam civilem, quàm sacrum, ad hominis salutem procurandam destinavit; sacerdotalem quidem immediatiùs, qui scilicet hominis perfectionem spiritualem proximè operatur, regium verò remotiùs, in quantum à malo avertit, poenarum metu; regiumque principatum, ad hominum salutem, per sacerdotalem dirigi, mo-

veriatque impelli, eodem nempe modo, quo corpus ab anima movetur, dirigitur atque impellitur: primasque & maximè necessarias partes dedit sacerdotali, sine quo nimirum dirigente, docente atque instruente, vix possunt homines ad Deum deduci, & salutem consequi, possunt autem sine regio principatu terrente.

In cujus rei confirmationem subjungit, populum Judaicum, qui à Deo singulariter diligebatur, ac fovebatur, ab initio habuisse sacerdotes, quorum ductu regeretur, Reges autem non habuisse, nisi cùm crassiores, ac rudiores effecti, indigerent scelerum vindice, & principe, jus gladii temporalis habente, ad ulciscendam rebellantis populi contumaciam.

Ad hanc necessitatem confirmandam, idem paulò post addit, ut ostenderet, regno ac sacerdotio sublato, nullum populo judaico salutis subsidium reliquum esse, ideoque Daniele prophet. ut illud ostenderet, fore, ut Judæorum res, post Christum in crucem sublato, funditùs deleantur, nec ullum latioris spei vestigium ipsis restaret, nec melior ulla exspectatio eluceret, his verbis usum, *exterminabitur unctio, & judicium non erit in ea*: per unctiōnem videlicet sacerdotium, per judicium autem Regnum, & civilem statum intelligens.

Quæ

Quæ obiter notare volumus, non tantum ad Isid. mentem ostendendam, verum etiam ad necessitatem sacri seu sacerdotalis principatus, & Hierarchici adstruendam: quam utique magis ipse confirmat subdens, sublato Hierarchico statu, civilem quoque perire; cuius rationem hanc assignat, *sublato enim ac prorsus deleto eo, quod caput erat, maiorisque momenti; nec aliud quidem quicquam consistere poterat: nam Regni quoque basis, pietas erga Deum, quæ in Dei cultu posita censebatur.*

Advertant ista, Hierarchici status osiores, vel contemptores, observentque sedulo principes, eodem scilicet ictu, quo Hierarchicus principatus concutitur, regium quoque quati, & priori destructo, posteriorem quoque labefactari.

Quod autem cit. loc. Isidor. Ecclesiasticam potestatem politicæ præfert, quia hanc corpori, illam animæ comparat, ad stipulatorem habet Nilum apud Damasc. lib. 2. parell. c. 21. scribentem, *tantò sublimius esse regno sacerdotium, quantò spiritus carne præstantior*: cuius rei ratio esse potest, egregia illa Nili sententia ibid. *quantum corpori præstat animus, tantum quoque is, qui animis medetur, eos antecellit, qui corpora duntaxat curant.* Ad stipulatorem habet Innoc. III. c. solitæ, de major. & obed. Non negamus, inquit, quin præcellat Impera-

tor in temporalibus illos duntaxat, qui ab eo suscipiunt temporalia: sed Pontifex in spiritualibus antecellit, quæ tantò sunt temporalibus digniora, quaniò anima præfertur corpori.

C A P. IV.

*Prosecutio ejusd. argum. de diversitate
inter sacrum, & politicum prin-
cipatum.*

SEd redeamus, ad principatus utriusque, sacri & politici, distinguendi susceptum negotium, pressius & accuratius discrimen istud, nobis videntur exhibere, seqq. à me laudandi PP. atque Imperatores Christiani, Gelas. Papa Epist. ad Anastas. Imp. apud Binium, cujus verba mutuati sunt Conc. Trosleiani PP. c. 2. & Paris. sub Ludov. & Lothar. lib. 1. c. 6. Greg. v. r. lib. 8. Regist. Epist. 28. & alii, referuntque Gratian. d. 96. c. 10. Ivo Carnot. & alii.

Duo quippe sunt, Imperator Auguste, quibus principaliter regitur hic mundus, auctoritas sacra Pontificum, & Regalis potestas. In quibus tantò gravius est pondus sacerdotum, quantò etiam pro ipsis regibus hominum in divino reddituri sunt examine rationem.

tionem. Nosti enim, clementissime fili, quodd licet præsideas humano generi dignitate, rerum tamen præfulibus divinarum, devotus colla submittis, ab eis causas tuæ salutis expetis, inque sumendis Cælestibus sacramentis, eisque, ut competit, disponendis, subdite debere cognoscis, religionis ordine potius quam præesse nosti. Itaque inter hæc Siliorum, te pendere iudicio, nos illos ad tuam velle redigi voluntatem: si enim quantum ad ordinem pertinet, publicæ disciplinæ, cognoscentes imperium, tibi supernâ potestate collatum, legibus tuis, ipsi quoque parent religionis antistites, ne vel in rebus mundanis exclusæ videantur obviare sententiæ; quo, rogo te, decet affectu eis obedire, qui prærogandis sunt attributi mysteriis, proinde sicut non leve discrimen incumbit Pontificibus siluisse pro divinitatis cultu, quod congruit; ita eis, quod absit, non mediocri periculum est, qui cum parere debeant, despicunt, &c.

Idem de anathematis vinculo, ubi ostendit, & apud Judæos fuisse, qui Sacerdotium regnumque conjungerent, & paganos Impp. simul Reges Pontificesque fuisse, hæc pro distinguendis istis potestatibus subjungit:

Sed cum ad verum ventum est, eundem Regem atque Pontificem (Christum) ultra sibi, nec Imperator Pontificis, nomen imposuit,

nec pontifex Regale fastigium vendicavit. Quamvis enim membra ipsius, id est, veri Regis atque pontificis, secundum participationem naturæ, magnificè utrumque in sacra generositate sumpsisse dicantur, ut simul regale genus, & sacerdotale subsistant; attamen Christus, memor fragilitatis humanæ, quod suorum saluti congrueret, dispensatione magnifica temperans, sic actionibus propriis, dignitatibusque distinctis, officia potestatis utriusque discrevit, suos volens medicinali humilitate salvari, non humanâ superbiâ rursus intercipi, ut & Christiani Imp. pro æterna vita pontificibus indigerent, & pontifices pro temporalium cursu rerum, imperialibus dispositionibus uterentur, quatenus spiritalis actio à carnalibus distaret incursibus: & ideò militans Deo, minimè se negotiis sæcularibus implicaret; ac vicissim, non ille, rebus divinis præsidere videretur, qui esset negotiis sæcularibus implicatus: & ut modestia utriusque ordinis curaretur, ne extolleretur utroque suffultus, & competens qualitatibus actionum specialiter professio aptaretur.

Eadem verò inculcat, Nicol. I. Epist. ad Michael. Imp. quæ incipit, proposueramus, circa finem.

Ex utroque verò Gelas. testimonio, colligere licet, potestates istas, & subiectis, & officiis distinctas esse, nec uni in alterius jura involare, propriosque
ter-

terminos transilire, fas esse. Priori porro cit. testimonio, hos fines utriusque potestatis assignat, sacræ quidem potestatis, religionis cultum, sacramentorum administrationem, & eorum administrandorum dispositionem, doctrinam salutis, & eorum, quæ ad divinum cultum pertinent, institutionem; civilis autem, ordinem publicorum negotiorum & rerum mundanarum procurationem. Posteriori, & fines, & objecta, & actiones utriusque potestatis, diversa assignat: Ecclesiasticæ scopum *vitam æternam*; civilis, *felicem rerum temporalium excursum*: objecta prioris, *res divinas*; posterioris, *negotia secularia*: Denique, prioris, *actionem spiritalem*; posterioris *carnalem*.

Illum imitatus Sym. Papa, Epist. 4. Apol. ad Anastas. Imp. *Conferamus autem, inquit, Imperatoris honorem, cum honore Pontificis inter quos tantum distat, quantum ille rerum humanarum curam gerit, iste divinarum. Tu, Imperator à Pontifice Baptismum accipis; sacramenta sumis, orationem poscis, benedictionem speras, pœnitentiam rogas. Postremo, tu humana administras; ille tibi divina dispensat: itaque, ut non dicam superior, certè æqualis honor est: ne te putes, mundi pompâ præcellere, quia quod infirmum est Dei, fortius est hominibus, &c.* ac paulò post, *Cæterum, si omnis potestas à Deo est, ma-*

gis ergo, quæ rebus est præstituta divini.

Propter hanc differentiam, quod humanis præsit politica potestas, divinis sacra seu Hierarchica, super humanam videtur hanc agnoscere, Horskmsda Pontif. epist. Presbyteris, Diaconis, & Archimandritis secundæ Syriæ, relatâ Aët. 5. Conc. Constantinop. sub Agapeto & Menna, dum ait, *alia est hominum potestas, alia sunt sacerdotum officia*: Hæc verò in doctrinæ ministerio, fanciendi circa res fidei auctoritate, religionis functionibus versari, nec impunè à sæcularibus principibus invadi, exemplo Oziæ Regis, exponit.

C A P. V.

*Quisnam illorum principatuum sit universalior occasione testimonii
Cassiodori.*

Cassiodorus lib. II. variar: cum esset Senator & præfectus prætorio, Epist. 2. ad Joan. Pap. *nolite, inquit, in me tantum rejicere illius civitatis curam, quæ potius vestrà laude secura est. Nos enim speculatores Christiano populo præ-*
sideris.

fidetis ; vos Patris nomine universos diligitis. Securitas ergo plebis ad vestram respicit famam, cui Divinitus est commissæ custodia : quapropter & nos decet custodire aliqua, vos omnia. Pascitis quidem spiritaliter commissam vobis gregem : tamen nec ista potestis negligere, quæ corporis videntur substantiam continere : Nam sicut homo constat dualitate, ita boni Patris est utraque refovere. Primum penuriam temporis, quam delicta promerentur, orationibus sanctis amovere : monere me, quæ sunt gerenda sollicitè. Sum quidem Iudex Palatinus, sed vester non destinam esse discipulus : nam tunc ista rectè gerimus, si à vestris regulis minimè discedamus : Sed cum me à vobis desiderem, & moneri consiliis, & orationibus adjuvari : jam vobis est applicandum, si quid in me fuerit aliter, quàm optabatur, inventum.

Eadem ibi Cassiod. cum cæteris, de vera & formali, ut loquuntur, ratione objecti sacrae potestatis, putà, quòd debeat esse negotium spiritale, seu ad salutem animæ spiritalem spectans : singulare verò istud docet, quod, ad Hierarchiæ, seu sacri principatus dignitatem, plurimum facit, nimirum magis universalem, generalioreque esse amplitudinem rerum, quæ sub principatum sacrum cadunt, quàm quæ sub dispositione civili continentur : nam & domestica negotia, quæ civilis principis co-

gnitionem fugiunt, objici sacræ potestati, cujus est secundum Divinas leges, uniuscujusque mores formare, non solum ut rectè se in Ecclesia gerat, verum etiam, ut & sivè in privata vita, sive in societate œconomica, officio suo fungatur; cujus item est paternam charitatem omnibus exhibere, & paternam supplere atque herilem, in iis, in quibus deficiunt, potestatem: actus proinde sacri principatus, aliquos esse domesticos, seu domesticæ potestatis, putà docendi, arguendi, & coram domesticis testibus increpandi, corripiendi, & poenitentias etiam privatas imponendi: quæ officia, nullo modo sunt publicæ potestatis politicæ.

Deinde civilia ipsa negotia, spectare pariter ad sacrum Magistratum, non quidem ut ipsa procuret, vel eorum procurandorum rationem, iis, qui potestati politicæ subditi sunt, per se singulariter præscribat; hoc enim proprium est officium politici Magistratus, quod sibi arrogare non debet Ecclesiasticus: Sed ut pro ipsis gerendis, apud Deum sit sollicitus, eaque Deo precibus suis commendet, quod supra ex Syn. notavimus, & apud ipsos principes satagat, quatenus secundum Dei legem fiant; imò etiam delinquentes corripiat ac puniat: quod jus etiam ipsis tribuit Innoc. III. c. *Novit de judic.* his verbis, *cùm non humanæ*

constitutioni, sed Divinæ potiùs innitatur, quâ potestas nostra non est ex homine, sed ex Deo, nullus sanæ mentis ignorat, quin ad officium nostrum spectet, de quocunque peccato corripere quemlibet Christianum, & si correctionem contempserit, per distractionem Ecclesiasticam coërcere.

Atque aded, quod olim Volusiano suavit. Sidon. lib. 7. Epist. 17. ut Abbas esset frater Auxianus supra congregationem, ipse verò & supra Abbatem: id servatâ proportionē, à Christo, circa utrumque principatum institutum dici potest, ut in negotiis civilibus, sit Rex, Magistratúsque politicus, supra plebem, & supra ipsum Sacerdotem, qui in eo, quasi unus ex plebe esse videtur, ad obediendum Regio Magistratui paratissimus: ipse tamen aliâ ratione, sit supra ipsum Regem ac Magistratum, quatenùs consilio illum dirigit, & precibus apud Deum juvat, in suo munere rectè exercendo: cujus rei rationem habens, ead. Epist. Sidonius, Victorem Comitem, *se jure seculari Patronum, jure Ecclesiastico filium, excolere ut clientem, ut Patrem eligere, profiteretur.*

Cassiodorus igitur, tum propter protectionem Divinam Imperatoris, quæ à precibus Sacerdotis maximè pendet; tum propter exhortationes, & consilia salutaria, quæ in rebus civilibus, quotiescunque dubium

bium, num aliquid sit contra legem Divinam, à Sacerdotibus experere debent Principes temporales, supra ipsos aliquâ ratione, Sacerdotes constituit. Hoc autem postremum, asserit etiam S. Bern. de confid. lib. 3. c. 3. iis verbis, *Uterque ergò Ecclesiæ, & spiritualis scilicet gladius, & materialis: Sed is quidem pro Ecclesiâ, ille verò & ab Ecclesiâ exercendus est. Ille Sacerdotis, is militis manu, sed sanè ad nutum Sacerdotis, & jussu Imperatoris.* Vide eund. Epist. 256.

Iis obiter addi potest, ad, majorem Hierarchicæ potestatis, quàm politicæ amplitudinem, ostendendam, occulta delicta, & intra animum conclusa, ad politicam potestatem non spectare, sive ut ligentur, sive ut solvantur, *cogitationis* siquidem *pœnam*, neminem pati, *lege cogitat.* ff. de *pœnis*. E contra verò, ad omnia penitus peccata, Hierarchiam extendi, juxta illud Christi, Math 18. *Quaecunque solveritis, &c. Quaecunque ligaveritis, &c.* Quæ verba, Sacerdotalem ligandi atque solvendi auctoritatem, ad omnia penitus peccata, licet nondum opere perfecta, patere demonstrant: quod & receptus ab initio Ecclesiæ mos, confitendi etiam apud Sacerdotem, peccata solo animo destinata, ad obtinendam absolutionis gratiam, confirmat, cujus meminerunt Tert. lib. de pœnit. Cyr. de Laps. atque alii plures.

Deinde

Deinde quòd ea solùm peccata ulciscatur Magistratus civilis, quæ pacem publicam turbant, in omnia verò, quæcunque tandem illa sint, animadvertere possit Ecclesiasticus, quia legibus Dei repugnant, & gloriam Dei deprimunt, pro quo vindex, in foro saltem poenitentiae constitutus est. Quæ causa est, cur scripserit Aug. Epist. 54. ad Maced. *Nam quosdam quorum crimina manifesta sunt, à vestra severitate liberatos, à societate tamen removemus altaris, ut poenitendo placare possint, quem peccando contempserunt, seque ipsos puniendo.*

Jure igitur Cassiod. universaliorẽ sacrum principatum, magisque extensum esse docuit, quàm politicum, cujus amplitudinis, explicandæ gratiâ, plurimas quoque Hierarchiæ, & sæcularis Monarchiæ, vel alterius generis principatus civilis differentias, observavimus, ut non tam à proposita quæstione diversio videri possit, quàm in suscepta disputatione, non infructuosa progressio.

C A P. VI.

Varii proferuntur auctores, pro differentiis, inter utrumque principatum, Ecclesiasticum & civilem.

VErùm redeundum videtur, ad alios, omni exceptione majores testes audiendos,

diendos, qui non minùs apertè, quàm præcedentes, utriusque principatus limites, finesque, intra quos sese continere uterque debeat, nobis exponunt. Primus secundùm rationem temporis profertur Justinian. Imp. cujus egregia ista verba leguntur, à quibus novellam sextam, quæ est de Clericorum ordinatione, exorditur.

Maxima quidem in hominibus sunt dona Dei, à surperna collata clementia, Sacerdotium & Imperium, & illud quidem Divinè ministrans, hoc autem humanis præsidens, ac diligentiam exhibens: ex uno eodemque principio, utraque procedentia, humanam exornant vitam: ideoque nihil sic erit studiosum Imperatoribus, sicut sacerdotum honestas: cum utique & pro illis ipsi semper Deo supplicent. Nam si hoc quidem inculpabile sit undique & apud Deum fiduciâ plenum: imperium autem rectè & competenter exornet, traditam sibi Rempubl. erit consonantia quidem bona, omne quicquid utile est, humano conferens generi, &c.

Citantur autem ista, & laudantur à summis Pontif. & sacerdotibus, scribentibus ad Tarasium, Constantinop. Patriarcham, Act. 7. 7. Syn.

Hanc autem divisionem duplicis potestatis, in Ecclesia, sacræ scilicet, seu Hierarchicæ, & politicæ, confirmant, Fulg. lib. de ver. præd. & grat. citatus à Conc. Paris.

ris. & Aquisgran. 2. PP. Ipsique Concilii PP. sub Ludov. Pio, & Lothar. c. 3. Aquisgran. 2. sub Ludov. in præf. Capitularia Caroli & Ludov. lib. 5. c. 167. eam, inquam, divisionem publicæ potestatis, tanquam adæquatam statuunt; & in Episcopis sacram, in Regibus politicam, residere docent, tanquam in fontibus, à quibus, ad alios derivatur, qui pro suo modulo, vel Regiæ, vel Episcopalis participes sunt potestatis.

Quibus proinde testimoniis refelluntur, qui Hierarchiam seu sacrum principatum, in aliis officiis reponunt, quæ nec sunt Episcopalis potestatis, nec alterius imminutæ, & minoris Episcopali, ab ipsa tamen derivatæ, ejusdemque cum eo ordinis, constituunt.

Verum quia isti auctores, neque sacram, neque politicam potestatem, suis terminis circumscribunt, neque nobis utriusque munia accuratè describunt, ideo à me obiter duntaxat recensentur, quatenus ad alios tandem perveniamus, qui hoc munere, distinguendarum duarum istarum potestatum, diligentius perfuncti fuerint, cujus inquisitio hoc loco, præsentis potissimum est instituti.

C A P. VII.

Oppositiones quædam inter utrumque principatum, explicantur, occasione testimonii Gregor. II.

Distingunt igitur alii, duas istas potestates: Greg. II. summus Pontif. adversus Leon. Isauric. scribens, qui & imagines sacras confregerat, & se Imperatorem, & Pontificem esse scripserat, fusè utriusque regiminis diversitatem ostendit, Epist. 2. ad ipsum, quæ Græca & Latina habetur, ante editionem VII. Syn. Ac. 1. Doctrinam non spectare tradit ad Imperatores, sed ad Hierarchas, non sunt, inquit, *Imperatorum dogmata, sed Pontificum: quoniam Christi sensum nos habemus; alia est Ecclesiasticarum constitutionum institutio & alius sensus sæcularium: in administrationibus sæculi, militarem & ineptum quem habes sensum & crassum, in spiritualibus dogmatum administrationibus habere non potes. Et ecce tibi palatii, & Ecclesiarum scribo discrimen, Imperatorum & Pontificum; agnosce illud & salvare, nec contentiosus esto.*

Hanc autem differentiam, præter citatos, apertissimè tradunt Osius Cordub. apud Athan. Epist. 1. ad solit. vit. agent. Athan. ipse ead. Epist. Lucif. Calarit. advers.

vers. Constant. Greg. Naz. Orat. 9 ad Julian. præfect. Hilar lib. imp. ad Constant. Aug. Gratian. Imp. apud Ambros. in Conc. Aquil. Idem Ambros. Epist. 32. Theodos. 2. Imp. Epist. ad Conc. Ephes. inter Epist. Cyr. Alex: Epist. 17. Gelas. Epist. 6. vel 7. ad Episc. Orient. circ. med. Horfm. Epist. ad Presbyt. Diac. vel Archimandr. secundæ Syr. relatâ , act. 5. Conc. Constantin. sub Agap. & Menn. facund. Hermian. lib. 12. prodefensi. 3. Capitul. c. 3. Avit. Vienn. nomine omnium Episc. Gall. Epist. 2. Damasc. orat. 2. de imag. Nicol. 1. Epist. 8 & 10. ad Michaël. Imp. apud Bin. Bas. Imp. act. 10. v l l l Syn. & alii passim.

Pergit paulò post , Greg. II. *Quemadmodum Pontifex introspiciendi in palatium potestatem non habet , ac dignitates regias deferendi, sic neque Imperator in Ecclesiis introspiciendi, & electiones in Clero peragendi, neque consecrandi, vel symbola sanctorum sacramentorum administrandi, sed neque participandi, absque opera Sacerdotis: sed unusquisque nostrum, in qua vocatione vocatus est à Deo, in ea maneat.* Plures hîc differentias, ratione diversarum functionum sacrarum, quas enumerat, utriusq; potestatis recenset Greg. quæ ex prædictis abundè innotescunt.

Duæ sunt, quas præcedentibus adjungit, 1. quòd sicut introspiciendi in Palatium

tium

tium Pontifex potestatem non habet, ita nec princeps politicus, in Ecclesias introspiciendi; quam differentiam confirmant Constit. Apost. lib. 2. c. 57. & 58. nec non lib. 8. c. 11. Euseb. lib. 6. Hist. c. 27. Chrys. orat. de S. Babyl. advers. gent. Idem Hom. 8. in Act. & 83. in Math. Ambros. apud Theodor. lib. 5. c. 17. Zozom. lib. 7. c. 24. & alios; Isidor. Pelus. lib. 1. Epist. 28. Eusebio; Theodos. Magn. in actis Ephes. Syn. edit. Pelt. tom. 5. c. 21. & alii plures.

Altera verò, quod electiones sacrorum Magistratum, seclusis privilegiis, quibus id principibus concessum sit, Politici Magistratus, seu principis, juris non esse: neque enim antiquus Ecclesiæ mos fuit, ut principes temporales, sacris se electionibus immiscerent: & ne iis se immisceant, ventant Apost. can. 30. seu in græco. 31. Syn. Rom. 11. sub Symmach. c. 3. Syn. Nyc. 2. c. 3. Mogunt sub Car. c. 29. Cabilon. sub eod. c. 42. Turon. c. 15. Arelat. sub eod. c. 4. Nicol. 1. Epist. *proposueram*. ad Michaël. Mogunt. sub Raban. c. 12. sub Arnulph. c. 5. Holon. apud Meld. c. 10. Wormac. c. 57. Syn. viii. sub Hadr. 2. c. 2. & 22. decreta Nicol. 11. in Syn. Rom. c. 13. Episcopor. Greg. viii. in Syn. Rom. ann. 6. c. 3. ann. 7. c. 1. & 2. ann. incerti c. 10. Victor. x. in Syn. Benevent. Urban. 11. in Claramont. Conc. c. 13. & 15. Melphit. Conc. c. 8.

c. 8. Paschal. 11. Epist. ad Archiepisc. Vienn. in fin. in Conc. incerto pluribus Canonibus ; Conc. Patav. subeod. c. 1. & apud Guardaſtall. c. 3. Callixt. 11. in Conc. Rom. c. 4. & 14. in fin. Innoc. 11. in Syn. Rom. c. 7. & 19. Alexand. 111. in Conc. Lateran. gener. c. 14. Innoc. 111. in Conc. gener. c. 25. & aliorum Conciliorum, & ſummorum pontificum paſſim.

C A P. VIII.

Diverſus utriuſque principatus modus procedendi , occasione testimoniſ ejusdem Gregor. II. Ubi de pœnis , à ſacro & politico Magiſtratu infligendis.

DEnique modum diverſum procedendi utriuſque poteſtatis, ſubinde explicat Greg. 11. copioſius, hæc ſcribens: ſi quiſpiam te offenderit , domum ejus publicas & ſpolias, ſolam illi vitam relinquens, tandemque illum ipſum vel ſuſpendio necas , vel capite truncas, vel relegas, eumque longè à liberis, & ab omnibus cognatis, & amicis ſuis amandas. Pontifices non ita, ſed ubi peccarit quis, & confeſſus fuerit, ſuſpendii vel amputationis capitis loco, Euangelium & crucem ejus cervicibus circumponunt, eumque tanquam in carcerem, in ſecretaria, ſacrorumque vaſorum ætaria conjiciunt, in Eccleſiæ diaconia, & in Cate-

Catechumena ablegant, ac visceribus eorum jejunium, oculisque vigilas & laudationem. ori ejus indicunt. Cùmque probè castigaverint, eumque fame affllexerint, tum pretiosum illi domini corpus impertiunt, & sancto illum sanguine potant, & cùm illum vas electionis restituerint, ac immunem peccati, sic ad dominum pium insonemque transmittunt. Vides, Imperator, Ecclesiarum Imperatorumque discrimen.

Et Paulò post, persequeris nos, ac tyrannicè vexas, militari carnalique manu: nos inermes ac nudì, qui terrenos ac carnales exercitus non habemus, invocamus principem exercitus omnis creaturæ, sedentem in Cælis Christum, qui est super omnes exercitus supernarum virtutum, ut immittat tibi dæmonem, sicut dicit Apostolus, tradere hujusmodi satanæ in interitum carnis, ut spiritus salvus sit. Nam ubi præclarâ commonitione adhibita, & doctrinâ, Pontifices Deo exhibuerint Imperatores irreprehensibiles, & mundos à peccatis & delictis, magnam apud eum laudem & gloriam obtinent, in sanctam resurrectionem magnam, quo tempore, res ipsas occultas, opera nostra, in lucem prolaturus est, in confusionem nostram, coram Angelis suis.

Nolim ad hujus discriminis, à Greg. traditi, explicationem, diversas pœnitentiæ impositiones, quarum aliquas ipse attigit, exponere; res immensi esset laboris, nec nostri

nostri instituti. Tria hîc tantùm observare, necessum est: 1. corporalem vitam, à sacra potestate, nemini auferri, citra mortem, peccata per poenitentiam à sacerdotali potestate plecti; politicam verò potestatem, & mortem ipsam nonnunquam inferre. Non debuit sacra potestas, peccatorem è medio auferre, quæ instituta est, ut illum emendaret: cujus emendationis procurandæ gratiâ, vitæ hominùm parcere debet, & ut loquitur Augustin. Epist. 54. ad Maced. *Quanto magis nobis displicet vitium, tanto minus volumus inemendatum interire vitiosum.*

Hoc quoque Ecclesia cupit enixè, ut qui liberantur à temporali morte, sic vivant, ne in æternum, unde nunquàm liberantur, incurrant. Unde quod contigit Ananiæ & Saphyræ, qui post voti infractionem mentientes Spiritui Sancto ad Petri vocem, præsentem meruere vindictam, non crudelitate sententiæ id factum interpretatur Hieron. Epist. VIII. ad Demetr. *Sed correctionis exemplo; nam & Apostolus Petrus nequaquam eis imprecatur mortem, ut stultus Porphyrius calumniatur, sed Dei judicium, Prophetico spiritu, annuntiat.*

Alterum poenas ipsas temporales, ac poenitentias, quas sacra potestas infligit, prout ab illa inferuntur, quodammodo spirituales esse. 1. quia prius animam subigunt, quàm corpus; prius animo poenitentis persua-

Aa den-

dentur, quàm corpori infligantur, vixque nisi consentienti imponuntur: efficit autem sacra potestas, admonitione & doctrinâ, ut poenitens consentiat; ideoque doctrina sacra, pars quædam potestatis sacræ, quod utique insinuat Apost. 2 ad Tim. 4. dum discipulo præcipit, *Argue, obsecra, increpa, in omni patientia, & doctrina*; & apertius docet, magnus Hierarchiæ magister Dionys. quem secuti sunt Maxim. & alii, dum in definitione Hierarchiæ meminit, *Divinitus traditæ, divinosque efficientis, & scientiæ, & efficaciæ, & perfectionis*, c. 1. Eccl. Hierar. statim init. quas condiciones recto ordine statuit, utpote cùm per divinitus datam scientiam, efficax reddatur sacer principatus, animosque subditorum inflectat, ac corpora subigat, per istam verò coërcitionem, perfectionem operetur.

E contra verò potestas politica, nec scientiâ opus habet, ut sit efficax, sed vi, nec coërcitione, perfectionem per se operatur, sed remotè duntaxat ad perfectionem præparat, quia metus iste quem infert, *nihil ad perfectum adducit, sed perfecta charitas*, ut ait Apost. *foras mittit timorem*, mundanum præsertim istum & carnalem; sed nec remotè quidem ad perfectionem aliquando disponit, tunc maximè, cùm peccatorem è medio tollendum judicat, tunc enim hoc unum spectat, ne flagitiosus æ-

teris

teris noceat, eumque è medio proinde tollit, & à societate civili, atque ipso hominum coetu per mortem abscindit.

Per doctrinam igitur, & fidem divinorum judiciorum, quam inculcat sacra potestas, efficax ipsa redditur, *vivusque sermo Dei efficax*, & *penetrabilior*, *omni gladio ancipiti*, ad Hebr. 4. c. sacrae potestati efficaciam præbet, & *integritas*, ad animum usque pervadentem: ideò doctrinâ opus habet ille sacer principatus, tum quia nisi probatio præcesserit, temerarius videbitur, qui peccantem divinâ se auctoritate castigare affirmabit, inquiunt Chryf. Theodor. Theoph. & Oecum. in cit. loc. Apost. ad Tim. Tum quia, cum sacri Magistratus, nullos alios homines tortores adhibeant, & vindices criminis, quàm ipsos peccatores, illos in se ipsos armantes, ut conceptâ detestatione criminis, in seipsos piè sæviant, quis dubitet, doctrinâ & verbo opus esse ut id persuadeant, & ad hanc vindictam poenitentes adigant.

Cujus verbi divini efficaciam, notarunt Euseb. lib. 3. de demonstr. Euang. asserens, *servatoris nostri discipulos ejusmodi aculeos in auditorum animis reliquisse, ut penetraret eorum doctrina, in intimos thalamos, & cujusque conscientiam ita sauciaret, ut arcana ex latebris proferre, & pravitatem ante actæ vitæ, palam confiteri non dubitarent.* Dionys.

Eccl. Hier. c. 6. docens, ex tribus immun-
dorum ordinibus, primum, qui est Cate-
chumenorum, ad vitalem partionem effor-
mari & effingi à ministris; *sermonibus ob-*
stetricandi vim habentibus; alterum poeni-
tentium, qui à sancta vita desciverunt, à
prioribus facinoribus revocari atque retra-
hi, *bonorum sermonum hortatrice institutione*;
tertium tandem Energumenorum, qui à
contrariis formidinibus adhuc per igna-
viam terrentur, confirmari, *sermonibus vir-*
tutem adferentibus; ac proinde, purgandi &
expiandi vim, in doctrinæ traditione &
instructione reponit.

Firmilianus quoque inter Epistolas Cy-
prian. Epist. 750. in doctrina, vim sacri
principatus magnam reponit, dum ait,
Lapsis fratribus, & post lavacrum salutare, à
Diabolo vulneratis, per poenitentiam medela
queratur, non quasi à nobis remissionem pec-
catorum consequantur, sed ut per nos ad intelli-
gentiam delictorum suorum convertantur, &
Domino plenius satisfacere cogantur. Sed &
Tertul. Sacerdotalis correctionis, & cen-
surarum efficaciam oriri, ex divinorum ju-
dicio metu, & divinæ providentiæ
fide, in quibus animus, per doctrinam
Christi susceptam, & exhortationes ac ca-
stigationes sæpius inculcatas, confirmatus
fuerit. Certè, inquit, *fidem sanctis vocibus*
pascimus, spem erigimus, fiduciam figimus, di-
scipli-

Sciplinam præceptorum nihilominus inculcationibus densamus: ibidem etiam exhortationes, castigationes, & censura divina: nam & judicatur magno cum pondere, ut apud certos de Dei conspectu, summumque futuri judicii præjudicium est, si ita deliquerit, ut à communicatione orationis, & conventus, & omnis sancti commercii relegetur.

Duplicem iis verbis rationem Tertull. nobis præbere potest, cur quodammodo spiritales dici possint ipsæ pœnæ corporales, prout ab ecclesia imponuntur; primam, quam explicuimus, quia non nisi involentes & consentientes feruntur, nec ad eas subeundas Ecclesia vi adigit, sed propositis, divinorum præceptorum necessitate, judiciorum severitate, scientiæ perspicuitate, quibus omnibus qui fidem adhibent, metu majorum pœnarum, minores ab Ecclesia inflictas, lubenter subeunt, imò & Ecclesiam ipsam rogant, ut illas meritis imponat.

Alteram, eos, qui in fide tepidiores sunt, vel suæ salutis negligentiores, ab Ecclesia nullâ aliâ ratione urgeri, quam excommunicationis comminatione, quæ spiritualis est pœna: quam utique impœnitentibus inferendam, monent Apost. 1 Cor. 12. Constit. Apost. lib. 2. c. 41. Cypr. epist. 10. & alibi passim: Ambros. lib. 1. de pœnit. c. ult. Hier. c. 3. comment. in c. 6. ad Gal. &

556 Quæstio XII. Cap. 8.

In c. 5. Zach. Aug. Hom. 50. inter 50. & innumeri propè Conciliorum canones. Ubi autem excommunicationem Ecclesia inflixit, inquit Cœlest. 3. *si excommunicatus in profundum malorum venerit, cùm Ecclesia non habeat ultra quid faciat, ne possit esse ultra perditio plurimorum, per sæcularum compri- mendus est potestatem, cap. non ab hom. de ju- dic. scilicet, quia, teste Aug. lib. de corr. & grat. c. 15. cujus sententia refertur. c. corri- piant. 24. q. 3. excommunicationis pœnâ, in Ecclesia nulla major est.*

Ob has itaque causas Cyrill. Alex. non carnalia Ecclesiæ arma, sed spiritalia esse, docuit, lib. 2. in c. 6. Joan. explicans siqui- dem ista Petri verba *Domine, ad quem ibi- mus, verba vitæ æternæ habes?* Exemplo urbis Hiericuntis, cujus mœnia, Arca Do- mini per Sacerdotes circumlatâ, non machi- nis aut arietibus admotis, sed tubarum so- nitu, & clamantium voce quassata, cor- ruerunt, modum vincendi Ecclesiæ à Chri- sto præscriptum ostendit, iis verbis; *ipse enim (Christus) est, qui à sanctis viris portatur, & omnem diaboli vim evertit, non armis, sed clamore & tuba, hoc est, Evangelicâ prædica- tione, & consensu omnium populorum, in recti- tudine fidei Dominum confitentis. Quod in my- sticis quoque rerum divinarum celebrationibus impleri videmus, Pontificali tubâ hoc est, mi- nistrantis voce populo præunte: ita verò cadit*
& con-

& conteritur adversariorum vis ; arma enim nostra non sunt carnalia, sed potentia Deo.

Nec iis obstat S. Aug. de fid. & oper. c. 4. docens, perversissimam securitatem prepositus tribuere, ut ad eos non pertineat, nisi docere, quid cavendum quidve faciendum sit, quodlibet autem faciat quisque non curare : contendensque in Ecclesia malos tolerandos, quando corrigi non possunt ; cum verò eis, per quos Ecclesia regitur, adest salvâ pace potestas disciplinæ, adversus improbos aut nefarios exercendæ, tunc rursus, ne socordiâ segnitiaque dormiamus, aliis aculeis præceptorum, quæ ad severitatem coërcitionis pertinent, excitandos nos esse admonens. Non, inquam prædictis obstat, quippe cum nequaquam nos omnem ab Ecclesia jurisdictionem coërcitivam, excludamus, sed solum publicam Ecclesiæ potestatem, ita demum corporales poenas, aut pecuniarias imponere, ac præcipere posse dicamus, ut si renuerit peccator illas subire, non aliud ordinarium, ac commune remedium Ecclesiæ suppetat, quàm à consortio Christi, & Ecclesiæ unitate, rebelles, istos exscindere.

C A P. XI.

Quid Ecclesiæ agendum cum iis, qui Ecclesiam non audiunt.

SI qui autem hanc extremam Ecclesiæ
Aa. 4. sen-

sententiam contempserint, nihil Ecclesiæ ut plurimum superesse dicimus, nisi ut vel eos lugeat, ac pro iis ingemiscat, quatenus ad sanio rem mentem redeant, juxta sententiam Chryf. Hom. ult. in Epist. ad Hebr. & 1. in Epist. ad Tit. vel satanæ contemptores istos tradat, quemadmodum incestuosum Corinthium tradidit Paul. 1. Cor. 5. quâ de re interpretes in illud cap. nosque super. etiam aliqua; vel denique ad sæcularem potestatem recurrat, quemadmodum recurrendum consuluerunt adversus inobedientes, Aug. Epist. pluribus, ad Bonif. Maced. & alios plures: Conc. Antioch. PP. c. 5. Vernens. c. 9. Turon. 111. c. 4. Ticin. Ann. 855. rescripto ad Ludov. pium; Greg. 9. c. *statuim. de Maled.* Cœlest. 3. c. *cum non ab hom. de judic.* Hincmar. Rem. apud Flodoard. Hist. Rem. lib. 3. c. 18. Lup. Ferrar. Epist. 80. & 81. & alii passim: lege Can. *si quis Episc.* & seqq. 23. q. 1. c. 1. de offic. ordin. verbo *cum opus est.* & Clement. *quia contigit*, junctâ glossâ, verbo *remediis, de religios. domib.*

Hicque recursus ad potestatem sæcularem, ut rectè notant Joan. Pap. in Syn. c. 1. cit. de offic. judic. ordin. *non ad præjudicandum, sed potius ad ea, quæ Deo sunt placita prosequendum*, valere debet. ob hoc enim *vir temperans* (Marcianus) *Imperator* (ait Facund. lib. 12. c. 3.) *suo contentus officio, Ecclesiarum*

clesiarum Canonum executor esse voluit, non conditor, non exactor. Lege ipsa Marc. verba, act. 6. Conc. Chalced. & Facundum, fusè toto isto lib. principibus, circa res sacras exequendi solum, non statuendi potestatem contendentem. S. quoque Aug. Epist. 159. Marcell. Trib. in hujusmodi causis, quænam Episcopi sit auctoritas, quod Magistratus exequentis officium, docet iis verbis, si non audis amicum petentem, audi Episcopum consulentem: quamvis, quoniam Christiano loquor, maximè in tali causa, non arroganter dixerim, audire te Episcopum convenit jubentem.

Quod fusiùs explicat, Epist. seq. ad Apring. judic. ubi & nomine Ecclesiæ, agere judicem sæcularem, dum inobedientes Ecclesiæ plectit, ostendit, hæc scribens, *time ergo nobiscum judicium patris (Dei) & commenda mansuetudinem matris, (Ecclesiæ) cum enim tu facis, Ecclesia facit, propter quam facis. & cujus filius facis, &c.* Ex iisque colligit, modum Ecclesiæ procedendi, in iis causis, sæculari magistratui esse imitandum.

- Netamen exinde judicandi de spiritualibus, occasionem sumerent Magistratus sæculares, quòd ad executionem vocarentur, & imperfectam, sine sæculari præsidio, potestatem Ecclesiæ censerent, non immeritò fortassis veriti sunt aliqui PP. atque

adeo perniciosi exempli recursum istum putaverunt, Hilar. lib. advers. Auxent. & Sever. Sulpit. dial. i. de virt. Monach. Orien. c. 2.

Obligantur verò principes temporales, non solum, tanquam filii parenti, & multis beneficiis ab Ecclesia affecti, eidem benè merenti hoc auxilium impendere; verum etiam ex institutione Christi, & fidei Christianæ susceptione, ut illud propheticum adimpleant, *erunt Reges nutritii tui, & Reginae nutrices tuæ, vultu in terram demisso adorabunt te, & pulverem pedum tuorum lingent*, Isa. 49. Itemque 60. *surge, illuminare, Ierusalem; & ambulabunt gentes in lumine tuo, & Reges in splendore ortus tui: gens enim & Regnum, quod non servierit tibi peribit: suges lac gentium, & mamillæ Regum lactaberis*. Item Ps. 71. *Et adorabunt eum omnes Reges terræ, & omnes gentes servient ei, &c.*

Lege, Aug. Epist. 50. Bonif. Com. *de moderatè coërcend. Hæret.* ut aliis ejusdem Epist. nec non lib. 3. contra Crescon. c. 51. Bonif. ad Honor. Imper. Leon. Magn. Epist. 85. ad Leon. Imper. c. 3. & Turrib. Asturic. Episc. in præf. Isid. Hisp. de sum. bon. c. 53. Conc. Paris. sub Ludov. & Lothar. c. 1. propè fin. & Aquisgran. 11. sub Ludov. p. 4. c. 2. Conc. Holon. in Syn. Meld. c. 11. Synod. meld. c. 28. 7; & 81. Alexand.

Alexand. I I I. in Conc. Later. c. 27. & alii passim.

Notandum verò, dum potestatem in invitos, Ecclesiæ quodommodo ademimus, nos duntaxat, Ecclesiæ universalem in omnes fideles potestatem, considerasse, ac publicam: nullam autem habuisse rationem potestatis ejusdem Ecclesiæ, quasi paternæ & domesticæ in eos, qui se Deo consecraverunt, & propriâ voluntate sese Ecclesiasticis Magistratibus corrigendos, etiam corporaliter subdiderunt, eodem modo quo servi vel famuli dominis suis, filii adoptivi patribus adoptantibus, discipuli præceptoribus sese subjiciunt: non enim dubium est, quin ea conventio æquissima, sit, eamque obligentur temporales principes custodire, & munire, utpote à Christo ipso delineatam, & Ecclesiastico Regimini necessariam, cujus meminit Aug. Epist. 159. Marcell. Trib. de coactione per virgarum verbera loquens, qui inquit, *modus coërcitionis, & à magistris liberalium artium, & ab ipsis parentibus, & sæpe etiam in judiciis solet ab Episcopis adhiberi*, adeoque hæc coërcitio Ecclesiæ propria censetur; ut si quis è Clero incorrigibilis, à laico Magistratu, in Ecclesiæ subsidium puniatur, auctoritate Ecclesiæ id facere videatur, c. *ut famæ*, de sent. excomm. sed hæc omnia, quæ leviter perstrinximus, fusioris sunt indagationis.

C A P. X.

Excellentia sacri principatus quoad modum procedendi.

EXiis tamen differentiis, circa modum procedendi diversum, sacræ & politicæ potestatis, ejusdem sacræ potestatis excellentiam colligere licet, I. quodd poenam imponat Ecclesia, quam licet in hac vita, aliqui proter vi ac rebelles effugiant; at in alia Deus, cujus manus nemo effugere potest, usque ad ultimum quadrantem, multiplicatâ pro contumaciæ crimine satisfatione, exsolvi curabit: atque adeo inevitabiliter poena, à Sacerdote peccatis assignata, vel in hac, vel in altera vita infligitur, quia quæcunque à sacerdote ligantur in terris, ligata erunt & in Coelis. Cùm è contra, poena publicæ potestatis, quia territorii cujusdam, vitæque hujus limitibus continetur, inevitabilis non sit, sed contrariâ vi, dolo, fugâ, evitari possit.

II. Quod Ecclesia percutiat, ut fanet, corripiat & corrigat, corpus opprimat, ut animam erigat: obliget ad poenam, ut peccati obtineat veniam, quorum nullum per se politica potestas spectet, cujus unicus interdum scopus est, exterminatio vitiosi, ne publicam societatem turbet, malens unum perire, quàm unitatem: atque adeo
sacræ

sacrae potestatis animadversio, non tam poena, quam medicina; non tam supplicium, quam beneficium dicendum est: *Quis enim, ut cum Aug. loquar, Epist. 59. Marcell. Trib. non intelligat magis beneficium, quam supplicium nuncupandum, ubi nec seviendi relaxatur audacia, nec puniendi medicina subtrahitur? vel si supplicium poena ista dicitur, supplicium cum beneficio conjunctum dici debet, ubi justitiae ultio, cum misericordia, severitas cum indulgentia copulatur: nam ut idem sanctissimus pater docet in Ps. 50. misericordia est, ut ignoscat Sacerdos peccanti, justitia est, ut puniat peccatum.*

Ex quibus apparet, coërcitionem, quam utiur Ecclesia, minus efficacem non esse, quam sit coërcitio politica: utiliore autem esse, & præstantiorem, quia ad divinae operationis formam magis accedit, quam Deus & peccata aliquando dissimulat, & in hac vita, nonnunquam impunita relinquit, in altera durius punienda, & misericordiam cum justitia conjungit, justitiam cum pace, misericordiam cum vindicta, juxta illud Ps. *Universae viae Domini misericordia & veritas: & 1 Reg. 2. Dominus mortificat & vivificat, deducit ad inferos, & reducit.* Hæc verò fusiùs, occasione traditâ à Greg. 11. differentiae, inter sacram & politicam potestatem.

C A P. XI.

Varia alia testimonia, quibus uterque principatus discernitur.

JAm verò, ad aliorum testimonia PP. quibus differentia, inter illas duas potestates, jam tradita, illustrari possunt, proferenda, levique manu attingenda, regredimur.

Occurrit 1. Damascen. lib. 2. de imag. Regum, inquit, partes non sunt, ut Ecclesiae leges præscribant; considera enim, inquit, quid Apostolus dicat, & quos quidem in Ecclesia posuit primum Apostolos, deinde Prophetas, tum Pastores, & DD. ad Ecclesiae constitutionem, non adhibuit Reges: Et rursus, obedite, inquit, præpositis vestris: verbum non locuti sunt vobis Reges, sed Apostoli & Prophetæ, Pastoresque & DD. &c. Regum est civilis administratio, Ecclesiastica verò, constitutio Pastorum atque DD. &c. paremus tibi, Rex, in his, quæ ad vitæ civilis negotia pertinent, ut in tributis, vectigalibus, congiariisque solvendis, quorum tibi, quantum ad nos spectat, munus est creditum atque demandatum: & in Ecclesiasticis rebus statuendis ac decernendis, habemus Pastores, qui nobis locuti sunt verbum, & leges, atque instituta Ecclesiastica tradiderunt.

Occurrit 1. Nicol. 1. Epist. 8. ad Michaël. Imperat. apud Bin. qui statuendi aliquid circa res fidei, auctoritatem Imperatori

tori denegat, & civilium negotiorum administrationem, unicam rem ipsius potestati subiectam, monet iis verbis, *Congregastis Concilium adversus Ignat. Episc. Constant.* & ad Imperii vestri nutum, cuncti sunt famulati minores, & ad votum sæcularium, ut cum pace vestra dicamus; de solio Imperiali descendentes, Cathedram præfularem, ut ita fateamur, ascendistis, & pro desiderio hostium ejus, augustalium obliti sceptrorum, quendam Regem Israël imitantes, adversus illum, Sacerdotalis ministerii arripuistis officium: præsertim cum imperium vestrum, suis publicæ rei quotidianis administrationibus debeat esse contentum, nec usurpare, quæ Sacerdotibus Domini solum conveniunt, &c.

Et paulò post, *Vos autem, quæsumus, nolite præjudicium Dei Ecclesiæ irrogare, illa quippe nullum Imperio vestro præjudicium infert, cum magis pro stabilitate ipsius, æternam divinitatem exoret, & pro incolumitate vestra, & perpetua salute, jugi devotione precetur. Nolite quæ sua sunt, usurpare; nolite quæ ipsi soli commissa sunt, velle surripere, scientes, quia tantò nimirum à sacris, debet omnis mundanarum rerum administrator esse remotus, quantò quemlibet ex catalogo Clericorum, & militantium Deo, nullis convenit negotiis sæcularibus implicari. Denique hi, quibus tantum humanis rebus, & non divinis præesse, permissum est, quomodo de his, per quos divina ministrantur, judicare*

Judicare præsumant, penitus ignoramus. Plura subdit in eundem sensum, maximè quæ à Gelas. superiùs retulimus.

Occurrunt Episcopi Gallicani, Agobard. Lugd. opusc. de comparat. utriusque Regim. Eccles. & Polit. dicato Imp. Ludovic. Pio, neque inquit, *Ignorare debueratis majus esse regimen animarum, quod est Pontificale, quàm Imperiale, quod est temporale.* Plura alia ibid. de excellentia jurisdictionis sacræ, quæ non sunt hujus instituti.

Hincmar. Remens. Epist. 4. ad Episc. Franc. statim init. *Doctrina est Christiana, secundùm SS. Scripturarum tramitem, prædicationemque majorum, quâ Deo ac Domino nostro, Iesu Christo, conditore & redemptore nostro, qui simul solus Rex & Sacerdos fieri potuit, in cujus nomine, omne genui flectatur, cælestium, terrestrium, & infernorum, disponente, sicut B. Gelas. Papa, ad Anastas. Imper. dicit, & ingestis, quæ nuper in martyrio S. Macræ gesta sunt, partim continetur, duo sunt, quibus principaliter, unâ cum specialiter cujusque curæ subjectis, mundus hic regitur, auctoritas sacra Pontificum, & regalis potestas, in quibus personis, sicut ordine sunt divisa vocabula, ita sunt & divisa in unoquoque ordine ac professione, ordinationum officia: quamvis enim membra veri Regis atque Pontificis secundùm participationes naturæ, magnificè utrumque in sacra generositate sumpsisse dicantur, &c. ut supra*
 ex

ex Gelaf. tom. de anathem. quibus memoratis sic pergit : *Sed tantò gravius pondus est Sacerdotium , quantò etiam pro istis regibus hominum , in divino reddituri sunt examine rationem : Et tantò est dignitas Pontificum major , quàm Regum : quia Reges in culmen regium sacrantur à Pontificibus , Pontifices autem à Regibus consecrari non possunt. Et tantò in humanis rebus , Regum cura est propensor , quàm Sacerdotum , quantò pro honore , & defensione , & quiete sanctæ Ecclesiæ , & Regnorum , & ministrorum ipsius , ac leges promulgandæ , ac militando , à Rege Regum , est eis curæ onus impositum.*

Plura ibid. Hincmar. ex quibus utriusque potestatis discrimina colligantur : quemadmodum & Epist. 6. cap. præsertim 32. & 34. ex Leon. Epist. 54. ad Marcian. Gelaf. Epist. ad Anastas. legibus Valentin. Theodos. & Arcad. plura congeffit , quod ipsum facit nomine Carol. Calv. Imp. ad Adrian. II. scripta , quæ habetur in auctuario Biblioth PP. Paris. Tom. 2.

Hildebert. quoque primo Cænoman. Episcopus , deinde Turon. Archi-Presb. Epist. 40. ad Herlon. Sagiens. Episc. hoc argumentum tractat , *Membrum* , inquit , *Christi Rex , membrum Christi Sacerdos* , scienti loquor , *nostri gladium Regis , nostri gladium Sacerdotis. Gladius Regis censura curiæ , gladius Sacerdotis , Ecclesiasticæ rigor disciplinæ.*

nae. Hoc Euangelistam figurasse legisti, dicentem, Domine, ecce gladii duo hîc: si esset, qui in gladio regni liberaret nos, non peteretur educi gladius Sacerdotis propter nos. Arnulph. Lexov. Epist. 68. ad Alexandr. III. summ. Pontif. Dignitas Ecclesiastica Regiam provehit, & Regalis dignitas Ecclesiasticam conservare potiùs consuevit, quàm tollere libertatem. Etenim quasi quibusdam sibi invicem complexibus dignitas Ecclesiastica & Regalis occurrunt, cùm nec Reges salutem sine Ecclesia, nec Ecclesia pacem, sine Regia protectione consequatur.

Quibus Episcopis Gallican. addo celebrem, ex Anglia, Anselm. Cantuar. comment. in c. 27. Math. Nota, inquit, duos esse gladios in Ecclesia: alter materialis est, alter spiritualis, sed spiritualis nonnisi volentes, materialis cogit etiam nolentes. De utraque potestate Clericali & Laicâ loquitur, quam dicit esse in Ecclesia, quia Ecclesia ex Laïcis & Clericis constat: à Laïca potestate seu civili, pacem & protectionem, à Clericali seu Ecclesiasticâ & sacrâ, doctrinam, salutis remedia, ac gubernationem habet.

Occurrunt & Abbates Gallicani maximi nominis, Lup. Ferrar. Epist. 81. ad Amal. Episc. ex parte Guenil. Episc. & Ger. Comit. Præcipit itaque, Dominus noster Rex, inquit, ut ejus vobis sermonibus diceremus, se fi-

se fideliter tenere, quod Rex Regum, idemque Sacerdos Sacerdotum, qui solus potuit Ecclesiam regere, quam redemit, postquam humanitatem suam in Cælum evexit, semper cum suis futurus Divinitate potestatem suam, ad eam gubernandam Ecclesiam, in Sacerdotes divisit & Reges, ut quod SS. docerent Pontifices, & ipsi implerent, & impleri facerent devotissimi Reges. Quamobrem se cupere debitam sanctitati vestræ impendere reverentiam, sicut ei, quem sciat Divinitatis cultum integrè velle servare: atque vicissim postulare, cum eo tale fœdus concordiae ineatis, ut ubicunque Ecclesiasticæ utilitati, in portione Regni, sibi Divinitus collatâ, vestræ auctoritatis dispositione, in re tanta cupit consulere, unanimitate vestri consensus continuè adjuvetur.

Bernard. Clarevall. lib. 1. de confid. ad Eug. c. 6. In criminibus, non in possessionibus est potestas vestra: quoniam propter illa, & non propter hæc, accepistis claves Regni Cælorum: sequitur, quænam tibi videtur major potestas; peccata remittendi, an prædia dividendi: habent hæc terrena infima, judices suos, Reges & principes terræ: quid fines aliorum invaditis? quid falcem vestram, in alienam messem extenditis? cur major vis esse Domino, qui interpellatus, quodam dicente, dic fratri meo, ut dividat meam hæreditatem, respondit, quis me constituit judicem inter vos? Denique Hug. Victor. de Sacram. fidel. lib. 2. p. 2. c. 4. Ad pote-

potestatem Regis pertinent, quæ terrena sunt, & ad terrenam vitam facta omnia: ad potestatem summi Pontificis pertinent, quæ spiritualia sunt, & vitæ spirituali attributa universa.

C A P. XII.

*Iudicium S. R. E. Cardinal. ac summor.
Pontif. de utriusque principatus distinctione.*

Occurrunt etiam illustres S. R. E. Cardinales duo, i. Petrus Dam. lib. 7. Epist. 3. ad Henr. Henr. 11. Imp. filium, quem iis verbis alloquitur, utraque præterea dignitas, Regalis scilicet & sacerdotalis, sicut principaliter, in Christo, sibi met invicem singularis sacramenti veritate connectitur, sic in Christiano populo, mutuo quodam sibi fœdere copulatur: utraque videlicet alternæ invicem utilitatis est indiga, dum & Sacerdotium Regni tuitione protegitur, & Regnum Sacerdotalis officii sanctitate fulcitur. Rex enim præcingitur gladio, ut hostibus Ecclesie munitus occurrat, Sacerdos orationum vacat excubiis, ut Regi cum populo Deum placabilem reddat: ille sub lance justitiæ terrena negotia debet dirimere: iste fluentia Cœlestis eloqui debet sitientibus propinare. Ille constitutus est, ut nocentes atque scelestos, legalium sanctionum censurâ coercerent: iste ad hoc ordinatus est, ut per claves Ecclesie

clesiæ quas accepit, alios zelo canonici rigoris adstringat, alios per mansuetudinem Ecclesiastica pietatis absolvat.

Alter Petrus Cardin. Bertrand. Episc. Eduenf. qui fusissimè tract. de Orig. & usu Jurisd. utriusque tam sacræ quàm profanæ limites statuit, & sacræ præsertim jura tuetur: quæ fusiùs quoque defendit adversus Petr. de Cugner. milit. & consiliar. Philipp. Vales. Francor. Regis, nomine prælatorum omnium Regis Franciæ, quibus à prædicto Regis consiliario, intentata lis erat, quòd plurima, quæ jurisdictionis temporalis erant, ad se traxisse viderentur: nec abnuebat Petr. de Cugner. potestati temporali nullum jus esse circa spiritualia; quin imò, eo præsertim argumento nitebatur, quòd distinctæ officiis & actibus, istæ potestates essent, atque adeo nulli earum in alterius fines invadere liceret. Unde hoc orationis suæ thema assumpserat, ex c. 23. Math. *Reddite quæ sunt Cæsaris, Cæsari, & quæ sunt Dei, Deo.*

Itaque dicam duntaxat Prælati intentabat, quòd quæ jurisdictionis essent temporalis, ea, ac si sui fori, suæque cognitionis essent, sibi vendicarent. Cujus petitiones declinabat dictus Cardinalis, eâ exceptione, quòd licèt plurimorum, circa prædia, & rerum divisiones, quæ fori non sunt Ecclesiastici, cognitionem ad se traherent Antistites

†istites Galliar. nihil tamen, inquam, contra officium statumque suum committerent : utpote qui jurisdictionis temporalis capaces essent, quemadmodum & cæteri Regnicolæ, & jurisdictionem istam, diuturnâ possessione plusquam trecentorum scilicet annorum, suam effecissent. Ultrò citròque per aliquot dies, res disceptata est, tandemque Rex Philippus, pro Episcopis judicavit. legi potest ista disceptatio. tom. 4. Biblioth. PP. p. 1.

Denique ultimo loco referendi nobis sunt, duo ex summis Pontificibus, posteriorum temporum; Innoc. III. & Urban. IV. prior scribens Illustrissimo Constantinop. Imp. ut habetur c. *solist.* de major. & obed. *nosse, inquit, debueras, quòd fecit Deus duo luminaria, in firmamento Cæli: luminare majus, ut præesset diei, & luminare minus, ut præesset nocti: utrumque magnum, sed alterum majus: ad firmamentum igitur Cæli, hoc est, universalis Ecclesiæ, fecit Deus duo magna luminaria, id est, duas instituit dignitates, quæ sunt Pontificalis auctoritas, & Regalis potestas: sed illa, quæ præest diebus, id est, spiritualibus, major est: quæ verò carnalibus, minor; ut quanta est inter solem & lunam, tanta inter Reges & Pontifices differentia cognoscatur.*

Eadem comparatione utitur, Urban. IV. litteris ad Romanor. Regem, quas lectione dignas

dignas censuit, auctor judicum rer. ab Arragon. Regibus gestarum, tom. 3. Hisp. illustratæ, easque proinde in indices suos retulit: orditur autem ab iis verbis sum. Pontif.

Qui Cælum terramque regit, is nimirum Cæli novit ordinem, & in terra potest cælestis ponere ordinis rationem. Is exempla de superioris ad inferiora derivans, sicut in firmamento Cæli, duo luminaria magna constituit, ut mundum vicibus illustraret, sic & in terris maxima dona sua, Sacerdotium videlicet & Imperium, ad plenum spiritualium mundanorumque regimen, ad firmamentum Ecclesiæ militantis instituens, utriusque potestatis discrevit, officia, ut eorum officiosa diversas nullâ sibi adversitate dissentiat: sed in commissi executione regiminis, ex officii debito, in voti unitate concordet: & ipsorum proculdubio pro futura concordia, alterutrius alternis fulta præsidiiis, ac utriusque mutuis fota favoribus, opus justitiæ liberius operetur, pacem mundo pariens, tranquillitatem inducens, & nutriens unitatem. Imperium siquidem ad salutem Sacerdotali auctoritate dirigitur, & ipsius adjutum suffragiis, sedatis procellosis interdum imminentium tempestatum turbinibus, tranquillum redditur & quietum: Sacerdotium vero, pium & tutum habere debet refugium, imperialem mansuetudinem cum sua veneratione conjunctum; ut Imperii Rom. fastigium, & ejus culmini

mini praesidens, specialis advocati, & defensoris praecipui, circa Ecclesiam gerat officium, & in ipsius fortitudine brachii, defensentur Ecclesiae libertates, & jura teneantur ipsarum, extirpentur haereses, cultus Christianae fidei amplietur, & inimicis consternatis ejusdem, in pacis pulchritudine sedeat populus Christianus, & in Regis opulentia quiescat.

Alias comparationes, duarum istarum potestatum, tradunt alii; Ambrosius potestatem sacram auro, mundanam plumbo, comparat, lib. 2. de dign. Sacerd. c. 2. iis verbis, *Honor igitur, fratres, & dignitas Episcopalis, nullis poterit comparationibus adaequari: si Regum fulgori compares, & principum diademati, longe erit inferius, quam si plumbi metallum, ad auri fulgorem compares, quippe cum videas, Regum colla, & principum, submitti genibus Sacerdotum, & exosculatis eorum dextris, orationibus eorum credant se communiri.*

Quae verba Ambr. referuntur à Gregor. VII. Epist. 21. ad Herman. corruptè, Herimitens. Episc. Metens. Quam Epist. Exorcistarum ipsorum potestatem, Regiae praefarendam esse, contendit, & fusè comparationem utriusque potestatis instituit. Bartol. autem in Novell. 6. in princ. duas istas potestates, tanquam fratrem & sororem, comparat: fratris locum, sacram tenere, profanam sororis, docet. Omitto innu-

ianumera alia, quæ in hanc rem proferri possunt.

Ex iis verò posterioribus testimoniis, multa confirmari possunt, quæ superioribus tradita sunt, nimirum, potestatem sacram circa animas versari; ad earum salutem, ex proprio fine tendere; non violentiam inferre, sed suasionem præmittere; sæculari & nobiliorem esse, & quodammodò superiorem; tum quòd apud Deum, qui est fons totius dignitatis, primum locum habeat Sacerdos, cui scilicet Imperatores ipsos & Reges commendat: tum quòd Reges ac principes, divinam & naturalem, in Reip. administratione, sequi debeant legem, quam à Sacerdotibus debent addiscere: Sacerdotes autem à Regibus, circa suum officium, nec dirigi, nec juberi debeant, nec consilii accipiendi necessitate ducantur.

Sæcularem verò potestatem circa corpus versari, ad hominum salutem per se non referri, sed ad pacem, & tranquillitatem publicam, violentiam inferre, nec suasionem exigere; ignobiliorem esse sacrâ, seu Sacerdotali, quia ad Deum minùs, quàm illa accedit; inferiorem quodammodò esse, ac subditam, tum ut apud Deum benè illis sit, qui per Sacerdotem reconciliantur, ac grati efficiuntur, tum ut homines sibi subditos, rectè & secundùm Dei legem regere

ac gubernare possint, quemadmodum docuimus.

QUÆSTIO XIII.

In Ecclesia esse aliquam jurisdictionem coactivam.

C A P U T. I.

Damnantur, qui jurisdictionem coactivam Ecclesiæ adimunt.

EX ista verò doctrina, quam jam quæst. præc. fusè explicuimus, Corollaria quædam, adversus Hierarchiæ perturbatores plurimos, egregia deduci possunt. 1. Suam esse Hierarchiæ, seu sacro principatui, jurisdictionem; nec omninò ab Ecclesiastica potestate, secundum se, & ex institutione sua, omnem jurisdictionem, quam *coactivam* vocant, esse amandandam; quod olim defenderunt Marfil. de Padua, & Joann. de Janduno, ob hanc causam, à Joan. XXII. damnati, cujus damnationis verba audire præstat, quàm ineptè velle, aut istos auctores, malè sentientes, è cerebro nostro exponere, aut Joann. ac proinde Catholicam sen.

sententiam, aliis seu nostris, seu cujusquam auctoris verbis, explicare.

Quintus autem error istorum hominum adversus Hierarchicam jurisdictionem militabat, quem iis verbis proponit summ. Pontif. Quinto adhuc isti blasphemi dicunt, quod tota ecclesia simul juncta, nullum hominem punire potest, punitione coactiva, nisi concedat Imperator; quod utique Doctrinæ Evangelicæ noscitur obviare. Constat enim, quod à Christo, Petro, & in persona Petri, Ecclesiæ, potestas coactiva concessa, vel saltem permissa existit; quæ quidem permissio fuit postea adimpleta, cum sibi Christus dixit, quodcumque ligaveris super terram, &c. Ligantur enim non solum voluntarii, sed invitæ: adhuc sicut ibi legitur in Mattheo, quod si aliquis damnum alicui indebitè dederit, illudque ad mandatum Ecclesiæ noluerit emendare, quod Ecclesia, per potestatem à Christo sibi concessam, ipsum ad hoc per excommunicationis sententiam, compellere potest: quæ quidem potestas utique coactiva est. Circa quod est advertendum, quod cum excommunicatio major, nedum excommunicatum, à perceptione sacramentorum removeat, sed etiam à communionem fidelium, ipsum excommunicatum excludat, per quod corporalis à Christo coactio Ecclesiæ est permissa: quia secundum leges imperiales, gravius reputatur, inter homines conversari, ipsorumque privari suffragiis, quam

578 *Quæstio XIII. Cap. I.*

ab hominibus separari. Ex quo sequitur, potestatem coactivam, non ab Imperatore terreno, sed ab ipso Christo fuisse originaliter Ecclesiam consecutam.

Præterea beatus Petrus, post ascensionem Domini, in personam Ananiæ & Saphiræ uxoris suæ, sine imperiali concessione aliqua, hac usus est potestate, in quos, quia de pretio agri, Ecclesiam fraudaverant, mortis sententiam promulgavit quæ quidem sententia non processit de conjugum voluntate. Item beatus Paulus Elymiam magum, Sergium Paulum, à fide quærentem abducere, ad tempus luce privavit. Fornicatorem quoque Corinthium, in carnis interitum tradidit Sathanæ. Item ad Corinthios scribens, idem Apost. dixit, quid vultis, in virga ad vos veniam? in charitate & spiritu mansuetudinis? in quo satis coactivam potestatem supposuit se habere. Item scribens, eisdem alibi, dixit, arma, inquit, militiæ nostræ, non carnalia pro Deo, id est, à Deo concessa, ad destructionem munitiorum, consilia destruens, & omnem multitudinem extollentem, se adversus scientiam Dei ut sequitur, in promptu habentes ulcisci omne malum. Ex quibus patet, Paulum non ab Imp. sed à Deo habuisse potestatem istam coactivam.

Joannes autem XXII. hunc articulum, qui omnium postremus est, cæterosque quatuor articulos, Velut S. Scripturæ contrarios, & fidei Catholicæ inimicos, hæreticos seu
bæ-

hæreticales, & erroneos damnavit, nec non & prædictos Marsil. & Ioan. hæreticos, imò hæresiarchas fore manifestos, & notorios, finaliter declaravit.

Missa eadem damnatio est, ad Facultatem Paris. ac recepta, anno M. CCC. XXX. die prima Septembr. in congregatione habita in domo Cancellarii Paris. & decreta inquisitio adversus eos, qui dictos libros Marsil. de Pad. & Joan. de Jand. Gallicos fecerant, quemadmodum in publicis ejusd. Facult. tabulis habetur. Unde & potestatem coërcitivam, Ecclesiæ à Christo convenire, docuerunt semper ejusdem Facultatis Magistri: eamque iisdem ferè argum. quibus Joan. XXII. probat Gerson de potest. Eccles. confid. 4. fusc Herv. lib. de potest. Eccl. itemque Petr. de Alliaco. & Joan. Major, in eodem argumento versantes.

Sed notanda verba Almayn. de auct. Eccl. c. 2. corall. 3. *Marsilius de Padua deviauit à fide, omnem jurisdictionem coërcitivam ab Ecclesia auferens.* Item de potest. Eccles. & Laica, quæst. 3. c. 2. *Marsil. de Padua ponit, quòd Papa nullam habet potestatem coërcitivam sive coactivam, ex institutione Christi, sed ista opinio est damnata: erroneum enim est, quòd Papa non habeat potestatem coactivam, in ullis rebus.*

In Conc. quoque Senon. Provinc. ha-

bito anno 1528. Præsidente Anton. Cardin. à Prato, Archiepisc. Senon. Regni Franciæ Cancellar. cui plurimi ex DD. Facultatis Paris. intererant, damnantur errores varii, Marsil. Patav. interque cæteros, ille, quem à Joan. XXII. damnatum diximus, *Post hos, nempe Valdenses (inquit Concil.) surrexit Marsil. Patavin. cujus pestilens liber, qui defensorium pacis nuncupatur, in Christiani populi perniciem, procurantibus Lutheranis, nuper excusus est. Is hostiliter Ecclesiam insectatus, & terrenis principibus applaudens, omnem praelatis adimit jurisdictionem, eâ duntaxat exceptâ, quam secularis largitus fuerit Magistratus.*

Verùm accurata hujus quæst. decisio, integrum librum exigeret, nec hujus temporis nec loci, nec mei instituti. Brevem duntaxat illius explicationem, ne quid ad opusculi nostri perfectionem desit, subnectimus.

C A P. II.

*Fundamenta erroris contrarii
refelluntur.*

I. **Q**Uænam fuerint fundamenta erroris, Marsil. de Pad. explicandum est, quatenus ipsa contrariis rationibus Joan. XXII. ritè redargui, & ab Ecclesiastica

stica traditione convelli, penitus innotescat.

Supponit igitur Marsil. de Pad. ut patet ex libro ab ipso conscripto, qui inscribitur, *defensor Pacis ad Ludov. Bavar. Imp.* jurisdictionem coactivam non esse, cui non conceditur facultas infligendæ alicujus pœnæ invito, cùm enim non cogatur, qui spontè aliquid facit, quia coactio voluntario & spontaneo opponitur, non solum ex Philosophis, Arist. in libr. Ethic. & cæteris; verùm etiam ex PP. Iren. lib. 4. c. 7. Tert. lib. 2. contr. Marc. c. 2. Hil. in Ps. 2. Orig. Procem. lib. Periarch. Euf. de Præp. Euang. c. 6. Epiph. Hær. 5. & 16. & Macar. Hom. 15. Chrys. Hom. 11. in Joan. & alibi sæpe. Aug. passim, & cæter. ex iis sequitur, jurisdictionem coactivam non habere, qui invito pœnam infligere non valet, Ecclesiam autem, defendebat Marsil. nullam posse infligere, nisi volenti.

Probare nitebatur his auctoritatibus, quarum aliquas superiùs protulimus, quæ suadere videntur, nonnisi volentem ab Ecclesia puniri, & eum qui nolit Ecclesiae judicium subire, aut pœnam ab ea impostam ferre, nec ad judicium, invitum per Ecclesiam adduci posse, nec compelli, ut pœnam in se admittat; nam, inquiebat ille, nec pœnitentias corporales, à Sacerdote impositas, aliquis subit, nisi volens;

& licet excommunicetur, aliquis nolens, excommunicatio ista non est poena solius Sacerdotis, sed totius communitalis, seu iudicis à communitate electi, sive ille sit Sacerdos, sive non sit; Sacerdos verò solum clavigeri officium exhibet, pronuntians maledicti sententiam in eos, qui iudicio totius communitalis renituntur; iudex civilis constringit, ut ipsa ferventur.

Eadem ferè fundamenta, Anton. de Domin. lib. 5. de Republ. c. 1. 2. & 3. quæ omnia, hoc loco, ex professo à nobis, impræsentiarum minimè refelluntur; quæ & ab aliis DD. seriò satis, Deo laus, refutata sunt: iis tamen obiter refellendis hîc, jam sufficiunt istæ elucidationes.

C A P. III.

Ecclesiastica potestas, quomodo corporales pœnas, prodigiosâ virtute inferat.

I. **E** Lucidatio. Ecclesia nonnunquam, potestate Divinitus traditâ, miracula faciendi (quæ licet neque singulis Ecclesiæ Pastoribus, neque passim concessa sit, in Ecclesiæ tamen corpore jugiter perseverat) corporales pœnas, mirâ virtute inferendi, auctoritatem habet: huiusque potestatis exempla, Joan. XXII. protulit, Ananiam & Saphyrâ morte mulctatos;
Ely-

Elymam magum cæcitate punitum; fornicatorem Corinthium satanæ discerpendum traditum. Nec ab iis abludit Chryf. Serm. cit. 50. de ver. Script. & Apostol. dign. Cacodæmones, tanquam carnifices obsequentes præstò esse docens, qui Sacerdotum sententiam exequantur, & ab iis maledictos torqueant.

Idem quoque Chryf. & reliqui Græci interpretes in 1 ad Cor. c. 5. hominem, qui excommunicationis sententiâ olim afficeretur, tradi solitum dicunt satanæ, ut ab eo cruciaretur, vel per morbum, vel aliter, citra mortem tamen, quomodo S. Job traditus à Deo dicitur, ut citra mortem, variis æumnis & tentationibus affligeretur. Theodor. inter Græcos, eandem quoque sententiâ inculcat, in prior. ad Timoth. c. 1. Ambros. lib. 1. de poen. c. 12. eandem sententiâ amplectitur, quod confirmat c. 13. *Explanamus, inquit, Pauli sententiam, nunc verba ipsa consideremus, quâ ratione dixerit, quod tradiderit eum satanæ, in interitum carnis; quia tentator noster Diabolus est, nam debilitates membris singulis inferre, & ægritudines toto solet movere corpori. Denique percussit S. Iob, ulcere malo, à pedibus usque ad caput, quia potestatem acceperat, interitum carnis ejus, dicente Deo; ecce trado tibi eum, tantummodò animam ejus custodi. Hoc iisdem verbis Apost. transtulit, dicens, quod tradide-*

rit hujusmodi hominem satanæ, in interitum carnis, ut spiritus saluus sit in die Domini nostri Iesu Christi. Magna potestas! magna gratia! quæ imperat diabolo, ut se ipse destruat, &c.

Assentitur Pacian. Barcinon. Epist. 3. ad Sympron. iis verbis, Deinde vides, quod hic ipse peccator incestus, non morti traditur, sed satanæ, ad emendandum, ad colaphisandum, ad pœnitendum. Denique ait, ad interitum carnis: non tamen animæ, non etiam spiritus, sed ad solius carnis interitum, tentationes scilicet, carnis angustias, detrimenta membrorum: sicut alibi de intemperantibus dicit, tribulationes autem carnis patientur hujusmodi. Assentitur Hier. Epist. 1. Nunc vero inobediens, spiritali truncatur mucrone, aut ejectus de Ecclesia, rapido dæmonum ore decerpitur. Assentitur Primas. & Haymo, in eund. loc. Apost. inclinat Aug. lib. 1. de Serm. dom. in mont. c. 20. lib. 2. contr. Epist. Parmen. c. 1.

Possuntque exempla hujus rei proferri plurima; v. g. quod in vitâ S. Ambrosii refert Paulin. Ambrosium, cum Stiliconis Comitis servum, anathemate percussisset, eodem momento spiritum immundum arreptum discerpere cœpisse. Quod, teste Marcellin. Presb. lib. de schism. Ursic. & Dam. cum Zozimus, Neapolitanæ Cathedralæ inuasor, à Maximo, legitimo Episcopo, fuisset excommunicatus, inter ipsa
verba

ipsa verba sacerdotalia, ejus lingua protensa fuerit, nec valuerit eam amplius revocare, intra oris meatum, eo quod contra naturam modum, extra os penderet, ut bovi anhelato, nec sanari potuerit, nisi ubi Episcopatus cessit. Quod Eudoxia Imperatrix, à Chryf. & Innoc. I. excommunicata, infelicitè, juxta prædicationem Innoc. qui litteris excommunicationis, præsentis etiam vitæ mala comminatus fuerat, perierit; & urna, in qua corpus ejus quiescebat, jugi motu contremuerit, donec reducto in urbem Constantinop. Chryf. corpore, precibusque à filio fufis, ante venerabile cadaver, motus iste repressus fuerit, ut referunt auctor. vit. S. Chryf. Niceph. Cedren. & alii. Quod Dioscor. in Chalced. Conc. damnatus, infelicissimè in exilio mortuus fuerit.

Quod Carisius, Ecclesiæ S. Eleuth. Martyr. Clericus, contemptor anathematis, à Gennad. Patriarcha Constantinop. in eum, ob malos mores contorti, ubi litteris publicis Gennad. Martyrem deprecatus esset, ut eum vel emendaret, vel è medio tolleret, die crastina mortuus in lecto inventus fuerit, testibus Theod. lectore, lib. 1. collectan. & Sophron. c. 145. Quod Nantinus Engolism. Comes, ab Heraclio Episc. excommunicatus, obierit, in clamans, se ab Heraclio comburi, teste Greg. Turon. lib. 5. Hist. c. 36. Quod Sigebertus

Rex in Anglia, juxta prædictionem Episcopi, à suis in domo sua occisus fuerit, quod Comiti cuidam, ab Episcopo, ob illicitum conjugium excommunicato, communicasset, teste Bed. lib. 3. Hist. c. 22.

Quòd cùm B. Machutius seu Maclovius, sacrilegos suæ diœceseos homines, & impios satanæ tradidisset, & pulverem de pedibus suis excutens, exiisset, terra sterilis & infructuosa reddita fuerit, homines, innumeris morborum generibus, affecti fuerint, alii scilicet membrorum debilitate cæperint contrahi, alii lepræ squalore, alii visu privari, alii oris officio destitui, alii auditu carere, donec Episcopum suum pœnitentes revocassent, eique obedientes effecti fuissent teste Sigeb. in ejus verba apud Sur. 25. Novembr. Attendant hæc contumaces, ac pervicaces & sanentur.

Quibus omnibus, & innumeris aliis, quæ brevitatis causa prætermitto, congruit, quod tradit Joseph. de bell. Judaic. lib. 2. c. 7. eos, qui apud Judæos, pro peccatis suis, à congregatione ejecti fuissent, & extra Synagogam facti, miserabili morte consumptos fuisse. Eæ enim sunt, *immissiones per Angelos malos*, quarum meminit Prophetæ Regius, Ps. 71. ob quas, carnifices Reipubl. Christianæ cacodæmones, à PP. dici solent: eo enim nomine, præter citatos illos indigetant. Orig. lib. 7. contr. Cels.

in

in fin. & rursus lib. 8. Hieron. in c. 2. Joël. Chrysol. ferm. 17. Basil. Synes. Aug. & alii.

Fundatur autem ista potestas, Ecclesiae collata, in iis verbis Christi, Marc. 16. Quibus Apostolis donasse dicitur; potestatem spirituum immundorum; licet enim potestas ejiciendi dæmonia præsertim iis verbis significetur, tamen & potestas tradendi fatanæ videtur indicari, ut notat S. Thom. in eum loc. cujus potestatis exemplum præbuit Christus, dum in porcos, dæmonia ab homine ejecta, immisit, quæ malè ipsos habuerint, & in mare præcipitarint, Math. 5. & Luc. 8.

C A P. IV.

Quomodo vim interdum adhibeat Ecclesia & pœnas corporales inferat, ratione domesticæ potestatis.

E Lucidatio II. videtur etiam statuendum, Ecclesiasticis prælatis, ratione potestatis œconomicae, seu domesticæ, de qua inferiùs, posse ex institutione Christi, vim corporalem iisdem permitti, quæ Patribus familias permittitur: unde quemadmodum potest unusquisq; privatum quemvis è domo sua repellere, etiam adhibitâ, si aliàs exire nolit, corporali violentiâ; similiter & indignos, & excommunicatos, Præ-

lati Ecclesiastici, etiam adhibitâ corporali renitentiâ, ab Ecclesiæ liminibus, per se, vel per Ostiarios, Subdiaconos, Diaconos, ingredi prohibebant, vel ingressos olim ejiciebant: illudq; primò constat ex facto Christi, qui è domo Dei ementes & vendentes ejecit, formam dans Sacerdotibus novæ legis, ut idem sibi licere prætendant, quippe cum Ostiariorum officium, eo facto, Christus Dominus demonstrarit, testibus I von. Carnot. serm. habit in Syn. de excell. SS. Ordin. & aliis Eccles. rituum scriptoribus.

Constat II. ex usu Mosaicæ legis, quâ vigente, Sacerdotes & legis DD. jushabebant è templis, & Synagogis, indignos ejiciendi: quod utique patet exemplo, quod habetur, cæci nati, de quo Joan. 9. *Et ejecerunt eum foras*; quæ verba, Chryf. Caten. Græca in Joan. & Theophyl. in eum loc. de ejectione è templo; Leont. de ejectione è Synagoga, interpretantur. Et sanè clara sunt ista verba Christi, Joan. 16. *absque Synagogis facient vos*. Clarum & istud Judæorum decretum, Joan. cit. c. 9. & 12. ut qui confiteretur Christum, extra Synagogam fieret, seu è Synagoga ejiceretur.

Constat III. ex S. Paul. I Cor. 5. quo loco, excommunicationis actum, verbis *tollendi è medio, & auferendi*, exprimit, v. 2. & vos inflati estis, & non magis luctum habuistis, ut tollatur è medio vestrum, qui hoc opus fecit

fecit; v. ult. auferte malum, ex vobis ipsis, quæ verba potestatem Antistitum Ecclesiæ ostendunt eam esse, ut possint jubere, è cœtu Ecclesiæ ejici eos, quos indignos ipso cœtu judicarint. Colligitur etiam ex verbis Joan. Epist. 2. can. v. 10. Si quis venit ad vos, & hanc doctrinam non affert, nolite recipere eum in domum, nec ave ei dixeritis. Si enim privatis licet imò præcipitur excommunicatos à domo sua excludere, non minùs Ecclesiæ Prælati licebit, à domo Dei, quæ in Sacerdotis est potestate, non Imperatoris, ut fusè tradit Ambros. Epist. 33. in veter. edit. seu lib. 2 epist. 14. Marcell. for. in novis, contestatus, ea quæ divina sunt, Imperatoriæ potestati, non esse subjecta; à domo, inquam, Dei, indignos, & per sententiam expelli jussos, facto ipso excludere.

Sed & notandum, eundem Ambrosium conc. ad Pop. adversus Auxent. Basilicam, quam auctoritate imperatoria, Auxentius junior Arrian. sibi vendicare studebat, *hæreditatem P. P. hoc est, Dionysii, qui ex exilio in causa fidei defunctus fuerat, hæreditatem Eustorgii confessoris, hæreditatem Myroclis, atque omnium retro fidelium Episcoporum, vocitare.* Si enim à sua hæreditate, extraneum excludere licet, & ab Ecclesiis excludere indignum, Sacerdoti licebit.

Colligitur etiam ex continua Ecclesiæ praxi,

praxi; quam plurima egregia documenta ostendunt: ac 1. constat ex constitutionibus Apostolic. lib. 2. c. 57. & lib. 8. c. 11. Dion. c. 5. Eccl. Hier. & Maxim. Scol. in eund. loc. Hier. Epist. 3. ad Heliod. Aug. 6. Confess. cap. 2. & lib. de Pastor. cap. 13. Conc. Carth. iv. c. 8. aliisque passim, quod Diaconi, Subdiaconi, iisque inservientes Ostiarii, ad fores Ecclesiæ stabant, Antistitis iussa executuri, eumque vel admissuri, vel rejecturi, quem ipse designasset.

Deinde Constit. Apost. lib. 2. c. 58. Pergrinorum commendatitiæ litteræ, à Diacono inquiri jubentur, antequam in synaxim introducantur. Præterea Philippum Cæsar. ex fama refert Euseb. lib. 6. Hist. c. 27. cum in die postrema vigiliæ Paschalis, cum multitudine in Ecclesiâ particeps fieri vellet, ab Episcopo, non prius permisum intrare, quàm peccata confessus, & in poenitentium ordinem redactus fuisset. Theodosium, ab Ambr. propter cædem Tessalonicæ factam, ab Ecclesiæ liminibus exclusum, tradunt, Theodor. lib. 5. c. 17. Zozom. lib. 7. c. 24. Niceph. lib. 12. c. 41. Eudoxiam Imper. Ostiarius, jussione Chryf. Ecclesiam intrare prohibuit, si credimus Pallad. Georg. Alexand. & aliis ejusd. vitæ scriptoribus.

Constat testimonio August. lib. 6. conf. cit. cap. S. Monicam matrem ejus, cum ad
memo-

memoriam SS. sicut in Africa solebant fideles, pultes, & panem & merum attulisset, ab Ostiario prohibitam, neque graviter id tulisse, *ubi hoc Episcopum prohibuisse*, cognovit. Idem Sanct. lib. de past. c. 13. vel per seipsum, vel per ministrum, ignotos, ad Ecclesiam accedentes probandi, Antistitis officium esse, describit, *Ovis Dei*, (verba sunt August.) *gregem suum quarit, puta ovem de oriente venisse in Africam, querit gregem suum, incurrit in te, in Basilicam tuam intrare vult, commoveris ignotâ facie, vel tu, vel minister tuus stans, vel sedens ad ostium, interrogat ovem, quærentem gregem suum, imò gregem Dei: cum grege suo intrare vult, ubi eum esse putat: quærns, Paganus es an Christianus? respondet, Christianus, ovis est enim Dei. Quærns, ne fortè Catechumenus sit, & irruat sacramentis: respondet, fidelis. Quærns, cujus communionis sit? respondet, Catholicus.*

Huc etiam refer, quòd peregrini, sine litteris communicatoriis sui Episcopi, ab Ecclesia interdum excluderentur, ex Can. Apost. quibusdam 9. quibusdam 12. & Constitut. lib. 2. c. 58. Conc. Carthag. 1. c. 7. Arelat. 1. c. 9. & aliis: nonnunquam verò in Ecclesiam quidem, sed non ad communionem, vel oblationem reciperentur.

Verùm potestatis istius apex est, quòd iceat Catholico Antistiti, divinas, atque ecclesiae.

clesiasticas leges, eâ poenâ confirmare, ut prævaricatores earum, ab Ecclesiasticis limitibus arceantur: cujus potestatis illustre exemplum, in Chryf. qui hom. 8. in Act. Apost. mensem tantum populo Constantinopol. præstituit, quo elapso, si quis vel ex consuetudine juraret, ab Ecclesiæ ingressu removeretur. *Si quis noluerit hoc præceptum perficere, quemadmodum tubâ quadam per verbum denuntio: abstineat à liminibus Ecclesiasticis ille, siue princeps sit, siue alius diademate cinctus. Nunquid deposuistis me ab hoc principatu? vel si mansero, multa me manent pericula? non patiar, ut ascendam in hunc thronum, magna non faciens.* Et paulò post, *Ecce iterum denuntio, & clarâ voce clamo, jecum nullus esse putet: ab arcebo & prohibebo non obtemperantes: & quamdiu in hac sede consedero, nihil illius justificationibus præferam: si me quis dejecerit, postea sine culpa siam.* Lege pariter epist. Isid. Pelus. 28. Euf. Episc. lib. 1. Epist. ipsius.

Egregium verò hujus potestatis exemplum, in Babyla, Antioch Episc. qui Numerianum Imperat. inspicere Christianorum arcana mysteria volentem, ingredi prohibuit, nefas esse dicens, eum in domum Deitam præcipitanter ingredi, & divina mysteria contaminatis oculis inspicere, teste Niceph. lib. 6. c. 37. in quo exemplo, id speciatim observandum, quòd à Chryf.

Chryf. sanctus ille præsul, non solum Imp. ingredi volentem objurgasse, sed dextrâ in pectus impactâ, ne ingrederetur, obstitisse, referatur, lib. de Babyl. adv. gent. sed plura in hanc rem, si de excommunicatione Ecclesiastica, ex professo nos differere, aliquando contingat.

C A P. V.

Confirmatur præcedens elucidatio.

DEnique, quemadmodum filii à parentibus, servi à dominis, discipuli à præceptoribus, poenis corporalibus castigantur; similiter ii, qui in familiam Ecclesiasticam transcribuntur, etiam corporali poena, vel mulctâ pecuniariâ, putà stipendiorum Ecclesiasticorum, divino jure debitorum, (quorum distribuendorum potestas, vel tempore ipso Apostolorum, erat in potestate Episcopi, ut patet ex 1 ad Tim. 5. & aliis) privatione puniri, ex eadem institutione Christi possunt; quam potestatem ostendit Apostolus, dùm adversus Presbyterum, accusationes suscipere, proprium officium Episcopi demonstrat, cap. cit. prior. ad Tim.

Fundatur autem hæc potestas, in filiatione speciali, quâ per ordinationem, Clerici incipiunt Episcopis, tanquam parentibus obstringi: fundatur in adoptione, quâ
in

in Christi familiam, hæreditatem & sortem, transferuntur, cujus familiæ Episcopus à Christo auctor est constitutus, *tanquam fidelis & prudens, quem constituit Dominus, super familiam suam*: Fundatur in subjectione, quam habent instrumenta & organa, causæ suæ principali: ita enim comparantur Clerici omnes cum Episcopo, ut ejus quodammodo; in tota Hierarchica functione, instrumenta sint, atque aded eisdem in officio subiecti, & ab eo applicandi, vel removendi: fundatur in pacto & convento istorum hominum, inito cum Ecclesia, in cujus corpus Hierarchicum admittuntur, cum subjectione Episcopo. Denique fundatur in professione obedientiæ, quam Episcopo emittunt.

Quæ omnia, divinâ lege sancitâ obediendi necessitate, Clericos Episcopis subjiciunt; Eodemque jure, domesticum in eos imperium, Episcopis tribuunt, ita ut castigationes quasdam corporales, ac pecuniarias quasdam mulctas, imponere possint, quod usus Ecclesiæ perpetuus, ab Apostolis ostendit, quemadmodum fortè alibi, singulari tractatu, Deo dante, ostendemus: hæc enim, quæ paucis istis verbis conclusimus, integram & fusissimam disputationem postulant, alibi fortè in lucem emittendam. Lege & auctores, qui hoc argumentum copiosius tractant, maximè in schola Sorbonica Paris. Suffi-

Sufficiat hîc, ex August. proferre, quæ ipse in Psal. 102. de ea potestate domestica edisserit, *Quid ergo, inquit, dormiet disciplina? auferetur omnis correptio? non auferetur? quid enim de luxurioso filio factururus es? non castigabis? non verberabis? servum & ipsum tuum, si male viventem videris, non pœnâ aliquâ, non verberibus refrænabis? fiat hoc, fiat, admittit Deus, imò reprehendit, si non fiat; sed animo dilectionis fac, non animo ultionis.* Hæc & alia, de potestate Ecclesiastica loquens, ut ex seqq. patebit, quam paternæ & herili, comparat August.

Unde innotescit optimè, Joann. XXII. ex illa potestate Episcoporum in Clericos, jurisdictionem Ecclesiæ, etiam in invitos exerceri, asseruisse, etiam cùm de pœnarum corporalium inflictione agitur. Et hanc saltem potestatem, juris divini esse, tradunt Joann. VIII. c. *si imperat.* d. 96. Bonif. VIII. c. *quamquam, de censib.* Conc. Lateran. sub Innoc. 3. c. 43. Lateran. sub Leon. 10. sess. 9. Conc. Colon. p. 9. c. 20. Trident. sess. 25. c. 20. de reform. Episcopi franciæ, in Syn. Caris. Epist. ad Ludov. Germ. Reg. Annuunt Dion. Epist. ad Demoph. Ignat. epist. ad Philad. Clem. Epist. 1. Constantin. Magn. apud Ruffin. lib. 10. Hist. c. 2. & alii passim.

Ad hanc quoque potestatem pertinet, dispensatio bonorum Ecclesiæ, quæ licet tem-

temporalis sit, ad Episcopos tamen, non ad Principes temporales pertinet, jure divino, secundum definitionem Syn. Rom. IV. sub Symmach. c. 3. & aliarum; & usum Ecclesiæ, ab ipsis Apostolis initium habentem, ut patet ex actibus Apostolor. & Epistolis Paul. sed hæc adnotamus duntaxat, non exponimus, multò minùs probamus.

C A P. VI.

Cogit Ecclesia, ad corporales pœnas subeundas, excommunicationis metu.

E Lucidatio III. Pœnas quoque corporales, peccatoribus ad poenitentiam accedentibus, possunt imponere Sacerdotes, eosque vel per excommunicationem, quæ sit vera censura, vel per refutationem absolutionis, vel per ademptionem participationis Eucharistiæ, ligare, juxta illa verba Christi, Math. 16. *Quodcunque ligaveris super terram, erit ligatum & in Cælis, & quodcunque solveris super terram, erit solutum & in cælis.* Mat. 18. *Quæcunque alligaveritis super terram, &c.* Joan. denique 20. *Accipite Spiritum S. quorum remiseritis peccata, remittuntur eis, & quorum retinueritis, retenta sunt.*

Quibus verbis apud Math. potestas extra Sacramentum confessionis, confertur à Christo ante passionem, Apostolis scilicet nondum in Sacerdotes consecratis: iis vero,

rò, quæ leguntur apud Joan. potestas à Christo, jam à mortuis suscitato confertur, in sacramento exercenda, Apostolis jam in die ultima Cœnæ, ab eodem Christo Sacerdotibus ordinatis. Utraque autem ista potestas, prima quidem inferendi pœnitentias corporales pro peccato, & ad eas subeundas, atque exequendas, metu judiciorum divinorum atque excommunicationis compellendi; altera verò excommunicationis infligendæ, veram jurisdictionem coactivam arguit, quod eo loci explicandum est.

Prior quidem potestas coactiva dici potest, quia est obligatoria, & necessitatem, tum præcepti, tum pœnæ incurrendæ, velimus, nolimus, involvit. Negatur tamen aliquando, esse coactiva, instar nimirum jurisdictionis sæcularis ac temporalis; quia executio præcepti nobis impositi, est in potestate nostra, possumusque impositam pœnitentiam non implere, & si inobedientes fuerimus, nulla nobis, pœna corporalis incutietur, quæ dolorem inurat, erimus quidem privati jure sacramentorum, & suffragiorum Ecclesiæ, & consortii domestici ipsorum fidelium: sed nec bonis nostris, nec corpori, Ecclesia vim ullam directè inferet; atque hic sensus est, secundum quem docuimus sup. plurimos P P. hanc differentiam inter utramque

tramque potestatem, sæcularem & sacram assignasse, quòd hæc vim nullam inferat, quam illa prævaricatoribus infert.

Eodem sensu intelligendus est Christus Dom. dum ait, *Reges gentium dominantur, eorum, vos autem non sic*, Luc. 22. intelligendi Paul. 2 Cor. 1. *non quia dominamur fidei vestræ, sed adjutores sumus fidei vestræ*; & Petr. Epist. 1. can. c. 5. *Pascite qui in vobis est, gregem Dei, providentes non coactè, sed spontaneè, secundum Deum, neque turpis lucri gratiâ, sed voluntariè, neque ut dominantes in Cleris, sed forma facti gregis ex animo*. Quibus omnibus sententiis, impotens dominatus vel violentus, qui vim corporalem infert ad legis executionem procurandam, videtur ab Ecclesiastico Magistratu, principatum sacrum gerente, non potestatem merè domesticam exercente, excludi, scilicet ut facer Magistratus, patris potius, quàm Domini personam induat, memineritque, se ex genere sui principatus, spirituales potius animadversionem, quàm corporalem decere, demandatam potius sibi, benevolam salutis subditorum procuracionem, quàm terribilem, subditorum regendorum, corrigendorumque potestatem: nam verbum ipsum, *κυριεύειν*, videtur herilem ac despoticam severitatem significare, ut patet ex eo, quod *κύριος & δούλος*, *dominus servi*, in Scripturis perpetuò opponatur, v. g. Math.

Math. 6. & 10. Luc. 7. & 12. ad Coloff. 1. ad Ephes. 6. ad Rom. 6.

Ita etiam explicandi plurimi P P. qui non ſolùm dominatum ipſum & truculentum imperium, à Prælatiſ Eccleſiaſticis reſciciunt, verùm etiam principatum ac coactionem; nec in invitos dicunt eorum poſteſtatem exerceri, ſed in volentes: quia nimirum pœnitentias, quas Sacerdotes imponunt, volentibus imponunt, nec renuentes, ad eas vi adigunt, ſed metu excommunicationis, quæ per ſe eſt pœna ſpiritualis; nec legum, quas condunt, obſervationem, aliter urgere ſolent, quàm comminatione ejuſdem pœnæ, prævaricatoribus infligendæ, vel incurrendæ, quemadmodum ſuper. explicuimus, pluriumque P P. auctoſitatibus confirmavimus: quibus iſtas quoque adjunges, ſimili ratione exponendas.

Origen. ſiquidem in hunc ſenſum, Hom. 6. in Iſ. ex verbis Chriſti cit. ex c. 22. Luc. hanc conſuſionem elicit, *qui vocatur ergo ad Episcopatum, non ad principatum vocatur, ſed ad ſervitutem totius Eccleſiæ.* Quod iterum confirmat, quia Chriſtus in medio diſcipulorum factus eſt, non quaſi diſcumbens, ſed quaſi miniſtrans. Naz. orat. 1. Apo. Præſectum Eccleſiæ ſeu Antifitem quàm optimũ eſſe debere, & acceſſiones virtutũ ſubinde facere, probat, quòd eum oporteat, *nō vi conſtringere, ſed perſuaſione allicere.* Hier. Epist.

Epist. 3. ad Nepot. cum Rege, Episcopum comparat, iis verbis, *ille nolentibus præest, hic volentibus; ille terrori subjicit, hic servitute donatur; ille corpora custodit ad mortem, hic animas servat ad vitam.* Item epist. 62. adv. Joan. Hier. patrias nostras dimisimus, ut quieti in solitudine viveremus, Pontifices Christi, qui tamen rectam fidem prædicant, non dominorum metu sed patrum honore veneremur, ut deferamus Episcopis, ut Episcopis, & non sub nomine alterius, aliis quibus nolumus servire cogamur: contenti sint honore suo, patres se sciant esse, non dominos. Joan. Chryf. hom. 3. in Act. Episcopalem administrationem, multò difficiliorem civili præfecturâ, ostendit, I. quod principem sæcularem nemo accusare audet, Episcopos omnes audeant, nam in Principibus urget metus; in his verò nequaquam, quando Dei timor apud istos (populos) valet nihil. II. quia in præfectura temporali, plures sunt, qui adjuvant, omnia legibus illic, & mandatis illic peraguntur; hic verò nihil tale, neque enim licet ex auctoritate præcipere.

Quæ duæ rationes supponunt, vim & rationem agendi, ex mera voluntate ac libidine, quæ in præfectura temporali aliquando vim habet, in spiritali abesse, quippe cum sublatâ æquitate causæ, nec poenitentiarum impositio, nec excommunicatio lata ab Ecclesiastico Magistratu, subditum liget: è contra verò, Magistratus temporalis

lis

lis sive iusta sive iniusta jubeat, poenas inferre possit, quæ verè damnatum afficiant, eumque constringant; quæ ratio non impedit, quin jurisdic. coactiva, Ecclesiastico Magistratui, eo sensu, quo dixim. conveniat, tantò nobilior, quò strictiori vinculo, Ecclesiastica coërcitio, æquitati causæ copulatur, in quo Dei principatum æmulatur, qui non potest non iusta præcipere, non potest non iustè quemquam punire.

Clariùs idem Chrys. hom. 1. in Epist. ad Tit. ubi de Episcopo, *omittam enim interim dicere, possibile non esse, hujusmodi dici verè principem. Cur obsecro? quia in potestate subditorum positum est obedire, vel non. Ac si quis rei veritatem diligenter exploret, non ad principatum promovetur, qui hujusmodi est, verùm potiùs ad serviendum innumeris dominis, qui contraria cupiunt semper & dicunt. Lege eundem hom. 11. in Epist. ad Eph. & conc. quadam in malum schismat. & lib. 2. de Sacerd. Hom. 4. de verb. If. vidi Domin. Adstipulatur Bern: de Confid. lib. 2. c. 6. non enim tibi ille (Petrus) dare, quod non habuit, potuit, quod habuit dedit, sollicitudinem, ut dixit, super Ecclesias: nunquid dominationem? audi ipsum, non dominantes, ait in Clero, sed forma facti gregis: & ne dictum solà humilitate putes non etiam veritate, vox domini est in Evangelio; Reges gentium dominantur eorum, & qui potestatem habent super eos, be-*

nefici vocantur, & insert: vos autem non sic. Planum est, Apostolis interdicitur dominatus. Ergo tu & tibi usurpare aude aut dominans Apostolatum, aut Apostolicus dominatum.

C A P. VII.

Prædicta PP. testimonia, non omnem penitus coactionem, parendique necessitatem, remouent ab Ecclesiastico Magistratu.

HÆc autem, & similia, dum apud PP. exhortatorio vel increpatorio stylo scripta legimus, non animum nostrum subire debet hæc cogitatio, quasi omnem penitus coactionem, parendique necessitatem omnem & obligationem, à Magistratu Ecclesiastico procul removeant, eorumque iussa inefficacia, cassâ, infirma crediderint, qui obedientiam Præpositis Ecclesiæ deberi, statuerunt, juxta illud Paul. ad Hebr. 13. *obedite Præpositis vestris, & subiacete eis; ipsi enim pervigilant, quasi rationem pro animabus vestris reddituri.* Qui vindicandi & ulciscendi potestatem, adversus inobedientes, Ecclesiasticis inesse, sciebant, easque S. Pauli sententias, altâ mente retinuerant, 1 Cor. 4. *Quid vultis? in virga veniam ad vos? an in charitate, & Spiritu mansuetudinis.* 2 Cor. 10. *in promptu ha-*

tu habentes ulcisci omnem inobedientiam, & c. 3. si venero iterum, non parcam. Et paulò post, idèd hæc absens scribo, ut non præsens duriùs agam, secundùm potestatem, quam Dominus mihi dedit in ædificationem, non in destructionem.

Qui denique passim, Ecclesiæ Principatum extollunt, & verè Principes Ecclesiæ Pastores agnoscunt esse: & sanè præter cit. PP. testimonia laudari possunt ista Ign. Epist. ad Trall. *Quid aliud est Episcopus, quàm is, qui omni principatu, & potestate superior est?* quibus assentitur, tum Epist. ad Smyrn. dum in Episcopo duo distinguit, *Principatum & Sacerdotium*: Principatum, ratione cujus imaginem Dei refert; Sacerdotium, ratione cujus, imaginem Christi gerit. Idem etiam Episcopo alibi, Principatum attribuit. Possunt & laudari, verba ista, Constit. Apost. lib. 2. c. 26. *Hic (Episcopus) Princeps & dux vester est: hic vester Rex & Præfectus.* Et paulò post, *Episcopus igitur vobis præficiatur, ut dignitate Dei colonestatus, qui Clerum sub potestate sua tenet, & principatum super Clerum exercet.* Citari etiam queunt verba Iren. lib. 4. c. 44. qui de Presbyteris (quo nomine Episcopos comprehendit) scribit, *quòd principalis confessionis tumore elati sint*; iisdemque mox applicat verba ista Is. secundùm 70. interpr. version. *Et dabo Principes tuos in pace, &*

Episcopos tuos in iustitia. Eosdem Tert. *præsidentes*, Apol. c. 39. lib. de cor. mil. c. 3. lib. 1. ad uxor. c. 7. Cyprian. Epist. 55. 69. & 65. *Principes* appellat, iis applicans verba ista, quæ Pontificibus veteris legis aptantur à Paul. Act. 13. *Principem populi tui non maledices.* Eosdem passim *Præpositos* nominat quemadmodum & Justin. Mart. Apol. 2. *regis autem* eos nuncupans.

Egregiè verò, Ecclesiasticam potestatem extollit pluribus locis Cypr. quam *Episcopatus vigorem*, & *sublimem ac divinam potestatem* nuncupat, Epist. 55. Cornel. quam & vegetam & fortem, & scelerum vindicem agnoscit, Epist. 65. Rogatian. ubi hæc habet, *at quidem honorificè circa nos, & pro solita tua humilitate fecisti, ut malles de e nobis conqueri, cum pro Episcopatus vigore; & Cathedræ auctoritate, haberes potestatem, quâ posses de illo statim vindicari.* Fusè Orig. hom. 22. in Num. Ecclesiarum Principes probat esse Episcopos: quo etiam nomine eos donat, hom. 11. in Exod. quo ultimo loco, duplicis generis eos constituit, alios qui de maioribus negotiis iudicent, amplio- rem potestatem habentes; alios qui minori- bus iudiciis præsumt, angustiore habentes & restrictiorem potestatem. Hilar. *Euangelicæ dispensationis Principes*, & *Principes Ecclesiarum*, Antistites Ecclesiæ appellat, in Ps. 67. neque solùm principatum exerce-
re, sed

re, sed regnare, Episcopos dici posse, ex Scriptura ostendit, in eund. Ps. 1. enim verba ista Proph. Reg. dum discernit Cælestis Reges super eam, quæ immediatè verbis illis subnectuntur, si dormiatis inter medios Cleros, &c. de Clericis interpretatur, quos Dominus de Cælis discernens, eos, qui spoliati fuerant, constituit in Reges. Tum ex aliis loc. eos Reges esse, paulò post demonstrat, addens, Reges autem eos esse, non obscurum est, de quibus dictum est, 1 Cor. 4. jam sine vobis regnatis, & utinam regnaretis, ut nos vobiscum coregnaremus.

Nazianz. orat. 20. ἱερωίας regi δυναστείαν Episcopis attribuit, quæ verba, potestatem coarctivam, & veluti Regiam significant. Bas. similiter in c. 13. ad ista verba Is. vox Regum, & gentium congregatarum, Hier. in Ps. 2. ad ista verba David. nunc Reges intelligite, & Arnob. in Ps. 132. ad illa verba, confiteantur tibi Domine, omnes Reges terræ, Regum nomine, intelligi Sacerdotes putant, quemadmodum & Cyr. Alex. verba ista Abac. 1. c. ipse de Regibus triumphabit, vel ut est in Græco, ipse in Regibus delectabitur, & Tyranni ludibria ejus, Reges asserit eos esse, qui Sacerdotii dignitate gloriantur.

Sed hæc, aliaque id genus, omissa facio, quæ nomen Principis & Regis, quod in in uno sensu, Prælati Ecclesiasticis adi-

munt aliqui PP. alio sensu, optimo jure iisdem, ex mente eorundem PP. & quidem plurium, convenire posse demonstrant. Hier. quoque Aug. Euthym. in Ps. 44. & alii, verba ista Proph. Reg. dicto Ps. *Constitues eos Principes, super omnem terram*, de Apostolis, ac deinde de Episcopis, in eorum locum succedentibus, prædicta esse, contendunt: si eidem Aug. credimus, hæc verba Proph. Reg. *Principes Iuda, duces eorum*, Psal. 67. *verissimos nobis insinuant, Ecclesiarum Principes, dignos ducatu*. Illa verò, *filie Regum*, in honore suo, Psal. 44. animas ab Apostolis, per prædicationem ad Christi fidem adductas, *Etenim omnes animæ, quæ illis prædicantibus & evangelizantibus, natæ sunt, filie Regum sunt, & Ecclesie filie, Apostolorum filie Regum sunt; ille enim est Rex Regum, & illi Reges, de quibus dictum est, sedebitis super duodecim sedes, judicantes duodecim tribus Israel*. Disces ista ex Comm. Aug. in Psal. cit. Prosp. lib. 2. de voc. gent. c. 16. *Sacerdotii Principatum agnoscit, in arce Religionis fun datum*.

Innumera alia ejusdem notæ, citari possunt, quæ si non sufficiant, ut Principatum Ecclesiæ, cum vera coactione conjunctum esse convincant. at sufficient utique ut argumentum, ex PP. negantibus in Ecclesia Principatum, diluant; dum enim PP. Principatum in Ecclesia sæpiissimè agnoscentes,
&

& Ecclesiæ Pastores, eosdem etiam Principes esse contestantes, legimus, proculdubio, si quando rariùs, Principatum seu dominatum in Ecclesia, eosdem negantes advertamus, explicatione opus est, non quæ propriè dictum Principatum evertat, sed quæ differentem, à Principatu temporali, Ecclesiasticum esse, ostendat; non quæ coactionem omnem, cuivis principatui necessariò conjunctam tollat, sed quæ diversam rationem coactionis involvat, & vim annotet, non minùs efficacem, aut minùs potentem, quinimò magis, ut suprà docuimus; at magis quoque suavem, magis æquam & rationabilem, ut hoc seq. capite patet ampliùs.

C A P. VIII.

Commendatur potestas Ecclesiæ, ab equitate, & suavitate.

I. **E**Nim, qui apud nos in Ecclesia imperant, *non dominandi cupiditate imperant, sed officio consulendi, nec principandi superbiâ, sed officio consulendi, ut tradit Aug. lib. 19. de Civ. Dei c. 14: in quem sensum Bern. lib. 2. de confid. c. 6. Blauditur Cathedra? specula est: inde denique superintendis, sonans tibi Episcopi nomine, non dominium, sed officium.* II. Corriguntur maximè à Sacerdotibus, fideles, exhortatio-

tatione , correptione , severâ & acri-
jurgatione , quæ sunt poenæ reales , v
animum pungentes , & infamiam aliqu
nonnunquam inferentes ; sed quæ tam
simul instruunt , & puniunt.

Corriguntur poenitentiis corporalib
quæ diversâ ratione voluntariæ , & in-
luntariæ dici possunt ; voluntariæ quid
sunt , quia à poenitentibus sibi ipsis libe
absque ulla externa vi inferuntur , sed int
na vis quædam à Sacerdote inferitur , d
conscientiæ stimulos excitat , & divinor
judiciorum metum , quibus poenitent
inducat , dum obligationem præcepti ,
lit , nolit poenitens , suo judicio , suâ
sententiâ , ipsi imponit : dum excomm
unicationis poenâ , per se quidem spiritu
quatenus animam ligat , per accidens c
porali , quatenus & infamiam quandam
bet adnexam , & corporalem à sacris ,
convictu fidelium separationem , præce
impositi transgressores , ac poenitentiar
contemptores coërcet.

III. Quia si ipsa excommunicatio ne
gatur , tum demum à Principe quidem
culari , contemptor punietur , *publicè ne
que interest* , ut ait Petr. Blef. Epist.
ad tres Episcopos Angliæ , *ut materiali
dio cobibeantur , qui nec Deum timent , nec
ferunt Ecclesiæ , nec censuram Canonum ri
rentur*. Sed quia divinâ lege , Princeps te

poralis adstringitur, ad Ecclesiæ potestatem muniendam, ejusque, ac Dei contemptum vindicandum, ideo pœna, quæ à Principe sæculari inferetur, quia ad Ecclesiæ sententiam, executioni demandandam, non corrigendam, vel retractandam, valere debet, eamque, divinæ legis præcepto, accedere Ecclesiastico judicio, ut quid necessariò consequens, oportet, ac Ecclesiæ nomine, & auctoritate quodammodò infertur, ut sup. ex PP. ostendimus, coactio ista, licet commodata, quia tamen debita, jurisdictioni Ecclesiæ potest attribui, eamque denominare coactivam.

Sicut enim, quamvis sententia judicis togati, vim & coactionem mutuatur ab apparitoribus, & militaribus Magistratibus, in quantum debent arma togæ, præsidio esse, & Reip. ordo postulat, ut Judicum sententiæ, per armatos, vim & auctoritatem habeant, ut insinuat Imperator Justinianus, statim init. instit. Nihilominus togatorum judicum potestas, coërcitiva, & vi coactivâ prædita, censetur ab omnibus: ita, quia Ecclesiæ ordo, à Deo, Sacerdotii & Regni auctore, statutus exigit, ut precibus Sacerdotii, apud Deum, Regnum muniatur; & æquitate legis divinæ, per Sacerdotem propositæ, dirigatur; ac vice versâ, armis Regum, Ecclesiasticæ leges afferantur, atque adversus inobedientes vindi-

centur, ex isto strictissimo foedere, & jurisdictione Ecclesiastica, coactiva, propter Regium subsidium, & imperatoria seu Regia, divina, propter consonantiam cum divina lege, divinumque subsidium, quod utrumque à Sacerdotio mutuatur, habere poterit.

Quod luculenter explicat prædictus Blefens. Epist. cit. iis verbis : *Ecclesia jurisdictionem suam prius exerceat, & si illa non sufficit, ejus imperfectum suppleat, gladius secularis ; hujus rei auctoritas, è Syn. Urbani Pap. de decr. Greg. ex Epist. Greg. ad Episc. Galliar. ex Conc. etiam Martini Papæ, & Concil. Cartag. III. & ex multis SS. PP. institutionibus emanavit. Nec dicatur, quod aliquis puniatur bis in ipsum, nec enim iteratum videtur, quod ab uno incipitur, & ab altero consummatur. Duo sunt gladii, qui mutuum à se mendicant auxilium, atque ad invicem sibi vires impartuntur alternas ; Sacerdotium Regibus, & Sacerdotibus regnum : ideoque si ab altero suppletur alterius insufficientia, non videtur duplex contritio, aut punizio combinata.*

C A P. IX.

Excommunicandi potestas est coercitiva, seu coactiva.

IV. **T**Andem elucidatio : vel sola excommunicandi potestas, coactivam potest denominare jurisdictionem Ecclesia-

clestasticam; ferri enim potest omnino in invitos, eosque velint nolint constringit, in quo propria ratio coactionis consistit: quamvis non eam vim inferat, quæ cum sensu doloris necessario jungatur, sed ejus illatio, eos tantum dolore afficiat, qui fide Christi imbuti, quanta sit hæc poena, quam perniciem, damnumque secum invehat, illuminato fidei oculo apprehendunt.

Prior pars clara est, quæ nempe tam Scripturarum, quam P. P. certissimis testimoniis comprobatur. Scripturarum quidem, hoc cap., SS. PP., seq. nam imprimis, sui excommunicatur, dicitur *esse anathema*; at anathema dicitur, qui fit alienus à Christo. Et 1 Cor. 16. *Si quis non amat Dominum nostrum IESUM Christum, anathema sit.* Et eo sensu, vocem istam interpretantur, Chrysost. Homil. de anathem. & hom. 16. in Epist. ad Rom. non longè ab init. Hier. q. 90. epist. ad Algas. & comm. in cap. 14. Zach. ad illud, *anathema non erit amplius.* Itaque operatur excommunicatio, separationem à Christo, quia separat ab Ecclesia, quæ corpus est Christi; & nemo potest Christo conjungi, nisi qui ejus corpori unitus sit.

Item qui excommunicatur, dicitur *traditus Satanae*, 1 Cor. 5. & 1 ad Tim. 1. sive ad cruciatus, ut supra explicuimus, sive ad

tentationem, cujus scilicet infidiis, ubi divinis subsidiis per excommunicationem privatur, longè periculosiùs patet, nudumque quodammodò habet latus, quo confodi possit, ut explicant Orig. hom. 2. in Judic. Hil. in Ps. 118. lit. *Ain*, ad illud, *feci judicium & justitiam*; Ambr. lib. 1. de poenit. c. 14. Hier. in c. 14. Is. & in c. 19. ad illa verba, *Tradam Ægyptum in manus*, &c. Leo Epist. 89. c. 7. ad fin. Theoph. 1 ad Tim. 1. in fin. & alii passim.

Dicitur *tolli de medio, auferri*, c. 1. prior. ad Cor. quæ verba vim aliquam significant, & effectum, à voluntate excommunicati, minimè dependentem, & spirituales quandam interfectionem, ut explicant Pacian. Epist. 3. ad Sympron. Hier. ad c. 32. Ezech. Aug. q. 39. in Deut. tractans verba illa Deut. 24. *Interficietur, & auferes malum de medio tui*, & lib. 22. contra Faust. c. 20.

Dicitur *abscissus*, Math. 5. *Si oculus tuus dexter scandalizat te, erue eum, & projice abs te; si dextra manus scandalizat te, abscinde eam, & projice abs te*. Quem locum excommunicationi accommodant, Orig. hom. 7. in Jos. sub fin. Pontif. Rom. p. 3. c. de ord. excomm. & alii aliqui, ex PP. tum ad Gal. 5. *Abscindantur, qui vos conturbant*: quod dictum Apost. excommunicatis applicat, Innoc. I. Epist. ad Conc. Milev. quæ est

est 93. inter Epist. Aug. ad stipulaturque Cyp. Epist. 62. Ambr. lib. de Elia, c. 22. Hier. Epist. 1. ad Nepot. Prosp. lib. 2. de vit. contempl. c. 7. & alii passim, qui excommunicationem abscissionem, truncationem, sectionem esse, dicunt; quæ omnia verba violentiam significant, & punitionem etiam inviti.

Dicitur etiam excommunicatus *mitti foras*, Math. 5. *Si sal infatuatum fuerit, in quo salietur? ad nihilum valet ultra, nisi ut mittatur foras, & conculcetur ab hominibus.* Quam sententiam de lapsis in hæresim, ab Ecclesia ejectis, forasque missis, interpretatur Chromat. in illud, c. 1. *Conculcatio* verò, cujus in eadem sententia fit mentio, ejaculatio execrationum ac maledictorum in excommunicatum, & proborum aspersio, videri potest, quorum meminit Clem. Rom. Constit. Apost. c. 20. & S. Paul. 2 ad Cor. 2. dum ait, *Sufficit illi, qui ejusmodi est, objurgatio hæc, quæ fit à pluribus.*

Ex quibus inferri potest, excommunicationem à Prælato Ecclesiastico latam, duos habere effectus, qui vim aliquam & coactionem indicant. 1. Ablegari excommunicatum ab Ecclesia, seu foras mitti, etiam invitum; mitti, inquam, foras, non sine violentia quadam saltem spiritali, in quantum contingit, per sententiam excommunicationis peccatores ab Ecclesiæ corpore

corpore arceri , suffragiisque & fructibus communionis Ecclesiasticæ , vel invitos privari. 11. Infamiam etiam aliquam excommunicato inuri , quæ conculcationis nomine , id est , contemptus nomine significatur , & excommunicationi adhærescere videtur , ex natura ipsa actus , esseque proinde ab excommunicatione inseparabilem , & ab eodem infligi , à quo & ipsa excommunicatio pronuntiatur.

Præterea dicitur excommunicatus habendus , sicut Ethnicus & publicanus , Math. 18. Quibus nimirum verbis , cohabitationem , & familiaritatem cum excommunicato , interdictam sentire debemus. Nam Ethnicos , ex lege , evitabant Judæi , ne eorum contagio polluerentur , Deut. 7. Cui affine est illud Joan. c. 4. *Non contutuntur Iudæi Samaritanis.* Publicanos verò odio infensissimo prosequiebantur , ut ex Evangelica Hist. colligere est , in qua , malè audivisse Christus , narratur , quòd cum Publicanis manducaret , & hæc hominum exempla , qui odio & execrationi esse solent , Christus Dominus attulit , ad ostendendum , excommunicatos à Christianis evitandos similiter esse , & execrandos , ut exponunt Hil. Hier. & alii , in eum loc. nec non Gelas. opusc. de anathem. alique passim. Quæ poena , partim divina , partim humana est ; eaque Ecclesiæ propria , cui , hujus poenæ infl-

infligendæ potestatem habenti, jurisdictionis coactiva haud dubiè convenire, dici potest.

Propter hanc igitur causam, eod. cap. 18. Math. excommunicatus dicitur, *Ligari in Cælo, & in terra*, eaque potestas ligandi in Cælo & in terra, Apostolis, eorumque successoribus conceditur, iis verbis, *quæcunque alligaveritis super terram, erunt alligata & in Cælo, & quæcunque solveritis super terram, erunt soluta & in Cælo*. Ligandi hæc potestas quid aliud, quàm potestas cogendi? qui enim ligatur, cogitur. *Vinculum autem illud Sacerdotale, ipsam animam contingit, atque ad Cælos usque pervadit, usque adeò, ut quæcunque infernè Sacerdotes confecerunt, illa eadem Deus supernè rata habeat, ac servorum sententiam Dominus confirmet* ut Chrys. lib. de Sacerd. c. 5.

Unde & duplex vinculum est, seu potius unicum, duplicem habens respectum, unum ad ea, quæ excommunicato interdiciuntur in terris, quod interdictum invitos ligat, & inhabiles ad plurima, v. g. ad sacramenta recipienda, ac conferenda officia, ministeriaque suscipienda vel exercenda, indulgentias lucrandas, aliaque id genus plurima, excommunicatos efficit. Quis autem dubitet, quin inhabilitates istiusmodi ac privationes, quibus, velint nolint, aliqui puniuntur, potestati coactivæ poenæ sint

sint proportionatæ? Quo nempe poenarum genere, potestatem quoque politicam uti decet, ut sæpè utitur, quatenus immorigeros ad meliorem frugem revocet.

Aliud vinculum est respectu Cælorum, quod injicitur homini, ut Coelestem felicitatem consequi non possit, quia cùm humanum Sacerdotis iudicium, Deus sententiâ suâ confirmet, & extra Ecclesiam, nemini salutis æternæ obtinendæ aditus recludatur; eo ipso quo quis extra Ecclesiam, per excommunicationem rejicietur, extra salutis viam constituitur, ac proinde eo ipso, quo quis excommunicationis vinculo innodatur, à felicitate æterna arcetur, ne eam consequi possit; ab istis autem vinculis, liberari incipit, cùm eum prioris vitæ poenitet, & Ecclesiasticæ communionis beneficium promereri satagit; sed perfectè solutus non est, nisi ubi Ecclesiasticæ communioni restituitur: quia quamdiu extra Ecclesiam fuerit, licèt absolute, simpliciter salvari possit, tamen ægrè id potest, quia remedia adversus peccata, & insidias satanæ, Ecclesiæ relictæ, ipsi subtrahuntur.

Quamobrem SS. PP. arctè illigari istiusmodi vinculo animas, docent. Præ cæteris legantur Nyss. *orat. in ægrè ferent. reprehension.* sub med. Chrys. hom. 4. in Hebr. Aug. Epist. 75. tract. 50. in Joan. & alibi sæpè. Et appositè ad nostrum institutu-

stitutum, Clem. Alex. lib. 1. pædag. c. 7. visionem virgæ vigilantis, & ollæ succensæ exponens, docet, *virgam* illam *vigilantem*, animadversionem esse, Ecclesiastici Prælati, per quam, qui non resipiscunt, incidunt in *ollam ignis æterni*. Itemque Tertull. scorp. c. 10. excommunicatis, per Ecclesiæ claves, *Cælum clausum*, asserens.

Verum quidem est, Deo præsertim attribui debere secundum istud vinculum, quod est subtractio quædam gratiarum, auxiliorum, ac mediorum, ad salutem obtinendam destinatorum; sed tamen & homo, vinculum istud injicit, auctoritate Dei utens, & Deus quodammodò hominis sententiæ obsequitur, iis peccatorem privans, ubi indignus à Sacerdote pronuntiatus fuerit, ut explicat Chrys. ibid. nec repugnant verba Jac. c. 4. *Unus est legislator, & judex, qui potest perdere & liberare*, verbis Christi, *quæcunque alligaveritis*, &c. quandoquidem quod Sacerdos ligat, Deus ligat; quod decernit Sacerdos, Deus decernit: Deus quidem principali auctoritate, Sacerdos tamen divinâ & acceptâ à Deo potestate.

Denique dicitur excommunicatus *virgæ subjeci*, 1 Cor. 9. ut explicat Ambr. lib. 1. de poen. c. 14. quæ virga coactionem haud dubiè sonat, & quidem severitatis multum habentem, quam ideo *ferream* dictam à Proph.

Proph. Regio, Pf. 2. contendit Hier. non ad dirigendum tantum, per Evangelica præcepta, sed cogendum, conterendum, ulciscendum; ita enim loquitur, Epist. 53. miror sanctum Episcopum, in cujus parochia esse Presbyter dicitur, *acquiescere furo-ri ejus, & non virgâ Apostolicâ, virgaque ferreâ, confringere vas inutile, & tradere in interitum carnis.*

C A P. X.

Eadem est mens antiquorum PP. de excommunicandi potestate coactiva.

PP. quoque excommunicationi, vim cogendi attribuunt. Tert. *relegationis* nomine, illum insignivit, Apolog. c. 39. excommunicatos *ab Ecclesia arceri*, docet, de idololatr. c. 11. *ab omni communicatione fraternitatis*, lib. 2. ad uxor. c. 3. prohiberi recipi in Ecclesiam, lib. 4. advers. Marc. c. 24. *Ab agmine pelli*, item *abjici*, lib. 3. advers. Marc. c. 9. *Sacramento benedictionis exauclorari*, lib. de pudic. c. 9. Quæ omnia verba, vim aliquam significant. Orig. Hom. 14. in Levit. duplicem ab Ecclesia exitum distinguit, unum spontaneum, per deviationem à veritate fidei, & Charitate; alterum coactum, per Episcopi vocem.

Cypr. Epist. 38. & 40. distinguit item duplicem ab Ecclesia egressum, unum schi-

schismaticorum, qui spontè ab Ecclesia exeunt, conventicula extra eam congregantes, & factionem perditorum colligentes; alium, qui fit per sententiam Ecclesiæ, eos pronuntiantis abstinendos atque evitandos, qui indigni Ecclesiæ consortio fuerint judicati. Unde inferitur, excommunicationem vim inferre, neque spontaneam esse. Epistolis quoque 27. 28. & 62. iis verbis, excommunicationem describit, quæ violentiam & coactionem connotant.

Iis adjungi debent Naz. Orat. 26. n. 52. Ambr. lib. 2. Off. c. 27. Hier. in c. 10. Eccles. Chrys. hom. de Anath. & 4. in 2. c. ad Hebr. Aug. de corr. & grat. c. 15. Serm. 20. & 40. novis; Leo Epist. 89. c. 7. ad fin. Faust. Reg. Hom. quad. ad Monach. quæ 3. est inter Epist. Pseudo-Eus. Emiss. ad Monach. & alii passim, statum miserrimum excommunicatorum nobis exhibentes, iisque verbis explicantes, quæ vim & coactionem sonant.

Quibus adjungo duo Aug. testimonia, quæ nobis id clariùs indicant, 1. ex l. 1. contr. advers. l. & proph. c. 17. petitur, quo scilicet vindicatricis & ultricis, ac coactricis potestatis actus, excommunicatio esse, manifestè describitur, *ignoscendi*, inquit, *misericors mansuetudo*, *propter quam dictum est, non solum septies verum etiam septuagesies septies,*

septies, fratri remittenda esse peccata, non ad hoc valet ut sit iniquitas impunita, aut torpens, aut dormiens disciplina, quod potius obsit quàm diligens vigilansque vindicta. Claves quippe Regni Caelorum sic dedit Dominus Ecclesiae, ut non solum diceret, quæ solveritis, &c. Ubi apertissimè bonum pro malo, reddit Ecclesia: verum & adjungeret, quæ ligaveritis in terra, erunt ligata & in Cælo; quia bona est & vindicandi justitia; illud enim quod ait, si nec Ecclesiam audierit, sit tibi tanquam Ethnicus & publicanus, gravius est, quàm si gladio feriretur, si flammis absumeretur, si feris subigeretur: nam ibi quoque subjuxit, Amen dico vobis, quæ ligaveritis super terram, erunt ligata & in Cælis, ut intelligeretur, quantò gravius sit punitus, qui velut relictus est impunitus.

Quæ posteriora verba, non obstant præcedentibus, nec indicant mentem Aug. esse, quòd excommunicatio non sit dicenda, poena, sed solum, quòd non sit talis poena corporalis, qualem infert Magistratus Politicus.

Alterum testimonium desumitur, ex lib. de fid. & oper. c. 4. ubi Aug. eos reprehendit, qui solam directionem, Ecclesiastico Præfuli tribuerent, coërcitionem denegarent, scribens, eos perversissimam securitatem Præpositis tribuere, ut ad eos non pertineat, nisi docere, quod cavendum, quodque fu-

fugiendum sit; quodlibet autem quisque faciat, non curare: hancque regulam indulgentiæ & coërcitionis statuens, c. 5. iis verbis, Nos verò ad sanam doctrinam pertinere arbitramur, ex utrisque testimoniis, vitam sententiamque moderari, ut & canes in Ecclesia propter pacem Ecclesiæ toleremus, & canibus sanctum, ubi pax Ecclesiæ tuta est, non demus.

Cùm ergo, sive per negligentiam Præpositorum, sive per aliquam excusabilem necessitatem, sive per occultas abreptiones, invenimus in Ecclesia malos, quos Ecclesiasticâ disciplinâ corrigere, aut coërcere non possumus, tum nec ascendat in cor nostrum, impia & pernicioſa præsumptio, quâ existimemus, nos ab his esse separandos: cùm verò eis, per quos Ecclesia regitur, adest salvâ pace, potestas disciplinæ adversus improbos aut nefarios exercendæ, tunc rursus, nec socordiâ segnitiaque dormiamus, aliis aculeis præceptorum, quæ ad severitatem correctionis pertinent, excitandi sumus, &c. Infinita ejusmodi sunt, quæ in hunc scopum proferri possunt, at hæc sufficiunt huic loco.

C A P. XI.

Respondetur effugiis adversariorum.

QUibus nec Marfil. nec aliorum effugia satisfaciunt, quasi potestas illa sit mul-

multitudinis, non Episcoporum: præterquam enim, quod plura ex iis testimoniis, Episcopis potestatem excommunicandi propriam esse, ostendunt; Conciliorumque omnium canones passim id demonstrant, & antiqua Ecclesiæ disciplina ab Apostolis; quam quæst. hoc loco nolumus attingere, utpote diffusioris discussionis, & alibi fortassè discutiendam: tamen nec, si hoc adversariis daremus, intentum evincerent, nec Regi aut Imperatori hujus potestatis exercitio, jus quoddam exinde competere, demonstrarent: quandoquidem potestas hæc, Ecclesiæ esse, non Reip. innotesceret; in Ecclesia verò Imperator, ut ovis ac subditus, non ut Rector vel Pastor constituitur, non ovem aut subditum habeat: pateretque, etiam invitis Imperat. Ethnicis, in Ecclesia, poenæ istius ac coercitionis usum, semper fuisse: nec solum viguisse excommunicationis censuram, prout spiritualibus bonis nos privat, verum etiam, ut ab omni nos consortio, & conversatione fidelium repellit.

Ea siquidem censura, ab institutione Christi, ortum habet, quam citata ejusdem Christi verba ostendunt, Math. 18. & ab Apostolorum disciplina, quam laudata pariter ex Epistolis S. Paul. testimonia, demonstrant.

Quibus addi debent loca ista, Epist. 2 ad Cor.

Cor. 5. Scripsi vobis in Epistola, ne commisceamini fornicariis, non utique fornicariis hujus mundi, aut avaris, aut rapacibus, aut idolis servientibus, alioquin debueratis de mundo exiisse. Nunc autem scripsi vobis, non commisceri, si is, qui nominatur frater inter vos, est fornicator aut avarus. 2 ad Thess. ultim. Quod si quis non obedit verbo nostro, per epistolam, hunc notate, & ne commisceamini cum illo, ut confundatur. Ad Tit. 3. Hæreticum hominem, post unam & secundam correptionem, evita: sciens, quia subversus est. Et 2 Joan. v. 10. Si quis venit ad vos, & hanc doctrinam non affert, nolite recipere eum in domum, nec ave ei dixeritis; qui enim dicit illi ave, communicat ejus operibus malis.

Constit. Apost. lib. 6. c. 18. quo jubentur impii hæretici, non poenitentes, excludi & semoveri à fidelibus, & eis Ecclesia Dei interdici, ut omnibus modis, ab his fideles declinent, & nulla cum eis sit precationis, aut sermonis communitas. Cujus constitutionis ratio redditur, quia hi sunt adversarii, & insidiatores Ecclesie, qui corrumpunt gregem, & fœdant hæreditatem.

Denique exemplum insigne habemus, in hanc rem, S. Joan. Apost. quod se à S. Polycarpo accepisse, narrat Iren. lib. 3. advers. Hæret. c. 3. & refert Euseb. lib. 6.

c. 22. illum scilicet Joann. Apost. lavandi sui causâ , balneum ingredientem , cum certior factus esset , Cerinthus intus esse , actutum ex eo loco resiliisse , atque in hunc modum suos hortatum fuisse , *Fugiamus extemplò , ne balneum , in quo Cerinthus , veritatis hostis , moratur , subito concidens , nos opprimat.*

Quæ autem de vitanda Hæreticorum communione , decreta sunt , quique mos ab Apostolis , eosdem evitandi , servatus est , ea ad omnes excommunicatos haud dubiè extendi debent , (saltem publicè & nominatim denunciatos , juxta Bullam Martini V.) quos tanquam Ethnicos evitari , Christus voluit , & à quibus Ecclesia plùs quàm ab infidelibus , horrere suos jussit , teste Chrysof. hom. 25. in Epist. ad Hebr. docuitque S. Paul. 2 ad Cor. 5. cit. sup. verb.

Atque hæc Ecclesiæ continua praxis fuit , ut testantur Ign. Epist. ad Philadelph. Tert. Apolog. c. 39. & lib. 2. ad Uxor. c. 3. Orig. hom. 9. in Hierem. Cypr. Epist. 62. Bas. Epist. 47. Ath. Synes. Epist. 58. ad omn. Episc. Chrys. hom. de anath. & in Psal. 4. & sæp. alibi ; Aug. lib. de ver. Relig. c. 6. lib. 3. contr. Epist. Parmen. c. 2. lib. post Collat. contr. Donat. c. 20. Conc. in Ps. 54. de corr. & grat. c. 15. & alibi passim ; Isid. Pelus. lib. 4. Epist. 154. ad Anatol. & alii plurimi PP. Qui-

Quibusjunge Ecclesiasticos Can. innumeros, videlicet 10. vel 11. Apost. 12. vel 13. nec non 32. vel 33. Eorund. Apost. Decreta summor. Pontif. Clem. Epist. 1. Anacl. Epist. 3. in fin. Alex Epist. 1. ant. med. Calixt. Epist. 2. Fab. Epist. 1. Zach. Epist. 5. ad Bonif. & aliorum. Item Conciliorum, Eliberit. c. 28. Antioch. c. 2. Tol. 1. c. 15. Arel. II c. 30. Antissiod. c. 38. Vafens. c. 6. Capitular. lib. 1. c. 1. & lib. 7. c. 295. & 461. aliasque passim ejusmodi sanctiones.

Sed notari speciatim debent, verba Origen. sup. quæ separationem istam, Dei dispensationi attribuunt, *Dissolvuntur ergò, inquit, & ad nihilum deducitur nequam cogitatio, cum non habuerit colloctionem alterius nequioris. Idcirco per dispensationem Dei providetur, pessimos à pessimis separari: justum quoque & commodum est, ut à pristinis sceleribus, ipsa solitudine, & penuriâ consortii, aliquando desistant.*

C A P. XII.

Quomodo excommunicatio est pœna spiritalis, & in ea sit vis & coactio.

HÆc autem excommunicationis pœna, non est omninò spiritalis, nisi ratione finis, & radicis: radix enim illius se-

parationis, à congressibus, conviviiis, colloquiis, & aliis humanæ societatis officiis, quæ per excommunicationem, etiam nolenti, videtur esse execratio ista, quam contrahit peccator, ex eo, quòd tanquam membrum putridum, ab Ecclesiæ corpore refectur, & tanquam inimicus Christi, Principis nostri, rebellisque adversus matricem Ecclesiam habeatur: ex eo enim connaturaliter sequitur, ut nisi accedat Ecclesiæ indulgentia, aded execrabilis nobis debeat esse excommunicatus, ut ab ejus conversatione ac familiaritate, debeamus abhorre-
re, quemadmodum à convictu & conversatione proditoris patriæ, & læsæ Majestatis rei, abhorremus.

Finis verò ejusdem separationis, etiam quoad humanam & externam societatem, est hominis, tum facinorosi, tum alterius, qui ejus convictu perverti posset, spiritualis salus; dicit enim Apost. cit. sup. 2 ad Thes. ult. *Ne commisceamini cum illo, ut confundatur*; de ea autem confusione loquitur Apost. de qua Sapiens, Eccles. 4. *Et est confusio adducens gratiam & gloriam*: idem quoque Apost. ad Tit. 1. *Increpa illos dure, ut sani sint in fide.*

Duobus ergò istis titulis, spiritualis est ista separatio in civilibus, & humanæ vitæ negotiis communibus, quæ per excommunicationem Ecclesiasticam consequenter infer-

infertur, quæ tamen in se considerata, humana, naturalis ordinis, & corporalis esse videtur, quomodo materia Sacramentorum, v. g. aqua elementaris, naturalis ordinis ut plurimum est, sed ratione finis, ad quem refertur, & institutionis, quam habet à Deo, supernaturalis est.

Verè autem in ista separatione, aliqua cognoscitur vis atque coactio, quia cum sensu conjungitur, *quod enim sanare non potest, cum dolore abscindere* Sacerdotem, dixit Ambr. lib. 2. offic. c. 27. legantur constit. Apost. lib. 2. c. 41. Orig. hom. 7. in Jos. & alii passim PP. qui acerbitatē istius separationis, dolore non mediocri, damnatos pungentem, amplificant, & egregiis comparisonibus illustrent.

Eadem ratio est istius infamiæ & execrationis, quæ connaturaliter excommunicationem consequitur. Excommunicatos siquidem infames esse, colligitur ex c. omnes verò c. illi qui, c. omnes illi qui, 6. q. 1. & aliis: quibus consentiens Bas. Epist. 47. ad Athan. Præf. Lybiæ, excommunicatum, *infamis viri*, & *δυσωρομας ἀνδρὸς* notâ afficit, & omnibus execrabilem futurum, & *aversandum* visum omnibus, affirmat.

Infamia siquidem ista & execratio, quam quis ob excommunicationem incurrit, poenæ sunt, tam potestati Ecclesiasti-

cæ, quàm civili communes, quia declarationem turpis facinoris consequuntur, potiùsque propriæ sunt Ecclesiasticæ quàm potestati politicæ, quia Ecclesia certius, & ex principiis, quibus minor potest obrepere falsi suspicio, virtutem à vitiis discernit, verumque honorem ab infamia, & execrationis major occasio, quo quis à Deo longiùs abscedit, Deoque magis invisus est, quod utique, judicare, Ecclesiasticus potiùs debet, quàm civilis Magistratus.

Nihilominùs PP. aliqui, coactionem, & vim omnem Ecclesiæ adimunt, & excommunicare Ecclesiam posse fatentes, cogere posse, diffitentur, quorum plurimos sup. & ab adversariis, objectionis loco prolatos, retulimus, & in explicatione differentiæ, utriusque potestatis, adduximus: ii autem, in eum sensum sunt exponendi, quem tradidimus, nimirum, ut quemadmodum putridæ omninò carnes, & emortuæ, absque doloris sensu, à corpore abscinduntur; ita quoque quidam in peccatis obdurati reperiuntur, qui sine doloris sensu, patiuntur se, à corporis unitate resecari; eò infeliciores, quò infelicitatis suæ sensum non habent, nec jacturam spiritualium bonorum dolent, nec bonorum consortium sibi ademptum gemunt, *quorum finis interitus, quorum Deus*
venter

venter est, gloria in confusione ipsorum, qui terrena sapiunt, ut loquitur Apost. ad Phil. 3.

Iis ergò, per excommunicationem, nulla videtur inferri violentia, quia voluntariè in eam incurrunt, & sponte in proprium exitium ruunt: atque aded sublatâ omni fide, & piâ voluntatis affectione, quæ non datur nisi volentibus, excommunicatio nullam, vel exiguam, peccatoribus induratis molestiam exhibet: eoque sensu P.P. neminem ab Ecclesia, nisi volentem, ligari docent: maximè verò, quia nemo per excommunicationem ligari potest, nisi qui in Ecclesiæ sinu fuerit, & per baptismi susceptionem Ecclesiæ mysteriis initiatus sit: baptisari autem adultus nemo debet, nisi volens, & Religioni Christianæ consentiens; nemo in Ecclesiæ corpore, nisi volens remanet, à quo per æternam infidelitatem exire potest.

Non requiritur tamen ad jurisdictionem coactivam, quòd poenas exhibeat, quæ doloris sensum, aut violentiam semper inferant, dummodò ut plurimum inferant, & ex se dispositis inferre possint, & debeant, aliàs nec corporales poenæ, quas tortores infligunt, coactivæ dicerentur, si grato animo susciperentur, citra doloris sensum, aut displicentiam, sive propter Deum ex pietate, sive propter animi ægritudi-

tudinem, ex desperatione, five denique propter membri defectum, sensu destituti, ex morbo.

C A P. XIII.

Quædam alia corollaria, ex præcedentibus deducuntur.

Corollarium I. ex prædictis confirmatur, quod quæst. I. à nobis sæpius inculcatum est, Hierarchiam, absque jurisdictione quadam nullam esse. Etenim quæ modo docuimus, ostendunt, *principatum* esse duplicem, unum sacrum, quem uno verbo Hierarchiam dicimus; alterum sæcularem seu politicum, five ille sit Monarchicus, five sit Aristocraticus, five Democraticus: utrique autem principatui, jurisdictionem aliquam coactivam competere: unde nullo negotio deducitur, Hierarchiam nullam esse, quæ jurisdictionem coactivam adnexam non habeat.

Corollarium II. Deducuntur etiam ex præcedentibus, jurisdictionis Hierarchicæ, prærogativæ plurimæ, quarum sup. explicatarum recensio, ad refricandam memoriam, non inutilis videbitur.

Ratione finis, præcellit jurisdictio Ecclesiastica, seu Hierarchica, quòd unū, tam publicum quàm privatum subditi bonum, pro-

posi-

positum habeat: politica verò solum bonum publicum, non autem privatum uniuscujusque, nisi in quantum publico conjungitur: sacra, inquam, respicit bonum privatum cujusque, ut castigatus resipiscat, & salutem consequatur, quemadmodum plurimis testimoniis, jam notum fecimus.

Quod ipsum colligo ex Walafr. Strab. de Reb. Eccles. c. 17. has causas excommunicationis, quâ præsertim Ecclesia contumaces castigat, referente, quæ ad privatum excommunicati bonum tendunt, sciendum enim, inquit, à SS. PP. ob hoc vel maxime constitutum, ut mortaliter peccantes, à Sacramentis Dominicis arceantur, ne indignè ea percipientes, vel majori reatu involvantur, ut ludas, vel ne (quod Apost. de Cor. dicit) infirmitatem corporis & imbecillitatem, ipsamque mortem præsumptores incurrant. Et ut à communione suspensi, terrore ejus exclusionis, & quodam condemnationis anathemate compellantur, studiosius pœnitentiæ medicamentum appetere, & recuperandæ salutis desideriis inhiare.

Hanc postremam rationem, quæ apud PP. antiquos communis est, profert Innoc. IV. in Conc. Lugd. prout refertur cap. pia, de exceptionib. in sext. docens, piâ consideratione statuisse Matrem Ecclesiam, quod majoris excommunicationis exceptio, in quacunque parte, judiciorum opposita, lites differat,

Et repellat agentes, ut excommunicati, dum à communibus actibus repelluntur, rubore suffusi, ad humilitatis gratiam, Et reconciliationis affectum, facilius inclinentur: item politicæ finis est quies temporalis; sacræ, seu Ecclesiasticæ, salus æterna.

Ratione mediorum, sacra potestas pariter præcellit, quia sacra ex officio adhibet media supernaturalia, cujusmodi sunt sacramenta, & sacramentalia, quibus homo expurgetur & mundetur; sacram doctrinam, quâ moneatur & instruatur; divina judicia, quibus terreatur, etiam miracula, quibus fidem faciat: politica verò, sola humana media, ad terrorem, poenam, vel excidium improborum.

Ratione objecti, similiter ante ponenda est potestas Ecclesiastica, civili, quia hæc in corpora duntaxat habet potestatem; illa verò in animas, quarum perniciēs ac iactura, longè magis extimescenda est, quàm corporum, dicente Christo Dom. Math. 10. *Nolite timere eos, qui occidunt corpus, animam autem non possunt occidere, sed potius timete eum, qui potest Et animam, Et corpus perdere in gehennam.*

Ratione poenarum, quia quæ poenæ, ab Ecclesiastica potestate infliguntur, spirituales sunt, non autem corporeæ, quemadmodum poenæ quæ à politica potestate inferuntur: item earum aliquæ supernaturalis

lis sunt ordinis, supernaturalibus nos bonis privantes, quas adhibere non potest politica potestas, sed solum poenas quasdam, quæ naturalibus bonis, expeti solitis, nos spoliant: deinde durabiliores sunt, poenæ Ecclesiasticæ potestatis, quàm sæcularis: Ecclesiastica siquidem potestas, æternis poenis hominem addicit, & quodammodo iudicium Dei prævertit, illudque provocat, dicente Christo Dom: *quæcumque ligaveritis super terram, erunt ligata & in Cælis*: potestas verò sæcularis, nonnisi ad poenam temporalem, per aliquod breve momentum subeundam, nos obstringit: ob eamque causam *temporalis* ista potestas dici solet.

C A P. XIV.

Aliæ prærogativæ Ecclesiasticæ potestatis.

EXtenditur potestas Ecclesiastica, ad ligandos etiam mortuos: nam & rebelles Ecclesiasticâ sepulturâ privat, cuius non minima commoda esse solent, testibus Aug. de cur. pro mort. c. 4. & 5. Greg. lib. 4. Dial. c. 50. Jul. Tol. lib. 1. prognost. c. 20. & aliis: privat sacrificii incruenti fructibus, quos Tert. lib. de cor. mil. & lib. de monog. Cypr. Epist. 66. Athan. lib. de var. qq. q. 34. Ambr. in fun. valent. Chrys.

hom. 21. in Act. 41. in prior. ad Cor. 3. in Epist. ad Philipp. 69. ad pop. Antioch. Epiph. hær. Arrian. Aug. Serm. 32. de verb. Apost. lib. 2. de civ. c. 9. Confess. c. 12. & 13. de anim. ad Renat. c. 9. & 11. de cur. pro mort. c. 1. Enchr. c. 10. & passim agnoscunt.

Privat & publicarum precum, ac satisfactionum, tum Ecclesiæ, tum privatorum Emolumentis; de quibus legendi præsertim Chrys. hom. 41. cit. in 1. ad Cor. Damasc. orat: *quod hi qui cum fide, ex hac vita exceſſerunt, vivorum missis, ac beneficiis juventur.* Petr. Dam. opusc. 33. c. 5. & alii. In mortuos, iis aliique modis rebellionem ulciscitur, de qua re latissimè Justin. Imp. Epist. sua ad Joan. Pap. 11. inter acta v. Syn. plurimis exemplis, & testimoniis, id probans. Eodemque spectant, quæ Cypr. supra; D. Aug. lib. de unit. Eccl. c. 7. Epist. 152. ad Donat. & aliàs, scribunt; & de Origine post mortem damnato, referunt Socrat. lib. 6. c. 17. c. 40. Nicephor. lib. 7. c. 27. & 28. Liberat. in Breviar. c. 13. & alii.

E contra verò, nihil simile dici potest, de potestate Politica, cui mortuis nocendi potestas denegatur, testimonio ipsius Christi Dom. Luc. 12. *nolite timere eos, qui occidunt corpus, & post hæc non habent ampliùs, quid faciant:* Ex quibus verbis, non nocere.

re inhumanam quorundam, in ipsa cada-
vera sævitiam, iis, qui mortui sunt, ita ar-
guit venerab. Bed. lib. 4. in Luc. c. 52.
*si persecutores sanctorum, non habent amplius,
quid faciant ergo supervacuâ furent insaniâ,
qui mortua martyrum membra feris, avibusque
discerpenda projiciunt, cum nequaquam omni-
potentiæ Dei, quin ea resuscitando vivificet,
obstiterere possint.*

Potestas item sacra propter Episcopatus
unitatem, in suo territorio ligatum, ubi-
que ligatum detinet, ut ostendit Syn. Epist.
58. contendunt Isid. Pelus. lib. 3. Epist.
259. & auctor libr. de 12. abusionib. &
alii; Concilia verò innumera, observari
jubent. Non eadem verò est vis, & efficacia
potestatis politicæ, quæ extra territorium
suum, vindictæ & ultionis locum non ha-
bet, propter principatum temporalium
differentiam, qui unum non efficiunt prin-
cipatum, sicut omnes Ecclesiæ, efficiunt
unam Ecclesiam.

Præterea poenæ à Magistratu Ecclesiasti-
colatæ, *clave non errante*, sunt inevitabiles;
v. g. excommunicatio, hominem ubilibet
apprehendit, & ligat: fugere nemo potest
judicium Episcopi, quin eo percellatur:
fugientem censura Episcopalis sequitur,
& ut notat Panorm. in c. 1. de treug. &
pao. non clauditur territorio, sed sequitur
personam; non vi, non dolis evitatur, sed

aggravatur. Poenæ corporales, in pœnitentiam, ab Ecclesia præscriptæ, possunt quidem non impleri, sed nunquam impunè cum culpa prætermittuntur, cum è contrario, corporales poenæ, à magistratu politico statutæ, & fugâ, & vi maiore, & dolis, sæpiùs evitentur, & impunè possunt aliquando prætermitti.

Denique, cùm poenæ, quas sacra potestas infligit, & poenæ esse soleant, & medicinæ; Magistratus è contra politicus, poenas, non remedia puniendo adhibere fatagit, præsertim ubi mortem infert, ut supra ex Aug. docuimus.

Exinde etiam patet, & efficaciorè simpliciter, & salubriorem, & universaliorè esse, sacram seu Hierarchicam potestatem, sæculari ac politicâ, quemadmodum jam observavimus. Confirmaturque, tum ex aureis istis verbis Constantini magni, ad Ablav. Præfectum prætorio, lib. 1. cod. Theodos. de Episcopor. judic. *Multa, quæ in iudicio captiosæ præscriptionis, vincula non patiuntur, investigat & promit, sacrosanctæ religionis auctoritas*: tum ex consentientibus, Magn. Basil. verbis, Epist. 917. *Commentariensi. Nam quæ tribunalium officia, non potuerunt efficere, ea ipsa, tremenda Dei iudicia effecisse scimus, & ad rectam deduxisse rationem.*

QUÆSTIO XIV.

De Prærogativa honoris, modò
ordini, modò jurisdictioni at-
tributa.

CAPUT I.

*Nulli olim jurisdictionem, nisi in sui, vel
inferioris ordinis viros, convenisse.*

SUbordinationem ratione jurisdic-
tionis, inter membra Hierarchiæ Eccle-
siasticæ esse, nemini dubium esse
potest, qui Ecclesiam Catholicam,
aciem ordinatam credit: hanc copiosè ex-
plicant DD. Catholici, & inter cæteros
præcipuè Franc. Hall. Sorb. in profundissi-
mo suo opere, lib. 4. de Jurisd. Hier. per
totum & nos supra quædam attigimus.
Alia nobis affectio explicanda, quæ ad
prælationem in honoribus attinet: circa
quam, variis prætermisissis, hoc præsertim
hic tractandum est, utrum *ordinis* sacri, an
jurisdictionis, ad honoris prærogativam de-
ferendam major habeatur ratio; cujus quæ-
stionis necessitas, ex eo oritur, quòd in Ec-
clesia aliquando contingat, ut qui ordine
sacro

facro inferior est , is ordinariū in eos , qui superiorem ordinem nacti sunt , fortiatur imperium : & vice versā , quod in Ecclesia veteri , raro permissum , in qua proinde hæc quaestio minimè movebatur.

Statim initio hîc demonstrandum , Prærogativas ordinis Episcoporum , Presbyterorum , & Diaconorum , aded strictè olim observatas , ut ultimus Episcoporum , ordinis Presbyterorum nobilissimis quibusque præferretur , ultimus Presbyterorum , præponeretur omnibus Diaconis , nec ullus ex Diaconorum ordine , Presbyteris æquaretur , multò minùs potestate jurisdictionis antistaret.

Constit. Apostol. lib. 8. c. ult. exemplo Hierarchiæ legalis , hunc ordinem servandum præscribunt , quòd sicut in Hierarchia legali , Pontifex præferebatur omnibus Sacerdotibus , Sacerdotes Levitis ; lexque ea , quæ à Pontificibus fieri deberet , distinxerit , & quæ à Sacerdotibus , quæ item à Levitis , assignans cuique religionem , quæ esset cujusque gradus propria , eumque deceret , ut quæ Sacerdotibus præscripta essent , hæc Levitæ non attingebant , sed potius singuli , ministeria certa & definita , quæ susceperant , custodirent : ita lex Evangelica (inquit istæ constit.) Episcoporum , Presbyterorum , &

& Diaconorum distinxit gradus & officia.

Nec inferiores ordines, superioribus subsultare, vel præferri voluit, Episcopis, quæ ad Principatum, Presbyteris quæ ad Sacerdotium, Diaconis, quæ ad Ministerium pertinent, assignans; nec unum ordinem in alium involare permittens, addunt, *siquidem non licet ordinem invertere, cum non sit Deus dissensionis, ut inferiores; quæ sunt superioris, per vim sibi vendicent, novam legem in malum suum refingentes, ignorantes durum esse sibi, contra stimulum calcitrare.*

Ignat. pluribus Epistolis, hanc graduum subordinationem commendat, ut scilicet Episcopis Presbyteri, Presbyteris Diaconi, parere debeant. Lege præsertim Epistol. ejus ad Tharsens. & ad Ephes. Clem. Alex. lib. 6. Strom. Exemplo Hierarchiæ Cœlestis, easdem progressiones Episcoporum, Presbyterorum, & Diaconorum, nobis proponit, in eo scilicet fitas, ut sicut in Hierarchia Cœlesti, ordines inferiores, à superioribus illustrantur, ita in Ecclesiastica.

Sed cæteris clariùs, Dion. magnus Hierarchiæ Mag. pluribus locis, à nobis suprâ, in explicatione Hierarchiæ Ecclesiast. prolati: quo loco, utriusque Greg. I. & VII. Rom. Pontif. & aliorum PP. testimonia
lice-

licebit intueri. Nec pigeat ex eod. Dion. c. 4. Coel. Hier. observare, à *superessentiali omnibus eminente, ordinato Principatu*, statutum esse, ut in unaquaque Hierarchia, & primi sint, & medii, & postremi ordines, inferiorumque diviniore Doctores sint.

Accipe etiam, ab eodem Doct. quæ tanquam sua recepta commendat Epist. ad Demoph. *Nefas est, Sacerdotem à ministris, qui te superiores sunt, à tui ordinis Monachis corrigi, & reprehendi, sive aliquid impiè, in divina facere videatur, sive aliquid aliud eorum, quæ vetant leges, fecisse arguatur: rationem subdit, si enim distinctionis, ordinisque confusio, quædam institutorum, legumque Dei violatio est, nullam habet rationem de causa & nomine, divinitus traditum ordinem pervertere.* Quæ postea confirmat iis verbis, Ipse ergo cupiditati, iracundie, & rationi, modum dignitatis statue, tibi autem Dei ministri, & his Sacerdotes, Pontifices verò Sacerdotibus, atque Pontificibus, Apostoli, Successoresque Apostolorum. Quòd si quis etiam in illis desit officio, à sanctis ejusdem ordinis corrigetur, atque ita ordo in ordinem non commutabitur, sed in suo quisque erit ordine.

Ex quibus verbis duo disces; I. Superiores ordines, inferioribus imperitare, v. g: Monachis Ministros, seu Diaconos; Diaconis Sacerdotes; Sacerdotibus Episcopos, Epi-

Episcopis inferioris loci, Apostolicarum Ecclesiarum Præsules, Metropolitanarum vel Patriarchialium.

Alterum, in singulis etiam tribus istis ordinibus Hierarchicis, quosdam esse, cæterorum ejusdem ordinis primores, qui inferiores in officio suo peccantes, corrigere, & plectere possint, acceptâ scilicet à Superioribus ordinibus potestate. Ex qua observatione, divisiones istorum ordinum aliquæ colliguntur, ut scilicet in Episcopali ordine, aliqui, qui Apostolicas Ecclesias tenent, aliis inferiorum Ecclesiarum Episcopis, præferantur: in ordine Presbyterali, aliqui primum locum teneant, quos Decanos, Archi-Presbyteros, Core-Episcopos, aliisque dignitatum nominibus, insignivit Ecclesia. In Diaconorum ordine, Archidiaconi sint, qui omnibus inferioribus ministris immineant, quos aliis nominibus dignitatum, similiter Ecclesia discrevit. De quibus omnibus, Deo dante, dicturi sumus.

Hic verò sufficiat observare, differentem in unoquoque ordine, cujusque præpositi constitutionem, qui cæteris emineat, quemadmodum idem Dion. significare videtur, dum c. I Eccl. Hier. duplicem Hierarchiæ notionem, nobis tradit, unam pro ratione sacrorum, quæ subjecta sunt; alteram, *pro universa sacrorum hujus, vel illius*

illius Hierarchiae, summa : quæ verba ita explicat S. Maxim. Ait ergo, cum Hierarchia de omni ordine dicatur, Hierarchiam esse principaliorē quādam ac generaliorē omnis Hierarchiæ summam ; v. g. ut Hierarchiæ, siue ordinis Presbyterorum Hierarchia, sit Episcopus, qui debet nosse expiare, illustrare, atque perficere ; Hierarchiæ verò Diaconorum Hierarchia, sit Archidiaconus, qui officia Ministrorum nosse debet ; atque ita cæteros deinceps ordines.

Itaque Dion. secundum interpretationem S. Maxim. nequaquam ex Presbyterali ordine, Presbyterum deligit, qui universam ordinis illius perfectionem contineat, sed Episcopum, tanquam summum illius ordinis complectentem, ei præficit. Ex Diaconali verò ordine, Archidiaconum, non solum Diaconorum, sed reliquorum ministrorum doctrinam tenentem, ac disciplinam satagentem, nobis describit. Idem tamen super. in utroque ordine, Episcopali, Presbyterali, & Diaconali præpositos, unicuique ordini præfectos, & imminentes, nobis exhibet.

Conciliari autem facile ista possunt ; nam & tres ordines Hierarchicos statuere possumus, quemadmodum super. statuimus, & duos : alterum Sacerdotum, alterum Ministrorum : quam divisionem tradere videtur, Urban. II. apud Gratian.

tian. dist. 60. c. *nullus*, & Blesens. Serm. 47. ad Sacerd. & Prælat. tradit S. Paul. Epist. prior. ad Tim. 3. duos tantum ordines, Presbyterorum & Diaconorum, commendans, in quem loc. PP. Episcopum & Presbyterum, unum Sacerdotii ordinem constituere, docent, majorum scilicet, & minorum Sacerdotum, quorum differentia, ex Constit. Apostol. supra cit. ea est, quod minores ea tantum gerant, quæ sunt Sacerdotii, majoribus verò reserventur, quæ ad Principatum Sacerdotum pertinent.

Quod discrimen videtur amplexus, Dion. dum Episcopos à Presbyteris distinguit, quod ii sunt *ἐπίσκοποι*, illi *πρεσβύτεροι*; Ministros verò communi vocabulo, *λαϊκὸν γένος* nominat, ex quibus aliquos *ἐκκλησιαστικούς*, seu electos facit.

Atque eo sensu, rectè dicere possumus, Episcopum, Sacerdotii summam perfectionem, plenitudinem, ac fastigium continentem, Hierarchiam aliquo sensu, seu potius Hierarcham, à Dion simpliciter & absolutè existimatum. Archidiaconum verò, & ipsum Principatus nomine donatum, sed inferiori, quod in Diaconos, & cæteros ministros inferiores imperium gerat, universamque rationem sacrorum, scire debeat, ut aliis in sacro ministerio præsit.

Propter

Propter has rationes, aliasque plurimas, quas inferiùs proponemus, Archidiaconorum auctoritas adeò crevit, ut minores Episcopi viderentur, suumque, quod erga omnes ministros imperium exercebant, ad ipsos Presbyteros, progressu temporis, extenderint, Presbyteri eis subjecti esse cæperint, ex eoque ordine, paucæ dignitates, institutæ ad imperium Ecclesiasticum, & jurisdictionis exercitium, sed Presbyterorum ordo retentus, ad Episcoporum Concilium, atque ab eo paulatim exclusus, jurisdictionis Ecclesiasticæ, saltem exterioris fori, minùs particeps habitus sit.

C A P. I I.

*Diaconorum in Presbyteros insurgentium
ambitus, & antiquus, & antiquis
temporibus notus.*

Diaconi veterem legem, quâ inferioris ordinis nemo, super aliquem superioris ordinis efferebatur, transilire conati sunt, & divitiarum, quas administrabant, potentiâ freti, & clientelâ ministrorum, quibus imperitabant, & Episcoporum, in quorum comitatu versabantur, amicitia & assiduo, quod illis impendebant, ministerio tumescentes, invaluerunt. Varia ejus rei testimonia proferen-

ferentur. Eorum autem audacia, à variis primùm auctoribus reprehensa, variisque decretis Ecclesiæ, ad tempus retusa, tandem consuetudine, ac postea lege probata, in legitimam potestatem & administrationem transiit.

Nycen. Syn. can. 18. Diaconorum reprimat audaciam, qui Presbyteris Eucharistiam dare, & ante Episcopos, attingere præsumebant, eosque in ordinem, hac contentione redigi voluit, *Hæc ergo omnia auferantur, & Diaconi intra suas mensuras permaneant, scientes, quod sunt quidem Episcopis ministri, Presbyteris verò minores. Accipiant autem suo ordine Eucharistiam, post Presbyteros, eis præsentem Episcopo vel Presbytero. Sed nec in medio quidem Presbyterorum, liceat Diaconis sedere; id enim fit præter canonem & ordinem. Si quis autem non vult obedire, etiam post has constitutiones, à Diaconatu desistat.*

Presbyteris subjectos Diaconos hic can. pronuntiat, Sacerdotibus scilicet ministros, in medio Presbyterorum sedere, cos vetat, vel quod medius locus dignior, ex Const. Apost. lib. 2. c. 61. Greg. Naz. in somn. de Anast. templ. Joan. Mosch. prat. Spir. c. 96. & aliis passim: nec non apud ipsos profan. ut ex Sal. in Jugur. colligis: vel certè, quod omninò Diaconos sedere in sacris, nefas esset. Stare enim jubebantur,

tur, ex const. Apost. lib. 2. c. 57. sedebant Presbyteri cum Episcopo, ex Cypr. Epist. 35. de Numid. Presb. ord. Et inter Presbyteros locum habere, Diaconi vetabantur, sed inter sui ordinis viros, ex eodem c. const. Apost. & cap. 58. ejusd. lib. Dion. c. 6. Eccl. Hier. & aliis.

Quin etiam majores in conviviiis, quæ agapæ vocabantur, partes Presbyteris, quàm Diaconis, aut aliis inferioribus ministris dabantur; earund. Constit. lib. 2. c. 28. & sportulæ majores, nisi fortè ex privilegio, v.g. designatis jam Presbyteris, æquales darentur, ut Aurelio & Celerino, apud Cypr. Epist. 34.

Porro Arelat. c. 15. & Aquisgran. c. 41. Nycen. legem renovarunt & inculcarunt. Syn. Rom. sub Sylv. 284. Episcoporum eidem consentit, dum c. 7. Pontifici Presbyterum, Presbytero Diaconum, & ita cæteros inferiores Clericos, superioribus obsequium præstare, jubet.

Arelat. 1. Conc. ante Nycen. sub. eod. Sylv. c. 18. statuit, *de Diaconis Urbicis, ut non aliquid præsumant, sed honor Presbyteris reservetur.* Urbicos præsertim reprimat iste Can. quia ii maximè, qui in civitate degabant, & in Episcopali gubernatione, Episcopum sublevabant, referentes ad eum, quid ageretur, minora judicia exercentes, introducentes ad idipsum adventantes,
Eccle-

Ecclesiasticas substantias, dispensantes, ut fusè cit. lib. Constit. integro refertur, inquam, non autem Diaconi forenses, in sacris duntaxat Presbyteris ministrantes, adversos Presbyteros intumescebant.

Laodicen. hanc legem subordinationis Clericorum, ratione ordinum sacrorum, firmat, c. 20. *Quod non oporteat Diaconum coram Presbytero sedere, sed iussione Presbyteri sedeat: similiter autem & Diaconis honor habeatur, à Subdiaconis, & omnibus Clericis.* Carthag. 4. c. 39. *Diaconus, quolibet in loco, iubente Presbytero sedeat.* Agathens. c. 56. Mart. Brachar. c. 40. Aquil' Gran. Conc. c. 77. hanc legem exscribunt.

Quam explicat. Tolet. iv. c. 39. *Nonnulli Diaconi in tantam erumpunt superviam, ut sese Presbyteris anteponant, atque in primo Choro, ipsi priorès stare præsumant, Presbyteris in secundo Choro constitutis; ergò ut sublimiores se Presbyteros agnoscant, id est, supra se Presbyteros Diaconi recognoscant, tam hi, quàm illi, in utroque consistent, id est, Presbyteri in utroque Choro priorer Diaconis, utrimque pariter sedentibus sedeant.*

Quo can. immutatus videtur antiquus ordo secundum quem Presbyteri, circa thronum Episcopalem, sellis utrumque dispositis, sedebant, ministrorum turba adstabat, quemadmodum describunt Greg. Naz. in som. de Anast. templ. & constit.

E e

Apost.

Apost. cit. Concessum autem in hoc Concilio, ut in Choro, ex utraque parte, tam Presbyteri, quàm Diaconi confisterent, sed Presbyteri priori, quàm Diaconi loco.

Carthag. Conc. prædict. hanc etiam prærogativam, Presbyteris servavit, c. 40. *Ut Diaconus, in Conventu Presbyterorum interrogatus, loquatur, id est, nonnisi interrogatus loquatur; cuius rei ratio continetur in eod. Conc. excerpto ex Nyc. & probata ab Aquisgran. Conc. Nycenum Can. exscribente, cap. 1. quod necessum sit, ut Diaconus ita se Presbyteri, ut Episcopi ministrum esse cognoscat. Ideoque Andegav. absolute decernit, c. 3. Ut Diaconi noverint, Presbyteris omni humilitate esse deferendum.*

Vetus ista videtur Diaconorum esse ambitio, quæ vetustissimis istis legibus reprimi debuerit, cuius, istis omnibus antiquior, Cypr. mentionem facit Epist. 65. ad Rogat. Episc. de superbo Diac. meminisse autem, inquit, Diaconi debent, quoniam Apostolos, id est, Episcopos & Præpositos Dominus elegit: Diaconos autem, post Ascensum Domini in Cælos, Apostoli sibi constituerunt, Episcopatus sui, & Ecclesiæ ministros. Quod si nos aliquid audere contra Deum possumus, qui Episcopos facit, possunt & contra nos audere Diaconi, à quibus fiunt.

Quæ verba, malè trahunt novatores, ad ordinem Diaconatus deprimendum, quasi divinâ

divinâ ordinatione constitutus non sit; cum non intendat negare S. Cypr. quòd institutio Diaconatus Divina sit, sed tantum, quod Christus primos ex ipsis creavit, asserens Diaconorum creationem, Apostolorum arbitrio reliquisse, ut quando creandos illos ducerent, & quos honore isto dignos arbitrarentur crearent, cum è contra, *Episcopos & Presbyteros, Christus ante suam ascensionem, & designasset, & per se ipsum creasset.*

C A P. III.

Cætera, ambitionis Diaconorum, testimonia.

FUssimè Hier. Epist. 85. ad Evagr. adversus Diaconos invehitur, qui adversus Presbyteros efferri vellent.

Ab eo primùm disce Diaconos ex eo, tumoris occasionem accepisse, i. quòd ad eorum testimonium, Presbyter ordinari soleret, *sed dicis, inquit, quomodo Romæ, ad testimonium Diaconi, Presbyter ordinatur?* Subdit autem, *quid mihi profers unius urbis consuetudinem?* II. quòd Presbyteris pauciores essent, nam paulò post subjungit, quid paucitatem, de quo ortum est supercilium, in leges Ecclesiæ vindicas? omne quod rarum est, plus appetitur. Pulegium apud Indos, pipere pretiosius est; *Dia-*

nos paucitas honorabiles, Presbyteros turba, contemptibiles facit.

Quem autem morem Ecclesiæ, carpit eo loci Hieron. is postea in Ecclesia Occidentali, usitatus esse cæpit, ut patet ex veteri ordine Romano, & Pontificali, & cap. unico, *de scrutinio in ordine faciendo*. In Ecclesia tamen Orientali, quod munus Archidiaconi, Romæ fuit, in ordinationibus, hoc munus Chorepiscoporum antiquum videtur fuisse, qui assumpto consilio Presbyterorum, & Diaconorum, ad Episcopos, de ordinandis referebant, ut patet ex Epist. Basil. Canonic. *Chorepiscop.*

Veterem autem in Ecclesia Rom. ante Hier. morem fuisse, ut Archidiaconus Antistiti, Presbyteros ordinandos præferreret, ex eo collige, quod auct. qq. ex utroque Test. apud Aug. qui quidem q. 44. annos à nativitate & passione Domini, vel certè, ab excidio Hierosolymorum, circiter 300. numerat, antiquior proinde Hier. & Aug. q. 101. adversus Rom. Ecclesiæ Diaconos declamitans, hujus moris meminert, nec eum ac Rom. Ecclesiam, ut Hier. restringat, sed ex eo, Diaconorum aliquam prælationem inferri posse, negat. Ita enim sibi objicit, *sed testimonio*, inquit, *Diaconi, sit Presbyter*, quasi istud ad prærogativam pertineat magnitudinis, legimus enim, *ad plebem dixisse Petrum Apost. elizite*, inquit

quit, ex vobis, quos constituamus, deservire mysteriis Ecclesiæ: & paulò post, ita & testis potest esse creandi Presbyteri.

Neque verò aded multò post Hier. obitum, Isid. Pelus. satis ostendit, quanta esset Archidiaconorum in Oriente potestas, in ordinationibus, dum Lucium, Pelusii Archidiaconum, accusat, quòd, Episcopo ipsi morem gerente, nummos ex ordinationibus corraderet, sibi que aggereret, lib. 1. Epist. 29. & lib. 4. Epist. 118. eid. Luc. in Conc. quoque Chalced. Act. 10. in libello Samuelis, & aliorum Presbyterorum, adversus Ibam, oblato Concilio, legimus, prohibitum ab Archidiacono Episcopum, ne indignum ordinaret; verba libelli hæc sunt, *Post hoc nescimus, quomodo persuasus satisfactione, ab eo nullatenus proveniente, tentavit eum, Batenorum civitatis ordinare Episcopum, & prohibitus est ab eo, qui tunc Archidiaconus erat, & indignatus est.*

Quæ narratio, quantum auctoritatis habuerit, in Episcoporum ordinatione, Archidiaconorum testimonium, in Ecclesia Orientali, nemo non videt.

Respondet etiam Balsamon, ad interrogationem 40. Marci Alexandr. *Utrum Diaconi, præter Archidiaconorum voluntatem, Sacerdotali gratiam possunt consequi, an non?* quæ habetur, lib. 5. jur. Græco-Rom. respond. inquam, *Episcopis ordinatio-*

num potestatem, attributam esse, oporteret itaque, inquit, ut ipsorum consensu, Diaconi sacrarentur Archidiacono tanquam fratre, solum præsentem, seu testimonio suo suffragante.

Disce præterea ab Hier. loc. cit. jam tum cæpisse, in Ecclesia Rom. Diaconos adversus Presbyteros efferri, ita ut adversus Presbyteros, absente Episcopo, sedere vellent, & in conviviiis coram Presbyteris, benedictionem darent, ut legit Gratian. in veterib. edit. d. 93. c. *legim.* seu, quod eodem recidit, *benedictiones dantes*, omnium *convivantium nomine*, consequenter Presbyteris *benedicere viderentur*, ut fert lectio vulgata Epist. Hier. Cæterum, ait ille, etiam in Ecclesia Romæ Presbyteri sedent, & stant Diaconi: licet paulatim increbrescentibus vitiis, inter Presbyteros, absente Episcopo, sedere Diaconum viderim, & in domesticis conviviiis, Presbyteris benedictiones dare.

Hanc autem præsumptionem, iis verbis castigat idem S. Doct. Epist. cit. *Discant, qui hoc faciunt, non se rectè facere & audiant Apostolos (Act. 6.) non est dignum, ut relinquentes verbum Dei, ministremus mensis: sciant, quare Diaconi constituti sunt, legant acta Apostolorum, recordentur conditionis suæ Presbyter & Episcopus, aliud ætatis, aliud dignitatis est nomen: unde & ad Tit. (1. cap.) Et ad Tim. (Epist. 1. c. 3.). de ordinatione Episcopi,*

Episcopi, & Diaconi dicitur, de Presbyteris omninò reticetur, quia in Episcopo & Presbyter continetur. Qui provehitur, de minori ad majus provehitur. Aut igitur ex Presbytero ordinetur Diaconus, ut Presbyter minor Diacono comprobetur, in quem crescit; aut si ex Diacono ordinatur Presbyter noverit se lucris majorem, Sacerdotio esse minorem. Et ut sciamus, traditiones Apostolicas, sumptas de veteri Testam. quod Aaron & filii ejus, atque Levitæ in templo fuerunt, hoc sibi Episcopi, & Presbyteri vindicent in Ecclesia.

Prætermitto explicationem rationum Hieronymianarum, quæ satis seipsas produnt, vel ex prædictis intelliguntur. Ultimum istud annoto, jam tum Diaconos, contra veterem Ecclesiæ morem, Sacerdotibus, lucris majores fuisse, & sportulas majores habuisse.

C A P. IV.

Auctoris qq. ex V. & N. T. testimonium, ubi varia, circa reverentiam, singulis ordinibus exhibitam, observantur.

AUCTOR laudatus qq. ex V. & N. T. q. 101. cit. plura disputat, adversus Diaconorum insolentiam, suo tempore invalenscens.

lescentem , præsertim in Ecclesia Rom. Falcidii cujusdam scriptum , quo Diaconi Presbyteris quodammodo coæquabantur , vel etiam præverebantur , exagitat , iisdem ferè rationibus , quibus Hier. quas repetere superfluum foret : ad illustrationem verò præsentis quæst. hæc annotasse sufficiat.

I. Ne quidem Romæ suo tempore , Diaconos sedendi inter Presbyteros , imò nec sedendi omninò in Ecclesia (qui honor ipsis , absente Episcopo , in Laodic. aliisque cit. Conc. tributus est) morem habuisse , *Quamquam , inquit , Rom. Ecclesiæ modicè inverecondiores videantur , sedendi tamen dignitatem in Ecclesia non præsumunt.*

Alterum Diaconos istos potissimum videri , hanc æqualitatem affectasse , non eos , qui ministrarent in altari , sed qui Ecclesiasticarum rerum procuratori , vel regimini invigilarent , qui idèd ministerio altaris , operam navare , non jubebantur , ait enim , *ut autem omnia ministeria obsequiorum , per ordinem agant ; multitudo , facit Clericorum ; nam utique & altare portarent , & vasa ejus , & aquam in manus funderent Sacerdoti , sicut videmus per omnes Ecclesias , & sicut constitutum est à Domino per Moysen , aut nunquid meliores sunt Heliseo , qui aquam fundebat , in manus Eliæ.*

III. Hu-

III. Hujus etiam ambitus notari præfertim, Ecclesiæ Rom. Diaconos, qui & Roman. Presbyteris coæquari aliquantum contenderent, licet tamen in Ecclesia, sedentibus Presbyteris, ut supra vidimus adstarent; sed & aliarum civitatum Presbyteris, sublimiorem locum, vel parem ambirent, subdit enim paulò post, *sed quia Rom. Ecclesiæ ministri sunt, ideo honorabiliores putantur, quàm apud Cæteros Ecclesias, propter magnificentiam urbis Romanæ, quæ caput esse videtur omnium civitatum.*

Probat autem, si ex Rom. Ecclesiæ dignitate, habent Diaconi, quod sublimentur, habituros potiori ratione Presbyteros, ut & sublimiores evadant, *si itaque sic est hoc, debent, inquit, & Sacerdotibus suis vindicare, quia si ii, qui inferiores sunt, crescunt, propter magnificentiam civitatis, quanto magis, qui potiores, sublimandi sunt, quicquid enim officialibus præstat, augmentum fit potestati, sicut honor servi, ad laudem proficit Domini.* Negat etiam, ex eo, quòd nobilioris Ecclesiæ sunt Diaconi, Presbyteris alterius Ecclesiæ, debere præferri, eò quòd, *apud justum judicem Deum, unicuique hic honor maneat, qui decretus est singulis Ecclesiarum officiis, ut qui Diaconus est, Diaconi honorem, per omnes Ecclesias habeat.* Item quia major ordo, intra se, minorem habet.

Ad hanc sententiam arrigunt aures quidam Ecclesiæ Rom. infensi, & ejusdem Ecclesiæ Cardinalibus obloquendi, occasionem sumunt; eumque Canonem, quem in tota jam Ecclesia usitatum, nec sine ratione immutatum, putant, ut ab officio potius, & dignitate, Ecclesiasticis sedendi prærogativa, quæ ab ordine sumatur, eum, inquam, in sola Rom. Ecclesia, cui honoris Ecclesiastici fastigium, & capitis dignitatem, auctor cit. non abnuat, canino dente arrodunt.

I v. Profert idem auctor inter cæteras, rationem, ad referendam Presbyterorum prærogativam supra Diaconos, quæ morem istius sæculi non contemnendum continet, Episcopum nempe, Presbyteros, confacerdotes, Diaconos non fuisse solitum, condiaconos dicere, denique, inquit, *non aliter, quàm Confacerdotes hîc vocat, & Confacerdotes suos: nunquid & ministros, condiaconos suos, dixit Episcopus? non utique; quia multo inferiores sunt.* Et id in Ecclesia, ut plurimum, usitatum credo, quemadmodum, & quoddam fratres vocarent Presbyteros, Diaconos filios; nam v. g. Ignat. Epist. 13. Heronem Diaconum, *filium* salutatur, Presbyteros, *fratres* vocat. Aug. Hieronymum Presbyterum, litteris omnibus ad eum scriptis, *fratrem*, & *Compresbyterum* appellat; Pres-

fidium Presbyt. Epist. 16. *fratrem*, & *consecratem*; cæteris similibus elogiis donat. Cyprian. Diaconum, filium appellat, Epist. 10. & 15. quam loquendi rationem, in aliis passim observat.

Eandem S. Leo religiosè sectatur, v. g. Epist. 10. 12. 15. 18. 19. Jul. Coenssem Episc. & Renatum Presbyterum, vocat *fratres*; Hilar. Diac. *Filium*; Flavianian. & cæteros Episcopos, semper *fratres* nominat; Epist. 11. & 20 Basil. Diac. *filium* nuncupat.

Religiosè etiam id servasse videntur, varii Scriptores Epistolarum, quæ Epistolis Ruricii præfiguntur, tom. 2. Bibl. PP. Itemque Ruricus ipse, in Epistolis ad varios scriptis; nam v. g. Faust. Epist. 7. ad Ruric. *filios* & *Diaconos* suos, in ordine Diaconali positos vocat: idem Faust. Epist. 8. Memorium Presbyterum; Cæsarius Epist. 18. Capillutium item Presbyterum; Sedatus alium quoque Presbyterum, Epist. 19. *fratris* nomine donant: semel duntaxat iis Epistolis, Turent. Episcopus, Epist. 12. Ruricio scribens, Rusticum Presbyterum, *filium communem sui*, & Ruricii nominat, ut ita Ruricio honorem deferret; Ruricius verò, lib. 2. Epist. 13. Presbyterum *fratrem* vocat. Ejusdem verò lib. Epist. 8. & 39. & 55. *fratrem* & *compresbyterum*; quin etiam lib. 2. Epist. 10. miratos fuisse, qui Sacerdotalis gradus non essent, si fra-

tres ab Episcopis vocarentur, satis indicat, dum ait, *Relictis litteris meis, fortassè miraberis, quod venerationi tuæ fratri scripserim, cum hoc nec ætati nostræ conveniat, nec honori, quia sicut me major es natu, minor es gradu.*

Rationem autem consilii sui subdit, fratrem illum vocasse, dicens, propter studium perfectionis, quod amplecteretur: fusiùs in iis morari nolim, si monuerim, ab hac aliquando regula deflexisse sanctissimos Præsules; nam v.g. Naz. epist. ad Cæsariens. nomine patris scripta, quæ 23. inter ejus epistolas legitur, Bas. Presbyterum vocat *filium*. Idem quoque Naz. Epist. 126. Aster. Georgium Diacon. *fratrem & Con- diaconum*, seu comministrum, & Epist. 159. Amphil. & 182. Georg. Euthalium *Con- diaconum*, appellat. Greg. quoque Mag. Rom. Ecclesiæ Diaconos, filios quidem sæpè nuncupat, v.g. Epist. 59. lib. 1. indict. 9. & lib. 2. Epist. 34. 58. & 66. indict. 11. lib. 4. Epist. 72. & 30. indict. 13. & lib. 5. Epist. 27. 55. 57. 58. 59. 60. & alibi.

Nihilominùs communes *filios* nominat, Georg. Presbyterum, & Theodor. Diaconum, lib. 6. Epist. 4. indict. 15. Candidum Presbyterum, *communem filium*, Epist. 53. & 54. lib. 5. indict. 13. quod tamen fortè honori alterius Antistitis dedit. Sidon.

Sidon. quoque Apollinaris, Donidium (si tamen Presbyter fuit, quem Clericum Arvernum fuisse, constat) lib. 3. Epist. 5. *etate fratrem, professione filium vocat.*

Evolve, si lubet, passim aliorum scripta, & exempla præscriptæ denominationis cōquire, nos huic rei vacare, non convenit, sed hanc disputationem, observatione breviori concludimus, & *fratris & filii* nomina, amicitiae aliquando fuisse; *fratris* verò potius, reverentiæ causâ, nomen impositum fuisse, quàm *filii*. Eo siquidem nomine, viri illustres, ab Imperatoribus honorabantur; cujus rei fidem faciunt, Theodos. novell. *de Tyron. nov. de Lampadar. nov. de Principibus agentibus in rebus, de ambitu, & loc. limitatis, de metat. de Patrimonial.* & aliis; Majorian. nov. *de bon. caduc.* Constant in. Epist. ad Porphy. hoc nomine viros illustres afficientes: sed clariùs Cassiodor. lib. 6. Epist. 21. *additur, quod à Principe frater vocaris*, loquens de Rectore Provinciæ. Sed hæc obiter notata sunt.

v. Proposito magis consentaneū, ex eod. auct. qq. v. & N. T. observandum est, Diaconos, aliqua Sacerdotalis officii propria munia, sibi arrogasse: *Nunc enim, inquit, videmus Diaconos temerè, quod Sacerdottum est, agere, per convivia, & in oratione id velle, ut respondeatur illis, cum illud solis*

liceat Sacerdotibus , Diaconi ergò ordo est , suscipere à Sacerdote , & sic dare plebi , vides , quid pariat vana præsumptio.

Ambigua hæc sunt, variaque significant: fortè, quòd sibi, Corpus Christi erogandi potestatem, concedi vellent, & sibi responderi, *Amen*, à communicantibus, ex antiqua formula; fortè, quòd benedictiones publicas vellent super populum fundere, eisque istâ salutatione, *Dominus vobiscum*, benè precari, ita ut responderet populus, & cum spiritu tuo, quod solis Presbyteris, tunc esset proprium; fortè quòd orationes publicas vellent dicere, & sibi populum respondere. Certè quicquid illud sit, in signum auctoritatis majoris, quam tunc temporis convenire, arrogare sibi aliquid volebant, quod auctor iste acriter reprehendit.

Cætera omitto, quæ ad antiquitatis Ecclesiasticæ illustrationem, minùs faciunt. Ex iis porrò innotescit; à multo tempore, Diaconos conatos fuisse, sese Presbyteris præferre, & quibusdam gradibus, ad hanc dignitatem, ad quam aliqui, ex ipsorum ordine provecti sunt, ascendisse. Neque verò tot decretis Conciliorum, eadem Diaconorum ambitio, omninò coërceri potuit, quin variis temporibus repullulasset.

CAP. V.

Decretum Quinisextæ Synodi, quo Diaconorum ambitio reprimitur.

AD eam reprimendam, Quinisexta Syn. in Trullo, can. istum 7. edidit, quoniam in nonnullis Ecclesiis, Diaconos officia Ecclesiastica habere didicimus, & ex hoc nonnullos eorum, arrogantia & licentia fretos, ante Presbyteros sedere, statuimus, ut Diaconus, etiamsi in dignitate, id est, in quovis sit Ecclesiastico officio, ante Presbyterum ne sedeat; præterquam si proprii Patriarchæ, vel Metropolitanæ vicem gerens, adsit, in alia civitate, super aliquo capite, tunc enim ut locum illius implens honorabitur.

Nota exceptionem à Syn. Trull. appositam, ut Diaconi præferri possint, superiorum ordinum viris, si in aliam civitatem, vel à Patriarcha, vel à Metropolitano mittantur, ut vicem illius gerant, nam in propria civitate vicem Episcopi Metropolitanæ, aut Patriarchæ, minimè Diaconus gerere potest, sed Presbyter, Episcopus verò, Legatos, in alias civitates, in quibus alii præsideant Episcopi, mittendi, qui vicem suam teneant, consuetudinem non habebat, atque ita jure merito Metropolitanæ, vel Patriarchæ Legatos, excipit Synodus, qui, quamvis in ordine tantum sint Diacon-

Diaconatus, tamen cæteris præferuntur, dum Patriarchæ, vel Metropolitanis vice, jurisdictionem exercent.

Sic enim v. g. legimus, Cyprian. Diaconum, in varias civitates, à Gregor. missum, cum auctoritate, lib. 4. indict. 13. Epist. 22. 27. 28. lib. 1. indict. seq. Epist. 13. & 20. lib. 6. indict. 15. Epist. 19. 38. & 41. Castorium Diacon. Epist. 24. ejusd. lib. Sabin. lib. 7. indict. 2. Epist. 46. & alios; imò & Sub-diaconos quosdam missos legimus, quos omnes Rom. Pontificis locum tenentes, etiam in Episcopos inquisivisse, & imperium exeruisse, ex iisdem Epist. colligimus, nec dubitamus, quin eo titulo, iisdem etiam præferrentur, sed hæc alterius sunt instituti.

Ad hanc exceptionem spectat, quòd Diaconi, ac Presbyteri, missi à Patriarchis, Metropolitanis, Episcopis, nomine eorum, à quibus mittebantur, etiam ante alios Episcopos subscripsisse legantur, in variis Conciliis, v. g. Ephesino, Chalcedon. aliisque: quod licet graviter tulerit, Emeritenf. Episcopus in Hisp. can. 5. prohibens, Diaconos ab Episcopis, ad Concilia, Episcoporum nomine mitti, ne in contemptum Presbyterorum, cum Episcopis sedere viderentur, tamen hoc decretum, vim in Hisp. ipsa non obtinuit, sed mox contrariò usu abrogatum est, ut super. docuimus,

De Prærogativa honoris, &c. 63
cuimus , probantes , Hierarchicam Diaconorum in Ecclesia auctoritatem.

C A P. V I.

Decretum Alexii Comneni, & Balsamonis testimonium, & variae observationes , circa morem Græcorum.

Similiter nec Syn. Trullana , huic controversiæ , finem imposuit , nam constitutionem Alexii Comneni , refert Balsam. in can. 18. Nicænum , cujus meminit in can. 17. Trullan. quâ ambiguum , ut refert eadem constitutio , privilegium Carthophylacis firmatur , ut qui hac dignitate ornatus esset , licet ex Diaconorum ordine , tamen in congregationibus , præterquàm in divino altari , ante Presbyteros , imò & Episcopos federet. Eiusdem contentionis meminit , in medit. de offic. defens. & Chartul. ex quibus hæc præcipuè notanda sunt.

1. Hanc pervulgatam quæst. multa diversis temporibus excitasse scandala , varièque disceptatam fuisse , inter Chartularium , & Pontifices solii Constantinopolitani. Alterum Patriarchale Concilium Pontificibus favisse. III. Alexium Comnen. eo tempore , pro Chartulario pronuntiasse , solo consuetudinis prætextu , & canonum distor-

distortione. **I V.** Occidentales Episcopos, huic præsertim edicto renitentes, jussos ab Alexio, in suas Ecclesias proficisci, ex ead. Constit. qualis refertur ab ipso, in can. 18. Nyc. **V.** Longam consuetudinem, Principis edicto stabilitam, viguisse, ita ut Chartularius, quibuscumque Episcopis, etiam *superhonorati, & Protosyncelli dignitatem* habentibus, præponeretur.

VI. Non probari à Balsam. quòd solâ consuetudine, adversus canones, prima ista sessio Chartulario deferretur, quippe cum consuetudo, etiam in judicio probata, & examinata, valere non debeat adversus Canones, cui in ea re favent, lex 34. digest. de legib. & lex 3. cod. *quæ sit longa consuet.* **VII.** Conari Balsamonem Canonum auctoritatem eludere, Nic. quidem, quasi prima sessio, Diaconis tantum in altari prohibita sit, isto can. Trull. verò, quia cum Chartularius, Patriarchæ os censeretur, ejus vicem gerebat; rationi autem consentaneum esse, ut qui alicujus personam sustinent, ejus loco sedeant, & insignia gestent.

VIII. Cardinalium exemplo id probare, qui pileis aureis ornarentur, veluti Papæ personam repræsentantes, ejusque jura fulciantes: prioris verò sessionis Cardinalium, ante Episcopos, non meminit, fortè quòd nondum usitata esset, sed invec̃ta
postea

postea fuerit, ne Cardinales Rom. Ecclesiæ, minus honoris haberent, quàm Ecclesiæ Constantinop. officiales; omnes enim præcipuæ dignitates in Ecclesia Constantinop. quas *ἐξωκατάκλιπες* vocant, Balsam. cit. medit. Joan. Episc. Citri, ad Constantin. Cabasil. resp. ad interrogat. 8. Cedin. de offic. c. 9. n. 4. auct. actor. Conc. Florent. & alii; omnes, inquam, illi videntur in Syn. Patriarchali, etiam Episcopis Prælati.

I. Enim, si hæc Prærogativa Carthophylaci collata est, qui à sup. laudatis, Balsam. Citr. Codin. 4. etiam loco post magnum œconomum, magnum Sacellarium, & magnum Schenophylacem numeratur, probabile non est, eum, qui ab istis dignitatibus præcedebatur, Episcopis priorem locum obtinuisse, quin & ipsi saltem obtinuerint. II. Quia de omnibus exocatacœlis, ait. Codin. c. I. *isti sedent in S. Synodo, cum Patriarcha*. Nihilominus in Syn. Oecumenica Florent. videntur post Episcopos sedisse. Idem tamen, pari cum Episcopis honore affecti, in salutatione Papæ referuntur, quibuscum nempe Episcopi Papæ sedentis dexteram, atque genam dicuntur osculati.

Illi porrò Exocatacœli, è Diaconorum ordine erant, quamvis olim Sacerdotes fuerint, nam si credimus eidem Codino c.

I 9. n!

9. n. 4. olim ipsi Sacerdotes erant, sub se habentes Clerum, & Ecclesias gubernantes, sed quia festis, & illustribus diebus, in propriis Ecclesiis, occupari eos contingebat, Patriarcha quidem, ne honoratioribus destitueretur ministris, eos ex Diaconorum ordine esse voluit; idcirco Exocatacelos ipsos, vocat Cabas. *Diaconos habentes principalia Ecclesiastica officia.* Hæc maxima, Diaconorum ordinis, pro vectio fuit, ex quo tantæ dignitatis, & excellentiæ ministri assumpti, qui etiam Episcopis præirent.

C A P. VII.

De Prærogativa S. R. E. Cardinalium.

Eorum exemplo, videtur S. R. E. Cardinalibus, etiam ante Episcopos, ordo sedendi, ac procedendi attributus, quem Eugen. IV. in Bull. *non mediocr.* mag. Henr. Archi-Episc. Cantuar. n. III. antiquis conc. generalibus, præsertim in duobus Lugdun. in uno præsidente Greg. IV. in altero, Greg. X. usitatum fuisse testatur: Item in Anglia dilatum à multo tempore fuisse, contendit, adversus eundem Henric. cedere nolentem, Witonienfi Episc. ad hanc dignatam promotum: ante tempora verò Concilior. Lugdun. vix apparet,

paret, in ullis Conciliis, Cardinalibus, præterquam legatis sedis Apost. quibus semper hic honor, ante Patriarchas ipsos, habitus est, priori loco sedendi, privilegium, fuisse concessum.

Hoc verò exemplo, ordinum sacrorum Hierarchia, minùs turbata est, quàm apud Græcos, qui priores dignitates Ecclesiæ Constantinop. Diaconis addixerunt, cùm justior multò Rom. Ecclesiæ mos hic fuerit, ut cum summo Pontifice, Cardinales Episcopi, prioribus locis sederent, hos sequerentur Presbyteri, infra quos, Diaconi Cardinales, *ita ut*, inquit prædicta Bulla Eugen. *in hac Rom. Ecclesia, tres constituerentur ordines, assistentium Papæ, qui purgantium, illuminantium, & perficientium, fungerentur officio, veluti sunt Diaconi, Presbyteri, & Episcopi Cardinales.*

Quodd autem ii tres ordines, cæteris postea reliquarum Ecclesiarum Episcopis, Presbyteris, Diaconis prælati fuerint, factum, in honorem Romanæ Ecclesiæ, quæ cùm cæteris, tanquam Hierarchia quædam Ecclesiis antistat, cæteris ordinibus reliquarum Ecclesiarum, etiam prælata est.

Quodd secundum ordinem, qui jam in Ecclesia servatur, ut officium ac dignitas, siue jurisdictio, præponderet ordini, ratione cujus Archidiaconus, præfertur Archipresbytero, & electus Episcopus, quam-

quamvis in inferioribus ordinibus, Presbyteris quibuscumque, grave aut molestum cuiquam esse non posse, monet Eugen. prædict. num. 13. *Cardinales Episcopis præferri, qui Rom. Pontifici assistentes, etiam de Episcopis cum eo judicant, & universæ Ecclesiæ bono satagendo præficiuntur.*

Hæc ratio olim cessabat, nam nec Presbytero in Episcopos, nec Diacono in Presbyteros, ordinaria jurisdictio concedebatur; ideoque nec ratione jurisditionis, Presbyter Episcopo, Presbytero Diaconus, præferri ambiebat, qui ordine inferior esset. Verum, quoniam in Presbyteros, progressu temporis, & longâ Ecclesiæ consuetudine, Diaconi tandem, imperium & jurisditionem consecuti sunt, quomodo id factum fuerit, breviter à nobis, seq. quæst. explicandum est.

QUÆSTIO XV.

Quomodo Diaconorum auctoritas, & jurisdictio, progressu temporis, ad Clericos superiorum ordinum, extensa fuerit.

C A P.

CAPUT. I.

Diaconos olim, in solos Diaconos, & inferiores ministros potestatem habuisse, iisque praelatos fuisse.

QUicumque olim, ex ordine Diaconorum, dignitate aliquâ eminebant, in solos ordinis sui Diaconos, vel inferiorum ordinum ministros imperium Ecclesiasticum exercebant. Constitut. Apost. lib. 8. c. 28. non in Presbyteros, sed in inferioris ordinis ministros, extensam fuisse eorum potestatem, demonstrant iis verbis, *Diaconus excommunicat Hypodiaconum, Lectorem, & Cantorem, & Diaconissam, si hoc facere opus sit, absente Presbytero.* Dion. Epist. ad Demoph. cit. Episcopos ab Episcopis, Presbyteros à Presbyteris, non autem à Diaconis, corrigi posse, expressè asserit. Ignat. Epist. pluribus, ex quibus aliqua super. citavimus, Episcopis Presbyteros, Presbyteris Diaconos, Diaconis, nonnisi inferioris gradus Clericos paruisse, testatur.

Synod. Rom. ejusdem vestigiis insistens, sub Silvest. c. 7. apud Gratian. dist. 93. c. à subdiacon. Burchard. lib. 2. c. 224. Ivon. p. 6. c. 299. Anselm. lib. 7. c. 66. jussit, ut à Subdiacono usque ad lectorem, omnes subdi-

ti sint, Diacono Cardinali urbis Romæ. Isid. Pelus. l. I. epist. 29. & lib. 4 epist. 188. Archidiaconi commendat potestatem, quòd Dei permisso, Diaconis præesset, sic enim utrobique, vix unâ Syllabâ mutatâ, rescribit, oculi sunt Episcopi, venerandi altaris Diaconi; tu verò, cùm horum his permissione divinâ, princeps, totus oculus esse debes. Idèd Archidiaconus dictus, non tam, quod Diaconus princeps, quàm quòd princeps Diaconorum, cæterorumque sub eis constitutorum ministro- rum, esset.

Theodor. lib. I. Eccl. Hist. c. 26. Athanas. Alexandr. Ecclesiæ Archidiaconum, *Choro Diaconorum præsentem* vocat scilicet, quia eorum collegio præficiebatur. Can. etiam Nicæn. 57. ex Arabicis translatus, hanc Diaconorum in Diaconos, singularem potestatem, nobis ob oculos ponit, iis verbis, *in omnibus verò, quæ ad Diaconos spectant, quibus præest Archidiaconus, sive quid inimicitia, aut peccati, aut litis, inter eos ortum fuerit, aut aliud quid, quod ad iudicium ejus, necessario pertineat, nihil referat Archidiaconus ad Episcopum, sed ipse potius eorum controversias dirimat, si quidem sub potestate ejus sunt Diaconi.*

Leguntur innumera veteris ævi exempla, potestatis Diaconorum in fideles & ministros; nullum eorum potestatis in Presbyteros, sed tantum in graduum inferiorum viros

viros ac populos animadvertimus: ideoque rectè de suo tempore loquens, docuit Petr. Blesens. Epist. 123. Richard. Londonin. Episc. quo quidem Archidiaconus, ex ordine Diaconorum esse debebat, sui temporis morem, à veteri consuetudine longè discrepare docet, *nam, inquit, dignitatis turbato ordine, Archidiaconihodie, Sacerdotibus præminent, & in eos vim, & potestatem suæ jurisdictionis exercent, ea propter Archidiaconum, in Presbyterum promaveri, non est honorem ejus augeri, sed minui.* Et paulò post, *si diligentius attendatur Archidiaconorum præ eminentia, & depressio simplicium Sacerdotum, quædam degradationis species est, in Archidiaconis, ista promotio.*

C A P. II.

Ordo Prælationis Archidiaconorum, supra Presbyteros, in Gallia.

Viguisse videtur ista Ecclesiæ praxis, saltem usque ad V. sæculum, quo sæculo in Gallia, sicut & in aliis deinceps provinciis, Archidiaconorum dignitas, supra Presbyteros, accrevisse videtur, ita ut Presbyteros judicarent, vel saltem in eos inquirerent, eorum crimina deferrent, Episcopalibus judiciis sisterent, & sententiam in eos latam, executioni demandari curarent, atque aliqua etiam imperarent, quæ ad officium Ecclesiasticum pertinerent.

Conc. Agathens. habitum ann. 506. c. 20. *Clericos, qui comam nutriunt, ab Archidiacono, etiamsi noluerint, invitos detonderi præcipit.* Utrum Clericorum nomine indefinito, etiam Presbyteri intelligantur, incertum est, ego non intelligendos arbitror. Archidiaconum Ecclesiæ ordinationi præponi, idem Conc. docet c. 23. quod ad commendationem ipsius officii valet, non ad præfecturam supra Presbyteros ostendendam.

A quo tempore, conscripti sint Nyceni Canones Arabici, incertum est, videntur certè antiqui, sed non à tempore conc. Nyc. absque ullo additamento, vel immutatione permanisse: ex istis verò Canon. 57. & 58. Archidiacono, etiam ante Chorepiscopum, & cæteros Presbyteros, ac Diaconos, sedendi prærogativam, & consentaneè Agath. constitutioni, universæ ordinationi Ecclesiæ, præsidendi potestatem tribuunt.

Vir Clarissimus Joan. Savaro, notis in Epist. 11. & 25. lib. 4. Sidon. Apollinar. putat, Archidiaconos Presbyteros, & secundi ordinis Sacerdotes, à Sidon. dictos fuisse. Neutrum meo iudicio, sufficienter probat. Nam nec diu postea Archidiaconos solitos Presbyteros consecrari, sed statim atque ordinarentur Presbyteri, dignitate Archidiaconali excidisse, patet exemplo,
tum

tum Ætii Diaconi, quem eodem ferè tempore, quo Sidon. floruit, S. Leo Epist. 56. 57. 58. queritur, ab Anatol. Præsbyterum factum, ut Archidiaconatus munere privaretur, tum Honorati, Salonitan. Archidiaconi, quem S. Greg. integro post Sidon. sæculo, similiter queritur, Epist. 10. & 20. lib. 2. ind. 10. aliisque pluribus, ordinatum Præsbyterum, ut ab isto officio dejiceretur.

Tum ex ipso Sidon. qui de Joan. Cabilon. electo Episcopo, ait, *eum multum retentum, in Diaconi gradum, propter industriam, diu dignitate non potuisse augeri, ne potestate posset absolvi*, lib. 4. Epist. 25. cit. Unde cum subjungit, *attamen hunc jam secundæ ordinis Sacerdotem*, electum fuisse in Episcopum, ostendit, diu quidem ipsum, in Archidiaconatus munere mansisse, ne per ordinationem ad Sacerdotium, à potestate Archidiaconi absolveretur, tandem tamen in Sacerdotem ordinatum fuisse, & à potestate ac cura Archidiaconi, simul liberatum cum in Episcopum electus est, non autem, ut contendit Savar. simul & Præsbyterum; & Archidiaconum fuisse. Nam si hæc, ex consuetudine Ecclesiæ, consistere potuissent, non opus fuisset tantopere differri, ordinationem ejus in Præsbyterum, quatenus in officio Archidiaconi permaneret.

I. Itaq; Argumentum Savaron. in ipsum retorqueri potest, ut probetur, Archidiaconos nullos Presbyteros fuisse, aut secundi ordinis Sacerdotes, sed defuisse esse Archidiaconos, cùm secundi ordinis essent consecrati.

II. Similiter, ejus Argum. nullius est ponderis, neque enim Claudianum Mammerc. S. Mammerci Vienn. fratrem, Archidiaconum fuisse, credimus, sed Presbyterum, quod utique testantur, Gennad. in catal. c. 83. & S. Ado Vienn. in Chron. Presbyterum autem eum fuisse, cæteris prælatum & præpositum, seu, ut loquitur Sidon. Epist. II. cit. *Fratri Episcopi consiliarium in judiciis, vicarium in Ecclesiis, procuratorem in negotiis*, de quo proinde in carm. paulò post rectè cecinit.

*Antistes fuit ordine in secundo,
Fratrem fasce levans Episcopali.*

III. Autem ejus Argum. ex eo petitur, quod S. Justus, quem S. Gregor. Turon. lib. I. Hist. c. 45. & Chartelacei codices, Illidian. Cœnobii, Archidiaconum S. Hilidii, Arvernens. Episc. fuisse, testantur, nominetur Episcopus, in area marmorea, cum hoc tit. *ibi requiescit S. Iustus, Arvernæ urbis Episcopus*: unde infert, etiam Archidiaconos, utpote Presbyteros, Episcopi nomine, donatos fuisse.

Valeret utique hoc Argum. si non recens,

cens, sed antiqua arca marmorea, si non ab imperito, ut suspicari fas est, titulus iste insculptus foret. Sed quia in eo tit. errati suspicio, non mediocris, ex dictis suboriri potest, ideò nullatenus inscriptione moveor.

Quamvis, ut ingenuè fatear, malletm eum, quòd Episcopi adjutor fuisset, Episcopum ideò dictum (quemadmodum Chorepiscopum olim Archidiaconum, Sigebo. in Chron. ubi de Damas. Pap. admisit) quàm Archidiaconum Presbyterum, aut secundi ordinis Sacerdotem, admittere Nec repugnat, eum primò Hillid. Episc. Archidiaconum, postea Presbyterum adjutorem, aut Chorepiscopum fuisse. Constat autem ex iis, quæ de Ætio, & Honorato Archidiaconis diximus, jam tum Archidiaconi potestatem, tantam fuisse existimatam, ut per promotionem ad Presbyterorum ordinem, *degradari quodammodo*, ut ait Greg. *Diaconus videretur*. Constat etiam ex iis, quæ ex Sidon. Cabilon. Archid. protulimus, Archidiaconum potestatem majorem, & sollicitudinem ampliorem Presbytero, habuisse, sed dignitatem majorem Presbyterorum fuisse.

Conc. Aurelian. 4. ann. 541. sub Childerb. Rege, can. 26. Clericos ab Archidiacono corrigi præcipit, jubet enim, ut *si quæ parochiæ, in potentum domibus constitutæ sunt,*

ubi observantes Clerici, ab Archidiacono civitatis admoniti, secundum qualitatem ordinis sui, fortasse quod Ecclesiae debent, sub specie domini, minus implere neglexerint, corrigantur, secundum Ecclesiasticam disciplinam, & si ab agentibus, vel ab ipsis rei dominis, de agendo officio Ecclesiae, in aliquo prohibentur, auctores nequitiae, à sacris ceremoniis arceantur, donec subsēcuta emendatione, in pace Ecclesiastica revocentur. Potestatem eo can. Archidiaconorum in Clericos indefinitè animadverto: sed nondum apertè video, eandem ad Presbyteros, nisi fortè ad eosdem inquirendos, & Episcopo deferendos, potestatem ipsis collatam fuisse.

C A P. III.

Magis praeſtantia argum. in favorem Archidiaconorum.

FOrtior utique, ex Conc. Antissiodor. habito ann. 578 ab Amachar. Episc. regnante Chilperico, Francor. Rege in favorem Archidiaconorum probatio ducitur. I. enim can. 20. statuitur, quòd si Presbyter, quod nefas est dicere, aut Diaconus, aut subdiaconus post acceptam benedictionem, infantes procreaverit, aut adulterium commiserit, & Archipresbyter (de vicano loquitur, non de civitatenſi) hoc Episcopo, aut Archidiacono non in-

innotuerit, si scit, integro anno non communicet: illi vero, qui hoc commiserint, deponantur.

Quo quidem can. non solum inferiorum Clericorum delinquentium, verum etiam Presbyterorum nomina, ad Archidiaconum, vel ad Episcopum deferri, usitatum constat, & vicinis Archipresbyteris, superiores Archidiaconos existimatos fuisse, apud quos nempe Presbyteros accusarent. Deinde can. 43. decernitur, ut *quicumque iudex, aut secularis, Presbytero aut Diacono, aut cuilibet de clero, aut de junioribus, absque voluntate Episcopi, aut Archidiaconi vel Archipresbyteri, injuriam inferre praesumpserit, anno, ab omnium Christianorum consortio, habeatur extraneus.*

Duo enim circa hunc can. observo, 1. Archidiaconum, ante Presbyterum, tanquam digniorem, numerari: alterum, supponi poenam aliquam, per saecularem infligi potuisse Presbyteris, aliisque inferioribus Clericis, ex voluntate Episcopi, Archidiaconi, vel Archipresbyteri, quod ultimum arguit, potestatem Archidiaconorum jam tum in Presbyteros ipsos viguisse; saltemque illis mandari solitum, ut latam ab Episcopo sententiam executioni demandaricurarent.

Quemadmodum in Monasteriis, Cabilon. 1. Conc. can. 11. satis indicat, etiam Archipresbyteris potestatem fuisse, ut ju-

dicēs Laicos , ad infligendam Monacho damnato poenam, ad monasteria ipsa advocarent. in eod. verò Cabil. I. c. 14. reprehenduntur illi, qui Clericos, qui ad oratoria deserviunt, ab Archidiacono coërceri, minimè permetterent. Ex iis verò aliquos Presbyteros fuisse, haud dubium est; eos ergò ab Archidiaconis coërceri potuisse, mos istius temporis fuit. Habitum autem, à Sirmond. hoc Concilium ponitur, ann. Christi 650. & sexto Regni Clodov. II. Francor. Regis.

Concil. verò Matiscon. I. ante Cabilon. habitum, anno, secundum eund. Sirmond. 582. sub Pelag. II. eandem Archidiaconorum auctoritatem exhibet, dum cap. 8. statuit, ut *nullus Clericus, ad iudicem secularem, quemcunque alium fratrem de Clericis, accusare, aut ad causam dicendam trahere, quocunque modo præsumat, sed omne negotium Clericorum, aut in Episcopi sui, aut in Presbyterorum, vel Archidiaconi præsentia finiatur. Quod si quicumque Clericus hoc implere distulerit, si junior fuerit, uno minus de quadraginta, ictus accipiat; sin certè honoratior, triginta dierum conclusione mulctetur.*

Patet etiam honoratiorēs è Clero (quo nomine Presbyteros, Abbates, levitas, comprehendendi, indicat Brachar. III. Syn. c. 6) ab Archidiacono judicari potuisse, insequenti

quenti tempore. Conc. Metense, sub Pipin. Rege, c. 3. de Presbyteris, inquit, & Clericis sic ordinamus, ut Archidiaconus Episcopi, eos ad Synodum commoneat, unâ cum comite, & si quis contempserit, comites eum distringere faciat, ut ipse Presbyter, aut defensor suus, sexaginta solidos componat.

Conc. Cabilon II. sub Carol. c. 15. Dicitur est etiam, quod in plerisque locis Archidiaconi, super Presbyteros Parochianos, quandam exerceant dominationem, & ab eis census exigant, quod magis ad Tyrannidem, quàm ad rectitudinis ordinem pertinet. Si enim Episcopi, juxta Petri Apost. sententiam, non debent esse dominantes in Clero, sed forma facti gregis ex animo, multò minus isti hoc facere debent, sed contenti sint regularibus disciplinis, & quod ab eis, ab Episcopis exigitur, hi per parochias suas exercere studeant, nihil per cupiditatem aut avaritiam præsumentes.

In Conc. Sueffion. II. subscribit aliquis, servans locum Archidiaconi; quasi suo jure, Archidiaconus subscribere posset. Idem, Monachos & Presbyteros, ad audientiam Episcopi deducit, c. 5. ejusd. Conc. In Valentin. sub. Car. Calvo, Archidiaconus, ante præpositum numeratur.

Quæ omnia confirmantur ex constitutionibus Regiis, Carol. Magn. nam lib. 5. capitular. c. 9. ex Metens. Conc. verbis parum immutatis, sed diverso sensu, lex ista

promulgatur, *de Presbyteris & Clericis sic ordinavimus, ut Archidiaconus Episcopi, eos ad Synodum convocet, & si quis ire contempserit, tunc Comes, jussione Episcopi monitus, eum distringere faciat.* Capitulare verò 121. ejusd. lib. Conc. Antissiodor. cit. canonem 43. exscripsit. Capitulare tandem ejusd. Car. ann. 11. Regni ipsius, editum, in addit. 4. Ludov. Imp. c. 49. ejusdem consuetudinis fidem facit, statuens, *ut provideant Episcopi, ne cupiditas Archidiaconorum, culpas nutriat Sacerdotum, quia multis modis mentitur iniquitas sibi.*

Quibus adde, Lotharii 111. Imp. Bullam, in privilegio S. Servatii, Trajectenf. & consuetudo, longo usu in habitum conversa, *ut Presbyter Parochiæ S. Servatii, & Presbyter Parochiæ S. Mariæ, præsidente Archidiacono, communiter habeant Synodum, in Ecclesia S. Mariæ.* Innumera alia sunt, quæ ex more Ecclesiæ Gallicanæ de Archidiaconis dici possunt.

C A P. IV.

Occurritur duobus scrupulis, in hac materia.

DUO solum hîc subtiliùs explicanda adjungo, quæ prædictis videntur officere 1. libellum quendam veterem, in append. Hist. Flodoar. de ministris Ecclesiæ Remens.

Remens. quos inordinate Elbo Episcopus invenit, &c. omnium Ecclesiæ Remens. dignitatum officia, sigillatim & accuratè explicare. I. quidem loco præpositum, ut digniorem, nominat. II. Archidiaconum ante Chorepiscopum, Archidiacono autem hoc officium tribuit, *gradus Ecclesiasticos, summa cum providentia atatum & meritorum ordinare: de tempore in tempore, nominibus certis, uniuscujusque officium, de omni regione præfigere, subtiliterve merita probare, & gratiam S. Spiritus unicuique investigando ministrare, &c.*

Circa quam officiorum Archidiaconi descriptionem, tria observo, quæ ad propositum pertinent. I. officium Archidiaconorū Rem. Eccles. si vera narret iste libellus, in formandis potius Clericis inferioribus & instruendis *usque ad consecrationem Presbyteri*, (ut ibid. postea subditur) quàm Presbyteris gubernandis, ac dirigendis (quod officium Chorepiscopo idem libellus assignat) occupatum fuisse. Alterum, tamen Archidiaconum, Chorepiscopo fuisse in honore, ac dignitate prælatum. III. Presbyterorum correctionem, nequaquam eis videri, collo, permissam. Tribuit enim Archidiacono, ut possit, *pro neglecta lectione, aut officio gradus sui, à Diacono usque ad infimum excommunicare etiam & juvenculos, talibus pro excessibus, verberibus coercere.* Quibus verbis

videtur, limitare potestatem coërcitivam Archidiaconorum, ut tantum ad Diaconos, & cæteros inferioris gradus, non autem ad Presbyteros, extendi possit.

Alterum, Hincmarum Remens. qui Ebboni deposito, in eadem Cathedra successit, à quo Ebbone prædictus liber videtur fuisse conscriptus, vel ab aliquo ejusdem contemporaneo, capitula tredecim, ann. incarn. Dom. 874 dedisse *Gunthario & Odelhardo*; *Archidiaconibus Presbyteris*, ex quibus, jus visitationis, & Synodi, & eligendorum Decanorum, & in Presbyteros, jurisdictionem amplissimam, Archidiaconos habuisse, manifestissimum est; totumque illorum officium, vel potissimum in parochiis visitandis, & iis, quæ à Presbyteris fiebant, vel in Parochiis, animadversione aut providentiâ eorum, digna erant, inquirendis, versatum fuisse: uno verbo, ea omnia præstare, quæ Chorepiscopis, prædictus libellus Ebbonis attribuit.

Quæ cum attentius considero, in rebus vix differentiam; sed tantum in nominibus animadverto: nam & præpositum Canonorum, in Ecclesia Rem. nominat Flodoard. libell. 3. Hist. c. 28. & Theodacium Præpositum, & Rodardum Canonorum item Præpositum, ad quos litteras scripserit Hincmar. ex quibus litteris, eadem officia, quæ Præposito, libellus tem-
pore

pore Ebbon. conscriptus attribuit, penes Præpositum viguisse, innotescit. Chorepiscopum quoque, & Archipresbyterum nominat, idem Flodoard. ad quos scripserit Hincm. quibus scilicet ea demandarit, quæ cit. Capitul. *Archidiacon. Presbyteris* inscriptis, ex officio convenisse colliguntur.

Quin etiam ad omnem tollendam dubitationem, Flodoard. eod. cap. refert, Hincmarum *Guntb. nro & Odelhardo Archipresbyteris*, commonitorium, ministerio ipsorum aptum, descripsisse, in capitulis tredecim. Iisdem autem inscribuntur cit. capitula, numero scilicet tredecim, quæ habentur tom. 3. Conc. Gall. Itaque eadem illa esse oportet, quorum meminit Flodoar. & Archipresbyteris data asserit. Ex quibus colligo eosdem, qui *Archidiaconi Presbyteri* dicti sunt, Archipresbyteros; imò etiam Chorepiscopos videri dictos in Ecclesia Rem. Archidiaconos quidem, quòd eadem officia præstarent, quæ Archidiaconi, ex ordine Diaconorum, in cæteris Ecclesiis obire solerent; Presbyteros verò Archidiaconos dictos, quod in Ecclesia Rem. non nisi ex ordine Presbyterorum eligerentur, ideoque eosdem, propter ordinem Presbyterii, Archipresbyteros, propter Episcopalis ministerii participationem, Chorepiscopos appellatos.

Scilicet Remens. Ecclesiam, quam Stephan. Tornac. Epist. 160. Magistro. R. Rem. Decano, supra cæteras Regni Ecclesias, disciplinâ præcelluisse prædicat, ubi vidit, Archidiaconorum potestatem in Presbyteros, Ecclesiæ usu confirmatam; Canonum verò antiquorum auctoritate, Diaconis, jurisdictionem in Presbyteros interdictam; ut & Canones antiquos servaret, nec ab Ecclesia recepto usu abhorreret; statuïsse probabile est, ut Archidiaconi ex Presbyterorum ordine eligerentur, eamque ob causam, & *Archidiaconos Presbyteros*, & *Archipresbyteros*, & *Chorepiscopos*, eisdem nominasse. Eandem tamen Archidiaconum alium habuisse, ex Diaconorum ordine, qui omnibus Ecclesiasticis officiis, rectè & convenienter obeundis invigilaret, quod officium Archidiacono attribuit, Isidor. epist. ad Ludifred. mox citandâ, & Diaconos, atque inferiores Clericos Ecclesiæ Cathedralis, sui officii admoneret, ac delinquentes puniret, quos nempe inferiores Clericos, idem Isidor. Archidiacono similiter, Primicerio & Thesaurario, secundùm diversas classes subjecit.

C A P. V.

*Origo præeminentiæ Archidiaconorum,
supra Presbyteros in Hi-
spania.*

HIs gradibus, Archidiaconorum officium, ad illud dignitatis, supra Presbyteros, fastigium, ad quod progressum ipsum animadvertimus, in Galliis conscendit. In Hispania, eodem ferè tempore, ac ordine, illa ipsa, supra Presbyteros, Archidiaconorum dignitas, sublimata est. Conc. Tolet. i v. sæculo, sub Innoc. I. habitum, occasionem dedisse videtur, Archidiaconorum potestati amplificandæ, can. 20. dum enim Archidiacono istud officium commendat, ut aliquam constitutionem, editam in Concilio, Episcopis, tam præsentibus, quàm absentibus, suggerat, videtur, tanquam vindicem Canonum, & consiliarium Episcopi in judiciis, & deliberationibus, Archidiaconum constituisse.

Tolet. i v. vi. sæculo sub Honor. i. ann. ut ajunt, 633. eandem ampliavit, dum c. 3. seu 4. secundum edition. Garl. in Conciliis, Presbyteros ab Episcoporum tergo sedere; Diaconos verò stare in conspectu Episcopi, præcipit, & ita, licet Diaconorum ordinem, ordine Presbyterorum, mul-

multo intervallo inferiorem faciat, nihilominus Archidiacono prærogativam istam tribuit, ut si *Presbyter aliquis, aut Diaconus, Clericus, sive Laicus, de his, qui foris steterint, Concilium pro qualibet re, crediderit appellandum, Ecclesie Metropolitanae Archidiacono, causam suam intimet, & ille Concilio denuntiet.* His enim verbis, actoris Concilii, ac Syndici munus, Archidiacono quodammodo tributum, à quo ad iudicis delegati, ac mox ordinarii officium transire, facile ei fuit. Dùm item c. 35. aliàs 36. Episcopo permittit, *ut si ipse, aut languore detentus, aut aliis occupationibus implicatus, id (nempe, visitationem annuam Parochiarum omnium dioeceseos) explere nequiverit, Presbyteros probabiles, aut Diaconos mittat, qui & redditus basilicarum, & reparationes, & ministrantium vitam inquirent.*

Eâ enim permissione brevi factum est, ut quia Presbyteri, Sacramentorum administrationi, & Ecclesiasticis officiis magis addicti, quàm Diaconi erant; & Diaconi, ut plurimum, magis industrii, & rerum gerendarum magis periti; ac Episcopis, in quorum semper comitatu versabantur, magis fidi erant; præsertim verò Archidiaconi; & Presbyterorum adversus Diaconos ulciscerentur injurias, ut constat ex Maræ Diac. excommunicatione,

ne, inflicta à proprio Archidiacono, quòd Presbytero suo fecisset injuriam, in Conc. Chalcedon. act. 10. ideò contigit, ut ipsi potiùs, quàm Presbyteri, non solum ad ea, quæ ad redditus Ecclesiasticos spectabant, discutienda; verùm etiam ad lites, & causas instruendas, electi sæpiùs fuerint ab Episcopis, quàm Presbyteri: atque ita, tanquam ordinarium istud munus subierint, visitandi parochias, & de redditibus Ecclesiarum, & ministrantium vita inquirendi, & de plano saltem leviores causas dijudicandi.

In eo verò Conc. tres Archidiaconi, post Presbyteros, nomine Episcoporum, secundum editionem Garfiæ, secundum vulgatam turbatis ordinibus subscribunt. Nondum tamen ordinariam Diaconi, ante Presbyteros sedendi, vel iisdem imperandi, habuisse videntur potestatem, nam Conc. Emerit. sub Vitalian. Pap. c. 5. Diaconos ad Concilium provinciale mitti, nomine Episcoporum, graviter tulit, ne Presbyteris præferri, & cum Episcopis sedere viderentur. Decernit siquidem, ut Episcopus, absens à Conc. *ad suam repræsentandam personam, non aliter, nisi aut Archipresbyterum dirigat, aut si Archipresbytero impossibilitas fuerit, Presbyterum utilem, cujus dignitas cum prudentia pateat, à tergo Episcoporum, inter Presbyteros sedere, & quæque*

que in eo Conc. fuerint acta, scire & subscribere. Injustum enim accipit cærus noster, ut quisquam Episcoporum, Diaconum, ad suam personam representandam dirigat; hic enim, quia Presbyteris junior esse videtur, sedere cum Episcopis in Conc. nullatenus permittitur.

Decretum tamen istud observatum minimè fuisse, & posterioribus Conciliis, Diaconos Episcoporum nomine subscripsisse, superiùs docuimus.

Nihilominùs usque ad Conc. Tolet. x i. Archidiaconos proprio nomine subscripsisse, minimè legimus. Sed Tol. v i i i. Archipresbyterum, & Primicerium Tolet. Ecclesiæ; eosdemque Tol. i x. subscriptos legimus. In Conc. verò Tol. x i. Archidiaconi Tolet. solemnem subscriptionem iis verbis tenemus, *Gudila Ecclesiæ S. Mariæ, Regiæ Sedis Archidiaconus, hæc gesta Synodica, à nobis definita, subscripsi: ad tantum scilicet honoris apicem, jam tum in Ecclesiis Hispaniar. Archidiaconi dignitas conscenderat. Habita sunt autem ista Concilia, Tol. i v. v i i i. i x. x i. itemque Emeritense, v i i. sæculo.*

Verùm Isidor. Hispal. cæteris accuratiùs nobis describit, Archidiaconorum officium, ab eoque Archidiaconorum prærogativam supra Presbyteros, si quæ ipsius tempore fuerit, discere licebit. Floruit autem

autem paulò post tempora S. Greg. nam & S. Greg. & seqq. quorundam Rom. Pontif. sententias, suis operibus plurimas inseruit: electus fuit in Archi-episcop. Hispal. in locum fratris demortui, S. Læandri, ann. (si credimus Bar. not. in Martyrolog.) incarn. Dom. 603. præfuit Hisp. 11. ann. 619. tempore Bonif. Pap. celebrato, ante Tol. 14. & cætera cit. Concilia; ejusque successor Honoratus, Tol. v. 1. subscripsit: sententiam ergò Isid. exquirere oportet.

C A P. VI.

Isidor. Hispal. sententia videtur dubia, propter quid?

DUbiam imprimis reddere videtur Isid. Hisp. sententiam, pars aliqua Epist. ad Ludifred. apud Ivon. p. 6. decret. c. 20. & Gratian. c. *perlect.* d. 25. quæ etiam inseritur eidem Epist. qualis excusa habetur, inter opera Isid. studio & diligentiam fratris Jac. du Breul, Monach. S. German. à Prat. quam nempe congruere manuscriptis quibusdam codicibus, à se lectis, asserit, dum postremam ejusd. Epist. partem aliquam, nondum excusam, edidit inter Epist. Isid. Pars istius Epist. hæc est, *Archiepresbyter verò se esse sub Archidiacono, ejusque præceptis, tanquam Episcopi sui, sciat obedire; & quod specialiter ad ejus ministerium perti-*

pertinet, omnes Presbyteros, in ordine positos, curam agere, & assidue in Ecclesia stare, & quando Episcopi sui absentia contigerit, ipse vice ejus Missarum solennia celebret, & Collectas dicat, vel cui ipse injunxerit.

Hæc pars Epist. si verè est Isid. Hisp. non dubium erit, quin Archidiaconus, ipsius tempore, in Ecclesiis Hispaniensibus potestatem habuerit, non solum supra Diaconos, & cæteros inferiores Clericos, verum etiam supra dignissimum Presbyterum, & Archipresbyterum civitatis; cujus officium ibid. describitur; idemque Archidiacono subesse, eique obedire debere; statuitur. Verum hanc partem, in Epistolam Isid. irrepsisse, ex aliquo Tol. Conc. cujus nomine citatur, lib. 1. decretal. tit. 24. c. 1. & à Bern. Præpos. Papiens. lib. 1. tit. 16. c. 1. probabilius est.

Correctores Romani, notis in cit. can. *perlectis*, in dubium eam revocant, quia omittitur à Burchard. lib. 3. decret. c. 50. Sed cum Burchard. nec cætera ejusd. Epist. quæ ad Primicerium, & Thesaurarium pertinent, descripserit, de quibus agere debuisse videtur Isidor. idè infirmum ex ea omissione, argum. sumi potest: quia omittitur ab Ivon. in Pannorm. lib. 3. tit. 4. c. 1. sed infirmum similiter ex eo argum. desumeretur, cum Ivo alibi eam partem exscripserit.

For-

Fortius autem est, quod Correctores iidem asserunt, in manuscriptis codicibus, ejusd. Epist. hanc partem non haberi, quorum testimonio favet Garf. Loayf. qui in antiquo cod. Monasterii S. Laur. quod à Philippo II. magnificentissimè ædificatum est, (quem cod. *Vigilanum* vocant) eandem Epist. absque isto additamento haberi testatur. Probatur autem iis argumentis : 1. Quia cùm Isid. prædicta Epist. post enumerata ordinum officia, hæc adjungat, *Hi sunt ordinēs, & ministeria Clericorum, quæ tamen auctoritate Pontificali in Archidiaconi cura, & Primicerii ac Thesaurarii sollicitudine dividuntur*, quibus statim ista subnectit, *Archidiaconus enim imperat Subdiaconis*; videretur inordinate propositam prosequi descriptionem, si officii Archipresbytero demandati, quam ista pars continet, explicationi Archidiaconi subjungeret; ac Primicerii & Thesaurarii expositioni præmitteret, sic enim trium istorum officiorum susceptam explicationem interrumperet: ex quo patet, assumendam esse istam Archipresbyterorum officii descriptionem, nec geminæ Epist. Isidor. partem.

II. Quia non congruit Tol. Conciliis cit. ut Archipresbyter civitatis, quem in Conciliis prælatum Archidiaconis animadvertimus, subesse dicatur Archidiacono, ab Isid.

Isid. Hisp. nec speciatim congruit Emerit. cujus can. 10. hæc continentur. *Communi deliberatione sancimus, ut omnes nos Episcopi, intra Provinciam constituti, in Cathedralibus nostris Ecclesiis, singuli nostrum Archipresbyterum, Archidiaconum, & Primicerium (aliàs Primicerium) habere debeamus, sanctus quippe est ordo, & à nobis per omnia observandus. Ideoque placuit huic magnæ Syn. ut quicumque ad hoc officium pervenerit, humilitatem Pontifici suo, & reverentiam præbeat, &c. Si quis ex his sui gradus ordinem non custodierit, & quæ illi pro tali officio, à suo Episcopo impetrata fuerint, adimplere distulerit, prout causa patuerit, excommunicationis damno mulcandum se noverit.*

Numerantur enim hoc can. tres dignitates Ecclesiarum Cathedralium totius Hisp. I. Archipresbyteri, II. Archidiaconi, III. Primiceri, seu Primicerii; gradus sui ordinem custodire, aliquam ex his dignitatibus adeptus, mandatur; innuiturque Presbyteros Archipresbytero, Diaconos Archidiacono, aliquos ex inferioribus ordinibus Primicerio parere debuisse, quemadmodum in eum can. potat Fronto-Duc. qui *Primicerium* legit, non *Primicerium*.

III. Quia nec ista obedientia Archipresbyterorum Archidiaconis, omninò consentit reliquis partibus Epist. ejusd. Isid. etenim
ita

ita partitur inspectionē in Clericorum ministeria Isid. ut Archidiacono inspectionem in Diaconos & Subdiaconos tribuat, dicens, *Archidiaconus enim imperat Subdiaconis & Levitis, ad quem ista pertinent ministeria, ordinatio vestiendi altaris à Levitis, cura incensi, & Sacrificii necessaria sollicitudo, quis Levitarum Apostolum, & Evangelium legat, &c.* Ad Primicerium pertinere dicat, inspectionem in Acolythos, Psalmistas, atque Lectores.

In qua partitione, Presbyterorum nulla mentio, quorum officia non attingit Isid. quia in celebratione Missæ, quæ propria est Presbytero, nullum Presbyterum habet superintendentem, quemadmodum in Ministeriis cæteris, supra Diaconos, & cæteros inferiores Clericos, aliqui Superintendentes, & inspectores erant, qui unumquemque officii sui admonebant: at quis credat, ab Isid. si ipse, Archidiaconum Presbyteris etiam imperasse, ac præfuisse, credidisset, hanc prærogativam, in Archidiaconorum officio describendo, prætermissam, quæ & potissima & nobilissima erat?

C A P. VII.

Vera Sententia Isid. de præeementia Archidiaconorum, suo tempore.

P Ars itaque ista Epist. ad Ludifr. quæ Archipresbytero, ait Archidiaconum, præ-

præfuisse, non videtur esse Isid. Hisp. quinimò videtur, ex ista Epist. Isid probabiliùs colligi, potestatem Archidiaconi, ejus tempore, nullatenus ad Presbyteros, sed præcipuè ad Diaconos & Subdiaconos extensam fuisse: alios verò inferiores Clericos, ad curam minorum dignitatum, putà Primicerii & Thesaurarii pertinuisse. Eadem tamen Epist. jam tum fundamenta potestatis, quàm postea Archidiaconi, Ecclesiæ consuetudine compararunt, jacta fuisse, libenter admitto, subdit enim, *solicitudo quoque Parochitanorum* (quæ lectio est Garf. Correct. Rom. & Burchard. suprà) aliàs *paræciarum* (quæ lectio est Gratian. c. *perleç.* cit. & Jac. du Breul) & *ordinatio*, & *jurgia*, ad ejus pertinent curam, pro reparandis *Diæcesanis Basilicis*, ipse suggerit Sacerdoti; ipse inquirat *paræcias*, cum jussione Episcopi, & *ornamenta*, vel res *Basilicarum Parochitanarum*, gesta libertatum Ecclesiasticarum, Episcopo idem defert, & Clerico partes proprias, idem distribuit; ab Archidiacono, nuntiatur Episcopo, *excessus Diaconorum*.

Nolim singula ista officia explicare; neque enim instituti mei illud est: solùm adnoto, ab istis principiis, Archidiaconorum jurisdictionem, originem sumpsisse. Nam inquisitio ista, & cognitio, Archidiacono demandari solita, ad instructionem Episcopi, jurisdictione postea armatam fuisse, tum

occa-

occasione conciliandorum jurgiorum, quæ inter Parochianos emergerent, Archidiaconos, potestatem Presbyterorum Curatorum in Parochianos, totam ferè ad se traxisse: maluisse scilicet Parochianos, extraordinarii sese visitatoris, cujus major è longinquo esse solet reverentia, quàm proprii Sacerdotis, cujus auctoritas, familiaritate vilior, judicio subdere.

Eosdem Archidiaconos, dum Parochi sententias retractant, judices se Parochorum constituisse, vixque populorum jurgia componere, ministrorum excessus Episcopo nuntiare potuisse, quin & Pastorum negligentias, & Presbyterorum crimina detegerent; vix ausos reniti Presbyteros, etiam injustæ ab Archidiacono vindicatæ potestati, à quibus in reddituum Ecclesiasticorum perceptione penderent: atque ita tempore Isid. complanatam jam tum viam fuisse, quâ in Presbyterorum jura, Archidiaconi irruerent, eisque & sedendi prærogativam præiperent, & de iis judicandi potestatem usurparent.

Firmata est postea, non usu solùm, verùm etiam lege, eadem potestas, in Ecclesiis Hispaniarum. Superfunt enim aliqua fragmenta Conciliorum Tolet. absque numero, sed quæ ante irruptionem Saracenorum in Hispanias, & destructum Gothicum imperium, habita fuisse fatentur omnes,

id est, ante ann. 713. quo irruptio ista contingit: in quibus Archidiaconorum potestas in Presbyteros, & dignitatis eorundem sublimatio, confirmata est. Referuntur ista à Garf. Loays. in not. ad Conc. Tol. I. Eorum I. habetur. antiq. Collect. I. Decret. apud Anton. Augustin. lib. I. tit. 15. c. 13. in quo, inter officia, Archidiaconi numeratur, *omnem causam seu querimoniam, vel injustitiam Presbyterorum, vel Subdiaconorum, debere deliberare, ordinare & facere.*

Alterum habetur lib. I. ejusd. Collect. tit. 16. de off. Archipresb. c. I. in quo monetur Archipresbyter, *ut sciat se subesse Archidiacono, & ejus præceptis omnibus, & præceptionibus, sicut Episcopi sui, obedire debere dicitur.* III. tit. 19. de off. Custod. c. ult. ubi de Archidiacono, Archipresbytero, & Custode hæc habentur, quæ potestatem Archidiaconorum, majorem cæteris esse dignitatibus, ostendunt: *In his tribus Ecclesiæ columnis, ut S. sanxit Syn. consistere debet alma Mater Ecclesia, ut ad hoc opus tales ordinentur, quales plus meliores & sanctiores esse viderint, ut nulla negligentia in sancta Dei Ecclesia esse videatur.* Hi tres, Archidiaconus, Archipresbyter, Custos, providè simul juncti uno animo peragant, & perfectè, & non sit invidia, nec zelus inter illos. Cætera minoris momenti omitto.

C A P.

C A P. VIII.

*Origo præminentiae Archidiaconorum,
in Italia & Oriente.*

DE more Italiæ, plura dicere, super-
vacaneum fuerit, solum observare
sufficiet ex libello veteris ordin. Rom. an-
tiquæ 1. Collect. decret. c. 2. & Collect.
Greg. IX. c. 1. de off. Archidiac. ita referri
ut Archidiaconus post Episcopum, sciat, se vi-
carium esse ejus in omnibus, & omnem curam
in Clero, tam in urbe positorum, quàm eorum,
qui per parochias habitare noscuntur, ad se per-
tinere, sive de eorum conversatione, sive de ho-
nore & restauratione Ecclesiarum, sive de do-
ctrina Ecclesiasticorum, vel caterarum rerum
studio, & delinquentium, rationem coram Deo
redditurus est.

Quæ verba, in veteri ordine Rom. qua-
lis nunc separatim excusus est, minimè ha-
bentur, sed ista solummodò, observandum
est, septem esse regiones urbis Romæ, singulas re-
giones, singulos Diaconos Regionarios habere, &
uniuscujusq; Regionis Acolythos, per manum sub-
diaconi Regionarii, Diacono regionis suæ, officii
causâ, subditos esse, eos omnes Archidiacono,
qui vicarius est pontificis, obedire, servato uni-
cuique per eum, proprii gradus ministeriali
ordine.

Hæc quæ in ordine Rom. leguntur, antiquum Ecclesiæ Rom. morem referunt: illa verò, quæ ex veteri ordine Rom. in Decretalibus citantur, recentiorum morem exhibent; ideoque ab aliquo, ex Rom. Pontif. veteri ordini Rom. ex usu posteriori ejusd. Ecclesiæ addita, in librum Decretal. congesta sunt; quemadmodum, & quæ in prima collect. Decretal. cap. unic. *de off. Primicer*, ex Conc. Rom. ordine; in collect. Decret. Greg. cap. similiter unic. eod. tit. correctius ex lib. Rom. ordinis, in gratiam Archidiaconi laudantur, ut scilicet tam Primicerius, quàm Archipresbyter, Archidiacono subsint: ea, inquam, Gelasio posteriora sunt, qui, ut supra vidimus, Epist. ad Episcopos Lucan. Diaconos infra propriam mensuram continuit, nec supra Presbyteros efferri voluit; neque in veteri ordine Rom. eadem habentur, neque veterem, toto saltem V. sæculo, consuetudinem Rom. Ecclesiæ sapiunt.

Sub finem tamen V. sæculi, quantum accreuerit Archidiaconorum Rom. Ecclesiæ auctoritas, ex eo patet, quod in Syn. Rom. I. sub Symmach. statim legatur, *Suggestio Fulg. Archidiaconi Ecclesiæ Rom. de congreganda Syn.* nihilominus in hac Syn. lego, Archipresbyterum primum subscripsisse, tum presbyteros, deinde Diaconos; lego etiam in v. & vi. Syn. sub eod. Symmach.

mach, Episcopos acclamasse, tacentibus Diaconis.

Initio verò vi. sæculi, lego, in Epistolis Pap. Hormisd. 24. & 63. Dioscorum & Felicem Diaconos, designatos legatos, prius nominari, quàm Blondum Presbyterum, similiter designatum; eodemque ordine nominari, in exemplo libelli Joan. Episc. Constantin. & in suggestionibus variis, inter ejusd. Hormisd. Epistolas: nihilominus nihil ex eo certi constitui potest, quandoquidem Epist. 32. ad Justin. Imp. idem Hormisd. Blondum nominet ante Felicem Diaconum; & liber pontificalis præferat Blond. Presbyterum, utrique Diacono legato.

Igitur vel ordo, in nominandis istis legatis, incuriosè prætermisus est, vel Diaconi Prælati, tanquam de rebus instructiores: nam ex iis Dioscor. relationes ad Hormisd. aliquas misisse, & Hormisd. ad eum singulariter scripsisse lego; Blondum autem Presbyt. aut scripsisse quippiam ad pontificem, aut ad eum, singulariter ab eo scriptum esse, non observo.

Hoc etiam observatu dignum est, quòd Hormisd. Papa Epist. 26. ad *Theodos. Archidiaconum*. & *Clerum Constantinop.* inscribat, quasi Archidiaconum, Cleri istius principem, & antesignanum agnosceret. Nec prætermittendum puto, quòd in Syn. Rom. sub Leon. i v. ix. sæculo, presbyteri omnes, an-

te Diaconos quoslibet, legantur subscrip-
fisse.

C A P. IX.

*De Prærogativa Archidiaconorum, ex
more Ecclesiæ Orientalis.*

ALiqua circa Archidiaconorum aucto-
ritatem, & Diaconorum præfiden-
tiam, ex more Ecclesiæ Orientalis antiquo,
adjungo, putà quòd Chrysf. ad Innoc. I.
per Archidiaconum Constantin. dicat,
Theophilum totum Clerum sibi conciliaf-
se, ac si jam Ecclesia vacasset; quòd Isidor.
Pelus. lib. I. Epist. 157. Pansoph. Archidia-
conos moneat, *Ne forensem præfecturam, sed
tranquillum imperium, munus suum cogitent;*
quòd Joan. Hieros. per Archidiaconum,
silentium imperarit Epiph. Salam. in Cy-
pro Episc. prædicanti, teste Hier. Epist. 61.
ad Pammach.

Quòd Concil. Chalced. Act. 10. referat,
Maram Diac. à proprio Archidiacono ex-
communicatum, quoniam injuriam Pres-
bytero intulerat; quòd ead. act. ἀντιπρόσ-
θεν, seu *audientia* Abrahamii Diaconi memo-
retur, ad quam Diaconus alius vocatus fue-
rat; quòd in eod. Conc. maxima Ætii Dia-
coni auctoritas fuerit.

Quòd in Conc. Constantinop. sub A-
gap.

gap. & Menna, Act. 5. Romanus quidam Archidiaconus, se admonitum ab Episcopis Provinciæ, antiquas Ecclesiastici status consuetudines, idque ab eo totus Apamæarum Clerus exegisse referatur; quòd in eod Conc. non servatâ prærogativâ ordinis sacri, Diaconi aliqui Monachi, Presbyteris item Monachis, tum in epistolis quibusdam tum in Concilii actionibus præferantur, prioresque nominentur, & subscribant, eo fortè titulo, quòd in Monasteriis antiquiores essent.

Quem ordinem servandum voluit in Occidente, S. Benedict. c. 62. suæ Reg. quo præscribitur, ut Monachus ordinatus Sacerdos, *locum illum semper attendat, quo ingressus est Monasterium, præter officium altaris, etsi fortè electio congregationis, & voluntas Abbatis pro vitæ merito, eum promoveri voluerit.* Nec dubium est, quin exemplum istud multum valuerit, ad infringendum istum ordinem, quo qui superiori ordine insignitus erat, cæteris inferiorum ordinum præferebatur.

C A P. X.

Posteriorum seculorum testimonia, pro Archidiaconorum præeminentia.

V Erùm antiquiora frustra prosequimur, quandoquidem constet, totius Ecclesiæ

clesiæ consuetudinem, jam receptam, & Canonibus probatam esse, ut & Archidiaconus, digniorem locum Presbyteris, & Archipresbyteris ruralibus obtineat, Presbyterosque ipsos visitet, in eos inquirat, eosdemque corrigit. Lege integros tit. *de offic. Archidiacon. de offic. Archipresb.* aliosque passim, toti juri canonico insertos canones.

Lege codicem donationum Auberti Miræi, in quo Archidiaconos, etiam ante Decanos subscribentes, observabis, in donat. Arnulph. 1. cognomento *Magni*, Flandriæ Com. Monasterio Blandiniensi, & ante Præpositum, Decanum, Cantorem, in Theoduini Leodiens. Episc. diplomate, ann. 1066. Ante Decanum, & Subdecanum, in diplomate Gerard. 11. Episc. Camerac. ann. 1089. Ante Decanum, Cantorem, Præpositum, in donat. Baldrici Noviomenf. ann. 1105. Ante Decanum & Subdecanum, in charta donation. Odoardi Camerac. 1108. Ante Abbates, in Charta Eustachii, Comit. Bonon. ann. 1122. Post Præpositum unum majoris, ut opinor, Ecclesiæ ante Decanum & Præpositum alterius Ecclesiæ, in donat. Burchard Camerac. Episc. & in aliis passim, ante Abbates, Diaconos, Præpositos, aliosque Presbyteros Ecclesiasticâ dignitate fungentes.

Lege Epistolas, Fulberti Carnot. 34. I-
von.

von. Carnot. 203. Hildeb. Cænoman. SS. Arnulphi Lexoviens. 43. Stephan. Tornac. 57. 58. 195. Joan. Sarisber. Episc. Carnot. plurimas; Blesens. Sermones in Syn. & Epistolas plures; præsertim verò 123. R. London. Episc.

Lege de eadem potestate Archidiaconorum in Presbyteros, Math. Parid. in veteribus consuetudinib. Angliæ, Baldric. Noviomens. apud Miræum, cod. donation. piar. c. 71. Orderic. Vital. lib. 3. hist. & alios.

Lege Conc. Rom. sub Greg. VII. anno incerto habiti, can. 4. Conc. sub eod. apud Jullam bonam habiti, præsentē Guiel. Rege, cap. 6. & 7. apud Orderic. Vital. lib. 5. Conc. Lateran. General. Callixt. II. præsentē, can. 7. Londin. sub Honorato II. ann. MCXXVII. can. 5. Remens. sub Eug. III. can. 10. Turon. præsentē Alexand. III. can. 7. Lateran. œcumen. eod. præsentē, can. 4. & 6. statuta Odonis Paris. in præcept. commun. c. 16. & 54. Lateran. æcum. sub Innoc. III. c. 33. Conc. Londin. sub Greg. IX. cap. 3. 8. 21. 22. 24. 29. in quibus fusè de Archidiaconorum jurisdictione; Conc. habiti in Aleman. sub Conrado Cardin. can. 3. aliaque plurima:

Quibus adde, varia Alex. III. & Innoc. adversus Archidiaconorum indebitas, à

Presbyteris Parochianis exactiones, rescripta de *Simonia*, & aliis titulis.

Quæ omnia, & quàm plurima, ostendunt, Archidiaconorum in Presbyteros potestatem, probatam fuisse, eisque honoratorem locum concessum: quod etiam ex eo patet, quia à 1000. & amplius annis, ubi eorum mentio fit, presbyteris semper præferri solent.

Archidiaconi porro, ex Diaconorum ordine sunt: licet enim jam ii, qui ad Sacerdotium promoti sunt, Archidiaconatum & habere, & retinere possunt, quod in Ecclesia Rem. tempore Hincmari, communiter receptum fuisse, conjecimus; nihilominus istud ab initio nequaquam admissum fuisse, exemplis *Ætii Constantinop.* Honorati *Salonit.* *Joan. Cabilon.* supra docuimus.

Quibus recentius testimonium addo, *Petr. Blesens.* Archidiaconi *Bathoniens.* in Anglia, qui *Epist. 123. Richard. London. Episc.* Contendit, se non posse cogi ad Sacerdotium, quia ista promotio, in Archidiaconis, degradationis species esset; quæ omnia superius à nobis prolata sunt.

Quinimodò sensim, hominum ignavia factum esse recolimus, ut Archidiaconi aliqui eligerentur, qui nondum Diaconatus ordinem consecuti essent, quos intra annum saltem Diaconos fieri debere, districtè præcipiunt *Conc. Claromontan.*

sub

sub Urb. II. c. 3. Pictav. sub Paschal. II. c. 7. Lateran. Oecum. sub Callixt. II. c. 2. Londin. I. sub Honor. II. c. 6. & II. sub eod. c. 6. Lateran. item generale, sub Innoc. II. c. 10. Remens. sub Eug. III. c. 9. Lateran. maximè generale, sub Alex. III. c. 3. & alia plurima.

Atque hæc de hisce satis ad gloriam benedictæ Trinitatis, gloriosæque semper Virginis, Dei Matris, ac totius Curiaë cælestis.

Quicquid verò vel nostrum hîc, vel alienum est, juxta S. Romanæ fidei regulas, & absque bonorum offensione, dictum volumus, quod aliter excidit, revocamus: neque instituti mei fuit, ullum gravem virum vellicare, quod vitium in aliis reprobis. Itaque si simile quid occurrat, quod inadvertenti excidit, cupio, ut corrigatur: nescio enim, quâ nostrâ ægritudine, dum animus in discursum raptus, calamo non invigilat, quasdam nonnunquam lituras pariat, ex quibus spinæ, quæ alios, & immeritos compungunt, succrevisse miramur.

Coronidis loco, subjicimus Tiaram hanc sacram, Monilibus quinque adornatam, è sacrae Scripturae Thesauro, in cujuslibet Prælati seu Ecclesiastici Principis Hierarchici, die inaugurationis suæ, dedicanda.

TIARA SACRA, Monilibus quinque adornata.

MONILE I.

Domini est assumptio nostra, & sancti Israël Regis nostri, Ps. 88: 19. Non irrepis, ut olim Abiron: sed vocatus es, tanquam Aaron. Esto florida virgæ memor. Num. 17.

VOTUM SACRUM.

Fiat manus tua, Domine, super virum dexteræ tuæ: & super filium hominis, quem confirmasti tibi. Psal. 79: 18.

PARÆNESIS EXPLICANS VOTUM.



Adgedum Vir dexteræ, sit Spiritus & manus Domini tecum. Illa te regat, erigat: illa te protegat, benedicat. Cur à sacrorum Hierarcha, Dei vices gerente, manus impositio tuo fit in vertice, in sacra inauguratione, nisi pro hac imploranda directione, protectione, benedictione? Olim

lim Jacob benedixit Ephraim cancellatis manibus, ut textus commemorat, Gen. 48: 14. Nec id sine mysterio. Nempe Ephraim sinistræ adstabat ut junior, Manasses senior, dextræ. Voluit verò Jacob potiore partem in benedictione Ephraim impertiri, præ fratre Manasse; ideò commutat manus, ut dexterâ valeat eum benedicere, ut *virum dexteræ* valeat eum efficere: ideò & meritò in ortu nomen *Ephraim* acceperat, id est *crescens* & *fructificans*.

• Sic tibi primas in benedictione inter fratres attribuit Dominus, ut sis *vir dexteræ ejus*, ut sis *Ephraim*, crescens & fructificans præ cæteris. Si ergo *vir dexteræ es*, quæ à sinistris sunt despice, infirma & caduca: quæ à dexteris sunt suspice, sublimia & æterna. Nec verò immemor sis, in sublimiori licet dignitatis apice constitutus, te *filium Hominis*, imbellem, invalidum; ideoque indigere robore ex alto. Infirmitatis agnitio, divinæ virtutis est impetratio. De prælatis Ecclesiæ dicit ipse: *Ego confirmavi columnas ejus*. Psal. 74: 4.

Ecce erigeris, ut lapis ad fundamentum, ut columna ad sustentaculum: efflagitanda igitur fortitudo ac soliditas à divina virtute, ut confirmeris, & aptus fias oneri sustinendo totius imponendæ molis sacri ædificii. Scire enim decet, ac sæpius mente repetere, te electum esse, & erectum, ut infirma confirmes.

firmes, disrupta consolides, depravata convertas. Idcirco & nos pro te ad Dominum clamantes repetimus: *Fiat manus tua super virum dexteræ tuæ, & super filium hominis quem confirmasti tibi*, Psal. 79: 18.

P. ARÆNESIS EXPLICANS MONILE.

PEdum Pastorale, quo inauguraris, memorem te reddere potest Aaronis. A Deo vocatus ille fuit, & virga portentosa, electionis divinæ symbolum extitit. Vitam autem Prælatorum, & dotes eorum virga illa signabat. Vis audire, (salvâ auctoritate) qualis debeat esse Prælatorum vita? utique frondosa, florida, frugifera. Frondosa cælestis gratiæ virore. Florida boni nominis odore. Frugifera sancti operis fæcunditate. Sic poterunt verè isti dicere: *Domini est assumptio nostra, & sancti Israël Regis nostri*. Psal. 88: 19. Sic poterunt cum fiducia sibi persuadere, se non irrepsisse ad dignitates, aut contendisse, instar Abironis; sed vocatos esse instar Aaronis.

Audi ergò, audiant & Prælati Hierarchici, cæleste monitum sapientis: *Obaudite me divinis fructus, & quasi rosa juxta rivus aquarum fructificate: quasi thus Libani odorem suavitatis date. Florete flores, quasi lilium, & frondete in gratiam*, Eccl. 39: 17. Audin' frondes, flores, fructus ab his requiri, qui

qui in Religione, aut in Ecclesia Dei, tamquam in fertili solo Domini plantati, aquis divinæ gratiæ sunt irrigui? Hujus rei commonefaciat pedum istud adornatum, Prælaturæ tibi delatæ sacrum signaculum. Certè, illud ipsum quod olim virga florens ab Aarone deposcebat, designat modò à te gerendum. Ideò monemus, ut floridæ virgæ memor sis, & frondes, flores, fructus germines.

Sed perpende ulteriùs, virga illa non absque mysterio Amygdalina fuisse, perhibetur. Quid enim? Nonne Amygdalus inter arbores primigenia est, & flores prima parturit? Nonne citissimè excussâ hybernali aurâ vigilat? Nonne ventos, tempestates, grandines fortiter novit perpeti? ita noveris, te præ cæteris electum, ut virtutis & gratiæ vernantibus gemmulis, cæteris etiam præfloreas. Noveris quoque, pervigilandum tibi in commisso munere, omni excusso frigore & torpore. Noveris denique, non paucas tibi tempestates, ventos, & grandines imminere, si perfectè tuo volueris perfungi munere. Sed adversus hæc omnia infractus animus, fructum debet patientiæ conservare, sed amaro licèt cortice.

Meritò igitur virgam Aaronis, virgam Amygdalinam, tibi pro monili offero, quòd monitum sacrum contineat, nobilissimæ & sublimissimæ dignitatis tuæ: quodque ex-
citare

citare te valeat, & in munere tuo, fortem pervigilemque reddere. Ergo eam conspiciens, dicere poteris, cum Jeremia: *Virgam vigilantem, ego video: mentem vigilantem gerere debeo, Jer: 1. 11.*

MONILE II.

Ut diligas justitiam, & oderis iniquitatem. Propterea unxit te Deus oleo lætitiæ. In vestis oram fluat unguentum à capite, Psal. 44. & 132.

VOTUM SACRUM.

*Det tibi Deus de rore cæli benedictionem,
Et de pinguedine terræ abundantiam.
Esto Dominus fratrum tuorum:
Incurventur ante te filii matris tuæ.
Qui tibi maledixerit, sit maledictus:
Qui tibi benedixerit, sit benedictus.
Gen. 27: 28.*

PARÆNESIS EXPLICANS MONILE.

Justitia & iniquitas adversantur sibi: Tu illam tuere, hanc torvo oculo intueri.
Tibi

Tibi committuntur justitia & religio, utraque virgo incorrupta, pro cujus integritate oportet te, regio & excelso animo decertare. Ob eam rem defers Diadema, & sceptrum; Tiaram & pedum, Regiæ & Sacerdotalis dignitatis indicium. Nec unctio interior deest à Domino & Christo ejus, defluens. Sit ergò *virga directionis, virga regni tui*, imbelles sustentans, rebelles domans: segnes stimulans & pungens, recalcitrantes feriens, & expungens. Dilige justitiam, odi iniquitatem, & audi monitum sapientis: *Noli fieri Iudex, nisi virtute valeas irrumperé iniquitates. Noli esse pusillanimis, & ne ponas in agilitate tua scandalum.* Eccl. 7. 6.

Unctio cælestis gratiæ, quâ Christos suos, ungit Christus, roborabit te, & de omnibus docebit te, si modò aurem interiorem illi volueris inclinare. Quin imò illa, per te, in consortes poterit derivari, ut fiant Theodidacti, sive docibiles Dei. Ac sicut ab Aaronis perfuso capite, oleum sacratum in genas ac faciem, deinde & in oram vestis, defluebat: ita cùm in caput electus sis, decet te, divini cæromatis & unguinis fluorem, præ cæteris participare, & in inferiora membra refundere. Dicam igitur cum Ecclesiaste: *Omni tempore vestimenta tua sint candida: Et oleum de capite tuo non deficiat,* Eccl. 8: 9.

PARÆNESIS EXPLICANS VOTUM.

Dedit Dominus sacro ordini Hierarchico, benedictionem de rore cœli, dedit & benedictionem de pinguedine terræ; hoc est providit ei copiosè opes terrenas, providit & cœlestes. Et quidem ros cœli, terræ pinguedinem generavit; quia Religio & pietas peperit divitias. Sed, eheu! filia devoravit matrem. Nam variis in locis, copia opum abligurivit Religionem. Multi enim affluentes divitiis, affluxere & vitiis, neglecto rore cœlestis gratiæ, & ordine disciplinæ.

Tu verò, huic rei providè satage, ut ager, quem excolendum suscipis, tanquam hæreditas Domini, primùm roris cœlestis benedictione irrigetur, & disciplinæ sanctæ sarculo à veptibus expurgetur. Sic semen sacratum, germinabit Deo. Exinde advigilare poteris, ut hæreditas terrena patrimonium S. Petri, & possessiones, ad ejus pedes, priscâ fidelium pietate oblatae, integrè conserventur, justè dispensentur. Det ergò tibi Dominus, primò quidem de rore cœli, irriguum superiùs: deinde de pinguedine terræ, irriguum inferiùs; ut cœlestem terrenamque substantiam ad ejus gloriam valeas dispensare.

Esto quoque Dominus fratrum tuorum:

¶ in.

Et incurventur ante te, filii matris tuæ, Gen. 27: 29. Volo, te Dominum, sed magis am-
bio patrem. Volo ante te incurventur filii
matris tuæ, per eam quam debent obedi-
entiam, honorem, timorem. At cupio magis,
ut subdantur per filialem affectum, obser-
vantiam, amorem. Nomen Prælati, nomen
est imperii & honoris. Nomen Abbatis, no-
men est suavitatis & amoris. Utrumque
junge, ut suadente Apostolo Petro, *non tam
sis Dominans in Cleris, quàm factus ex animo,
formæ gregis*, 2 Pet. 5: 3. Memor sis Domini
pronuntiantis: *Reges gentium dominantur
eorum; qui autem major vestrum est, fiat sicut
minor*. Luc. 22: 25.

Hæc si observes, à lingua malignantium,
& à verbo aspero securior eris. Et qui tibi
maledixerit, erit maledictus; qui benedixe-
rit, benedictus. Tunc quoque de prænobili
Clero tuo, & alumniis, tuæ curæ commissis,
pöterit illud dici: *quàm pulchra tabernacula
tua, & tentoria tua! Ut valles nemorosæ, ut
horti, juxta fluvios irrigui, ut tabernacula,
quæ fixit Dominus, quasi cedri propè aquas*,
Num. 24: 5.

MONILE III.

Imponitur vertici tuo, corona de lapide pretioso.

Illa ornat, sed onerat: nisi onus benedictio tollat.

Prævenias ex imo oratione: prævenieris ex alto benedictione.

Ex Psal. 20.

VOTUM SACRUM.

Benedictio illius, qui apparuit in rubo, sit super verticem tuum,

Quia Nazaræus es tu inter fratres:

Egressus es lapis, regressus Pastor Israël.

Deut. 33: 16. & 49: 24.

PARÆNESIS EXPLICANS MONILE.

Non omne quod rutilat, aurum est, nec quicquid aureum, aut speciosum, mox ambiendum. An non aurea reperiuntur vincula, aurei compedes, aurei laquei præfocantes? Absolon aureis suis capillis, & coruscante cæsarie ad funestam arborem suspensus lugetur. Vitta aurea

aurea caput nimium stringens, vertici ornamēto est, sed & tormento: Galea auro splendescens, duci quandoque ob pondus onerosa fit, & tædiosa. Diadema Regium ex gemmis contextum non desinit torquere gestantem: adeò ut Rex quidam ingemiscens pronuntiavit: *O splendens corona, quas sub rutilantibus gemmis spinas tegis! Has quicumque nosset homo, haud te dignaretur tollere de humo.* Nempe honorum fasces, gestantium humeris sunt fasces, sub quibus gemere coguntur. Dignitatum rosæ, non sine aculeo sunt pungente.

Visum quandoque, in hujus rei symbolum & emblema, pedum Episcopale depictum, quasi prostratum humi, & in pulvere neglectum, cum hac inscriptione: *Qui non novit me, tollat me.* Hoc igitur nec te lateat, Cidarim & Tiaram, monilibus licet promicantem, grave pondus Prælati advolvere, hoc te experientia plenius poterit erudire. Subtiliter & verè Urbanus VII. dum Pontificali veste indueretur, cum vocis, & cordis singultu, dixisse fertur: *Quis credat tam subtili indumento tantum ponderis involvi?* Verumenimverò, onus Prælati non parum sublevat benedictio Dei. Illa vires subministrat, ad portandum cum solatio, quod vix attingi poterat gravi sine tædio.

Hoc igitur Monile te admonet, divinam è Cælo

è Cœlo opem fixis oculis suspicere, divi-
namque benedictionem ferventibus votis
implorare, & dicere, *Levavi oculos meos in
montes, unde veniet auxilium mihi.* Monet
quoque onus, quod tuis incumbit humeris,
ponderare in maturitate, in Sanctuarii siclo
& pondere: ut cum agnoveris illud, & præ-
veneris Dominum intimâ oratione, præve-
nias ab illo supernâ benedictione. Tunc
verò & illud, è Psalmis poteris ore & cor-
de sonoro decantare: *Benedictus Deus, qui
non amovit orationem meam: et misericordi-
am suam à me.* Pl. 65: 20.

PARÆNESIS EXPLICANS VOTUM.

CHristus in flammivomo crucis rubo,
inter rubentes spinas, manus proten-
dere cernitur. Sciscitatis rationem? paucis
edisseram. Quemadmodum olim Dominus
Moyfi è rubo ardente, benedictionem est
elargitus, legatum tùm eum inaugurans:
sic & modò ex mystico crucis rubo, be-
nedictionem expansis manibus impartitur
Nazaræis: hoc est, Sacerdotibus & Præla-
tis, legatione pro ipso fungentibus. An non
hi meritò dicuntur Nazaræi inter fratres,
quandoquidem speciali ritu segregati sunt,
consecrati, coronati? Ergò benedictio su-
per verticem eorum. A quo verò nisi à Na-
zaræorum Principe, & summo Sacerdote?

Quis

Quis ille nisi Dominus Jesus Christus.

Quicumque ipſius expoſcit benedictionem, in rubum oculos mentis convertat. Inſpiciat frequenter, pietatis oculo, Sacerdotii ipſius, ac Nazareatus inſignia. Cordi illa imprimere, operibusque eadem in ſeipſo, quoad fieri poteſt, conetur exprimere. Intueatur ſacraſiſſimam ipſius Tiaram, & infuſas, è ſpinis & rubeto contextas. Intueatur ſanguineas guttas, quaſi gemmas in vertice rutilantes. Perſpiciat manus, & digitos tranſverſis radiantes clavis, quaſi pretioſis annulis. Contempletur ejus pedum Paſtorale & Pontificale, aſperum illum crucis baculum; cui innititur ingrediens ſancta ſanctorum. Attendat denique ſacrificium & holocauſtum, quod in odorem ſuavitatis offert, cruoris purpureâ veſte, quaſi podere Sacerdotali, adornatus.

Hæc ſunt ſummi Sacerdotis, ſummique Paſtoris, & Episcopii Pontificalia, & Episcopalia inſignia. Hæc ſacroſancta ejus ſtemmata, in quibus gloriatur; in quibus & optat ut Nazaræi omnes ac Religioſi, omnesque Sacerdotes, Abbates, Pontifices glorientur. Ab illis omnis derivatur benedictio, quam ipſi ſuo exoptare poſſunt in regimine. Hunc ergo Pontificem tuum, è Rubo flammante, manus protendentem, ut tuo illas imponat vertici, oculis fidei contem-

MONILE IV.

*Humilitas in honore , honor est
ipsius honoris.*

*Humilitas sine honore , ipsa sibi
sufficit ad honorem.*

*Noli extolli ; illud time : elevans
allisti me. Ex Psal. 101.*

VOTUM SACRUM.

*Provideat Dominus spirituum,
Ut dignè sis super hanc multitudinem :
Possisque ante eos exire , educere , introdu-
cere. Num. 17: 16.*

PARÆNESIS EXPLICANS MONILE.

N Eutiquam tibi abblandiatur eminens
celsitudo. Humiliare potius debet
ejus pedissequa sollicitudo. Ab al-
tiori gradu ruina periculosior ; grave ju-
diciū his , qui præsunt. Audi S. Cypria-
num , Fœnore quodam , quantò amplior fuerit
forma dignitatum & honorum , tantò major
exigitur usura pœnarum. An non & id ipsum
insinuat Rex & Propheta ? *exaltatus autem ,
humiliatus sum , & conturbatus.* Confor-
miter

miter his sapiens, in suo Ecclesiastico, te, Prælatosque omnes commonefacit, disertis istis verbis: *Rectorem te posuerunt? noli extolli. Esto in illis quasi unus ex ipsis, curam illorum habe, & sic considera; & omni curâ explicitâ recumbe, ut lateris propter illos, & ornamentum gratiæ accipias coronam, & dignationem consequaris corrogationis.* Aurea sanè sententia, inscribi digna prælatorum aulæ, vel conclavi, magis autem penitiori mentis eorum sacrario.

Sed & plenius de his, te erudire potest magnus Gregorius, magni patris Benedicti sectator eximius, ordinis ejus alumnus. Ille in opere suo Pastoralis Prælatos instruit, quomodo in gradu sublimi se gerere debeant, ut ordinem suum illibatum tueantur. Ac in illis sollicitè requirit humilitatem; talem sed humilitatem, quæ sit sine dispendio auctoritatis & disciplinæ. Audi ejus monitum propriis verbis expressum, quod tuo recondas pectori: *humana mens plerumque extollitur, etiam cum nullâ potestate fulcitur, quantò magis in altum se erigit, quando ei potestas se adjungit? Hanc tamen potestatem rectè dispensat, qui noverit, & sumere ex illa quod adjuvat, & expugnare quod tentat: æqualem se cæteris cum illa cernere, & tamen peccantibus Zelo se ultionis anteferre.* Summus itaque locus bene regitur, cum is qui præest, vitis potius quàm fratribus dominatur.

Quid

Quid elegantius, efficaciusque dici potest, ad commendationem humilitatis, simulque ad custodiam auctoritatis & disciplinæ? Dispendiosa est enim humilitas, & inanis, quæ ordinem pervertit, vel perverti finit disciplinam. Tumida quoque est auctoritas, & cœlo terræque odiosa, quæ humilitati non est conjuncta. Inflatio est, non magnitudo.

Audi iterum de utraque eundem S. Gregorium sic differentem: *Solertius intuendum est, ne dum immoderatus custoditur virtus humilitatis, solvantur iura regiminis; Quod dum prælatus quisque plus se quam decet dejicit, subditorum vitam distringere sub disciplinæ vinculo non possit. Teneant ergo rectores exterius, quod pro aliorum utilitate suscipiunt, servant interius, quod de sua æstimatione pertimescunt. Sed tamen quibusdam signis decenter erumpentibus eos apud se esse humiles etiam subjecti deprehendant; quatenus Quod in auctoritate eorum quod formident videant Quod in humilitate quod imitentur agnoscant.*

En fœdus auctoritatis & humilitatis, planè admirabile, plenè amabile, quod Prælatis omnibus cordi esse decet, ut humilitas quâ intus apud se deprimuntur, sit honor ipsius honoris, quo foris afficiuntur, & extolluntur.

PARÆNESIS EXPLICANS VOTUM.

DEus Spiritus est, & sacris in litteris, *Dominus Deus spirituum, Pater spirituum, ponderator spirituum*, est nomen ejus. Utique omnium corda & spiritus creat, ingenerat, ponderat. Is qui cuncta suo temperat arbitrio, spiritum ac multiformem gratiam afflat unicuique, secundum cujusque vocationem, ac secundum varia ad quæ destinat munia. Hoc ergò sacro voto obsecratum volumus, Dominum Deum spirituum universæ carnis, Patremque ac ponderatorem spirituum universi orbis, ut cum te ad regendum destinarit, providere dignetur, & communicare huic sublimi muneri, spiritum congruum, & efficacem, Spiritum utique benedictum benedicti Patris, tibi adoptamus; ut eodem Spiritu impulsus, illiusque exemplo præanimatus, ante gregem tuum egredi valeas & ingredi, educere & introducere. Pastor gregem suum modò præit, modò sequitur, ut dirigat, ut pascat.

Quòd si per abrupta Pastor graditur, facile contingit, quòd ad præcipitium grex sequatur. Tu Pastor es electi gregis, cave abrupta, cave præcipitia. Ut verò perfectè Pastoralis fungaris munere, opus est sibilo, opus est & virgâ. Sibilo, ut oves errantes re-
vocen-

vocentur. Virgâ, ut dirigantur, & delinquentes feriantur. Et quidem duplex tibi virga convenit, ut possis dicere cum Propheta: *Assumpsi mihi duas virgas, unam vocavi decorem, alteram vocavi funiculum, & pavi gregem.* Quid binæ illæ virgæ? duplex regimen designant; diversæ subditorum conditioni pernecessarium. Unum & suave, speciosum & decorum; quando regi possunt amore, clementiâ, suavitate. Alterum est severum, minax, pænisque permixtum, quando duri sunt, cervicosi, elati. Hi cùm constringi magis debeant quam duci; virga quâ reguntur: *funis, & funiculus* nuncupatur.

Docebit te morum, & humorum conditio, quando virgâ *decoris* utendum fuerit. Spiritus prudentiæ suggeret, quando virga, *funiculus* nuncupata, sit exserenda, sed & regula Canonica & Ecclesiastica de eis te erudire est nata. Interim quicquid circa oves peragis; sive vocando, sive revocando; sive ducendo, sive reducendo; sibilo, sive virgâ utendo; hunc semper scopum spectâ, ut ad æternitatis virentia pascua, eas ducere valeas & introducere.

Tunc tibi erit merces à Domino, oves & Pastores recensente, quando erit unum ovile, & unus Pastor: quando qui deducit velut ovem Joseph, manifestabitur coram Ephraim, Benjamin, & Manasse (hoc est,

coram variis ordinibus electorum) limpida divinitatis suæ visione.

Hæc erit remuneratio Pastorum , Principem Pastorum clarò intuitu cernere. Hæc erit remuneratio ovium , Agnum cælestem jugiter sequi , deducentem ad vitæ fontes aquarum. Tu verò , dum in Ecclesia Dei & pascis & pasceris , dic cum fiducia , & gratitudine : *Dominus regit me , nihil mihi deerit : in loco pascuæ ibi me collocavit*, Psal. 22: 1.

MONILE V.

*Procul à luce , tenebræ & caligo :
Procul ab igne , fumus & fuligo.
Ardete , & lucete.*

VOTUM SACRUM.

*Sic luceat lux vestra coram hominibus :
Ut videant opera vestra bona ,
Et glorificent Patrem qui in Cælis est.* Ibid.
5. & 16.

PARÆNESIS EXPLICANS MONILE.

• **C**hristus Dominus de se pronuntiat ?
Ego sum lux mundi, Joan. 8: 12. & c.
1:9. Id verò non solum quamdiu fuit in mun-

mundo. Sed & perpetuò verum est, quamdiu stat mundus. *Illuminat enim omnem hominem venientem in hunc mundum*; illuminat omnem hominem egredientem ex hoc mundo. Quicumque oculos aperit, hanc lucem agnoscit. Et licet militantis Ecclesiæ Horisontem, præsentia corporali reliquerit, supremum cæli verticem conscendens: Radios tamen fulgurientes & coruscantes hætenus misit, & in finem usque sæculi promisit. Hi variis in orbis partibus serie ordinatâ dispertiti, lucem quoquovèrsum diffundunt.

Quinam hi radii? Ecclesiæ sunt Prælati, quorum fulgida vita, & fulguriens auctoritas, tenebrosis frigidisque mentibus lucem & calorem valet impertiri. Facem ipsi deviantibus, in caliginosa umbra præferunt, ut pedem, erroneumque gressum in viam veritatis & æternitatis revocent. In his radiis evidenter æterni solis splendor, vigorque agnoscitur; quando errorum fugant tenebras, & vitiorum eliminant catervas, quasi noctuas, aut vespertiliones lucis osores, qui ad ejus præsentiam antris se remergunt. Prælatorum munus esse arguere opera tenebrarum, & determinare Tenebriones, à filiis lucis, quis inficiari potest?

Ergò, ô Prælati, meritò vobis inclamatur: *Vos estis Lux mundi.* Vestrum est, ab Horisonte, in quo constituti estis, omnem

caliginem, auctoritatis, ac vitæ piæ corusco jubare, propulsare. Ergo agite, puram fundite lucem pietatis, ac sapientiæ. Hanc à solis æterni perennante splendore, veluti totius luminis fonte, potestis, cum volueritis, in vos derivare. Vos ejus estis radii igniti, & scintillantes. A vobis igitur diffiliant scintillæ illius ignis, de quo dixit: *Ignem veni mittere in terram, & quid volo, nisi ut ardeat?* Luc. 12: 49. Terrena & frigida corda, calore cælesti succendite, algidæ, aridæque telluris viscera, vestro penetrare fervore, ut frugem ampliorem valeat producere.

Vos estis stellæ illæ, de quibus Propheta: *Stellæ dederunt lumen in custodiis suis, & vocatæ dixerunt, adsumus. Et cum jucunditate luxerunt illi, qui fecit illas*, Baruch. 3: 14. Quid illæ custodiæ stellarum, nisi Ecclesiæ & prælaturæ, in quibus positi estis, & à Deo vocati, ut lucem fundatis; Ergo ejus, qui vos vocavit, & ibi constituit, voto respondentes, lucete illi, cum jucunditate. Tandem verò è custodia hac inferioris horisontis, vos transferet, & cælis sublimioribus figet, ut fulgere possitis, in perpetuas æternitates.

PARÆNESIS EXPLICANS VOTUM.

Sic luceat lux vestra, ô Prælati, ut fumo, aut nebuloso vapore non sit permixta.
Quis-

Quisquis fastu honoris, vel scientiæ, se turgidum ostentat, aliquam fuliginem affricat propinquanti: aut velut titio fumigans, non lucem, sed obscuritatem parit, non discutit tenebras, sed excutit lachrymas intuenti. Vos verò non sic, quos elegit Dominus, & evexit latentes sub modio, ac in sublimi Ecclesiæ candelabro constituit, ut luceatis omnibus, qui in domo sunt. Imò vult etiam ut luceatis his, qui extra domum sunt, extra Ecclesiam Dei, jacentes in tenebris & umbrâ mortis; ut scilicet in domum veniant, & dirigant pedes suos, in viam lucis, de regione umbræ mortis.

Ardete igitur & lucete; Alioqui veniens veniet is, qui ambulat in medio candelabrorum aureorum; de cujus ore gladius, & *romphæa bis acuta procedit.* Apoc. 1: 16. Eccles. 21: 4. Veniet autem, & movebit candelabrum vestrum, ac in perpetuum lucernam vestram extinguet. Imò verò gladio peracuto, oris sui succidet, flammis ultricibus æternum devovendos: ideò enim describuntur. *Pedes ejus sicut in camino ardenti,* Apoc. 1: 15. ad reprobos ibidem proculcandos.

Ardete igitur, & lucete; sed lux vestra sic luceat, ut in gloriam Patris cælestis radii ejus jugiter tendant. Absit, ut propriam lucem, aut gloriam ambiatis, vel adimetis. Vanitatis ventus, aut popularis

aura venenosum afflatum tegit , veritatis lucem perimit , vel inanem reddit. Hunc afflatum præcavete. Lux vestra Deum glorificet , & in subditorum profectum redundet. Illis præesse , non est , sine sollicitudine : illis prodesse , non est sine remuneratione.

Videant illi , in vobis dignitatis auctoritatem , videant , & operis sublimitatem. Audiant verba vestra , sed prævia simul intueantur exempla. Concipiant à luce vestra lucem , à zelo ardentem fervorem. Verbis sacris Ecclesiæ concludo , & postremum hoc , cum ipsa , Monile & votum , hoc est Monitum Sacrum , repræsentō , & pectori vestro appendo. *Os , lingua , mens , sensus , vigor , confessionem personent : flammeſcat igne Charitas , accendat ardor proximos , Amen.*

HYMNUS SYNESII, EPISCOPI CYRENES.

Memento, Christe,
Fili Dei,
Alte regnantis,
Servi tui,
Qui miserâ forte est peccator;
Qui

Qui scripsit hæc.
Et mihi præbe,
Expiationem scelerum
Cordi infitorum,
Quæ mihi sunt innata,
Animo fordido.
Da verò, ut aspiciam,
Servator Jesu,
Divinum splendorem,
Tuum, ad quem quum apparuero;
Canam Carmina,
Animarum medico,
Medico corporum
Patri simul excelsò;
Spirituique Sancto.

O R A T I O .

V E N E R A B. B E D Æ ,

Presbyteri, ad Christum.

TE deprecor bone Jesu, ut qui propitius donasti, verba tuæ sapientiæ, vel scientiæ, dulciter haurire: dones etiam benignus, aliquando ad te,

H h 6

omnis

omnis sapientiæ fontem, pervenire, &
apparere semper ante faciem tuam, qui
vivis & regnas Deus per omnia sæcula sæ-
culorum, Amen.

Concludens, verbis venerab. Bedæ, sup-
pliciter precor omnes, ad quos, hæc pauca
scripta pervenire poterint, legentes, sive
audientes, ut pro meis infirmitatibus, men-
tis & corporis, apud supernam sæpius in-
tervenire meminerint, & hanc mihi suæ
remunerat[i]onis vicem rependant, ut
apud omnes, fructum piæ eorum
intercessionis, inveni-
am. Vale &
frucere.

F I N I S.



INDEX

INDEX GENERALIS
Quæstionum & Capitum, quæ
in hoc Tractatu continentur

QUÆSTIO I.

De Hierarchia generatim,

Præfatio.

pag. I

CAPUT I.

- D**E origine vocis Hierarchia, & usu, apud
D. Dionys. 3
II. Alia Dionys. loca expenduntur. 8
III. Eodem sensu, post Dion. ceteri SS.
PP. nomen Hierarchia usurparunt. 11
IV. Altorum PP. Sententia, hac de re. 16
V. Ceteri Scriptores Ecclesiast. expenduntur. 19
VI. Testimonia S. Gregor. & Acacii, Archi-Epi-
scopi Constantinop. 23
VII. Eadem mens, medii ævi Scriptorum, qui
Theologia Schol. parentes dici possunt. 25
VIII. Argum. Guilielmi, & aliorum, conti-
nuatio. 29
IX. De usu ejusd. vocis apud S. Thomam. 33
X. De eadem voce, apud S. Bonavent. 38
XI. Duo difficilia loca ex S. Bonavent. 40
XII. Solvitur difficultas ex locis S. Bonav. 45
XIII. Alii celebriores Theologi Scholastici profe-
runtur. 50
XIV. Itemque Facultatis Theologicæ Parisiens.
& Conc. Provinc. Senon. ac Syn. Diæc.
Carnot. decreta ante Conc. Trident. 55
XV. De explicatione Hierarchia, per Conc.
Trident. 60
Hh 7 XVI. De

XVI. De ejusdem nominis acceptione, apud recentiores Societ. Jesu Scriptores. 65

QUÆSTIO II.

De Hierarchiæ Ecclesiasticæ, propriè dictæ, natura. 70

Cap. I. Definitio Ecclesiasticæ Hierarchiæ traditur, & explicatur. 70

II. Quædam observationes, circa istam definitionem. 78

QUÆSTIO III.

Quòd omnis Hierarchia habeat subditos. 84

Cap. I. Probatur ista veritas, variis rationibus, ex præcedentibus. 84

II. Probatur à consensu Theologorum, & PP. circa quæst. An detur aliqua Hierarchia divina. 85

III. Idem probatur, ex notione Hierarchiæ, tam latè, quàm strictè sumptæ, quòd sit ordo, vel ordinatio inferioris, & superioris. 93

IV. Aliorum PP. testimoniis hac de re. 97

V. Continuatio præcedentis Capituli. 102

VI. Hierarchiæ Ecclesiasticæ ordo necessarius, in superiorum & inferiorum collocatione, exemplo Hierarchiæ cælestis. 105

VII. Nonnullæ objectiones proponuntur, & explicantur fusiùs. 109

VIII. Judicium PP. de Sententia Gersonis. 111

IX. Quibus auctoritatibus contraria Sententia, nititur. 115

X. Quenam harum Sententiar. probabilior. 119

XI. Confirmatur amplius hæc Doctrina. 122

XII. Enucleatur magis responsio, ad objectiones cap. VII. præced. 127

XIII. Probatur ultimò, Hierarchiæ Ecclesiasticæ ordo, in superiorum & inferiorum collocatione, exemplo Hierarchiæ legalis. 131

QUÆ-

QUÆSTIO IV.

De necessitate ordinationis, ad Ecclesiasticam Hierarchiam. 133

- Cap. I. *Utrum ordo sacer, seu consecratio personæ, per Sacramentum ordinis, ad Ecclesiasticam Hierarchiam requiratur.* 133
- II. *Nemo perfectè in Hierarchia esse potest, qui non Sacramento ordinis actu, de facto sit insignitus.* 135
- III. *Confirmatur præcedens assertio, aliis rationibus.* 141
- IV. *Ne quidem imperfectè quisquam in Hierarchia esse potest, cui non Sacramentum ordinis debitum sit, cui non, servatâ Ecclesiæ lege, atq; institutione sui officii, ilicò sit conferendum.* 145
- V. *Imperfectus ei, in Hierarchia locus est, cui expedita Ordinis potestas relinquatur, cum jurisdictione scilicet saltè voluntaria, etsi per accidens desiit fortè necessaria, eaque ordinaria jurisdictio.* 148
- VI. *Ignat. malè, auctor Hierarchiæ Ordinis à jurisdictione divulsæ, profertur, qui contrarium doceat.* 149
- VII. *Conclusio præc. Cap.* 154
- VIII. *Dionys. quoque ordinem cum jurisdictione conjunxisse in explicanda Hierarchia.* 157
- IX. *De Ign. mente iterum disputatur, & recentiorum periculosa expositio, refellitur.* 160
- X. *Ign. Epistola ad Heron. Diac. adversus Neotericos.* 164
- XI. *Utrum electi Pontifices, non ordinati, imperfectè sint in Hierarchia collocandi.* 167
- XII. *Continuatio præced. Cap.* 172

QUÆ-

QUÆSTIO V.

- De divisione Hierarchiæ, ratione Ordinis,
in Episcopos, Presbyteros, & Minist. 174
- Cap. I. *Episcopalem, Presbyteralem & Diaconalem, veros ordines Hierarchicos esse.* 174
- II. *Idem confirmatur testimoniis PP. seqq. sæculorum.* 182
- III. *Prosecutio præced. Cap.* 187
- IV. *Proferuntur PP. v. sæculi.* 191
- V. *Speciatim Diaconatum, Ordinem Hierarchicum esse, ostenditur variis argumentis.* 193
- §. I. *Diaconos, quibusdam plebibus, olim præfatos.* 193
- §. II. *Diaconos, virginibus sacris, & monialibus, olim præpositos.* 195
- §. III. *Diaconos immundorum præcipuam curam habuisse.* 196
- VI. *Quædam officia publica, non nisi præsentè Presbytero, vel Diacono celebrata. Varia officia publica explicantur.* 198
- VII. *Diaconis olim, Ecclesiasticæ disciplinæ cura permissa.* 203

QUÆSTIO VI.

- Solos ordines Episcoporum, Presbyterorum, Diaconorum, non cæterorum inferiorum, Hierarchicos esse. 207
- Cap. I. *Auctoritatibus PP. id suadetur.* 207
- II. *Rationibus id ipsum demonstratur.* 213
- III. *Potissima ratio petita, à potestate, in Corpus Christi verum, Episcopis, Presbyteris, & Diaconis, præ cæteris Clericis, communi.* 217
- §. I. *Ratio I.* 220
- §. II. *Ratio II.* 220
- §. III. *Ratio III.* 222
- §. IV. *Ratio IV.* 225
- IV. Con-

IV. *Conclusio arg. Cap. præc.* 226

V. *Ecclesiæ ritus, praxin & disciplinam, ternarium Hierarchicorum ordinum numerum probare, amplius improbare? 1. ex Episcopis, Presbyteris, & Diaconis, S. R. E. Cardinalibus.* 229

VI. *Episcopi, Presbyteri, & Diaconi, in Conciliis.* 230

VII. *Propria quæq; Diaconer. officia, in Conciliis.* 234

VIII. *Episcopi, Presbyteri, & Diaconi benedicunt.* 238

IX. *Inter Episcopos Archiepiscopi, inter Presbyteros Archipresbyteri, inter Diaconos Archidiacon.* 243

X. *In Episcoporum, Presbyterorum, & Diaconorum ordine, Clerici consistebant.* 246

XI. *Plures alia, Episcoporum, Presbyterorum, & Diaconorum prærogativa.* 250

XII. *Objectiones in contrarium proponuntur, & dissolvuntur.* 252

XIII. *Prosecutio solutionis argumentor. præc. c.* 258

XIV. *Solutio argum. iv. & v.* 264

QUÆSTIO VII.

Functiones Hierarchicæ, Ecclesiasticorum Ordinum, præponendæ, Cœlestis Hierarchiæ, seu Angelicæ Custodiæ, officiis. 267

Cap. I. *Præcellentiam Sacerdotii, supra officium Angelicæ Custodiæ, non officere Angelor. dignitati.* 267

II. *Insignes prærogativæ Sacerdotii, in productione Corporis, & sanguinis Christi; ac sanctificatione hominum.* 271

III. *Enucleatur magis, modus sanctificandi homines, per Sacerdotium.* 276

IV. *Prærogativa Sacerdotii amplius inquiritur, ex conformitate Sacerdotii, cum divino Principatu.* 282

V. *De dignitate paternitatis Sacerdot. quædã.* 286

VI. *Alia rationes similitudinis Sacerdotii, cum divino Principatu.* 291.

VII. *Ea-*

- VII. *Eadem prærogativa Sacerdotii, ex conformitate, cum Sacerdotio Christi, & cum ipso Christo, colligitur.* 294
- VIII. *Confirmantur hæc omnia, ex communi Theologorum Doctrina, de Characterè ordinationis.* 298
- IX. *Comparatio specialis Sacerdotii, cum officio Angelicæ Custodiæ.* 302
- X. *Prærogativa ultima Sacerdotii, quod homines divinos faciat.* 305
- XI. *Nil Sacerdotio sublimius cogitari potest.* 309
- XII. *Fundamentum, quo adversarii, adversus ea, quæ pro prærogativa Sacerdotii diximus, excipiunt, dissolvitur.* 311
- XIII. *Fundamentum hoc inductivum est erroris, & contrarium ex eo sequitur.* 316
- XIV. *Rationum allegatarum firmitas, adversus Modernorum conatus, asseritur.* 318
- XV. *Utrum Episcopi obeant omnia munia Angelicæ Custodiæ; illuminentur immediatè à Deo, & Angelos aliquando illuminaverint.* 324
- XVI. *Angeli illuminantur nonnunquam à Pastoribus Ecclesiæ.* 330
- XVII. 1. *Error, quem ad probandam prærogativam Angelorum, supra Sacerdotes, invehunt; putà, ex nullo capite, Hierarchicis actionibus, hominem Angelo equiparari posse.* 336
- XVIII. *Prosecutio præc. cap.* 340
- XIX. *Alter error, in depressionem virtutis sacramentalis, ipsorumque Exorcistarum; itemque prædicationis verbi Dei, facta hominibus; & precum à Sacerdotibus fusarum.* 342
- XX. *Alii errores, injuriam gratiæ Christi, prædicationi verbi Dei, & Ministerio legis Evangelicæ, inferentes.* 347
- XXI. *Affe-*

XXI. *Afferuntur nonnullæ auctoritates, sed gratis.* 352

QUÆSTIO VIII.

Errores quorundam, Pastorum & Sacerdotum, tribuentium Angelis; itemque Ecclesiam invisibilem, sine Sacerdotibus, & Pastoribus visibilibus, fingentium, refelluntur. 357

Cap. I. *Angelos non esse veros Pastores ostenditur.* 357

II. *Officium Custodiæ Angelicæ, officio Pastoralis inferius esse.* 360

III. *Aliæ rationes, ob quas, officium Angelicæ Custodiæ, officio Pastoralis inferius est.* 365

IV. *IV. & V. Ratio dignitatis officii Past.* 368

V. *Idem confirmatur testimoniis PP.* 371

VI. *Non docet S. Ambrosius, contrarium.* 377

VII. *Conjecturæ, quibus Pastoris officium, Angelis tribuere conantur. Confirmatur nostra assertio.* 379

VIII. *Angeli non dicuntur simpliciter Pastores, eo quod unam alteramve Pastoris functionem obeant.* 384

IX. *Responsio ad conjecturas, cap. VII.* 384

X. *Alius error, Ecclesiam invisibilem, Pastores tantum invisibiles habentem, refellitur.* 389

XI. *Tertius error, Angelos Sacerdotes esse.* 394

QUÆSTIO IX.

De præeminencia ordinis Hierarchici, supra Monachatum, & populū. Auctoritas & Reverentia ordini Hierarchico debita 398

Cap. I. *Error est, nullam auctoritatem, vel præeminentiam supra populum, Hierarchiam Ordini*

*Ordinis continere : de auctoritate , quæ con-
venit , vi ordinis , tam Hierarchici , quàm non
Hierarchici.* 399

*I I. Veneratio & Auctoritas , Clericis debita , à
P.P. asseritur.* 404

*I I I. Auctoritas & veneratio , Clericis debita
vel ipso ordinationis , & Clericatus titulo.* 410

*I V. Venerationis , & auctoritatis Clericorum ,
aliquæ rationes proferuntur.* 412

*V. Expressiora pro præsentis veritate , P.P. testi-
monia.* 416

*V I. Clerici non tantùm Patres , sed & præcep-
tores , & Magistri populi.* 420

*V I I. Ex ritu Consecrationis clerici , & Mona-
chi huic auctoritas deesse , illi convenire , de-
monstratur.* 425

V I I I. Testimonium S. Francisci profertur. 429

QUÆSTIO X.

*An loco pœnæ , ad Sacerdotium , sicut ad
Monachatum , detrudi aliquis , æquo ju-
re possit.* 431

*Cap. I. Crininosos ad Monachatum promoveri
posse , non Sacerdotium.* 431

*I I. Non requirit status Monachalis , peccata præ-
cedentia , necessariò.* 436

I I I. Quo sensu Monachi , pœnitentes dicuntur. 439

*I V. Quàm sit diversa ratio pœnitentia , in Cleri-
cis , & Monachis.* 442

*V. Sacerdotium , vel Clericatum , pœna loco , im-
poni non potuisse , sicut Monachatum.* 446

*V I. Respondetur exemplis , quibus ad Sacerdo-
tium , aliquos adductos , liquet.* 449

*V I I. Enucleatur magis V I I. Can. Conc. To-
let. V I I I.* 453

V I I I. Es-

- VIII. *Ecclesiam in Monasterium, aliquos in-
tos detrussisse.* 460
- IX. *Etiā in perpetuum, ad Monasteria, detru-
si nonnulli.* 463
- X. *Quosdam ex iis, qui in Monasterium, pæniten-
tiæ causâ detrudebantur, ad Mona-
chatus professionem, fuisse compulso-
s.* 467
- XI. *Duobus aliis argum. confirmatur doctri-
na præc. cap.* 474
- XII. *Nonnullæ objectiones in contrarium refe-
runtur, ac refelluntur.* 479
- XIII. *Alius error perniciosior refertur.* 483
- XIV. *Alia subtilitates contra prædicta.* 487
- XV. *Quadam ex Canonibus adducta examinan-
tur.* 492
- XVI. *An Regulares, donatum cælitus Conciliis
Spiritus, purius, nobiliusque custo-
diant.* 497

QUÆSTIO XI.

De nunquam nimia multitudine Sacerdo-
tum. 501

Cap. I. *Ridicula est sententia, de nunquam nimia
multitudine Sacerdotum.* 501

I. *Æquum esse, ut Clericorum determinatus
sit numerus.* 502

III. *Pauci in primitiva Ecclesia Clerici, sed
gnavi & in officio assidui.* 505

IV. *Statutum, ab Ecclesia, ut determinatus
esset numerus Clericorum.* 506

V. *Monachorum, in Presbyteros & Clericos
promovendorum, ab Ecclesia, potest nume-
rus determinari.* 509

VI. *Duocorollaria inferuntur.* 513

QUÆ

QUÆSTIO XII.

De Sacro, & Ecclesiastico principatu, ejusq;
discrimine, à prophano, & politico. 518

Cap. I. *Unicus inter Angelos, Sacer principatus; duplex inter homines sacer & prophanus.* 518

II. *Varia discrimina, inter Sacrum & politicum principatum.* 521

III. *Alii antiqui PP. pro discrimine, inter sacrum, & politicum principatum.* 529

IV. *Prosecutio ejusd. Argum. de diversitate, inter sacrum & politicum principatum.* 534

V. *Quisnam illorum principatum sit universalior, occasione testimonii Cassiodori.* 538

VI. *Varii proferuntur auctores, pro differentiis, inter utrumque principatum, Ecclesiasticum, & civilem.* 543

VII. *Oppositiones quædam, inter utrumque principatum, explicantur, occasione testimonii Gregor. II.* 546

VIII. *Diversus, utriusque principatus, modus procedendi, occasione testimonii, ejusd. Greg. II. ubi de pœnis à sacro, & politico magistratu infligendis.* 549

IX. *Quid Ecclesia agendum, cum iis, qui Ecclesiam non audiunt.* 557

X. *Excellentia sacri principatus, quo ad modum procedendi.* 562

XI. *Varia alia testimonia, quibus uterque principatus discernitur.* 564

XII. *Iudicium S. R. E. Cardinal. ac summor. Pontif. de utriusq. principatus distinctione.* 570

QUÆSTIO XIII.

In Ecclesia esse aliquam jurisdictionem
coactivam. 576

Cap.

- Cap. I. *Damnantur, qui jurisdictionem coactivam, Ecclesiæ adimunt.* 576
- II. *Fundamenta erroris contrarii refelluntur.* 580
- III. *Ecclesiastica potestas, quomodo corporales pœnas, prodigiosa virtute inferat.* 582
- IV. *Quomodo vim interdum habeat Ecclesia, & pœnas corporales inferat, ratione domesticæ potestatis.* 587
- V. *Confirmatur præcedens elucidatio.* 593
- VI. *Cogit Ecclesia, ad corporales pœnas subeundas, excommunicationis metu.* 596
- VII. *Prædicta PP. testimonia, non omnem penitus coactionem, parendique necessitatem, remouent ab Ecclesiastico Magistratu.* 602
- VIII. *Commendatur potestas Ecclesiæ, ab aequitate ac suavitate.* 607
- IX. *Excommunicandi potestas est coercitiva, seu coactiva.* 610
- X. *Eadem est mens antiquorum PP. de excommunicandi potestate coactiva.* 618
- XI. *Respondetur effugiis adversariorum.* 621
- XII. *Quomodo excommunicatio est pœna spiritalis, & in ea sit vis & coactio.* 625
- XIII. *Quædam alia corollaria, ex præcedentibus deducuntur.* 630
- XIV. *Aliæ prærogativæ, Ecclesiasticæ potestatis.* 633

QUÆSTIO XIV.

De prærogativa honoris, modò ordini, modò jurisdictioni attributa. 637

Cap. I. *Nulla olim jurisdictionem, nisi in sui vel inferioris ordinis viros, convenisse.* 637

II. *Diaconorum in Presbyteros insurgentium ambitus*

ambitus, & antiquus, & antiquis temporibus notus. 644

III. *Cetera, ambitionis Diaconorum, testimonia.* 694

IV. *Auctorisqq. V. & N. T. testimonium; ubi varia circa Reverentiam, singulis ordinibus exhibitam, observantur.* 653

V. *Decretum Quinisextæ Syn. quo Diaconorum ambitio reprimitur.* 661

VI. *Decretum Alexii Comeni, & Balsamonis testimonium, & variae observationes, circa morem graecorum.* 663

VII. *De prerogativa S. R. E. Cardinalium.* 666

QUÆSTIO XV.

Quomodo Diaconorum auctoritas & jurisdictio, progressu temporis, ad Clericos, superiorum ordinum extensa fuerit 668

Cap. I. *Diaconos olim in solos Diaconos, & inferiores ministris, potestatem habuisse, iisque praelatos factos* 669

II. *Ordo praelationis Archidiaconorum, supra Presbyteros, in Gallia.* 671

III. *Magis praequantia argumenta, in favorem Archidiaconorum.* 676

IV. *Occurritur duobus scrupulis, in hac materia.* 680

V. *Origo praeeminentia Archidiaconorum supra Presbyteros, in Hispania.* 685

VI. *Isidori Hispal. sententia videtur dubia, propter quid?* 689

VII. *Vera sententia Isid. de praeeminentia Archidiaconorum, suo tempore.* 693

VIII. *Origo praeeminentia Archidiaconorum in Italia, & Oriente.* 697

IX. *De prerogativa Archidiaconorum, ex more Ecclesiae Orientalis.* 700


X. *Posteriorum saeculorum testimonia, pro Archidiaconorum praeeminentia.* 701

Tiara sacra, monilib⁹ quinque adornata. 706

Hymnus Synesii, Episcopi Cyrenes.

Oratio venerab. Bedae Presbyteri ad Christum conclusio.

F I N I S.









5-6-2.

